經

錢基博著

學

通

志


經

錢基博著

學

通

志



本書據中華書局1936年版影印

序

記載疏舛於魏晉以下不詳後淸儒江藩鄭堂紹述其意作經師經義目錄則又膠於 余量讀唐陸元朗德明經典釋文敍經學源流文少波瀾未足以發人意又恨其

門戶特以清儒承漢學而擯唐宋於不論不議學術流變之迹因以不明爱輯舊聞餐 爲是志無錫錢基博。

序

自

# ·經學通志目錄

小	春	=	詩	尙	周	總
學志	春秋志第六	禮志	詩志第四:	書志	易志第一	總志第
第七	第六	第五·	<u>四</u> :	第三		:
•	•		•	•		
	•	•				
		•		•		:
		•				
			•	•		•
		•				
		•	•	•		
小學志第七		三禮志第五		佝書志第二····································		
_		•	•	•		•
	•			四	九	
<u>:</u>			•			
	七〇	_	六二	四	-h	

# 經學通志

### 總志第一

所謂 名『經徑也如徑路無所不通可常用也』此經之義也然古無經之名伏羲神農黃 常所秉以治天下也邦國官府謂之禮灋常所以守爲灋式也常者其上下通名」釋 曰: 雅語奧義其歸一揆入卦之說謂之八索求其義也九州之志謂之九邱邱聚也言九 州 帝之書謂之三墳言大道也少皞顓頊高辛唐虞之書謂之五典言常道也虞夏商周, 尙 所宜土地所生風氣所宜皆聚此書也周官外史「掌三皇五帝之書」大都不離 「雷震屯君子以經綸。」周禮天官太宰「以經邦國」注「經灋也王謂之禮經, 說文「經織也」玉篇「經緯以成繪布也」借以爲經綸天下之意易屯卦象 墳典者近是楚左史倚相能讀三墳五典八索九邱學士大夫所誦習者此耳時 有經名禮記王制「樂正崇四術立四教順先王詩書禮樂以造士」亦不聞稱

吾志· 在 春秋, 《行在孝經 四經 」也經之名見於國語 莊子天運篇 載 \_ 孔 挾經秉抱」而孝經鉤命決 f 調老聃 曰: 吾治詩書易禮 公引孔子曰:

**秋** 六經以 爲文』六經之名始此然此之所謂六經卽後世之九經蓋禮經統三 而樂經亡佚也此經 称 之見於傳與緯書子書之在 西漢 以前者也自漢 ₹禮,

後儒者相原 者相傳俱言 五經 而 陳後 主 時吳中陸元 朗德明撰經典釋文則於五經之外增

德明 六 孝經 生 略 附論 於陳季循沿六代 論語老子莊子爾雅五書其繫孝經論語爾雅於五經之後或用漢書藝文 語孝經 小學之例 之餘波 丽 廁 也其書凡三十卷於諸經皆摘 以老班 和者蓋老莊? 自 |魏晉以 來爲 字 爲音惟孝經 士大夫所推尙 活

蒙始學老子以衆本多乖各摘全句所採漢魏六朝音切凡二百三十餘家义兼載 儒 訓詁證各本之異同後儒得以考見古義其有藉於德明此書者非細 也惟! 德 明

所增而] 論語及老莊爾雅於五 經之後則增五經 而 十矣唐時 國子學則所云 立之學官則省 信

徳
明

之

[論 語爾雅。至宋儒取禮記中之大學中庸及進孟子以配論語謂之四書而十三經之 九經者三禮三傳分而習之故爲 九 也其 刻 石 九經并孝經

或曰 傳 E者詩則V 傳或曰箋或曰解或曰學今通謂之注訓曰詁因立所謂十四經者先時當併大戴記於十三經末 毛萇 傳, 原文笺周禮: 或日學, (儀 禮 禮 }記 则 鄭玄注公羊問 称 章日 干四 則何休學孟子則 句經 日賢 | 四 | 注者 | 經 見著 也。 張述 其先儒 華日 博傳 釋經 趙 岐 志記 注; 世 所

漢 人。易則王弼生 注繫辭韓康伯注書則梅賾僞孔安國傳皆晉人論語則何晏集

之注, (左氏則: 率 成 杜預 於唐以前 注; 爾雅則 而 唐以 郭璞 後 文注·穀梁則\* 諸 儒辨釋之書 范寧集解皆晉人孝經則 則 名曰 正 義今通謂之 唐明皇御注 疏。 而 創 爲 蓋 IE.

者蓋自唐之孔穎達始據舊唐書儒學傳了 達 於諸儒譔定五 一經義疏, 凡一百七十卷名曰 五經 īĒ 義 <u>\_\_</u> 高宗紀 永徽 20 年

太宗以儒學多門章句繁雜詔國子祭酒

達作 月 者則 壬子朔頒孔 又非新唐書穎達本傳云「 穎達五 經正 義 於天 个; 初潁達與顔師 是也然世儒 古 或 司 執 馬才章 此 以 五 王恭王剡 經 正義爲 受詔譔 孔

五 經 義 訓 **餘篇**; 其 中不 能 無謬冗博士馬嘉運駁正 其 失詔 更令裁定未就。 永徽二

射 張 行 中 書 成侍中高季輔就加增損書始布下一然則五經正義者蓋孔穎達與諸儒之 門下 與國子 一館博 士宏 文館 學士考正 之於是尙 書 左僕射 于志寧右 僕

所 特 洪渓而非一人之書彰彰明甚而高宗紀大書特書曰「孔穎達五經正義」者意 以孔穎達爲奉詔譔定五經正義之總纂官而遂以尸其名邪然孔穎達奉詔譔

定正義者但有易書詩禮記春秋左氏傳五經永徽中賈公彦始譔周禮儀禮義疏宋

未修皇令直閣崔頤正孫奭崔偓佺等重加讎校以備刊刻」而穀梁用唐楊士勛疏 「判國子監上言『五經書既已板行惟三傳二禮孝經論語爾雅七經疏

疏也然宋以前疏本與注別行而宋以後疏遂與注合刊說經者遂以注疏爲不刊之公羊用唐徐彦疏孝經論語爾雅用宋邢昺疏孟子用宋孫奭疏此世所稱十三經注 典至新喩劉敞原父撰七經小傳三卷始異注疏之說七經者尚書毛詩周禮儀禮禮

記公羊傳論語也宋人說經毅然自異於先儒實自敞始然敞學有根柢故能自爲

山以說經者但知誦習成言不能求之詳博因取諸經注疏之文據事別類而錄之謂 家之言後來不能學其深究古義而學其排擊古義則甚矣其低也獨臨卭 之九經要義凡二百六十三卷殘存周易要義十卷尚書要義十七卷儀禮要義五 魏丁翁鶴

卷春秋左傳要義三十一卷雖主於採掇注疏然別裁精審汰其冗文旣使後人不病

能貫通 清儒 於蕪雜而分臚綱目咸有條貫可謂剪除枝蔓獨擷英華是亦讀注疏者之津梁矣至 華亭吳浩養齋取諸經箋注標其疑義撰十三經義疑十二卷雖於注疏之學未 融會而研究考證具有根柢亦注疏家之諍臣也元和惠棟定字乃究探諸 經

古義於注疏未出之前撰成周易尙書毛詩周禮儀禮禮記左傳公羊穀梁論語十經 古義二十二卷日補注刊板 別後 行 蒐採舊文互相參證日古義者蓋漢儒專門訓詁更名

流 字輾轉多岐又六體孳生形聲漸備毫釐辨別後世乃詳古人字數無多多相假借沿 學得以考見於今者也古者漆書竹簡傳寫爲艱師弟相傳多由口授往往同音 承襲途開通假一門談經者不考其源每以近代之形聲究古書之義旨穿鑿附會, 異

糾結 書證佐分明斯稱精核庶幾哉! 不通故讀古人之書則當先通古人之字庶明其文句而義理可以漸求棟作是 可謂抗心希古直抉經奧者若乃勘文字之異同校刻

本之是 非則有儀徵阮元芸臺之撰十三經注疏校勘記二百四十三卷焉雖然六藝

經傳以千萬 .數要其歸則不外五帝之道六藝之教禮記經解「孔子曰「 溫柔敦厚

詩教也疏遠 通知遠書教也廣博易良樂教也潔淨精微易教也恭儉莊敬禮教也屬辭

樂所 故 以 比 以 何? 則 達意易以道化春秋以道義。 長 ·事, 經十四經之名而究其要歸不外五常之道六藝之教而已 經常也有五常之道故曰五經樂仁書義禮禮, IE. 附於經羣書頗關經則附於經何謂傳書之有大小 篇是也何謂羣書易之有淮南道訓古五子十八篇羣書之關易者也書之有周書 傳也春秋之有公羊穀梁 ·言義之用: 於行。 春 以 也。五 %格 |秋 生故, 也班固仍之造 十四經之喋 書記 一者蓋 也。 長於和春秋辨是非故長 先王 也禮以明體明者 五 」史記自序曰「易著天地陰陽四時 常之道相須 |之事故長於政詩| 喋 世! 藝文志序六藝為 不 左氏鄒 知六經六藝之名由來久遠, 而備。 」漢書藝文志日『六藝之文樂以和神仁 著見故無訓也書以廣聽知之術也春秋以斷事信 而易爲之原」白虎通 灰氏 於治 紀 亦傳也 山 九種: 人。 ĴΪ 是故 谿 有 谷 易智詩信也。 經, 何謂記大小 禽獸 {禮 有 以 僔, 夏侯 節 草 五行故長於變禮經紀 有記, 不可以肊 1人樂以發5 木 歐陽傳也詩之有齊魯 五經論曰「經 戴氏所記 有羣 則亦何居乎後世 牝牡雌雄故 然則 增益善夫! 書, 4和書以 經 傳 雖有 則 人 百 三 之表 所 長 附 道 以有 劉 {九 於 也詩 事詩 向之 -Ħ.

一篇 温官 書之關書者也春秋 司馬法羣書之頗 鰯 ∤禮 之有楚漢春秋太史公書羣 者 也皆以附於所傳所記 書之關 或 所關 香秋者也 之經, 丽 不 別著 則

焉,禮之有 爲經 侯各 止 抚 藝爲 記 一十有三如其 }氏 於禮等之於明 周馆 一 經, 爲 畢 ·稱經夫 乎後世九經十三經 九種也有苦 經。 奢· 之戶 可乎? 述然 晚 핊, 、夫子日: 大 可也則然 {易 如是則韓亦一 劉歆 榀 八小戴二記, 堂陰陽 有三家禮分慶戴春秋 也 始立 小 心馬斟酌盡善馬序六藝矣七十子以來尊論語 學者, 後世名一家說經之言甚衆經當以百數或以記爲經大小 劉向 吾……·行 Mi 所以明 Ë. 古時篇篇單行然則禮經外當有 經, 後 班 四經之喋喋 齊亦一 # 占 在孝經。 六經之訓詁 稱 灼 為 知 之有鄒 經魯亦一 經是爲述 其 出於晚 山故 也或以傳爲經 夾漢, 不 而 劉歆 經, 周 論語述夫子之言行孝經 敢以夷於記夷於羣書也然 世總 毛亦 先秦之士之掇 非為 公羊為 古 |今文為| 經 述 百三十一經或 孔氏善夫劉氏之 可平? 經穀梁爲 歐陽 經當 而譚孝經 拾舊 章 干 所 有 經 則 以 羣 叉 再 孙 爲; 兩 戴 傳 書 附 何

總 志第 於是以三種爲經之貳而廁諸六藝之後然序類有九而稱藝爲六雖爲經之貳而

自制一經哉經之爲言常也古之所謂經乃三代盛時典章法度常所秉守見於政敎 蓋經之書關多而經之旨爛荒。存秋三家之傳周官二戴之記後之讀者尚籍以闚見 仍抑之不與經齊顧後世又以論語孝經爲經假使論語孝經可名經則向早名之且 謹撰次衆說條其原委而析衷以劉子政氏序六藝之義等總志第一 經以經之武爲經猶以爲未快意或以諸子爲經孟子是也或以經解爲經爾雅是也。 行事之實而非聖人有意作爲文字以傳後世也後世以傳爲經以記爲經以羣書爲 日序八經不日序六藝矣於戲仲尼好古述而不作曷嘗奐然大號使弟子筆其言以 儒家之著述爾雅則經傳之釋詞。倘以此爲六經之羽翼則可而逕廁於六經則荒矣! 三代政教行事得失之迹而無大悖於經綸天下之意廁之於經猶可言也至孟子爲

## 周易志第二

作序卦以序六十四卦相次之義泰之受以否也剝之窮以復也損而不已必給升而 周 明 辭文言序卦之屬十篇故曰『易道深矣人更三聖世歷三古』所謂易者何也曰易以諸侯順命而行道天人之占可得而效於是重易六爻作上下篇孔子爲之彖象繫 反終之義而周易以純乾爲首乾健也爲天天行不息周天三百六十五度四分度之 是始作八卦以通神明之德以類萬物之情至於殷周之際,紂在上位逆天暴物文王 之爲言變也易窮則變變則通通則久是以自天祐之吉无不利謂之『易』 一一日一夜行一周復其故處日東行一度乾道之變天行之復也孔子以詩書禮樂 也周而 已必因如此之類原始要終問不根極於復所以深明易道之周也。 世道窮變通久之必然而繫以『周 **宓戲** 復始也孔子緊泰之九三日。无平不陂无往不復。彖復見天地之心而 氏仰觀象於天俯觀法於地觀鳥獸之文與地之宜近取諸身遠取諸物於 』者所以明世變剝復循環之有常周之爲言 周 有原始 一者所以

易志第二

周

弟 子,蓋 点。 而 受易 者 獨 稱 商 瞿。 酒 濯, 魯人字 字子 木少孔子二十 九歲。 孔子 傳

於瞿。 敎 瞿 傳魯人 、橋庇 子庸。 子庸 傳 江 東 · 弓子 弓 傳 藤 周 醜 子家子 家 傳

子傳 乘, f 及 乘傳 **决秦栋原子易** 齊 田 彻 -J. 寫 從 裝。 ト 之 書 獨 人史 矫記 子-仲 庸尼 不 艇弟 禁; 停 班子|臂 受 燕傳 各 人日 不 周瞿 絕 子傅 也。 家楚 |漢 賢人 興 豎鼾 田 傳臂 何 淳子 以 于弘 人弘 齊 光傅 田 徙 子江 杜 乘東 武 陵, 羽人

號 杜 田 生; 傳東武王问 子中洛陽 周  $\pm$ 孫, 宽, 齊服 生, 著易 傳; 而 王 氏周氏 服 氏 各

田 篇; 何 受易時寬為 獨 丁氏 八篇, 見漢書藝文志。 項生從者讀 恩精敏时, 要言易者本之 財過 )項生; 丁寬。 逐事 何。學 字子 成, 襄梁人 何謝 寬; 也 東歸; 初梁 項生 何 謂 從

易已 \_ 東 矣! 寬 主 維陽復 從 周 王 孫 受古 口義號周氏语 傳景帝 時爲 梁 孝 Ě 將

距 吳楚號 孫 Ŧ 採 得 丁將 施 讎 軍作易說三萬言訓故 孟喜梁 邱 賀 由 是 易 舉大義而已 有 施孟 梁邱之學焉。 不言陰陽災 施 雌字 變也寬 長卿, 傳 沛 人 同 郡 也; 與 碭 田

喜梁邱 河 賀 内 張 從 田 禹 王 子文等從讎 孫 受易 謙 設常 間。 讎 自 稱 匿 學 廢, 不 肯 不 見; 教 授。 賀 固 梁 請, 不 町 得 賀 貴 乃 仕 授臨等於是賀 事 多; 迺 遺 f 臨 薦 分 將

髮事師數十 年賀不能及詔拜博士與五經諸儒雜論问異於石渠閣讎傳張禹 周易志第二

以爲 同, 腔 諸 咸 傳 翁, 琅  ${\mathcal F}$ 曲 顺 令充宗 邪 白 是 充宗 [ii]現 禹 儒 Jî. 光 源以签: 子 受易焉 官 魯伯; 梁邱 子 邪 祕 鹿 於 石 君孟。 諸 丞 友受易攝齊登堂抗 1 1 嶽 有易傳 稫, 與 渠。 有 夫 嶽! 禹 朱雲折 光宗 琅邪 房出 也; 宣 諸 有 傳 4 應近 官大 易家論充宗 孫鄧衡之學孟喜字長卿 陵 從 准陽彭宣 王吉通五經 官 爲 大 其 篇, 司 齊 中大夫京房受易房者 孫 幸累官少府傳子; 少府貴幸為 郡 見漢 空皆至大官其知名者也由 張 角! 子 仲 太守賀更事 方真定 然不 首 書藝文志蓋易 佩, 乘貴辨口諸儒莫能 一川 臨武 m 沛戴崇子平; 梁邱 詳 請, 太 音 誰 ¥; 臨。 守 家? 動 易。 田 東海蘭陵人也從田王孫受易傳易家候 自 沛鄧彭祖 之乃使其子 左 臨又學於施讎, Ŧ 阿可 宣 孫宣帝 淄川 魯伯 右; 家之初 正 鹿 帝 旣 充宗 論 與抗皆稱疾不 楊 時, 傳 是施 子 善 立 時間 太山 難, 何 夏, 略說 梁 即 博 叔 王莽 京房為 士者; 邱 家有 中 ൬ 元 毛 弟子 Ħ. 賀說; 駿 專行京房法以耶 莫 張彭之學如 篇, 講 鹿 上 太 如 君; 敢獨魯朱雲游 史公 學 易; 疏從臨受易臨 見漢書藝文志 世 少 元 大 故 何者 帝 明 路, 天齊 好之欲 諸 求 琅 司 梁邱 儒 其 嘗 邪 馬 衡咸 爲 門人, 受易 談 邴 نخر 考 奉 及 賀, 丹 充 其 :/i 從 張 得 京 東武 字 曼 使, 博

陽 背 梁 陽氣亡箕子箕子者, 此 於是傳者以 房字君明東郡頓邱人 云受孟 不 光 上 延壽之所 不肯皆日 人 圓 災 之學孟喜之學雖與施梁讎不同然要爲田王孫之所自 耀 加 與 焦延 之! 變書, 和同。 喜 田 …喜喜為? 何; 改 一壽赣 楊叔 師法遂不用 門 本也延壽著易林十六卷大抵即易家候陰陽災變之書以一 言 梁邱 為喜 然考孟喜學田王孫言師田生且死傳喜之易家候陰陽災 一師 延壽云 名之後實外莫能持其說 非 T 誕祚也乂蜀人趙賓 將 世! 賀 田生且死時枕喜膝獨傳喜 疏 萬物方荄茲 軍 <u>\_\_</u> 八喜·喜·傳同 Y 八世累官 至成帝 「當從」 通證 誼 略同。 明 乏曰: 時光祿 [孟喜門易] 魏郡太守蓋匪傳梁邱賀易之齊郡太守京房治易, 郡白 也。」賓持論巧慧易家不能難皆曰「 惟 京氏為 <del>--</del>1 大 光 好小數書後爲易飾易文以爲了 田 喜因不 夫 生絕於 <u>\_\_\_</u> 少子沛翟牧子兄皆爲 異; 劉 會喜死房以爲延壽易卽孟氏學翟 向校經傳諸子考易說以爲 」蓋十二月卦之學所 肯仞以此不 施讎 焦延壽獨得隱士之說, 唐中時 喜歸 古 迅; 獨京房之易爲別 見信博士 博士由是孟喜 東海, 自 箕子明夷, 托之孟 缺衆· 非古法也; 安得 **桂**寅六 一出焉諸 變書或者 諸家易 人 此 十四 牧 薦 事! 有 儒 卽 訊 京 事 翟 以

{易 大蛇 常路使季畏懼 』寧漢 足,降二 焦京而房之推衍災祥更精於延壽卒以誅死其著書見於漢書藝文志隋書經籍 分六十四卦更直 者, 之相 成 **}種** 之流 今易林引左氏語甚多又往往用漢書中事至云『劉季發怒命滅子嬰』又曰「 載 物之表 總 八卦卦凡八變六十有四於其往來升降之際以消息盈虛於天地之元而酬酢乎 有孟氏京房十一篇災異孟氏京房六十六篇京氏段嘉十二篇章句十卷占候十 七十三卷唐以後 四千九十六卦各繫以繇詞文句古奧與左氏傳載「鳳邉于飛和鳴鏘鏘 者謂之應世之所謂位而陰陽之肆者謂之飛陰陽肇乎所配坎 爲 横 術數自 入宿; 炳然在目也大抵辨三易連 庚庚予爲天王 其進 百用 延壽始也顧! 多佚不傳今傳者曰京氏積算易傳三卷其書兆乾坤之二觀象 退以幾而 事以風雨寒溫爲候各有占驗房傳延壽之學故言術數者稱 人所宜言者耶疑是東漢以後人撰而托之延壽者然漢 」之語絕相類惟**延壽**生當昭宣之世**其時** 延壽常日『得我道以亡身者京生也』其 爲 卦之主者謂之世奇 |五行正四時謹二十四氣, 耦 相 與, 쌿 悉七十二 一以超 左氏未 說長於災變, 離坤 空而 艮震 候, 而 免罪 而 立學 位五

上乾 終 不 脫 手甲 者謂 之子 平 上於 本, 之建 乃以 乃初 生坤 伏飛 終; 一建 某某 終始 世里 往宫 之之 之午 極 位位 初於 以 初 平 1/2 等。 世之五 1113 、佐神 不 山 明者謂: 位, 窮 乃 以 分而 紀 之伏; 日 爲 者, 間 起  $\mathcal{F}_{\mathbf{L}}$ 平 2 世之位其五 積 # 含。 而 周 外性 乎 備中 111 四而 之上乃 卦以 參严 者四 訓爲 為 游

魂 甲 则 之 之說皆出京房房傳東 1 1 一世元 氣。 其數虛則二 一世之初, 乃爲 --有 歸 海 魂 八, 殷嘉, Z 盈 则三 亚; III 河 東姚平, 歸 +-有 魂 污。 2 益 河南 Ð, 後 乃 生 釆 世 弘, 後 術 皆 桂 士 之初。 爲 所 郎博士由是易有 用 其建, 世 應 剛 飛 伏 日 則 游 節 魂歸 京 氣, 氏 魂 柔 納

學京 直 氏 相 易於元帝之世, 也費 直字長翁, 東萊 與施孟梁邱 人; 易長於卦 氏 並列 學官; 筮, 亡章 而 民 句; 徒 間 以象象繁辭 有 費高二 一家之說費高艺 十篇 文言 者費 解

文 然劉向 间 自是費直 以 中 古 易號古文 文易經校 之學, 施孟 與施孟 梁邱易, 梁邱之稱今文者不 或 脫 去 无 谷 二 写悔亡; 同。周相, 沛 唯費 也; 治 直

與費 旬 篇, 直 見漢 间 時, き 卅 藝文 說 陰陽 志旣, 災異 炎漢 日 祚 言 絶, 出 於 世 祖 將 重 光, 軍; 其 好 學亦 愛經 無 術, 章 儒 彦 旬 雲從; 而 施孟 於是立 梁 邱 五 氏 經 各 博 有

有 施孟梁邱京氏各以家法教授而京氏之易極盛焉蓋東漢之世治施氏易有

僅 憴 陳留 Ji 劉昆 餘 人; 世 父 蒯 子 而 興累官光祿 已! 字桓公; 勳授皇太子及諸王 一个帝 時, 受 施 氏 易 小侯五 於沛 人 戴 十餘 賓 龍; 人; (傳子軼, 王 莽 世, 字 教 君 文,

能 辨 呂 卿 ##: 羌, 與 共 學, 願 博 門徒 推 土 梁 博士以避二人。 恭, 亦 盛; 山 陽 然知名之士 太守呂羌 一世祖 **不許然由**: 無開焉! 似修 梁邱 此 易; 治 是 重 世 施 祖 氏易 之尚書令韓歆疏請 徴 拜議 者 也 治 **郭蹇博士自** 梁邱易者日出 爲費氏易 以 代 學不 郡 左 如|梁 范 氏 升

春 廢 立, 京氏 秋立 各有 疑 道 湯 博 所 不 士詔范 博 執 可 今費氏 士、 由! 疑事 博士 下 不 執 學, 可前 無 4 可 克能 行! 有 平 本 費氏 據 說; 師, 正 遂 而 京氏 易以 多 與歆等駁難, 2反異先 此 旣 立費 不得 帝 氏怨望京費 立 前 日 博士! 中乃 世 有 市
升 罷。 疑 於 升退 此故 **已行**, 弟子知名 而奏曰 次復高 京氏 雖 者日京兆楊 立, 氏 近 輒 並 有 復 司 復 請 見 求

時 太 累 則 -fth 少 官 興 傅; 左 乏初 顯宗 Цı 郞 將又 數 mi 訪 有 君之外終東漢治梁邱易者無聞治孟氏易者日 經 潁 狮。 ]] 旣 張興 而 聲稱 君 Ŀ 者 著聞, 習 梁邱 第子自: 易 這至者, 以 教 授; 行祖 著錄 興舉 且萬 人為 南陽洼丹子 孝 廉, 梁邱 爲 郞, 累

政

子行,

少從

升

一受梁邱

易善說經書。

京師

爲

之

新

日:

\_\_\_

靗

經

鏗

鏗楊

子行;

<u>\_\_\_</u>

敎

授

數

周易志第二

臚, 作 傳 孟 易通論七篇 汝南袁安 氏 易王莽時常避世敎授專志不仕徒衆數百人世祖興爲博. 邵公者祖父良習孟氏易安傳其學肅宗之世累拜司徒以直節 世號注君通安定梁竦叔敬, 中山觟陽鴻孟孫亦以孟 ·士稍遷爲· 氏易教授有 大鴻

於朝 末有 廣漢任安定祖者少遊太學受孟氏易兼通數經又從同郡楊厚學圖識究極 子京字仲譽敬字叔平傳習父業而京作難記三十萬言其尤知名者也東漢之

著聞

|州 術。 南 牧 時 戴憑次仲沛獻王輔顯宗之世日 劉馬 人稱 表薦之然王 日『居今行古任定祖。 · 全阻塞記。 命竟不至焉治京氏易者最多大抵世祖之世 』初任州郡後大尉再辟除博士公車徵皆不 南陽魏滿叔牙恭宗之世日 琢郡崔瑗子玉廣漢 就

郎 折 顗 像 伯 雅 式 光汝 北海 南許峻 郎宗仲綏南陽樊英季齊李昌子然豫章唐檀子產順帝之世日 季山 桓帝之世日弘農劉寬文饒濟陰孫期仲彧皆有名 m 樊英 北海

前 世 世稱樊氏學唐檀著書二十八篇名爲唐子許較 所著易林行於世或者即焦氏易林之所蠶也世之言占候者取治京氏焉。 **卜占多有顯驗時人方之** 

夷考光武之世劉昆之傳施氏范升之明梁邱徒丹之通孟氏或藏之武京氏皆譚昌

爲其傳融授北海鄭玄康成玄初從弟五元先受京氏易又從融受費氏易故其學出 之宗時主所重獨蒼梧陳元長孫海南鄭衆仲師皆傳費氏易其後扶風馬融季長亦 者屈來者信』『原始反終通乎晝夜之道』蓋言消息者之所本也同時類川荀爽 辰; 郡王 興京氏易後來居上而施孟梁邱三家先後衰費氏興而京氏亦衰其大較然也. 易注十一卷見隋書經籍志蓋漢之言易學者楊何最先立博士然最早衰至東漢之 慈明以碩儒作易傳據爻象承應陰陽變化之義以十篇之文解說經意亦宗費氏而 形 蓋 之末荆州牧山陽劉表景升亦有周易章句五卷見隋書經籍志 言消息自是費氏與而京氏遂衰馬融有周易注一卷鄭玄有周易注九卷荀爽有周 、於兩 阿用 」則費氏易之所無也然玄又喜言十二消息卦則其說出於孔門繫辭傳云『往 暢 注易著聞魏朝凡易注六卷易略例一卷自鄭玄傳費直之學始析易傳以附經 家然要其大旨費義居多而謂了乾坤六爻上繫二十八宿依氣而應謂之爻 率以凱有風貌乃以妻凱凱生業即劉表外孫也有子曰弼字輔嗣幼而察惠, 叔茂暢之孫日粲者遭漢亂與族兄凱俱避地荆州劉表欲以女妻粲而 而表之學實受於同 東漢

倘 至 所 丽 割 以 叉更定之玄 |附經者| 卷崇文總目 不 本 過彖傳象傳; 稱存者爲文言說卦序卦雜卦 大約如今之乾卦; 今本乾坤二 其坤性 一卦各附 以下, |文言 四篇; 又弼所割裂然鄭玄易注 知全經皆弼 則玄本尚以文言自 所 更定非 爲 至 鄭玄 北 一傳

變本 尙 易 排 竟 擊 頗 也弼之 漢 加 入 載 八於老莊者弼 儒, 厲。 其 自標 遺 45 心 證, 說易稱出費直直易 大抵究爻位 而論易本卜筮之書故末派寖流 新 學; 亦 然 闡 不 能 明義 之上下辨卦德之剛柔已 無 理使易 過; 瑕 今不 瑜 可見然荀爽易卽費氏學唐 不 不 掩, 雑 斯爲 於術 數者彌 於證緯王弼 定評魏朝之 ]與弼注: 實 不 略近; 明易者 爲 乘其極敝 無 李鼎 但弼全廢象數又 功; Ŧ 而 **祚周易** 而攻 弼 加 倘 而 外司 虚 之遂能 集解 無, 使

東海 肅善馬融之學而 E 朗 景興嘗著易傳 不好鄭玄時 子肅子 雅因撰定成周易注 樂 安孫炎叔然則 受學鄭玄之門人 一卷隋書經籍志所著錄是也 稱 東 州 大 儒, 作

周 ]例 庸 作 聖證論 以譏 短玄炎 駁 而 釋焉。 然馬 鄭 不同要其言易本之 費氏獨

國以 志輅 明 本疇 傳之 注京 桂 引房 風 輅見 角 别表 傳松 |或者 南陽何晏平叔請共論易曰『 本之京氏 ···管 昔辰 雖每 君論陰陽此世無雙 善觀 卜輅 及售 律惟 之有 林

賢不同釋經一也今彖象不與經文連而注連之何也」俊對日『鄭玄合彖象於經, 也! 欲學者尋省易了也。」帝曰『若鄭玄合之於義誠便則孔子曷爲不合以了學者乎』 傳其業然僑士也蜀士之易學蓋始於廣漢任安之習孟氏弟子知名者日梓潼杜微 俊對日『孔子恐與文王相亂此聖人以不合為謙』帝日『鄭玄何獨不謙耶』俊不對。 書經籍志然翻之先世本治孟氏易而績之注則採諸京氏易傳者爲多績年輩差晚 者曰會稽虞翻仲翔曰吳郡陸績公紀翻有周易注九卷績有周易注十五卷具見隋 蓋魏博士之治易善鄭氏學者也蜀博士之治易善鄭氏學者日南陽許慈仁篤子勛 也。 國輔日蜀郡杜瓊伯瑜然瓊好圖讖而 。之卦則以一 颺玄茂在晏許言『君見謂善易而語不及易何也』將專聲答曰「善易者不論易 翻舊齒名盛說易專取旁通與之卦旁通者乾與坤坎與離艮與兌震與巽交相變 魏之易博士日淳于俊魏帝高貴郷公常就問易日「孔子作彖象鄭玄作注聖 兩爻交易而得一卦消息六爻發揮旁通與魯國 不言易巴西譙周允南傳其學焉吳士之善易 孔融文舉書示以所著

周易志第二

{易

注融答書曰『自商瞿以來好錯多矣去聖彌遠衆說時辭異聞延陵之理樂令都

·之治易, 乃 知 東 南 之美者非徒會稽之竹箭。 然翻 自稱 傳孟 氏易, 而 説一 七日

氏 來 易摘商蓋費氏之支流 復, 易 則 』不言六日七分則亦不盡用孟氏易也。 同 陸績。 **叉汝** 南程 餘裔矣大抵三國之世, 乗徳樞 者, 速事 ,鄭玄吳大帝聞其名儒徵拜太子太傅; 廣 北 陵 士傳馬鄭而習費易 張紘子綱名輩 不後虞翻, 而 吳蜀 則守孟 而治 著周

笑! 京 馬融 而 薄馬鄭虞翻 所解復不及諝若乃鄭玄雖各立 學之殊風焉然南北 初立易注奏稱 學亦 潁川 何常之有費易大 荷 注未得其門。 諝 號 爲 知易臣得其注, 一荷諝荷爽 興而孟京 顚倒 之別名也此 不廢梁邱 反 逆, 有 叫 可 以

氏亡於 ·寶令升 西晉孟氏京氏雖· 丽 已寶有 周 易注 有其 書; 十卷見隋書經籍 而 明京氏易者四晉惟弘農董景道文博 志孟氏之易 無聞, 而費氏 之學 東晉 文分 惟 新

脱三 國

南北

不能

施

鄭玄王 請 爲 鄭玄易置博士自 弼 兩家元帝中興江左議爲王弼易置 是易有鄭玄王弼二博士然有晉始 博士獨太常潁川 自 中 朝迄於江左莫不 荀崧景猷以爲 不 崇 可,

宗 飾 老 莊, m 明易亦造玄論風流所仰學者宗焉惟弼注者僅上下經而補繫辭說卦雜卦 加 述 虚 玄嬪 闕 里之經 典習 正始 之餘論 王 一辆生當 正始辭 才 逸辯老學實

傳鄭義。 尙 國子博士吳郡陸澄彥深與尚書令琅邪王儉仲寶書陳『王弼注易玄學所宗今若 後河朔言易者多出郭茂之門大抵南北所爲章句河洛周易則鄭玄江左則王弼, 諸儒, 東都 撰定周易正義然後專崇王注而衆說皆廢序稱 夫易理難窮雖復玄之又玄至於垂範作則便是有而敎有若論住內住外之空就能 明以傳范陽盧景裕仲孺景裕傳權會郭茂權會早入鄴都郭茂恆在門下教授其 卦注者其門人韓康伯也自是王注行而鄭學亦衰河南及青齊之間儒生多講王 師訓蓋寡奚論江左自跖拔魏之末大儒華陰徐遵 互 有 鄭不可廢」儉答了 可謂 則有荀劉馬鄭大體更相 並傳其學河北 不同獨晉揚州刺史晉陵顧悅之君叔有周易難王輔嗣義 至隋平江南汪注 矯矯南士之不羣者也然梁陳之世鄭玄仍得 學者罕能及之其江南義疏十有餘家皆辭尙虛玄義多浮誕。 易體微遠實貫羣籍豈據小王便爲該備依舊存鄭高同來 乃盛河朔然鄭義不廢既隋氏道消唐代應運詔孔頹達等 **祖述非有絕倫惟魏** 漢儒傳易者西都則有丁孟京 世王輔嗣注獨 明子判門下講鄭玄所注周易。 與王弼注並列 冠古今所以江 卷四十餘條齊 學官南齊惟 田。 原 好

魏學一為 吾觀 就 之辭尙虛玄義多浮誕而不知王注爲玄學之宗江南諸家之所自出也顧謂『 達之周易正義是也有旁通象數而採處翻者李鼎祚之周易集解是也一爲三國之 採凡子夏孟喜焦戆京房馬融荀爽鄭玄劉表何晏宋衷虞翻 凡十七卷仍用王弼本惟以序卦傳散綴六十四卦之首蓋用毛詩分冠小序之例所 म 先以輔嗣爲本』寧必爲達識乎雖然唐之易家有期詮義理而用王弼者孔穎 **廑張房王凱沖侯果蜀才翟** 一國之吳學一 開宋儒胡程之先一 元韓康伯 植清學惠張之基蓋李鼎祚周易集解 陸績干寶王肅王弼 義理 姚

信王 以 達 刊 姚 多參天象王乃全釋人事且易之爲道豈偏於天人哉」 規 輔嗣之野文補康成之逸象而不採玄爻辰之說自序謂『 朱仰之蔡景君等三十五家之說 而採虞翻尤 何妥崔燝沈驎士盧氏崔覲 多其所自爲說則 則是於鄭王皆有不足, 王鄭相 沿頗行 伏曼容 純 似翻; 孔颖

博採諸家以爲折衷也其有拾遺補闕而搜孔字所未採者則有史徵之周易口訣

鄭則

而

李史二 輔嗣 存 |義 弼注定為正義於是學易者專言名理惟李鼎祚集解 朝未遠隋書經籍志所載諸家之書猶有存者故徵得以旁蒐博引雖 大象引莊氏說謙六五引張氏說實大象引王廙說頤大象引荀爽說坎上六引虞氏 兼 滯; 引 兌大象引鄭**衆說漸大象引侯果**說多出 咸大象井大象鼎彖引何安說萃彖困大象引周宏正說升彖漸彖 於今者京房王弼孔穎達李鼎祚 凡七卷自序云 收漢學凡前爽虞翻干寶蜀才九家之說皆多互考稽不主一家其解義間異先儒 自 而唐以前解易之書子夏傳旣多屬偽撰鄭玄陸績注爲後儒輯 周氏 之野文補康成之逸象 非晉唐諸 |氏新舊唐書幷無傳其人本末不詳耳此唐代易學之要删也然自唐代 說乾大象革象引宋衷說屯象 儒 可及然於象亦闕焉 \_ 但舉宏機纂其樞要先以王注 而後來經 四家 不詳獨金華鄭剛中亨仲著周易窺餘十五 生不能盡從其學宋儒若胡瑗程子言理精 及史氏此書而 引李氏說師彖 孔穎達疏及李鼎祚集解之外蓋唐 |為宗後約孔疏 不主弼義博採諸家以 五 漸九五引陸績 耳]] 稽古者所宜珍 佚, 爲 次非完 引褚氏說; 理。然中如乾 有 文義問 說; 師六 爲 書; 以王 其實 渉拙 也! 去六 震九 Ŧi. 刊 惜

周

而

亦 往 往 有 當 於理; 雖 其 人附 和 秦檜, 公論 不 予然闡 簽 經 義, 則 自 出 新 義, 具 有 理

要 前 爲 作正 易 豕 義, 所 行於唐代古易自此不 不廢也又古易 本廿二 篇, 復存宋呂大防仲徽始考驗舊文作周易古經一 自費直鄭玄以至王弼遞有 移掇; 孔穎 達 因 弼

卷; 後 鱼 野 晁說之以道作<u>古易十二卷</u>永嘉薛季宣 士龍作古文周易 十二 一卷餘 姚

據,{易 程 十二 间 미 一卷金華: 久 作古 呂祖 周易 謙 一卷丹陵李燾仁 伯 恭作古 周易 甫 卷大致 作周易古經 互 相 八篇, 出入獨祖謙 崐 山吳仁傑 書最 斗南 晚 出 作 而

**凡分**上 椎 ·經下經象上傳象下傳象上傳象下傳繫辭上 士 篇 傳繫辭下傳文言傳說卦

雖定 |序 L傳雜計傳為 丽 注 爲 JE 義, 丽 新唐書藝文志著錄玄注 朱子嘗爲之跋後作 本義即 一十卷是唐出 用皿 謙 時 王學盛 而 不 用 荇, 王 弼焉然唐代 而 鄭 注

地 也! 至 北 宋 《尚存玄注 文言序卦說卦雜卦 四篇 卷見崇文總目 而淳熙以 後 諸 儒

罕所 鄭 康 成 稱 注 蓋 卷蒐 亡於南宋 羅 放 之初 失以 存 也慶元王應麟伯厚獨能 漢易之一 線經文異字, 於散佚之餘旁摭諸 亦皆並存其 無 經文 書, 可 存 輯 者 {周

總錄於末簡又以玄注多言互體并取左傳禮記周禮正義中論互體者入條以類附

大宗漢 然圖 以 焉; 於邵雍而造端 剮, 易原皆發明牧說至建陽蔡元定西山則以爲與孔安國劉歆所傳不 |南, 宗而 湯外別傳 其淵 可謂 獨 則是陳摶者 九爲洛書朱子從之著易學啓蒙自是以後言圖 中敍傳授本 書之學劉牧實爲別傳 成 宋儒者 卷其學盛行於仁宗時黃黎獻作略例隱訣吳祕作通神休寧程大昌泰之作 泰州胡瑗翼之開宋儒義理說易之先河范陽邵離堯夫爲宋儒象數說易之 儒言易本多主 篤 源 與邵 志遺經研心古義者矣此宋儒之整理古易則有然者雖然宋儒易學之所 者 末謂: 不在 也! 宋 於彭城劉牧長民者也牧之學出於洛陽 雍 "同而以九句 顧 儒 **図或者謂**了 此蓋宋儒易學之自名一 圖 書 象數至宋儒言易而象數之中復歧出圖 雅易受於青社李之才挺之之才師鄭州穆修伯長修師陳摶。 說易之祖 而邵雍乃其正宗雍之子曰伯溫子文者著易學辨惑 爲河圖十爲洛書則與雍異著易數鉤 陳摶以先天圖傳种放更三傳而至邵雍放以河圖 師 也然宋儒 家者甚衆然要其 之有陳摶邵雍猶漢學 |書者皆宗||朱||蔡而||牧之圖幾 种放 《名逸]放出章 書一 大別不外象數義 隱圖三卷附 合而以十 派此派蓋 之有孟 亳州 陳摶 爲河 大昌 (廢焉 京,所 理 圖

以著皇 述 傳 **{易** {特。 李 . 」 據朱 極經 溉, 更三 怎 牧得 傳 漢 而至劉牧穆修以太極 之以 上易集 著周易鉤 傳卦圖之說 隱圖周敦頤得 云爾其說! | 圖傳周敦頤| 之以著太 頗 再傳至程顥程 爲 後 人 所 極圖 疑。 訊 而 一頭厥後 雅思 通書頭 朱子亦謂『 之以 得之

子之 於周 聞之胡翼之先 敦頤 學源於周子。』然考之程子易傳無一 無 徴 也 生, 倪天隱述其師 <del>---</del>] 予聞 之胡 胡瑗之說有周 先生日 語及太極; 者, 不 易 口義 而足則是程子之學源於胡 而於觀大畜夬漸諸卦云『 十二卷其說易以 義 理為宗 暖,

理, 而 程子不信邵雍之數故 本, 於 及彖象文言章 胡 暖為 近; 其書以序卦分置諸卦之首依李鼎祚 亦 與王弼注同 邵子皇極經世以數言易而 加詳焉首 朱子周易 水本義が 圖, 末著揲法 初亦用 集解例而用王弼注 程子著易傳四卷則 王弼 本後 以 呂祖 本但 謙 黜 言; 占 數 周易 解 而 崇

易 學 啓蒙 卷日本圖書原卦畫明蓍筮考變占凡 四篇, 始折 衷理數二家之說 丽 無

爲

然大指

仍

略

同

E

弼

而

列

九

大略

兼

義

理

占

象

而

附

者嘗言「辭變象 所 廢 者 乎! 浦 魏了 占易之綱領而蘇彖爻之辭畫爻位虛之別互反飛伏之說 翁鶴 山蓋問業於朱子之門人建昌李燔敬子趙州 輔 深承比 廣 漢

應之例一 吉水 輯周易要義十卷雖主於王注孔疏而採摭謹嚴別裁精審可謂剪除支蔓獨擷英華 傳 以 事 顧 民之旨愈南轅而北轍箕子之貞鬼方之伐帝乙之歸妹孔子繫辭何嘗不明證史事! 而參引史事以證之則同李光初名易外傳宋代書肆曾與程傳並刊謂之程楊易 傳二十卷寧德王宗傳景孟童溪易傳三十卷其最著者也簡之學出金谿陸九淵子 依 宋儒 以 矣雖然宋儒易學亦有不言理不言數而但言事者上虞李光泰發讀易詳說 吉 此 心 楊萬 證 ED, 凶 經 丽 悔吝 爻象始自 道家之授丹訣自譚易者推闡: 詆之者夥以爲足以聳文士之觀瞻而不足以服窮經士之心然聖人作易本 爲 推, 有不 里誠齋易傳二十卷其最著者也光之書於卦爻之詞皆引證史事蓋 三百八十四爻可以例舉矣舍人 二家 明人事 知則義理闕焉 病! 鄭玄若全經皆證以史則光書其始也萬里之書, 此 使天下萬世, 一派也又有不言理數亦 し其 無不 大旨主於以象數求義理折衷於漢學宋學之間; 性命, 知所從違非徒使 事而談天道 句稽奇偶, 不 言事 其言愈微 而言 上智者於談 正後儒說易之病 心性者茲谿楊簡 妙而於聖 以妙悟如: 旨 本程子易 未可 人立教牖 敬 佛 仲易 以 家之 接古 引

|靜, 故 其 解 易, 惟 以人心為 **純主蓋自漢** 以 來以玄空說易始魏 王 弼; 而 以 心 性 一競易始王

玄虚 宗傳及簡宗傳之論 以 闡發義理漢學至是而始變宋儒掃除古法實以王注 有 性 本 ·無說聖人· 本無言」 之語與簡文旨相同夫弼湯祖尙 爲藍本然胡瑗程子 祖

叔者朱子再傳弟子也嘗輯周易傳義 幻 省。此 叉 派 也 然論 宋儒易學者 醇實宗傳及簡 要以程子易傳朱子易本義爲大宗臨海董 祖其玄虚 而索諸性天故似高 深 楷

書而采二子

其

義

理

而

歸

諸

人

事故似淺近而

易本楷以程7 之。造說, 附錄其下意在理數雜通惟程于傳用王弼本而朱子本義則用 子在 前, 遂 割裂朱子之書散附程傳之後而 十四卷合程子傳朱子本義爲一 朱子所定之古文仍復淆亂 呂祖謙

迨 過明之成 祖, 命 行 在 翰 林 學 士胡廣等纂周易大全即以楷書爲 底本而 则之學官? 迄

有 其 端 ħ. 也! 百年間士夫之爲學朝廷之取士胥以此焉鄉墊之士遂不復 於是程傳朱本義之大全本行而王注 孔疏 亦廢擱 矣元明 兩 知 代 有 古經則 學者言易

海 鹽姚 士粦叔祥之輯陸氏易解耳考陳應潤之書凡四卷大旨謂「義理玄妙之談

大

抵

不

脫

宋

儒窠

白;

明古義,

不

囿 風

氣者惟元天台陳

應潤

之撰周易爻義變蘊

墮於老莊先天諸圖雜以參同契爐火之說皆非易之本旨。」故其論八卦惟據說卦 周子 者定謂八卦相錯之用謂文王演易必不顕倒伏羲之文致相矛盾。」其論太極兩儀 例, 四象以天地為 法 稱 之學者自應潤始所注用王弼本惟有上下經六十四卦據春秋左氏傳某卦之某卦 撮京房易傳注李鼎祚集解諸書所引之吳陸續周易注以成陸氏易解一卷雖不及 如乾之姤日一潛龍 ൬ 一卦可變六十四卦六爻可變三百八十四爻即漢焦延壽易林之例蓋亦因古占 帝出 無極 推原其變通之意非臆說也昔宋王應鱗輯鄭玄易注爲學者所重而姚士舜抄 上極二 乎震 兩儀以四方爲 氣五行之說自是 一節爲八卦之正 **可勿用** 四象謂 』 乾之坤日 『見羣龍無首吉』 之類故名日爻變其 位而以『天地定位』一節邵雍指爲先天方位 家議論 了<br />
未分八卦不應先有<br />
揲蓍之法分陰陽太少。 不可說易。 」蓋自宋以後毅然破陳摶

**周易志第二** 

應麟搜討之勤博然在陸注久佚之餘而掇拾叢殘存什

於千

百;

於元明人易家之

來知

亦翹然獨

德矣鮮隱萬縣之深山精思易理自隆慶庚午至萬歷戊戌閱二十九年而成周易集

秀者矣若乃師心自悟闇與古會足以卓然名一家者莫如梁山

{注 十六卷其立說專取繁辞中錯綜其數以論易象而以雜卦治之錯者陰陽對錯如

有以 先天圓圖乾錯坤坎錯離八卦相錯是也線者一上一下如屯豪之類木是一卦在下 爲屯在上爲豪載之序卦是也其論錯有四正錯有四隅錯論綜有四正緣有四隅緣 剝宋學宏宣漢易別成風氣而首驅除夫難者要推餘姚蓝宗羲太冲宗爻晦木兄弟, 即漢以來互體之法特知德縱橫推闡專明斯義較先儒爲詳盡耳既清儒崛起務推 有錯卦之象有綜卦之象有爻變之象有占中之象皆由冥心力索得其端倪因而 互旁通自成一說當時推爲絕學然上下經各十八卦本之舊說而所說中爻之象亦 正綜隅有以隅綜正其論象有卦情之象有卦畫之象有大象之象有中爻之象,

[德清胡渭朏明二氏初陳搏推闡易經行爲諸圖其圖本準易而生故以卦爻反覆 求無不符合傳者務神其說遂歸其圖於伏義謂易反由圖而作又因繫辭河圖洛

書之文取大行算數作五十五點之圖以當河圖取乾**黎**度太乙行九宮法造四十五 研 以當洛書其陰陽奇偶亦一一與易相接應傳者益神其說又真以為龍馬神

龜之所負謂伏羲由此而有先天之圖實則唐以前書絕無一字之徵驗而突出於北

宋之初邵雍朱子亦但取其數之巧合而未暇究其太古以來從維授受於是宗義病 世儒視象數爲絕學今

尋門餘 無浫義; 潤之說合而論 其末派之支離糾本原之依托著易學象數論六卷自序云『 **背各據所見抵其罅隙尙未能窮溯本末** 易未經內人不應獨禁其圖轉爲道家藏匿二千年至陳搏而始出」則尤篤論也然 天古易辨後天之學辨卦變辨象數流弊大指謂『詩書禮春秋皆不可無圖獨易無 所用圖六十四卦二體六爻之畫即其圖 河 有故執之成理乃修鍊術數二家旁分易學之支流而非作易之根柢視黃氏兄弟所 一疏通知於易本無干涉而後反求程傳亦廓淸之一端。」又稱 圖 洛 論 之矣」 善辨五行九宮辨周易參问先天太極辨龍圖易數鉤隱圖辨啓蒙圖書辨先 」而病朱子添入康節 圖 書辨惑二十四卷大指謂 『四聖相傳不應文王周公孔子之外別有伏羲之易爲不傳之祕]周 引據舊文互相參證以籍依托者之口於是學者知圖 先天之學爲添一障可謂了當而宗炎著周易象辭 「陳搏之圖書乃道家養生之術」與元 也八卦之次序方位則乾坤三索出震 一一块所自來獨胡渭著易圖明辨十卷辨 **| 王輔嗣注簡當** 一書之說雖言之 陳 齊異 附

康成 力矯 玩辭六十四卦皆實象安得虚战漢儒言易孟喜以卦氣京房以適變尚爽以升降 易學掇拾緒論成易漢學八卷凡孟長卿易二卷處仲鄉易一卷京君明易二卷,手 玄荀爽宋咸干寶諸家之說融會其義自爲注而自疏之持論尤精贊者孔穎達正義 有 尤爲窮源竟委其功不可沒也然此三君子者於宋儒有推陷廓清之功而漢學之 弼 學亡幸存其略於李氏集解。」精研三十年引伸解類始得貫通其旨乃追考漢 於易謂『孔子作十翼其微言 鄭 低 太極之學又究漢儒之傳以闡 盡改俗 以爻辰虞翻以納甲其說不同, | 未極宏主吳縣惠士奇天牧撰易說六卷以爲 成成成易 EÍ 弼 餘年至是而燦然復章又自爲解釋成周易述二十三卷專宗虞翻 以來空言 書义創虛象之說而漢易亡矣易者象也聖 一卷荷慈明易 說經之弊徵引賅備, 二卷其末 大義, 明易之本例凡九十類成易例二卷漢學之絕者千 而指歸則一皆不可廢。 七十子之徒相傳至漢猶有存者。自王弼 一卷則棟發明漢易之理以辨正河圖 而失之雜其子曰棟字定字者 **一个所傳易出聲直易費本古文** 人觀象而繁辭君子觀 」然士奇博學無所成名 博通經 而參以鄭 洛 史尤 象 興而 書 鄭 m

뷇 式 馬 E 融陸績 用 享歧 說以爻辭爲周公作與鄭學異其所執者明夷六五云「箕子 山, 皆 文 王 後 事論者 不 能 奪也! 獨棟 引春秋傳 禹貢爾 雅 以 升六 證 王 四

**瓜之學以為** 明夷馬融公 於子。 用享 所 世, 而 師 說, 傳 注, 面當 别 infi 儒行居。 錄 111 <u></u>該, 瀆 **』當從古文作其子其古音** 歧 易 梁邱 一箕子 家候 君位, 山 狮 上之為 俗 循 之器也讎賀嫉喜而: 「箕子 陽 於是施讎梁邱賀皆嫉之孟喜與讎賀 儒, 孟學故馬融俗說荀爽獨知其非復用實古義。 乖於易例甚矣謬種流傳兆於西漢博士 為 同 易 不 夏后 識 物 災變去得 明夷陰陽氣無箕子箕子者萬 也。 麦茲其與亥子 七 氏 + 本坤 伽 子 罪文王; 自王 傳 世, 易之大義讀其爲箕蓋 并及賓班固 孫; 亥亦作箕劉向云『 坤 而箕子 而賀 與茲文異而 終於亥乾出於子用, 思之訓 ,明夷则; 作喜 音義同三統術云『 無 傳 此 同 物 用 方荄茲 涉彖傳 **今易箕子作荄茲** 一施讎讀其爲箕蜀人趙賓 漢趙賓之說疏 事。 事 亦用讎賀之單 討 田 晦 聞於 E 而明, 也 雖敢爲異論 孫。 而 喜未 上宣 明不 譌。五 宣賓 詞 貴 爲天位箕子臣 可息, 該 通證 帝遂以喜 **據古義以** 門皆非實錄劉 而 関 」荀爽據以 學獨 於玄 明以 闹 改其了 不 盡合 為 高。 難 爲 述 改 喜 諸

周易志第二

林傳 從 紫滋之說; 宁矣處翻云『箕子||新設五乾天位今化為坤箕子之象』||虞翻世傳孟氏易而 事 |何||楊 上下歸 惠言之論大指以爲『翻之易學自其高祖父故零陵太守光治孟氏易世傳其業至 以 不 名之。」此趙賓謂等子二字爲荄滋 世: 鄭右 可解 諸 實; ,暢茂條理途於大道後儒罕能通之自魏王弼以虛空之言解易唐立之學官而 Ħ. 云『趙賓以爲箕子明夷 然自是清 世又具見馬鄭宋荷氏書考其是否故其言易以陰陽消 叔丁將車之所傳者舍處氏注奚從也」故求其條貫明其統例釋其疑滯信其 儒之說微惟鄭荷處三家略有梗概可指說 於乾 諸儒; 也惟漢人之易孟貴諸家各有 可見孟氏易不作丟滋矣惠楝言易尊處翻何以於此獨不從虞翮乎 元川 學者以無家法少之未若武進張惠言皋文治虞翻易之爲專家絶學也 儒論易家多信<u>孟喜真傳田王孫學者其說實自棟簽之然按漢書</u>儒 儿 mi 天下治; 依物 、陰陽氣無箕子箕子者萬 之誤也然則趙寶所 **収**類貫穿比 師承勢不能合而棟之學宗 而虞义較備然則七十子之微言 附始苦瑣 見之易經 物方荄滋 碎及: 息六爻發揮旁 其 沈深 (禰虞翻) 也云受孟喜喜爲 本是「箕子 解 有未 剝, 離 通 逝, 升 根 此 不 散 降 補

為 及**虞氏略例務以探頤索**隱存一 周易虞氏義九卷表其大指爲周易虞氏消息一卷义撰虞氏易禮易事易候 家之學焉惟惠張二家咸以漢易之亡歸獄王

源 謂劉景升表表之學受於王暢王弼者劉表之外曾孫而暢之嗣 於劉 獨甘泉焦循理堂明其不然其大指以為: 前 實根本於暢兄宏字正宗亦撰易義兄弟皆以易名可知其所受者遠矣故 東漢末以易學名家者稱荷劉馬鄭。 玄孫也弼之學 盖 劉,

解經 |彌之易雖參以己見而解『箕子』爲荄茲正用趙宣解又如讀 爲甕通「 之法尚未遠於馬鄭 学 爲浮 而訓爲務躁解『 詻 儒特貌等 寫 峝 簡, 斯 故 <u>\_\_</u> 為 疏 者 廝 M) 艞 釋爲賤役之屬皆以六書通借; 视 爲 空論 耳! 彭 因作周易王 」 為 旁 借 雍

**{補** 卷可謂持平之論也考循之易本出家學嘗疑一 也何以既見於族又

{小 於同人一 :過 同辭甲庚三日之占何 拯馬壯 』 也何以既見於復 以蠱象與巽象同例 又見於明夷密雲不雨 乃徧該 說易之書旣悟 之级 何以 剂间 淵 小畜 九容之 與

實通 學易所悟得者有三一日旁通二日相錯三日時行旁通者在本卦初與四易二 於易乃以數之比 例求易之比例以易解易觸類求通成易通釋二十卷自謂 與

孔 與 本生 無 可易, 則 旁通 於他 卦, 亦 初 通 於四二 通於五三通於上先二五,

後 大 而 中 初 Ŀ 初 四三上爲當位。 不 而 下應之此變通不窮也或初 能 上下 應, 姤 應如乾四之坤而 **初則能應小** 不 - 俟二五, 畜 成 丽 不能應豫四 四先行, 初四三上 小斋復失道 三上先行, |先行爲失道易之道惟在變通| |矣變通之小音|| 能 應坎四之離上而成并豐失道 则 上下 亦 作應然能等 一之豫五姤二 變而通之 三五 一之復 先行 仍 Ŧi.

變通 {復 能應此所謂 之井二之噬嗑五豐五之渙二 時行也比例之義出 豐上不能應渙上則能應井三不能應嘅嗑三 则

叫

四

则

妄放暌之噬 膚即 、<u>噬嗑之噬膚坎三之離上成豐噬嗑上之三亦成豐故豐之日昃</u> 於相錯如暌二之五爲无妄井二之噬嗑五亦爲 削

**}離** 之日是 /豐之日· 中, **滕**嗑之口 中漸上之 歸妹三歸妹成大肚漸成蹇蹇大肚 相

故 成 **从需放贴证** 眇 能 视, 跛能履; }妹 以須之即需也歸妹四 臨二之五即履二之謙 八篇 穷通 了之漸初漸成家人歸妹成臨臨**通**遯 相 Ji 錯時行之義論: 之此 例 也 易通釋既成為 《復提其 之非復成! 相 錯為 要爲 :謙; 易 }履

《圖》 }略 卷總稱雕菰樓易學三書共四十卷蓋其爲學不拘漢魏各師法惟以卦爻經 卷儿圖五篇原 發明 十篇 破舊 說 易

文比例爲主號咷密雲蹤跡站顯蒺蔾樽酒假借可據如郭守敬之以實測得天行也; 可謂 冥 心孤 往獨闢蹊徑者矣尤豈惠脹諸家墨守漢易姝姝一先生之言者所可及,

耶晚清善化皮錫瑞庬門撰易學通論以張惠言爲專門焦循爲通學而謂 書儒林傳以證明孟喜陰陽災變書之不出田王孫京房納甲之托孟喜而深慨淸儒 先觀二家之書」可謂知言之士然錫瑞論易崇義理而黜象數實主王注程傳據漢 一學者

惠棟以 氏而已如孟氏之卦氣鄭氏之爻辰皆別傳也又非獨易而已如伏傳五行齊詩五 來重 理孟京之緒之爲大惑曰「經學有正傳有別傳以易而論別傳非獨京證明孟臺階限分數是 1222

聞; 月命明堂陰陽說春秋公羊多言災吳皆別傳也子貢謂『夫子性與天道不可得 ] 則孔子删定六經以垂世立教必不以陰陽五行爲宗旨至孟京出而漢儒稱讖

緯宋人斥讖緯而 義陳邵之易出道家之修鍊雖數近巧合非作易之本旨故雖自成; [稱圖書其實焦京之易出陰陽家之占驗雖應在事後非學易之大 家之學而 於聖

焦循說易自闢町畦以虞氏之旁通兼荀氏之升降意在采漢儒之長而去其短而於 人之易實是別傳而非正傳近儒於陳邵之圖闢之不遺餘力而又重理焦京之說獨

之與阿哉! 道。 趙宋儒者關卦氣而用先天近人知先天之非矣而復理納甲卦氣之說不亦唯 斯 又侃侃敷陳清儒之箴砭也他如 衡陽王夫之而農之周易稗疏蕭

毛奇齡 甘泉江藩鄭堂之周易逃補震澤陳壽熊獻青之讀易漢學私記寶應成翠鏡芙卿之 大可 之仲氏易推易始末存秋占筮書三書旌德姚配中仲虞之周易姚氏學,

周 侯官嚴復又陵 補 易釋爻例之屬皆淸儒易學之有根據有條理者雖立說或有未純要其創通新解, 直 前賢多可取者然易道淵深包羅衆義隨得一 序其所譯英儒赫胥黎著天演論則义據易理以闡歐學其大指以爲 隊皆能宛轉關 逝, 有所闡發近, 儒

數以為 歐學之最爲切實而執其理可以御密變者名數質力四者之學是已。 經質力以爲緯而合而名之日易大字之內質力相推 非質無以 而吾易則名 見力非力 無

以呈 路 必直 乾其靜也專其動也直。一後二百年有斯賓塞爾者以天演自然言化著書造論 質凡力

片乾也

凡質

皆坤也

奈端動之

例三其

一日 速率必均 」此所謂曠古之處自其例 出, 而后天學明人事利者也而 靜者 不 白動。 動 者 茅 易則 自止。

簡易而 則 貫天地人而一理之此亦輓近之絕作也其為天演界說曰『翕以合質闢以出力始 有 終雜糅。 自彊 |不息』爲之先『凡動必復』之說則有消息之義居其始而『易不可 <u>\_\_\_</u> 易則曰『坤其靜也翕其動也闢』至於『全力不增減 二之說,

見乾坤

或幾乎息』之旨光與『熱力平均天地乃毀』之言相發明。」可謂有昧乎其

言之也然嚴復尙非易家也不過爲闡易道以歐學者之大略推輪而已至海寧杭辛 備焉著有易楔口卷學易必談初集二集各四卷易數偶得二卷愚一錄易說訂二卷 **鷹出精究易義博及諸家傳注而蒐藏言易之書六百二十餘種並世之言易藏者莫** 

象社會政治無君民上下之分為隨象乃至日光七色見象於白漬微生蟲變化物質,英不適如其本來之象如君主立憲義取親民為同人象民主立憲主權在民為大有 易雜識一卷改正揲蓍法一卷其平日持論以爲『易如大明鏡無論以何物映之,

消

見象 副 雛 於蠱。 心力也翕者即物理學所謂向心力也凡物之運動能循其常軌而不息者皆賴 心二力之作用地球之繞日即此作用之公例也凡近世所矜爲創獲者而 义如繁辭言『坤其靜也翕其動也闢 三面 所謂「闢 **』**者即物理學之所

周易志第二

此

離

心向

四〇

易皆備其象" 之偏以會其通而宏其指。 數或偏於物質而遺精神惟易則理數兼賅形上道而形下器乃足以調劑中西末流, 重而無偏廢中土文明理重於數而西國則數勝於理重埋或流於空談而鮮實際泥 明其理於數千年之前蓋理本一原數無二致時無古今地無中外有偏 此則推而大之以至於無垠而異軍突起足爲易學關

新塗者焉篡周易志第二。

將 昔 使 嗣 在 位, 帝堯聰明文 歷 試 諸 難; 思, 作 舜 光 典帝 宅 天 釐 下, 將 下 土 遜 於 方設 位, 讓於虞舜作 居 方, 别 生 作 分 堯典虞舜 類作 {泪 }作 {九 側 共 微, 堯聞 九 篇 稾 }飫

明, 和 禹 湎 陶 淫, ]][] 矢 征 廢 厥 時 諸 謨 侯, 亂 禹 葛 成 日 扈 伯 元 戰 厥 往 功; 於甘之野作甘醬太康失邦, 不 祀, 帝 征 湯始 之作 舜 1 九征 之, 征 之作湯征。 作 自 契至 禹 一於成 伊尹 陶謨 去亳適 昆 棄 湯 第五. 稷。 八 八遷湯始] 禹 人, 夏; 別 (須於洛汭; 既 九 虺 居 州, 亳, 有 隨 夏復歸 山 先王 濬 作五子之 ЛÌ, 於亳; 居;作 任 歌 帝告 作 入

藏

可; 北 夏 作 師 乃 |夏 遇 洲 败 績; 女 疑至臣巵湯歸 鳩 湯 女方; 遂從 之遂伐 作女鳩 自 女方, 夏至 朡 停厥 伊 於 尹相湯 大 寶玉誼伯: 坰; 仲 伐桀, 虺作 升自 計。 仲伯作 湯既 河前, 黜 }典 遂 寶。 與桀戰於 夏 湯既勝 命, 復歸 鳴條 夏、欲 於 亳; 作湯誥。 之野作 遷其 社 伊 湯 不

自

明;|尹 伊 尹 放 諸 桐, 年復歸於亳思庸伊尹作太甲三 篇沃丁既葬伊尹於亳

咸

有

**德** 答單

作

明

居。

成

湯

旣

没;

太

甲

元

年,

尹

作

伊

訓

肆

命徂

派。

太

甲

旣

伊 伊 事; 陟; 作 作 }沃 伊 陟 伊 陟 }原 命。 相 仲 太 戊。 亳 遷 於 有 祥 囂; 桑穀 作 仲 j 共 生 河 於 亶 朝; 甲 伊 居 陟 相; 作 贊 於 河 亶 巫 减; 甲 作 궲 咸 圯 义 於 四 |耿; 作 太

|巖;{乙。 盤 作 訊 庚 命三 五. 遷, 將治 篇。 高宗祭成 追, 殿民 咨胥怨作: 湯, 有 飛 雉 盤 升鼎 庚三篇高宗 耳 加 雊; 膩 夢得說, 訓 諸 使 王; 百 作 高宗 I 誉 彤 求 旧高宗之 諸 野, 得 諸 傅

殷 惟 人, 始 與 **給周** 有 一受 戰 周 年, 於 |牧野; 武 王 乘 作牧 黎; 伐 殷, 祖 誓。 伊 武 月 逖, 王 戊 奔 伐 午, 告 |殷, 於 師 往伐歸 受; 渡 孟 作 津; 四 "昌誠 作 伯 戡 大 其政 誓 黎。 殷 篇。 旣 事; 作 錯天 武 王 (武 戎 **版。** 命, 微子 武王 車 作 勝 百 浩 殷 兩, 殺 父師 虎賁二 受立 少 師。 武

朝; 以 箕 芮 伯 子 歸; 作 作洪 旅 巢 範 命。 武 武 王 王 旣 有 勝 疾; 周 殷 邦, 公 作 諸 侯 金 縢。 班 宗 武 E 彝; 崩, 作 分器。 一監及 西 旅 淮 獻 夷 叛; 獒; 太 周 保 公 相 作 }旅 成 獒 巢伯

來

|庚,

命; 大浩 放 旣 黜 腿 命, 殺 武 庚, 命 微 子 啟 代 殷 後, 作 微 子 命。 唐 叔 得 禾, 異 畝 亩

伐管. 穎,|殷 作 獻 語 叔 子王 蔡 召 公既相 叔 以 命 服 唐 宅周公 餘 叔 歸 民 邦 周 往 公 康 叔; 於 成周 東作 作 (康 使來告 計 歸 酒語 禾。 周 小作件 公既 **祥** }材 維治。 得 成 命 成 禾, 在 豐, 旅 周 院成遷殿語 大子 欲 宅 維 之 邑 命; 作 **碩民周公以** 使 召 嘉 公 禾 先 成 相 Ŧ

命 告, 作 東 周 公 作 無逸。 召 公爲 保, 周 公 爲 師, 相 成 E 爲 左 右。 召 公不 悅 周 公作

**独**。 成 成 歸 伐 自 淮 夷, 他, 在宗周 逐 踐 淹作/// 語馬 邦; 政。 作 - 多方成王 成 Ê 旣 踐 奄將 遷 殷 其 命, 君 滅 於蒲 淮 夷, (還歸, 姑; 周公告 在 豐; 作 召 公作 | 周 官。 周

作 一薨成 1/. }政 成 E 葬 於 |畢; 旣 伐 東夷。 告 周 公作亳 肅愼 來 賀。 姑。 周 王 俾 公 榮伯 既没, 命 作 君陳 賄 肅 愼 分 芝 JE. 命。 東 郊 周 公在 成 周; 豐, 作 游沒欲, (君 陳。 成 Ē 葬 | 成 將 崩,

命周 册。 僕 ĪĘ; 華 公 公 作 召 们 分 命。 公 居 里成 华 蔡 諸 叔 旣 周 侯相 郊; 没, 康王, 王 作 /畢 命 作 祭 命。 穆 顧 仲 E 徐。 踆 康王 諸 命 君牙 侯 旣 位, 爲 尸 作蔡仲之 天子逐浩諸侯; 周 大 司 命。 徒; 魯侯 作 (君 牙/穆王 作康王 伯 禽宅 之誥。 命 阜徐 伯 康王 冏 夷 爲 命 周 作 太

東 }命。 郊 不 開; 作 广柴誓吕伊 侯 命 穆王 訓 夏 贖 刑; 作 呂刑 平王 錫 晉文 人侯和鬯 圭 瓚, 作汉 筷

曲

並

移 公伐鄭晉襄公 帥 師 敗 諮 |崤, 還歸, 作 秦誓至 孔子 觀書 於周室得 虞 夏 商 周 四

代 其 之典乃 意。 或 斷 說: 自 唐 孔 -5-虞 之際, 求 得 黄帝 下 迄 秦 苋 穆 孫 **麦**煩 帝 魁 翦 書, 浮, 迄 舉 於 其 秦穆, 宏 綱 凡 定 爲 尙 書 Ħ 百篇; 四 -thi 篇。 爲 之 斷 序, 遠 収

其 11 爲 世 法 者 百二十篇以百二篇爲尚書十八篇爲中候』 此据 }尙 書韓 }璇

所言 人也 割之倘 下爲 史所書故曰尚書也。」蓋書之所主 上, 各梅 低 低 孔 安 國 傳 日 一 以其上古之書謂之尚書。一王肅 本於號令所以宣王 義,

言 舜之聖馬於大禹謨皇陶謨見禹稷皇陶之忠勤功勳馬於雜誥見周公之德焉故帝 於臣下故其所載皆典謨訓誥誓命之文子夏問 書大義孔子曰『吾於帝典 道之正 7發話 (見堯

觀義 典可以觀美大禹謨禹貢 江牆可 以觀仁呂刑 ul 可以觀事阜陶謨益稷 以觀誠通斯七者書之大義舉矣』三千之徒並受其學 可以觀政洪範 可以觀度太誓 可以

及 公始皇滅 無有獨濟南伏生名勝字子賤者故秦博士名能治之欲召而伏生华九十餘老 先代 !典籍焚書坑儒天下學士逃難解散漢與孝文帝時求能治倘書者

不能行於是詔 漢定伏生 求其書亡數十篇獨得堯典。皇陶謨禹貢甘智湯智盤庚高宗形日 太常使掌故潁川童錯往受之秦時禁書伏生壁藏之其後 大兵起, 西伯 流

**戡黎微子大誓牧誓洪範金縢大誥康誥酒誥梓材召誥洛誥多士無逸君奭多方立** 

生書也生以教於齊魯之間博引異言接經申證撰次尚書大傳凡三卷八十三篇其 顧命費誓呂刑文俟之命泰誓二十九篇漢書藝文志載尚書經二十九卷蓋即伏

斟 加 兼 假, 明 大義 知 事 不 死 - 盡釋經; 如 事 生。 鳥 而 釋經 獸 咸 變見 可据 物 者; 性 如 大麓之野必是, 通 性。 于二 一州之 山 兆 林旋 祀是祭星辰三 機之星實質 爲 干條之 北 極。 禰

抗 冽 法, 先 刑 難 爲 重 華 解畫 世子 禪 護居 象七始七律, 以 迎俟皇天動 賓客之 文循 位。 四伯 威, 見於唐 開 金縢 受 命, 速六 山。 Mi 改葬。 Ji. 載 服五 此皆 丽 **立章制豈同** 稱 王元公居攝門 伏 生 所 傳古 於周世三公絀 閱 解, 七 而 年 或 者 ∭ 陟在 以 致 爲 政。 巡 伏 成 狩 生

師 弟 |伯。 傳 子 無 不涉份書以教最 記 伏 人生之學 也。 學者 以授 出 是 頗 间 先出者, 能 那 見 i 咒 尚 濟南 1 ൬ 而晁錯 宽 張生及 又治  $i^{l_1}$ 傳 文尚 千 伏 乘歐陽 生 書 害以 於魯 教 生
片
伏
生
弟
子
也
歐 國 汝 孔安國有 陽 何 比 干 俊才舉 少 卿諸 歐陽生。 字和 侍 山 御 東

陽 見 武 大 帝 小 語經學。 夏侯氏皆出 曰: 於寬傳 吾始 以 伏 生書而 {问 書 爲機學 說 多違 弗好及聞 異。如 大 寬 夏 侯 説 説 可觀, 萬 乃從寬 方之事, 大錄 問 篇。 於 君, 歐

漢書 <u>-j-</u> 定 國 優背代 生 大龙 乏説 一矣。 位, 夏侯 爲不 ßi. 說周公封弟 虎通 康叔號日孟侯, 見地 理

背伏 一矣歐陽 生 迎俟 之說 夏侯說 矣夏侯說處賓 大子服十二章公卿服九章見續 在 丹朱 見白 漢輿服 志背伏生五 背伏 生 舜 服五 爲 賓 各

渠後至· 龔勝 騎 誑 以 異 災 博 司 廢昌邑王光 選安世以爲泄語安世實不言迺召問勝勝對言「洪範傳曰「皇之不 (伏生者) 隸 都 主 異後 傳族子始昌始昌之族子曰勝長公者少孤好學從始昌受尚書及洪範五 四矣接兒寬 君賓崇爲時 校尉宣 尉, 曾 至丞相 翁生信都太傅家世傳業, 者。 光 孫高子陽-領 三王怒謂 旅 事 少府太子太傅傳平陵平當子思梁陳翁生武帝時當以 大夫會昭立 同郡簡 河隄由是陳 或者以寬受孔安國古文尚書而雜用古文之說也寬授歐陽生子世 與龔勝皆著高 爲 博士勝右扶風而 伏生 由是倘書世有歐陽氏學 卿 勝 簡 帝崩昌邑王嗣立數出。 **派言縛屬吏吏白** 山 再傳弟子歐陽 卿者兒寬門人而勝又從歐陽氏問爲學精熟非一師 Щ 節知 言治河者別 名者也濟南 平當傳九江 大 由是歐陽有平陳之學翁生傳 大小夏侯之所 、將軍霍 出禹貢爲尚書專家之學其端實自平當發 勝當 濟南林尊長賓者事歐陽高為博士 朱普公文上黨鮑宣子都普為博 張生爲博士魯國 光是時光與 乘 興 治出, 前 諫曰: 丽 歐陽 車 騎將軍 經明禹貢使行河爲 天 夏侯都尉從受尚書 久 大小夏侯說多違 陰 琅邪殷崇楚 一張安 不 雨 行傳 八世謀欲 臣 也徴 士宣 謚 下有 世 國 相 石

字 陰 極, 長 陽 厭罰常陰時則下人有伐上者」恶察察言故言臣下有謀。」光安世大驚由 卿 災異者; 自 師 事 別出 勝及歐陽高左右采獲又 洪範 五 行爲 尚 書專家之學其端實 從五 經 諸侯 問 與倘 自夏侯勝發之勝從父子建 書相出入者牽聯以次 是

萬, 章 府, 應 心敵建卒以分 句 爲勝素服 遷太子太傅, 具 文飾 自顓門名經爲議耶博士至太子少傳勝用尚書授上官太后官長 說勝非之日「建所謂章句小儒破碎大道 五日以報師傅之恩儒者以爲榮由是尚書有大小夏侯之學齊人 受詔撰 尚書論語說賜黃金百斤 年九十卒官賜冢 坐太后 **|建亦非勝爲** 學疏略難 加膊錢二 周堪 信 以

少 族融 卿 /傅而 魯 及長安 人孔霸次儒皆事大夏侯勝霸為博士堪譯官令論 孔 霸 許 以大中大夫授太子太子即位, 商 長伯牟卿爲博士覇以 帝 爲元帝累擢堪 師 賜 爵 號聚成君傳子光子夏亦事 於石 爲 光 渠經爲最高 緑 動堪傳 牟 後 卿 爲 |单

**溢**, 泉 見漢書藝文志 至丞相由是大夏侯有孔許之學許商明洪範五行善推陰陽災異著五 王吉少 一音爲 政事 四 至 齊炔欽幼卿爲文學王莽時林吉爲九卿自表上 九卿號其門人沛唐林子 高 爲 徳行 平陵 吳章偉君 師 家大夫博 行傳 為言 韶

侯之學 之學 守師 帝 御 文志是爲今文 大小 子長鄭寬 鄍 皆古字也。共王往入其宅聞鼓琴瑟鐘磬之音於是懼乃止不壞宅悉以書還孔氏孔 相。 廣陵太傅守小夏侯說文<br />
恭增師法至百萬言爲城陽內史<br />
倉以謁者論石渠至 侯。 寬中以博士授太子即位爲成帝賜爵關內侯遷光祿大夫領尚書甚 寬中 夏侯尚書依伏生篇數而歐陽氏則分盤庚爲三故大小夏侯章句各二十九卷, 法 史大夫至大官知名者也自武帝立五經博士書惟有歐陽至宣帝乃增立大小 帝末魯共王壞孔子宅欲以廣其宮而得古文尚書及禮記論語孝經凡數十篇 夏侯解詁 許氏 也傳小夏侯之學者有平陵 教授尋獨好洪範災異又學天文月令陰陽事由是小夏侯有鄭張秦假 中 傳東郡趙玄無故傳沛唐尊伯高 少君 學者各從門人會車數百兩儒者榮之欽章皆爲博士徒衆尤盛此 尚 書古文 + 山 陽 九篇, 張 與伏生 尙 無 故子 書者出孔子 儒 經二十九卷同而歐陽章句得一 信都秦恭延君 張 山拊張賓爲博士論 壁中; 恭傳魯馮賓賓為博士尊王莽太傅玄哀 而藏之者或說孔騰或說孔鮒未詳 陳留假倉子驕無故善修章 石 渠至少府<mark>授同縣</mark>李 三十一 卷見漢書 尊重寬中等 一膠東 大夏

者孔子十一 世孫也得其書以所聞伏生之書考論文義定其可知者爲隷古定

咸 更以 而 有 义增析伏生二十九篇之熙庚太誓皆爲三漢書藝文志著錄 竹 簡 德 寫之增多伏 典寶伊訓肆命 八生十六篇 原命武成族獒冏命內九共分爲九則出八篇爲二十四 日舜典汨作 九共大禹謨棄稷五子之歌允征 尚書古文經 呵 湯浩

|卷 採今文而 大夫以傳都尉朝。 為五 十七篇者是也蓋尚書茲多於是矣安國獻之遭巫蠱未列於學官安國 不用古· 而 文說都尉朝傳膠東庸 司馬 遷亦從安國問故撰史記載堯典禹貢洪範微子金縢諸篇, 譚譚傳清河胡常少子以明穀梁春秋 爲 爲

眞 左氏 部; 傅 (傳書敍) 刺史义傳左氏常傳號徐敖敖爲 河南桑欽君長世所傳百 爲 作首尾凡百二篇篇或數簡 兩篇者出東萊張霸分析合二十九篇以爲數十又采 右 扶風掾义傳毛詩授王璜平陵鈴惲子眞子 文意淺陋成帝時光祿大夫劉向校 經傳

求(尚 而中古文者蓋即安國 書出 召誥脫簡二率簡二十五字脫亦二十五字簡二十二字脫亦二十二字文 文者關 以能為 所獻者 百 网 篇徵; 也。 劉向 以中古文校之非 以中古文校歐陽 是是爲 大 小夏侯 最 先 三家經文酒 出之僞古

尚書志第三

歌向之子也受詔罗 五行傳以傳族子夏 字 誰宗? 皆 }傳 於 書 也。 異 有古 沛 也 怨 學官哀帝 帝 敎 、既中興漢 者 一个文歐 恨卒不 + 爲 授 削 郡 立文之學時: 七 虎賁 徒 命榮令說 桓 百有餘E 榮春 卷漢書藝文志 衆 令歆 陽尚書後漢傳 果立 数百 族子夏侯勝 業立五 卿 與五 脱字 入世 王莽 嗣父領校 少 世 尚書甚善之拜議郎入使授太子。每朝會輙令榮於公卿前敷 將以尚書授皇太子世祖 學長安習歐陽尚 뒖 經博士尚書歐陽 數 經 加 龍 時諸 隋書經籍志著錄 潛 [博士講論其義博士或不肯置對)散移書太常切責之諸儒 十; 下及許商皆以敎所賢 卽 學皆立法 秘書貴幸欲建立左 習最盛自顯宗以下諸 在 而向治穀梁春秋數其 位, 既立 野之長安受尚書 顯宗為 伽 書事 王璜 大 《皇太子選》 博士 者是 小夏侯而古文不 **塗惲之傳古文尚書者皆貴顯** 從容問湯 於 (弟子其傳) 也自 氏春秋及 九 江朱曾精 禍 中 帝者罔不 孝武 本 求 大夫廬江 福, 傳以 明經, 師爲誰湯對 時, 毛詩逸禮古文尚書皆列 與 與立焉疑亦習今文尚 劉向 力 習歐陽焉 洪範成尚書洪範 夏侯始昌通 迺 許子 選 不 榮 俊 十 同惟 弟子豫 威; 事 劉歆 則 未 五 一矣由是尚 沛 桓氏之 詳 年  $i\epsilon$ : 今古文 傳獨異。 經, 國 不 奏經 担榮 善推 窺 何 家 故

佝<del>胄</del>志第三

書。帝 榮爲關 護 樂 宗 累 遷 會三雍成拜榮爲五 侯皆至三公榮少子郁字仲恩少以父仕爲郎敦厚篤學傳父業以尚書教授門徒 自 議 中彭 相 坐 制 百人、榮卒襲爵、顯宗以郁先師子甚見親厚常居 胡憲 稱善曰『得生幾晚』會歐陽博士缺帝欲用榮榮謙對 東 厭; 鄍。 皇太后日「 五 圐 一家要說 南設 屯 內 不 一駕幸太學会 以辭長勝 侍講乃能得出; 作明揚州從事皋宏奉 騎 侯食邑五千戶門徒多仕公卿潁川 几杖會百官及榮門生數百人天子親自 校 尉 章句令郁校定於宣明殿永平十五年入授皇太子經太子卽位 昔五 和帝即位富於春秋侍中寶憲自以帝舅之重欲令少 更每大射養老禮畢帝輙引榮及弟子升堂執經自爲下說, 會諸博士論 人儒者莫之及特加恩賞常令止宿太子宮積五, 更桓榮親爲帝師子郁結髮敦尙繼傳父業故再以校尉入授 旦一入而 難於前榮被服儒衣溫恭有蘊藉, 卿 也! 己累擢太常顯宗即位拿以師禮嘗 』帝日『俞往汝諧! 丁鴻孝公趙國 中論經書問以政事稍遷侍 執業, 每言輙日『太師在是 因拜榮爲博士引閎宏 經術 張 禹伯達汝南 淺薄, 辨明經義每以禮 年榮薦 主頗 不 幸太常府今 如 門 張 同 涉 中帝 門 迺封 經 爲 下 酺 生 生

鄍

九

父子給 事 禁省更歷四世今白首好禮經行篤備宜令**郁** 入教授。 由 一是遷長樂

**篤門人宏農楊震伯起京兆朱寵仲威皆至三公初榮受朱曾學章句四十萬言及榮** 少府復入侍講頃之轉侍 授顯宗滅爲二十三萬言郁復删省定成 中奉 車都尉永元四年代丁鴻爲太常郁教授二帝恩龍 十三萬言由是有 桓君大小太常章句郁

治歐 中子焉以父任爲郎能世傳其家學永初元年入授安帝。 陽尚書授帝禁中然不如焉之三代帝者師推世儒宗三遷爲侍中步兵校尉永 而侍 中南陽鄧宏亦以 帝

者數 寧中順帝立爲皇太子以焉爲太子少傅月餘遷太傅順帝卽位累官太尉弟子傳業 百人江夏黃瓊世英宏農楊賜伯獻皆至三公最知名孫典字公雅復傳其

以 沿 **善教授潁川門徒數百人桓氏** 丽相, 顯乎當世而學最高稱儒宗者莫如丁鴻張醋及楊震楊賜祖孫父子也 自榮至典世宗其道父子兄弟 代作帝師 受其業

與 甚賢之詔徵鴻至即召見說文侯之命篇賜御衣及綬稟食公車與博士同禮肅宗詔 人鮑 事桓榮 受歐陽尚書三年而 明章· 一句善論 難爲都講經學至行顯宗

張酺楊賜先後帝師胥足繩徽師門者焉考之於史丁鴻年十三

張楊

网

氏家世傳經;

五.

與廣平 王羡 及諸儒太常樓望少府成封 屯 騎校尉桓郁衞士賈逵等論定五經 同

異於北 以才高論難最明諸儒稱之帝數嗟美焉時人歎曰『 累權 鴻 少府門下由是益盛遠方至者數千人, 宮白 虎觀; 使五官中郎將魏應主承 彭城劉愷 制問難侍中淳于恭上帝親稱制臨決鴻 北海巴茂 殿中無雙 九江朱倀皆至公卿。 丁孝公」數受賞賜,

陳留陳弇叔明亦受歐陽尚書於鴻仕爲蘄長而 鴻累轉司徒行太尉張酺祖父充與

學於南宮置 同門學通尙書酬傳祖業又事桓榮勤力不怠聚徒以百數顯宗爲 五經師酺以尚書教授數講於御前以論難當意除爲耶賜車馬衣裳遂 四姓 小侯 開

令入授皇太子。酺爲人質直守經義每侍講問隊數有匡正之辭以嚴見憚及肅宗 位擢侍中虎賁中郎將數月出爲東郡太守自酺出 後帝每見諸王師傅嘗言 \_\_\_\_\_\_ 張酺 

前 入 (侍講) 屢有 諫正誾誾惻! 惻 有史魚之節! 」 倉東巡 幸東郡引酺及門生并郡 縣掾

庭 中帝先備 司空子藩曾孫濟 弟子之儀使酺 亦世其學楊震父寶本習歐陽尚書而震又受歐陽尚書 講伯書一 篇然後修君 户 之禮賞賜殊特莫不沾洽,

於桓郁 明徵博覧無不窮究諸儒爲之語曰「關西夫子楊伯起」仕至司徒中子秉 累轉

太尉

濟帝嘉 於華 字 究 拜 建 世 氏。 下 薦 長, 寧初, 叔 祉, 自 生之傳歐 極 大 張 少有志操能習歐陽尚書世祖即位累仕至兗州牧子昱字文泉少傳父學客授東 加 前漢 光殿遷 中大夫左中郎 濟 節; 位 刨 師法稱爲通儒而以 河 少傳父 仗, 歎復封寬及濟子寬少學歐陽尚書京氏易尤 南 明 靈帝當受學詔太傅三公選 至 諫議 歐 智 累仕遷汝南太 尹傳父業教授日 少師 陽 陽尙書最 典 (業**)** 大夫而 生傳伏 訓; 光 因 祿 將累轉太尉子即賜 明 與 京氏 生尚 爲高第者也其 勳, 汝南高獲字敬公少遊學京 濟 守在郡教授數百 累轉司 明尚書與賜同 及 太尉劉寬 易, 書至歙字王思八 黨鮑氏 博 徒行辟雍禮引賜 通 通尚書 \_ 書 傳; 自前漢 並入侍講? 他 他少傳家 後漢 書桓 入侍講賜子彪字文先亦傳家學此 仕 人濟陰曹曾字伯山, 爲 鮑宣 (世皆為 經 君 任 章句宿 至是辭 城 師 之世 受歐 師 爲三老又拜太尉, 學篤志博聞仕爲侍中越騎校尉。 相。 與光武 博士歙既傳業 明韓詩外傳星官風隅算曆皆 桓 陽尚 帝即位: 傳歐陽尚書者日 不宜獨受封賞願分戶邑 有 重名者三公舉賜乃侍 書於平當傳子永 有 舊 從歙受尚書門徒 以明 亦嘗 倘 封臨晉侯 而 師 恭 書 事 謙 樂安歐陽 徴 歙 桓氏 好 入 勒講, 初場 字 焉 禮 門 寬 君 講

累官 承 士, 不 太 叫 尉。 考者樂安牟長君高 德修志節, 太守; 亦有名稱不 少習歐陽尚 至 大 司 書, 農。 凡 不 仕王 此 諸 莽; 儒皆 世 祖 授 卽 受 有 Ò, 大 原, 師 司 空宋弘 承 叫 考 特 者:

拜 萬 餘 博 急言皆 ナ 稍 本 遷 之歐 河 內 陽氏俗號爲 諸 生講 牟氏 學者 常 章 有干 句 而 敦煌張 餘 Ä 、著錄 奥字 前 然 後萬 明者 人著尚書章句 常受歐陽 尙 書 四 + 於 五

陽不 諸奐 蒼 徒 酱堪 當章 也智 知懷 7 歐 牟太 著尚 氏子 章注 書 桓帝, 句時 書 自牟 指卿 記難三十 奏其 牟受 長書 章 有韶 所於 餘 萬言顧 撰張 者堪 下 耳爲 東觀 且博 以 與牟氏並牟長子紆又 爲 牟士 牟氏 卿故 之有 師牟 章 係氏 句 周章 浮辭繫多減, 堪句 非不 張知 以隱居教授, 堪何 而據 張侗 九 萬言後 堪參 本觀 生

南 太守南陽宗資 人。 此 外 叉 有 潁 叔都處. 川 太 守京兆宋登 上士汝 南廖扶文起侍 叔 陽, 太 尉 中蜀郡董扶茂安皆習歐陽尙 河 內 杜 喬 叔榮處士 一筆章 徐 穉 書教 孺 子, 汝

百千 人蓋 東漢尚書 今文之學, 商有盛 於歐陽 氏者矣其! 以大夏侯尚 書教授 间

見者三人曰 司 農 濟 陰 遼東 張 馴 太守 子 儁。 南陽 以 小 夏侯 宋京 及子 尙 書教授 司 隷 校 叫 考 尉 見者 宋意 伯意 人; 曰 日 太尉 司 徒 北 海 司 牟 直 東 融 海 子 優  $\pm$ 

仲子以夏侯 尚 書相傳而未詳大小何所屬者日廣漢楊統 仲通楊厚仲桓父子未若

五

以 幼 歐 至 通 推 超, 南 生, 博 扶 古文偷倫言 陳留 未冠 季世 三家尚 潁 周 陽 洽。 師 風 2雖遭艱 防 尙 杜 川 事 河南鄭興少 太守。 林伯 偉 祖 劉 書之有孔氏比之歐陽尚書之有歐陽氏矣其他汝南周磐堅伯蜀郡張 謁 司 公年 陶 去 徒 傳習之盛也時 書及古文是 初 子奇 文有 山 卽 困 丁鴻習古文尚 師 亦 十六仕 如尹敏之初習歐陽尚書而後 握 為 事 位, 持不離 上疏 **餐東海衞宏敬仲等皆長於古學與當師事劉歆林旣遇之欣然言** 濟陰 魯國 徐 繼別之宗方王莽之敗林 州 陳洪 正 孫期仲或 孔僖 那 刺 三百餘 史蓋 身既還三輔世 亦 小 吏; 書。 有 仲和孔昱元 範 豫, 消 初習歐陽 然余考 祖巡狩 中山劉佑 受古文尚書撰尚 災 事, 之術。 名日中古 九世者安國後出 汝南, 궲 丁鴻習 尙 日 徴拜 大中 剘 伯 書而後受古文者: 文尚 召掾 辟 受古文者耶古文尙 祖 兵河 侍御史問以經書 歐 亦 大 更試經防尤能 大陳留 書。然 指 陽 書 習古文尚書 尚 雜記三十二篇 西得漆書古文尚 也自安國以下世傳古文尚 後漢 書 於恒榮具如所記, 楊 之言古文 倫 日 諫 仲 理史稱 而楷作 誦讀, 京師 書之專習者日 議 四 大夫 書 尚 拜為 士 十 一份書注 ·萬言 書者 大 南 卷常寶 夫咸 少 **不聞** 守 陽 累仕 **丞。** 防 尹敏 爲 汝 推 其 陶

事 宏, 林 後 皆 得 典等 更 受林 固 \*學林出 諧 矣! 使宏 漆書以示宏等日 得 林, Ä · 墜於地也. 有 益 之。 L \_ |林 及宏 流 離 兵亂, 見 合時務然 林, 常恐 闇 斯經 丽 服! 將絕! 濟 南 何 徐 意 巛 東 始 師

义 衞 宏 子 尙 書 因 濟 爲 於 南 塗 作 徐 訓 惲 生 復能 逵 }注。 傳父 於是 傳之是道竟不 古 業, 文遂 能 以 行。 大 夏 林 侯 同 尚 郡 賈逵 書教 景伯 舌 授。 文雖不 肅宗 亦 立, 爲 一降意 作 訓。 儒 而 逵之父 術; 願 特 好 諸 日 生 古文尙 | 徽者 無 悔 書 受 所

{書 詁 {氏 傳; 作 訓。 建 相 初 林 應 詔 同 元 年詔達入 令撰 郡 馬 歐 融 季長 陽 講 大 又爲 小 北 宮白虎 夏侯 作 ~ 傳。 書古文同 觀南宮雲臺達數爲帝言古文尚書與經傳 北 海 鄭玄康 異。 逵 成 |撰集爲三卷又爲 先受古文尚書於東郡 杜林 張 傳 恭 古 文 궲 爾 尙

融, 西 受古 入 關 學好 因 }涿 研精作 郡 廬 植 尚書章句其 子 幹 事 馬 融, 人書皆不 受杜林 得。 漆 書 [馬 古 融 文, 注: 爲 十一 作 注 卷, 解。 鄭玄注 盧 植 少與鄭 九卷 著 玄 俱 目 事

書 經 安 籍 國 志 亦 古 好 一文之得 此 學。 自 世 大 類 旭 興後 於 世 齊也 漢 田水 衞 者 則 氏經 | 賈 馬 時注一馬 融鄭玄之力 君子 之業則 也! 鄭玄書 贊 疋 材 云 博, \_\_\_ 旣 我 先 一之矣 師 棘 下

善二 學十 者六 所卷 會引 選鄭 也志 之逸 棘問 下贊 生云

尙

書

志第三

何棘

時下

鄭棘

答下

云地

一名

所 篇二 算人 叉 不 其 訓, 家之所 儒穿 也四 津 ·敢以 書 並 傳, 碑, 魏 爲匚 鑿, 十 止 但 逮 分 使 抑豈殘缺失 太祖輔漢政徵拜諫議 者 四凡五十 盤庚太誓皆爲三篇, 解二 習 師云 疑誤 Ĩ 也 訊 故子 其句 杜林漆書者 意 鐫 也。 則 父後學, 說歟? 十九篇而 刻立 王 孔据 讀 之國 穎尙 朗 有人篇: 也者 穎陸 次, 於 者 丽 達書 叉云: 不 不 太 焉 序正 也乃馬 可讀 解其 不解十六篇歟見 ヹ 學門外於是後儒 光 義 然 祿 東 書經 再 分願命 歐陽 默 歌 歌 歌 歌 歌 歌 表 云 所注 海 文誼歟抑豈? 大 傳 大夫愛司空軍 融 夫楊賜等奏求正定六經文字靈帝 王 弟 書敍 氏 者三十四 子而 朗景興以通 失 **耶陳留蔡邕伯喈以經籍去聖久遠文字多謬俗** 一首 其 E 云: 亦治 鄭卷 /本義。 正敍 若 先 晚 注云 逸十六篇5 義亦 有 歐陽 學, 篇 自 尚一 事; 厥後鄭玄作注, 其 經師 成取 書馬 以以 حسا 而已豈二十四篇之 魏國建累轉司徒子肅字子確累官 則是鄭玄者 訊 尚書者矣後為會稽太守為 篇鄭 太尉楊賜。 正焉。 下 而後亡之歟彼 數所 絕無師 爲康王之誥計三十四篇 並注 其尚 與並 三伏 書則 可謂集諸儒之大成矣 就。 固淵原 而 家生 同所 賜則受歐陽 豈都: 張楷 誼 今文歐陽 許之邕乃 未有 於孔安國氏, 是非 之注, 尉 鄭古 朝 聞 未文 衞 庸 尙 孫策 夏侯 自書 於 注也 合逸 買 生 書 師 於 册 十孔 而 中 所

貴 鄉 加散騎常侍以儒宗爲名臣撰尚書注十一卷尚書駁義五卷載隋書經籍 公講尚書榮陽鄭沖文和 以司 空執經親授與侍中高密鄭小同 . 倶被賞賜鄭

高 賈馬不 道 論 領 爲 定之然洪範 非 小 奉 立 {尙 長。 而行之。二二義不 }尚 同 博士矣吳國 師 其至也今發篇開義以明聖德而舍其大更稱其細豈作者之意耶」峻對曰『臣 書問三事一事日 者鄭玄之孫也則是高貴鄉公者當是治鄭注 說, 而 · 違; 帝曰「仲尼言『惟天爲大惟堯則之』堯之大美在乎則天』 瑾少游 未喻大義至於折 蓋肅善賈馬之說, 稱 『三人占從二人』賈馬及肅皆以 士大夫之通份書者獨稱 京師治毛詩尚書左氏春秋獨尚書不詳 同, 何者爲是」博士庾峻對日 「鄭玄云『稽古同天」言堯同於天也王肅云『堯順考古 中裁之聖 而 不好 鄭氏; 思。 」此高貴郷公之申 非不 **現邪諸葛瑾子瑜廣陵張紘子綱紘治歐陽** 通習古文者也此以知魏 爲 **『先儒所執各有乖異臣不足以** 古文尚書者矣既幸太學與博 順考古道; 何家? 鄭黜王也然王肅 然以毛詩左氏春秋皆 」以是言之肅義 順考古道, 以古文尚 之說與

文推之當是古文尚書也獨士無得而稱者焉晉世祕府所藏有古文尚書經文後

尙 無 書洪 傳 者! 及永嘉之亂今文歐陽大小夏侯尚書並亡濟南伏生之傳惟劉向父子所傳 範 五行 傳論是其本法而又父子 乖戾江左中興元帝時豫章 內史汝南 梅 賾

未立於學官』而儒林傳亦但稱『孔安國以今文讀之因以起其家』不云安 上古文尚書孔安國 傳然考漢書藝文志敍古文尙 書但稱了 安國 獻之遭巫

國作傳則是安國作傳已嫌羌無依據而其書析伏生二十九篇爲三十三增益二十 篇, 以傅合於劉向別錄言『尚書五十八篇』之數散百篇之敍引冠篇端,

而止篇

孔

列次其間其篇章之離合篇目之存亡絕與 兩漢所 傳不合而立 說多本王肅賾

自言『古文尚書受之城陽臧曹而曹受之城陽太守天水梁柳洪季柳受之扶風 蘇

貫 愉 鄉 休 公講尚書太學乃據鄭注 預。 愉受之太保公鄭沖 』授受淵原如此然考鄭沖在魏授尚書高貴鄉公而高 以難王誼; 具如前載然則沖所授高貴鄉公者當是鄭

善何緣傳目沖之古文尚書孔安國 傳 而轉 本王誼立說 者耶? 後儒諡 之日僞, 非

**苛誣也安定皇甫謐士安梁柳之從舅子也亦受孔傳之古文尚書故作帝王世紀往** 往 載僞孔五十八篇之說。謐高名宿學儒者宗之既相讚述遂翁然信奉以爲孔氏古

尚書 志第三

至隋 賾 卷司徒蔡大寶撰尚書義疏三十卷隋太學博士劉炫撰尚書述義二十卷尚書義疏 (文 得 乃 七卷一般書學士顧彪撰尙書義疏二十卷尙書文外義一卷具載隋書經籍志皆据梅 一十卷國子助教巢猗撰尚書百釋三卷尚書義三卷國子助教費虛撰尚 時稱 注 義皆 行。 於是復出其書復闕舜典一篇齊明帝時吳姚方興於大航 若 險 因梅賾之僞孔焯炫之義疏撰定尚書正義二十卷序稱『古文經雖然早出晚始 1 多一 其爲 僞 初始行孔傳其爲義疏者有梁兼國子助敎孔子祛撰尚書義二十卷集注 其言必托數經悉對文斯乃鼓怒浪於平流震驚飆於靜樹使敎者煩而多惑學 而 淺 孔 一劉劉焯字士元信都人劉炫字光伯, 更爲險無義而更生義竊以古人言語惟在達情雖復時 十八字於是始列國學然鄭義兼行梁陳所講有孔鄭二家北朝惟得鄭義, 略惟劉焯劉炫最 正義者蔡大寶巢猗費趙顧彪劉焯劉炫等其諸 安國傳古文尚書也隋太學博士劉焯亦爲僞孔作疏聰明博學與劉炫 爲詳雅然焯乃織綜經文穿鑿孔穴詭其 河間人至唐孔穎達奉詔纂五 公旨 頭得其書奏 趣多 或 取象不必辭皆 新 或 因循; 見, 上上上馬鄭 書義 異 經義疏, 彼 帖釋 尙 前儒, 疏 齊 書 1-

者 符; 後 爲 耶! 夫梅 張 之所傳鄭玄之所注者胥偕今文歐陽大小夏侯以俱亡夫書以道政事儒者不能異 國 奉 有 文叉多十六篇。』卽是僞書二十四篇也。」是直斥安國所得之壁中古文爲僞書矣 (生若為) 勞而 以爲 前義義更太略辭又過華雖爲文筆之善乃非開獎之路義旣無義文又非文欲使前義義更太略辭又過華雖爲文筆之善乃非開獎之路義旣無義文又非文欲使 師 十四篇二十四篇者合今文爲五十七幷敍爲 **提霸偽造而** 惟 而 何 承信 合九共為 穎 不 氏之書不 少功; 達 先祖 幸 領袖, 而 前 惧 以 梅 賾 過 之書 有徵者也乃穎達云「藝文志云「 有 知誰 猶 一則十六篇 此乃炫之所失未爲得 此不肖之孽孫哉由是梅賾之僞孔傳行而孔安國之古文尚書馬 ;不及良<del>0</del> Mi 曲 以上之書為壁中 何妄人僞作以誣安國 所傳百兩篇者出張霸載漢書儒林傳甚明而非鄭注 爲 爲 護; 此 又與漢書藝文志相應是實出於安國自都尉朝以下遞 者也炫嫌焯之煩 反斥其 先祖 也! Ŀ 文而 」 揚権諸家黨亦辭嚴予奪具 之十六篇 爲安國子孫者當力辨其非乃穎達竟信 爲 孔安 之正義反斥鄭注 雜, 五十八與漢書藝文志劉向 就 國者孔子後也悉得其書 面 爲 偽是不 删 焉, 雖復微稍省要又好 加其 書序之二十四篇 有裁 而 加 別錄皆 一書序之 斷 他 者也 以古 改

也諸家聚訟不外四端日今文古文日錯簡日禹貢山水日洪範疇數漢儒發其端,

會宋儒 說 而宋儒演其緒然宋儒持論多與漢儒 病 師 心也。洪範疇數之說始四漢今文家伏生大傳以下建京房劉向諸 不同者蓋漢儒 重師法、宋學尙獨見漢儒 好附 人以

陰陽災異附合洪範五事庶徵之文而宋儒兴流爲象數之學惟圖書同異之是辨經 義愈不能 明獨泰州胡瑗翼之生於北宋盛時學問最爲篤實撰洪範口義二卷務在

謂五行次第爲箕子所陳 發明天人合一之旨不尙新奇如謂 不辨洛書本文之多寡謂 「天錫洪範」 爲錫自帝堯不取神龜頁文之瑞 五福六極之應通於四海不當指

其要皆歸於建中出治定皇極爲九疇之本辭雖平近而深得聖人立訓之要遠勝漢 身而言駁正梅傳孔疏自抒心得又詳引周官之法推演八政以經注經特爲精確,

儒 托聖經 而演磯群也惟暖明天人合一之旨立說尚本漢儒 而 臨 川 王安石 介甫 剘

直持天人不相與天變不足畏之論以破伏生董仲舒劉向言洪範五行災異之蔽撰 訓如蓋人君之五事,

}洪 <mark>燠風而已安</mark>石 範傳 卷以庶徵所謂『若』者不當訓順當 說經好為新解類如是矣神宗初安石以尚書入侍遂與政而子雩元 如天之雨煬寒

尚書志第三

興亡 經文, 考二家同 焉。 Z 獨 或 度作 忠於夏則侯官林之奇拙齋宗之以康王之誥服冕爲非禮引左傳叔向之言爲證則 澤 氏 建陽察沈 獨 學王氏三經義, 實 新經與蘇軾同指; 問 於 須 /考 覈水 一披抉明暢其釋禹貢三江定爲 眉 此 刑 如 山 講 滿 書 此 1\_\_\_ 異但就 九峯 蘇 解者。 有 豕 作 事; 軾 書解 道而附益以味別之說遂以 有旨爲之說成新經尚書十三卷以 取 子瞻撰 焦! 何, 取之朱子語錄 』」則又未嘗以簡爲病洛閩諸儒以程子被軾譏訶之故與軾 此其 蓋宋儒之說 誰 東坡書傳而論則軾究心經世之學明於事勢又長於議論於治 最好莫是東坡 中紹興二十一年進士第累轉校書郎南渡以後王氏新經之說 合於理後與蔡沈帖, 東坡 一也自是朝 書 亦稱 書者實推軾及林之奇最條暢云之奇 傳十三卷多駁異其說今王氏新經尙書不傳不 南江 廷用 三日一然! 其解呂刑篇以『王享國 浴後. 雖有 41 王氏之說進退 ŽĪ. **二**叉問: 人之議 北江, 蘇氏 進; 本諸鄭玄遠有端緒 失之簡 至於以義 下其說太學頒焉, 但若 多 士迨徽欽 失之太簡。 上之語 百年耄 和 曠職 之持論 然語錄 之際 作 三 日: 為武 惟未 零蓋: 說 句, 叉 於羿而 嘗詳 述其父 力 經 能 稱 排 水 亦 者 荒 有 亂 審 盡

尚書志第三

訖於 法,燦 老始其言曰『 恭 說詖行淫辭之不可訓者」雖深文周內未爲實錄然之奇說書頗多新解撰尚書全 談之罪深於桀紂本朝靖康禍亂考其端倪王氏實負王何之資在孔孟書正 際也辭旨所發不能不敷暢詳至者欲學者易於覽習而優游饜飫以斷深造自得際, 之奇者也龍游夏馔柯山雖不及之奇之門然撰尚書辭解二十六卷反覆條暢博乐 傍前人至其辨析吳同貫穿史事覃思積悟實卓然成一家言呂祖謙之書學即受諸 解四十卷雖止洛語 梅氏偽孔孔穎達王安石 家之學也雖然凡此諸儒皆据梅蹟僞孔傳而莫適 初本受學於之奇撰東萊書說十卷先之秦誓費醬者欲自其流而上诉於唐虞之 浴::: 然明白而其; 而 朝 廷欲令學者參用其說之奇上言「王氏三經率爲新法也晉人以王何淸 而 遂以 伏生傳於旣髦之時而安國爲隸古又特定其所可知者而一篇之中, 絕筆者蓋之奇書以是終而祖 中 |不爲全解| 取林之奇之說者實什之六七蓋淵源在是矣至金華呂祖謙 蘇軾林之奇及諸儒之說深究詳繹使唐虞三代之大經大 而 中以陽 鳥爲地名三俊爲 謙 即以是始所以終始 疑爲僞者疑之自武夷吳棫 常伯常任準人皆未嘗依 師 說, 前謂 (倘 也; 伯 邪

釋之。豈 是假 至 亦 作 得 }偽 而六 文章況孔書是東晉方出前此諸儒皆不 卻 <u>\_\_\_</u> 撰 簡 孔 也 度年 有 口 說 如 傳爲 謂 書 傳, {書 之内其 至 是 此。 不 難 可疑 儿 }碑 ul 後 讓 有 比 讀 傳 諸篇 毛公 矣 於 F 間士 篇; 登紹 而 不 舜 世? 百 獨 老夫四代之書作 前 |朱子 指 書 進興 惟 安 可 後 兼小序皆可 一卷首 方 國 然。 其 知 人 如 士中 作舜典, (書始 者蓋 況他 此高 說 超然遠覽亦疑 所 輝為 卷舉 宗太 增多 底 先漢 時常 不 話, 出, 簡, 疑堯典一篇自 之 無矣; 亦 大 未 要; 收 爲丞 段省 自 者不 文 是 拾 爲 書, 御忤 章, 總 乃欲 於 世 見 今 史秦 二。乃至二 事。 所 劾澮 說, 書 重 灰 孔傳之僞 深信。 以 厚 代 燼 宰出 日 目 書序日 曾見可疑之甚」是其抉摘孔傳視城尤 是盡求作書之 政事 屋 相爲 有 儒 具 説堯一代爲治之次 壁 力 故 訓 韓泉 在, 量。 之 新 人之手 中, 釋 伲州 皆文從 m |君辨, 他 終始, 與 文 著 昌 胄通 黄 今 字, 其 等判 口 日臣 大 傳 多 說 而 度 而 字 卻 於語錄日 之餘, 是 撰尚 序 文 遂定爲二體乎? 順; 本意 訊 辨, 格 歷試 如 叔 非 書說七 日考異日: 致 名 更 此 若 與 **(序至讓於舜方止今** 輩 夫 極 諸 無 有 伏 生之 輕, 難, 疑 雖 本 某疑 卷其 字 是 則 卻 末 視 書, 疑是晉 其亦 爲 訛 闕。 棫 先後 詁 要受讓 訓詁 今 差 舛? 訓, 孔 屈 一後; 難言 安國 此 理 曲 日 會 宋 義, 差 聱 卻 仍 間 書 牙, 盡 以 矣! 不 和棫 時

確不 易好; 則 師之托沉潛反覆者數十年然後成書集傳六卷洪範皇極內篇五卷發明先儒之所 古書所引之文。皆已如此恐其未必然也或者以爲記錄之實語難工而潤飾之 未及,其辨今古文曰『按漢儒以伏生之書爲今文而謂安國之書爲古文以今考之 元定之子也元定本名儒尤精洪範之數然未及論著曰「成吾書者沈也」沈受父 故二 紀 頗與經不合而安國之序义絕不類西京文亦皆可疑獨諸序之本不先傳則賴 考定於科 之序而見。」可謂闡明師說淵源有自者也其論洪範數曰「體天地之撰者易之象。 **今文多艱澀**。 而象備矣九九而又九九之爲六千五百六十一而數周矣易更四聖而象已蓍範 磨者矣顧朱子晚欲作書傳未及爲遂以屬門人蔡沈沈字仲默號九峯建陽人; 故訓誥誓命有難易之不同此爲近之然伏生倍文暗誦乃徧得其所難而安國 四而 地之撰者範之數數始於一奇象成於二偶奇者數之所以立偶者數之所以行。 斗古書錯亂磨滅之餘反專得其所易則又有不可曉者至於諸序之文或 八八卦之象也三三而 而古文反平易或者以爲古文自伏生女子口授鼂錯時失之則先秦 九九疇之數 也由是八八而又八八之爲 四千 2雅詞 安國 九

錫 家焦京 胂 ? 書主於通 禹 之術特 而 數 不 變易 傳。 所 μJ <u>\_\_</u> 數為洪範! 乃衍 通而 洪範 闕其所不可 九數 以 新 為 耳日蓋開演範之一 八十一 通; 章, 而 者不啻再三而沈之撰 配 以 派者, 月 令 節 **貫自沈始焉惟** 氣, 欲 以擬易; 實 本易

艘艦周浩, 一必求 **艾解自序** 稱二 典三謨經朱子點定 見於語錄 而究其實 所謂 朱子點定者 (書集傳

亦不 篤 信朱子之學者而! 免 有 所竄 易故宋末 履祥作尚書表注機作書傳折衷鼎作書傳纂注咸於沈 蘭溪 金履 祥仁山及元儒休寧陳櫟定字鄱陽 董鼎 集傳斷 季亭皆

{禮 之後僻 漢志水經注 處 隅無 山睹: 九域志諸書而 1 1 原 旁引 西 北 之古蹟, 他 說以證古今山水之原委頗! 統 核其真 而 |卷其書大抵引爾雅| 授據考證獨不泥 爲 簡明雖生於南 諸儒 {周

齗

11

辭其說

禹貢,

大率用

衢

州

毛晃之說蓋晃撰禹貢指南四

附會之說故沈集傳多用之亦言 禹貢 山水者所當考證矣然宋儒言禹貢 山 水 者,

於休寧程 大昌泰之莫卓於義島傅寅 削 叔蓋 大昌喜 談 地 理之 之 學 嘗 以 吏 部 尙

備對背刻意冥搜考尋舊蹟而禹貢論六卷證辨尤詳其中前論五卷於江水河水淮 筵進 誹 禹貢闕文疑義疏 說甚詳是 禹貢實爲大昌 專門之學所著雅錄 及 北 邊

漢 水 濟 水 弱 水黑 水皆糾舊傳之誤後論 卷, 則 專論河水汴水之患而殿以

所斥; **[** ] [ ] [ ] 地 水 理圖 }斵 四卷。 要 其援 卷惟 博引衆說斷以己意具有特解不肯蹈集前人其論 据釐 禹 訂, 跡 質爲 大 抵 博洽後 在. 中 原, 世注 而 大昌 禹貢者終 生當 南 不 渡地 能 廢其 非 親歷, 說 孟子 也至 不能 傅寅 闕疑; 決汝漢排 以 所 撲 此 之 爲 淮 泗

禹貢 ൬ 注之江, 一家則 指 南, 程 <u>\_\_</u> 為 大昌之禹貢論, 古 清洫 之法尤爲諸 而 儒所 |矣! 未 汉可謂: 毛晃之禹貢指 卓 然能自 南, 抒所 見採於蔡沈 見者足與毛晃之 集傳

傅二 駁 雜 }解 Ŧi. 爲 嫌; 然趙歧注孟子漢儒 蔡氏採者少耳寧宗之世正蔡氏集傳初出之時而 卷獨取古注疏參以新意與蔡氏頗有 已 有 此例; 於經 社之說書奚病 左 異同雖援後世之事以證古經, 句 櫛字 安福 比, 陳經顯之撰 疏 證詳 明, 或以 () 往 往

發 先 儒 肵 未發實足與林 之奇 夏 供 諸 家 相 爲 羽 翼; 固 無 庸 拘 蔡氏 之 學, 執 格 以 相

繩 也! 蒲 江 魏 ſ 翁鶴 山者嘗問業於蔡氏 之同 門建昌李燔敬子趙 州 輔廣 漢郷; 而

尚書要義 十七卷序說十卷未免拘虚然梅蹟當東晉之初去古未遠先儒書 傳孔疏精 義 往

朱子之再

傅

求

-

也然

115

篇信:

梅氏僞孔

傳之說摘梅

要之說標

以

目

粲 擷; 存; 汗學者卒業 然故 尚 朱子 } 書 者 爲艱。 語錄 要 於諸 了翁 亦謂 **永**為 臣矣宋儒疑梅傳孔氏古文之非 汰 \_\_ 一最古! () 其冗長使後 ]書 名 而 孔穎達正義, 物 典制, 人不 當看 病 於蕪雜 , 発釋謹嚴 疏 文』然尚書文既聱牙注 而 不 立同 (者) 切 考證之實學, 吳棫朱子蔡沈始。 異; 而 原 原 百精 疏 本 义 本**,** 考 復 華

證

面

插

是亦

**梅博** 

孔疏

之功

眞

旣, 非 補; 眞 谌 所 併 其 者五 伏 掊 併 者 也蓋 生 舜 擊觝排儻亦 條蓋吳棫年 一个文 典 (於堯典删) 柏 **人而疑之者自然** 勇 於疑經 變本 朱子蔡沈之所嘗疑而未若汝談 除 之不 加厲 姚 趙 方 汝 興所 已, 者 耶然! 談始汝談字南塘宋之宗室撰 抑 撰一 又勇 面 一十八 於 勇於疑經師, 改經; (字合益稷) 撰書 之決 心自 疑 於皋 九 也然於伏 用未有? 卷, 陶 動 書說 謨; 以 脱簡 如 此 三卷, 生所傳諸篇亦 有 金華王柏魯齋 爲 孔 中 辭, 颖 疑 臆 達 爲 移

ग 據 補 者也 舜 以 讓 於德 大禹謨皋陶謨爲 弗嗣 之下其爲堯典 愛書此有 左傳 本文 抑 叫 據者 或爲 也以論 他 書所 載如 咨爾 灣子 述帝 舜 王遺語

類,

包不

可

知?

以孟子

勞之來之

二十二

字,補

敬

敷

五

敎

在

寬

之下

則

孟

堯言柏乃以爲舜語已相矛盾然亦尙有論誠孟子可據也至於堯典皋陶謨說

七〇

廣 **}**命 脱簡一召誥 兩 武 成 句者何脫簡若是之多而所脫之簡又若是之零星破碎長短參差其**簡之長短** 洪範多士多政八篇則純以意爲易置 脱簡二率簡二十五字者脫亦二十五字簡二十二字者脫亦二十二字。 一概托之於錯簡有割一兩節者有

自必 無脫 文字異者七百有餘脫字數十載漢書藝文志此實發見脫簡之始然向旣校知脫簡, 恰得句首簡尾恰得句尾無一句割裂不完之事也而柏乃托脫簡之說師心自用勇 於改經若此然宋儒解書之作亦有不 十二字』具有明文則必無全脫一章一段之事而此二十餘字之中亦必無簡首 一一改正; 簡 可 知, 亦非篇篇悉有顚倒且「簡二十五字者脱二十五字簡二十二字者脫 |必不聽其仍前錯亂又惟言『酒誥脫簡一召誥脫簡二]|則其餘 以師 心為病而 以輯 ·佚爲功者閩人黃倫 併

漢迄宋亦極賅博惟編次不以時代每條皆首列錢塘張九成子韶之說或者疑卽襲 |成所著尚書詳說五十卷而僞托黃氏然九成詳說之目僅見宋史藝文志久經徑 書精義 五十卷替萃諸說依經臚 戦不 加論 斷,間 有同異亦兩存之其所徵

尚書志第三

七

晦; 氏正大蘇氏子才等當時著述並已散佚遺章賸何猶得存什一於是編體裁雖涉泛 事釋今文自崇仁吳澄草廬始惟孟頫以書畫名後世罕知其通經者乃能**灼**知古文 之後疑孔傳古文之僞然言性言心言學之語宋人 濫, 作偽 沿 之以爲經秦火之後樂遂無復存詩書禮春秋西漢以來諸儒有意復古殷勤收拾而 沈雖疑之而不敢論定也其分編今文古文自元儒湖州趙孟頫子昂始其置古文而 又幸而覺其偽忍無述焉以明之使天下後世常受其欺耶余故分今文古文而爲之 mi 帝三王之道於是乎在 使 王氏等果氏綱孔氏武仰孔灰文仰陳式鵬飛孫氏覺朱氏炭蘇氏詢吳氏孜朱 ıi] 夏輯之勤要亦不可盡沒矣然宋儒尚書諸家最盛傳者察沈沈雖承吳棫 之偽撰書今古文集註而序之曰「詩書禮樂春秋皆經孔子删定筆削後 者出焉學者不察算僞爲眞俾得並行以售其欺書之古文是已嗟夫書之爲書, 果相沿襲亦未嘗不可禱是喜以傳九成書也他如楊氏繪顧氐臨周 K 光 張 氏 沂上官 不 氏公路王氏目体王氏當黃氏母愈顏氏復胡氏伸 幸而至於亡於不幸之中幸而 **據以立教者其端皆發自古文故** 有存者忍使偽 亂 氏範李 其 氏

派是今文古文本各為師說澄專釋今文尚為有合於古義非王柏書疑舉歷代相書者伏生今文傳為大小夏侯歐陽三家孔安國古文別傳都尉朝庸生胡常自為 維揚 字初 序謂 《註焉嗟夫】 亢 雲作法言 經肆意 是以 儒之 驛、玉 作書傳折衷頗論察氏之失治法制既定乃改作尚書集傳纂疏凡六卷於蒸傳 一惜孟頫之書不 無駁正; 晉 入也然元制猶兼用梅傳孔疏故吉水王充極與耕作書義矜式主張題義 郵郵 世 色大人表伏梅千載事 朱子爲宗書宗察傳固亦宜 晚 刊 可 與 者 削 出之書別見於後。 時無知者日『後世有子雲必愛之矣』庸詎知今之世 mi 知者道難, 地元仁宗! 者比; 駁正察傳之尚 惟其 傳, 而 延祐二 與俗 顚 與孟頫同志者時獨有一吳澄。 倒錯簡 疑谳 書折衷乃佚不傳自序稱 人言也余恐是書之作知之者寡 然此 年議復貢舉定尚書義用蔡沈集傳休寧陳櫟定 然 皆以意 了 レスス変 四卷以 也 自爲則 L., 外實禾釋古文一篇也考漢代治 者也因撰書纂言四卷專釋 延祐 與 設 王柏同譏然要與孟頫 科以 澄贈別盂賴詩云 聖朝 後功 科 而不知者之衆 果 令 如斯故 無典 與行 我同 諸經 一識 <del>今</del>文自 失 徜 志 傳 君

尚 皆 志 第 三

其 象以 攻 依 文武 不以察傳為主其專主察傳定爲功令者則始自明成祖時行在翰林院學士胡廣等 之亦不堅持門戶以巧爲回護計所糾正凡六十六條中如堯與謂天左旋日月五, 下繫以經文及傳音釋於字音字義字體辨之甚詳其傳 )異同; **『端委然察傳歧誤之處則不** 功令, 出 異 儒臣定正之命翰林院學士劉三吾等總其事書成賜名書傳會選凡六卷每傳之 駁注文也獨明太祖聰明首出考驗天象知蔡傳日月五星運行之說不合詔徵天 説 典刑爲各象其罪而加之非垂象之意謂同爲逆河以海潮逆入而得名皆非故 耐 處 受 者至 仍得 其 兼 命惟七年謂 右旋高宗形日謂 中 亦考證典故於察傳之合者存之不預立意 |彭鑫陳師凱則又於名物度數察傳所稱引| 如謂 本梅傳孔疏立說, 堯典乃舜典之緣 問公輔成王之七年皆採諸家之說 膩 **庆釋於高宗之廟西伯越黎謂是武王洛誥惟周公** 个復糾正蓋# 而不用禁傳也充耘撰讀書管見二卷所 心起本為 如孔穎達諸經正義主於發揮注文不主於 一篇故曰虞書謂九族旣睦旣當訓盡謂 見以 以彌蔡傳之遠是洪武 中用古人姓氏古 而未詳者一一 曲 肆詆排其不合者則 博 說與蔡傳尤 引繁稱, 書名目必 一誕保 中尚 星 改

卷自是蔡氏傳成 而 敕撰書傳大全大旨本陳傑陳師凱主於發明紫傳奏傳舊爲六卷大全分爲 駁之者旌德梅鶯 不 刊 之 典; 因宋 吳樾朱子及元吳澄之說作尚書考異五卷尚書譜五卷 而梅氏孔傳亦若存若亡矣然明儒 有灼 知梅氏孔傳

別 書譜 無 確證又謂東晉之二十五篇出於皇甫謐所爲則 尙以空言詆斥無所依據如謂孔壁之十六篇出於孔安國所爲實以臆斷之, 但據孔穎達疏引晉書證 傳

其 姑 子 外弟 五篇, 梁柳得古文一 語其說· 以成文則指 亦在 影響之間獨尙書考異謂孔安國序拜增 摘背有依據又

悉雜

取傳記

中語

如調

瀍水出谷城縣

网

志並同? 元六年, ·始置 晉始省谷城入河北, 金 加克 郡 而孔傳乃云積 而孔傳乃云出河南北山 石 山在金城 四南; 積石 孔安國卒於漢武 Щ 在西南羌中漢昭 時載 在 帝始

則猶 在 ni 馬 進 以 前安得. 知 此 地 名乎其為: 依托尤佐證顯 然連江 陳第 季工作 尚

尤 }衍 以為 四卷乃篤信梅氏孔傳以朱子疑之爲非而於梅驚尚書考異尚書譜三編詆 張爲 幻過矣然第學問淹博所著毛詩古音考屈宋古音義諸書 皆授據

治具 有 根 柢; 其 作是書雖其 初本 由制品 人而實非師心臆斷以空言說經者比如

尚書志第

武 潛三十年乃引經據古撰古文尚書疏證八卷一一陳其矛盾之故所列一百二十八 **淪舜典五瑞** 條其最結者謂「漢書藝文志言」為共王壤孔子宅得古文尚書孔安國以考二十 今晚出吉無汨作九共典寶等此篇名之不合也鄭嚴成法書序於仲虺之誥太甲說 傳古文者据鄭氏說則增多者舜典汨作九共大禹謨益稷五子之歌嗣征典寶湯誥 數之見於四漢者如此而梅賾所上乃增多二十五篇此篇數之不合也杜林馬鄭皆 九篇得多十六篇』楚元王傳亦云『逸書十六篇天漢之後孔安國獻之』古文篇 者則始於清儒太原問若腹百詩者廢年二十讀尚甚至古文二十五篇即疑其偽沈 命微子之命察仲之命周官君陳舉命君牙皆注曰亡而於治作九典典實肆命等皆 咸 |成無錯筒洪範非龜文亦足破諸儒穿鑿附會之說正未可以拘泥古文排詆梅鶩 有一 日逸逸者即孔壁書也康成雖云『受書於張恭祖』然書賞稱「我先師子安國 事少之矣惟梅驚之攻古文蒐采未周考證份疏人多不信其昌言排擊盡發癥結 德伊訓肆命原命武成旅獒冏命凡十六篇巾九共有九篇故亦稱二十四篇 五玉五器謂不得以周禮釋處告斤注疏家牽合之非其理確不可易論

世 饗図 **砕遺** 傳 }晚 亦 馬 憂腎 111 肖 書序盆 以為 巡 法言孝至篇云「言合稷契之謂忠謨合皋陶之謂嘉。 则 好 安國 後安國 字見於淇适 此學 出 白 稲 書析泉陶 河 年一與今菁之二五 陽 Į. **今**文又不同 墨子引湯誓 後惟 宅 扎氏 稷 [l \_\_\_ 嵎 [[I] 本名葉稷馬鄭王三家本皆然蓋別是一 =7 It 康成所注 政 護之华為益程則程與民 劓 夷, 淵 今以與記說文與晚出書相校又甚不合 海釋者五 玔 鄭作 然後 其辭若此不云"此出揚誥」亦不云"與湯誥小 源 故堯與禹貢洪範微 於安國 剠 者得其真 知 --1 L., 鄭 宅 晚 --Li 作 出之書蓋 有 四十七字以今孔書校之不同者甚多碑云 崛 明矣今晚出 九年 鉞; رحح 腦宮 一个文傳自伏生後推察邕石 派 رست {-j. 昧 谷, 不古不 劓割 削 仓 孔敍三宗以 書與鄭名目 無 縢諸篇 一言子写量整空者耶 頭 صا 今非伏 鄭作 底刻, 篇中多載后稷 多 非孔 與與 柳谷 | 互異其果安國之舊耶古文 古文說 华 安國 子雲親見 釤 少爲 丽 古 注論語 經所勒 文既 許 欲 先後 心腹腎 倾 别 與契之言揚子 古文故有 説 班 爲 不 文解字 孟 碑以 同 者 予小子 矣石經 家之學 堅言 高宗之 腸, 得 然則 傳敍 其正今 亦云 鄭 此 履, 者 司 爲 殘 作

尚書志第三

则云 平? 此僞 千古之大疑蕭山 逸篇不免干慮之一失义史記漢書但有安國上古文尚書之說並無受詔作傳之事, 罅然終不能以强辭奪正理則有據之言先立於不可敗也元和惠棟定字遂; 11: 之說續加考證成古文尚書考二卷以益闡明鄭玄二十四篇之即孔壁真古文焉然 一家之注隋書藝文志尚皆著日稱 周至 小子 傳義 肅對 得二十九篇與伏生數分非別有一 為王而何? 本鑿空之顯證亦辨僞本至要之肯綮乃置而未言亦稍疏略然反覆釐 親 魏明帝乃取家語孔子曰「所宗者六」之語肅以前未聞 1 也言紂至親雖多不 履 與王 而不賢不忠則誅之管。宗是也仁人謂箕子微子來則用之。」於尚書則云 □云云非眞古文湯語蓋斷斷也其注『 」可謂信而有徵矣惟若據謂馬鄭注本亡於永嘉之亂則殊不然考 肅注合乃孔竊王非先有孔。而王取之也漢儒說六宗者人人各異。 毛奇齡 大可好為駁辨乃作古文尚書冤詞八卷百計 如周家之多仁人。」其詮釋相懸絕 \_\_\_ 所傳 本注孔氏書也若璩誤以鄭逸者即爲所注之 惟二十九篇 雖有 周親, 』蓋去其無師說者十六篇, 不如如 如此豈一人之手筆 也而偽傳已有之 仁人」句於論 以 抵若璩之 因岩珠 剔,

刊 叉間緝 以注二十九篇义作案以釋鄭義於馬王傳疏之與鄭異者則條析其非折衷鄭氏成 尚書後案三十卷吳縣江聲艮庭又廣集漢儒之說以注二十九篇漢注 他 尚書之學乃煥焉重光其後金壇段玉裁懋堂撰古文尚書撰異三十二卷陽湖孫星 學爲宗證以許愼說文輔以馬融傳誼取僞孔之傳辭而闢之黜其實而存其眞古文 馬鄭古文說之肊造無師授以返於西漢伏生歐陽夏侯及孔安國問政之學此魯 深乃撰書古微十二卷以發明西漢尚書今文之微言大義而闢東漢馬鄭古文之鑿 古文然於今文歐陽大小夏侯之學三家師說之異同者又不暇致詳也邵陽魏源默 衍淵如撰尚書今古文注疏三十卷武進劉逢祿申受撰尚書今古文集解三十卷則 正經文疏明古注棟猶未之逮也由是嘉定王鳴盛西莊搜羅鄭注益以馬王傳疏 書精研故訓成尚書集注音疏十二卷皆因惠棟之說聲則棟之弟子也 無師傳曰「治尙書者知東晉梅賾之僞以返於馬鄭古文本此齊 如古文獨孫星衍持平於西漢今古文而知伏生今文書大傳說之勝於馬鄭 今文與古文異同其中段玉裁於司馬遷史記之異馬鄭者皆擠爲今文說斥 變至魯也知 不備則旁考 而以鄭

尚書志第三

變至道 也」侯官陳喬縱樸園又益采摭經史傳注及諸子百家之說成歐陽夏侯經

說考一卷今文尚書敍錄一卷今文尚書經說考三十三卷實事以求是必溯師承 流以討源務隨家法而參詳考校則亦有取於馬鄭之傳注爲之旁證引伸於是今文 沿

份書之學亦以興廢繼絕惟清李善化皮錫瑞鹿門撰書經通論謂**「馬鄭古文與今** 文駁異當與僞孔同 一不可信者。則與魏源同其趣而與喬樅有取馬鄭之旨微 乖

矣斯亦今文學者之後勁也其他治禹貢者於清儒當推德清胡渭朏明因嘗與閻

好如三江當主鄉康成 "左合漢為北江右合彭蠡為南江岷江居其中則為中江

州之黑水與導川之黑水 一 浮於淮泗達於河, 不可溷而爲一乃博稽載籍及古今經解考其同 』河當從說文作荷「榮波既瀦」當從鄉康成本作播梁 與血 折

禹貢之舊要爲國計民生所繁故於導河一章備考歷代決溢改流之迹而表以圖蓋 古今郡國分合異同道里遠近夷險犂然若聚米而畫沙也漢唐以來河道遷徙,

之依經爲訓章別句從名日禹貢錐指凡二十卷爲圖四

十七篇於

九州山

川形

山山 故首言「鰇塵洪水」繼言「禹乃嗣與」終言「天乃錫禹」則洪範爲體而禹貢 書益爲精密蓋繼事者易爲功也,渭又撰洪範正論五卷大旨以禹之治水本於九疇。 宋以來傳資程大昌毛晃而下注禹貢者數十家精核典瞻此爲冠矣當塗徐文靖位 之象數圖書其辨證前人之說如謂「漢人專取災觧推衍五行穿鑿附會事同纖緯。 爲用互爲推闡厥義乃彰然主於發明奉若天道之理而不爲漢儒之陰陽災異宋儒 其病一洛賽本文即「五行五事」至「五福六極 八字乃爲禹所加與危徵精一之心法同旨初一初二至次九不過是次第名目亦非 儒 龜文所有龜之有文如木石之文理有可推辨又如魯夫人公子友有文在手之類宋 蓋渭經術邁深學有模柢故所論一軌於理而於漢儒附會之談宋儒變化之論成能 更定其病门义洪範原無錯簡而宋儒王柏等任意改竄其病三』皆切中舊說之失 撰禹貢會等十二卷又因渭所已言,而更推尋所未至博擴諸書斷以己意較之渭 創爲黑白之點方圓之體九十之位變書而爲圖以至九數十數劉牧蔡季通紛紜 掃而麻除之也實應成構美卿撰禹黃班義述二卷蓋溪書地理志言一推表山川 ||二十字惟『敬用農用』等十

何書亦第三

所卜祭祀征伐行幸田獵之事故殷先公先王及土地之名所見甚衆上虞羅振玉叔 縣 也! 闢 骨中發見王亥王恆之名及上甲以下六代之世系以甲骨文證補尚書而治尚書者 寧王國維靜安纘成其業成殷卜辭中所見先公先王考續考及殷周制度論各一卷, 言撰殷虚書契考釋兼及書契中所見之人名地名及制度典禮審釋殷帝王名號海 禹蹟期補前書之未備而惜未成書也殷虛甲骨者遜清光緒戊戌己亥間河南安陽 西北五里之小屯洹水厓岸爲水窗而崩得龜甲牛骨鐫古文字所記皆殷先王室 本釋禹資兩漢經師遺說多存其中孺據以釋本經最得家法援機精博顓門之學 元得意者商自成湯以前絕無事實史記殷本紀惟據世本紀其世次而國維於甲 又以班義述詳於考古乃復擬撰禹貢今地釋一書首取今地釋漢地更取漢地證 新途徑爲好事者之所誦說云寫尚書志第三。

其後王澤竭而詩亡魯太師擊次而錄之得三千餘篇及至孔子去其重取可施於禮 昭前緒武王克平殷亂成王周公化至太平誦美盛德踵武相繼幽厲板蕩怨刺並興。 考正也夏殷以上詩多不存姬周始自后稷而公劉克篤前烈太王肇基王迹文王光 之聲發誦其言謂之詩咏其聲謂之歌故古有采詩之官王者所以觀風俗知得失自 治道之遺化雅以爲後世法、頌誦德廣以美之三者詩之體也風有周南召南有邶風 持人情性關睢之亂以爲風始脫鳴爲小雅始。文王爲大雅始清廟爲頌始風者聖賢 義上采商下取魯凡三百五篇日「詩三百一言以蔽之日「思無邪」」詩者持也, 鄘風衞風王風鄭風齊風魏風唐風秦風陳風愴風曹風豳風舊說二南者正風十三 國者變風也上以風化下下以風刺上主文而譎諫言之者無罪聞之者足戒故曰風。 詩者所以導達性靈歌詠情志者也在心爲志發言爲詩故哀樂之心感而歌咏詩者所以導達性靈歌詠情志者也在心爲志發言爲詩故哀樂之心感而歌咏

詩志第四

至於王道衰禮義廢政教失國異政家殊俗而變風變雅作矣國史明乎得失之迹傷

八四

之風言天下之事形四方之風謂之雅雅者正也正言其事言王政之所由廢興而與 情止乎禮義發乎情民之性也止乎禮義先王之澤也是以一國之事繁一人之本謂, 情 宣王 言情謂之賦情盡物者也索物以托情謂之比情附物者也觸物以起情謂之與物動 風之主文譎諫者殊科也政有大小故有小雅焉有大雅焉。頌有周頌有魯頌有商頌。 人倫之廢哀刑政之苛吟咏性情以風其上達於事變而懷其舊俗者也故變風發乎 頌者美盛德之形容以其成功告於神明者也是謂四始詩之至也作詩之法敍物以 情而直體之豳風也忠厚之至小雅也振刷精神宣王小雅也深遠大雅也錦張事業, 變淵靜自守邶風也翩翩有俠氣齊風也憂思深遠唐風也秋聲朝氣桑風也深知民 移風俗不離日用間有福天下萬世之意周南也至誠淳恪秋毫不犯召南也君子處 求合韶武 :者也賦比與三者與風雅頌幷稱爲六義先王以是敬夫婦成孝敬厚人倫美敎化, 「巧笑倩兮美目盼兮素以爲絢兮」何謂也」子曰『繪事後素』曰『禮後乎 大雅也天心布聲周頌也謹守禮法魯頌也天威大聲商頌也孔子皆弦歌之以 雅頌之音詔羣弟子曰「不學詩無以言小子何莫學夫詩」卜商子夏問

十一篇作序此不數六笙詩也子及作序時六一孔子曰「商也始可與言詩已矣」孔子删 人李克克授魯人孟仲子孟仲子授根牟子根牟子授趙人荷卿名兄年五十始遊 時六笙詩 詩授卜商商乃隱括詩人 存歌 之 授魯人曾申子 本旨爲三百 妲。 中授

見於魯 於齊齊襄王時尚卿最爲老師养爲詩禮易春秋而以詩傳魯人毛亨齊人 傅太子戊戌不好學病中公及戊立為王胥靡中公中公愧之歸魯退居家教終身不 父少弟也及秦焚書各別去漢興交爲楚元王而高 人申培公少時嘗與國人穆生白生及楚人劉交俱學詩於浮邱伯交字游漢高 魯詩 南宮呂太后時浮邱伯在長安元王遣子郢客與中公俱卒學中公始爲詩傳 而元王亦撰次詩傳號日元王詩世或有之元王薨野客嗣立爲楚王令中公 祖過魯中公以弟子從浮邱伯 八 浮 邱 伯 。 蒯

同

出 學官弟子行雖不備而至於大夫耶掌故以百數魯孔安國傳古文尚書然亦受詩 弟子自遠方至受業者千餘人而弟子為博士二千石者十餘 人居官皆 有稱

兄漢書藝文志蓋弟子傳錄之口義也疑者則闕勿傳蘭陵王城既從受詩已通事景 公稱高第弟子中公獨以詩經爲訓故以教亡文而有魯故二十五卷魯說二十八卷

|帝為 使束 **賢長孺治詩事博** 辯 悅 1 申 諸 称 詩 払 公時 公對默然然已 鄒魯 春秋 儒 見 儒 經! 有韋氏學東平王式翁思者事免中徐公及許生受詩為昌邑王師昭帝尉昌邑王 **《太子少傅》** 申公爲御史大夫綰臧請立明堂以朝諸侯不能就其 帛 術得綰臧之過以讓上因廢明 雜 **没而瑕丘** 已入 加壁; 大儒徵爲博士給事 論 重 官丞 寫 同 (十餘老對日 安車 玄成父子言之也玄成兄子賞以詩授哀帝至 異 免去武帝初卽位臧乃上書宿衞累遷一歲至郎中令及代趙絈 於石 相。 士大江公異下博 招致即以爲大中大夫舍魯邸議明堂事太皇寶太后喜老子言 以蒲裹輪駕駟迎中公弟子二人乘軺車 傳子玄成 江公盡能傳之徒衆最盛! 渠閣 復以 — 中進授昭 爲治 少翁於元帝時以太常受詔與太子太傅蕭望之及 明經 者 生即 堂 不 歷位 |帝詩稍遷光祿大夫詹事至宣帝世以先帝師 江瑕 事 在 公丘 故江 稱公 下納臧吏皆自殺 多言願力行 主 及魯許生免中除公肯守學教授魯國章 丞 机。 大及許生兼通 故鄒魯諺 何 如 從至見上上問治亂 大司 事乃言師申公於是 中公亦病免歸! 耳! 口: <u>\_\_</u> 是時 造子 禮尚書以詩教授號 馬車 騎將 上方好文辭見 武金蒲 中公卒以 軍。 由 窳, 亦嘗 是魯 iE 上使 不如 經

獄當 嗣 陳之也臣以三百五篇諫是以亡諫書」使者以聞亦得減死論歸家不敎授沛郡薛 於忠臣孝子之篇未嘗不爲王反復誦之也至於危亡失道之君未嘗不流涕爲王深 登堂頌禮甚嚴試誦說有法疑者丘蓋不言諸博士驚問何師對曰「事式」皆素聞 廣德長卿山陽張長安幼先事式後東平唐長賓沛褚少孫亦來事式問經數篇式謝 至江公著孝經說心族式謂歌吹諸生曰『歌驪駒』驪駒者逸詩篇名客欲去歌之 其賢共薦式詔除下爲博士式徵來衣博士衣而不冠曰『刑餘之人何宜復充禮官』 日『聞之於師具是矣自潤色之』不肯復授唐生褚生應博士弟子選詣博士摳衣 未 既至止舍中會諸大夫博士共持酒肉勞式皆注意高仰之博士江公世爲魯詩宗 也於是式言曰『聞之於師客歌驪駒主人歌客毋庸歸今日諸君爲主人日尚早, 醉逿墜式客罷讓諸生曰「我本不欲來諸生强勸我竟爲豎子所辱」逐謝病免 可也」江翁曰『經何所言之」式曰「在曲禮」江翁曰「何 以行淫亂廢昌邑羣臣皆下獄誅惟中尉王吉郎 死治事使者責問曰『師何以亡諫書』對曰『臣以詩三百五篇朝夕授王至。 中令龔遂以數諫減死論式繁 狗曲 也! 二式恥之

詩志第四

遷御 歸 不爲愚! 望之爲御史大夫除廣德爲屬數與議論器之薦廣德經行宜充本朝爲博士論 天子之位: 過以 傳孝景時以治詩爲博士與黃生爭論於上前黃生日『湯武非受命廼殺也』固日: 者上下之分也今桀紂雖失道然君上也湯武雖聖臣下也夫主有失行臣不正言匡 歸湯武湯武不得已而立非受命爲何」黃生曰『冠雖敝必加首履雖新必貫足何 尉陳留許晏字偉君初受魯詩於王扶改學曰許氏章句儒林諺曰「殿上成羣許偉 終 不然夫桀紂荒亂天下之心皆歸湯武因天下之心而誅桀紂桀紂之民弗爲使而 』由是張家有許氏學此又魯詩之支流與裔也齊詩始於齊人轅固固作詩內外 **冷寒天子反** 於家弟子薛廣德溫雅有醞藉以魯詩教授楚國襲勝君賓襲舍君倩師事焉蕭 有張唐豬氏之學。張生兄子游卿為諫大夫以詩授元帝其門人王扶爲泗水中 史大夫而張生唐生楮生皆爲博士張生論 』 途罷寶太后好老子書召問固固日「此家人言耳」太后怒曰「安得司 非耶』於是上曰「食內毋食馬肝未爲不知味也言學者毋言湯武受命 因 過而 | 誅之代立南面非殺而何||固日「必若云是高皇帝代秦即 石渠至淮陽 中尉唐生楚太傅由是 石渠,

詩志第四

疾発武 空城 齊以詩顯貴皆固之弟子也魯人夏侯始昌最能傳固學始昌亦事公孫宏以齊詩尚 固 書教授自董 川 陽之占元帝 太傅后蒼字近君東海人也事夏侯始昌始昌通五經蒼亦通詩禮而詩有齊后氏故 之長倩 經賢者見經 十卷齊后氏傳三十九卷見漢書藝文志爲博士至少府授學同郡翼奉 公孫弘固弟子也亦徵仄目視固固曰: 利 道 「臣聞之 聖人 兵下固刺彘正中其心彘 日書子 上述家以偶 帝初即位復以賢良徵諸儒多嫉毀日『固老 匡衡稚珪三人經術皆明衡爲後進望之施之政事 見道 然後 師日: 仲舒韓嬰死後武帝得始昌甚重之時昌邑王以少子 初即位諸儒薦之徵待詔宦者署言事數驗宴見天子敬焉自稱於天子 然後 知人道之務則詩書易春秋禮樂是也易有陰陽詩有五際 『天地設位懸日月布星辰分陰作定四時列五行以視聖 知 王治 令法 也爲 之象故畫州 13 應手而 迺使固入圈擊彘上知太后怒而 倒太后 土建君臣 『公孫子務正學以言無曲學以阿世 無 如 何。 立律曆陳成 』罷歸之時固已九十餘矣。 上以固 而 奉惇學不仕好律曆陰 原直拜為法 敗以視賢者 固言直無辜; 愛爲選師始昌 清河 少君蕭望 人名之; 二諸

於此則有變改之政也。春秋有災異皆列終始推得失考天心以言王道之安年戊亥也陰陽終始際會春秋有災異皆列終始推得失考天心以言王道之安

穴處知雨亦不足多適所習耳。」以郎中爲博士諫議大夫由是齊詩有翼氏學最爲 方臣奉竊學齊詩聞五際之要十月之交篇知日蝕地震之效昭然可明猶巢居知風, 危至秦乃不悅傷之以法是以大道不通至於滅亡。一今陛下聖明深懷要道燭臨萬

博士白奇又從始昌族子夏侯勝問論語禮服京師諸儒稱述焉宣帝聞望之名拜為 后蒼高第弟子者也蕭望之好學治齊詩事后蒼且十年以令詣太常受業復事同學

授皇太子即元帝也尋拜前將軍受遺詔輔政領尚書事匡衡於望之爲後生然好學, 調者累遷至二千石<u>寖</u>益任用以言事見罪遂見廢不得相爲太子太傅以論語**禮服** 

太常掌故調補平原文學學者多上書薦衡「經明當世少雙今爲文學就官京師後 尤精力過絕人諸儒爲之語曰『無說詩匡鼎來匡說詩解人頤』**衡射策甲科除爲** 

進皆欲從衡平原衡不宜在遠方。一事下太子太傅蕭望之少府梁邱賀問衡對詩諸 而皇太子見衡對私善之元帝卽位以爲耶中遷博士給事中爲太子少傳數上疏陳 大義其對深美望之奏「衡經學精習說有師道可觀覽」宣帝不甚用儒遣衡歸官。

詩志第四

家世多 受詩於師以 誦說 便宜及朝廷有政議傳經以對言多法義遂拜丞相封樂安侯子咸亦明經歷位: 論語於金華殿中詔伯受焉卽通大義又講異同於長安許商長伯累官侍 意 夫禁中設宴飲之會怕言『詩書淫亂之戒其原皆在於酒 不見班生今日復聞讜言』 往往見於他書不知果韓生原書否也張趙問言詩者由韓生韓生孝文時爲博士景 家世傳業 丹經爲 君都爲詹 而 的有法拜為 作 爲 十六卷韓說四十一卷見漢書藝文志祇存外傳析十篇其及經蓋寡 {内 丹以妹為 博 世儒宗德爲國黃耆 外傳數萬言其語頗與齊魯間殊然指歸 事授九江張邯瑯琊皮容皆至大官徒衆極盛 士 而丹爲哀帝 《中常侍時· 者由是齊詩有匡衡之學衡授瑯琊師 成帝倢仟帝舅大將軍王鳳薦伯宜勸學召見晏昵殿容貌甚 上方鄕學平陵鄭寬中少君 大司空以言事不合上意策免尚書令唐林上疏爲訟直 一途罷酒此齊詩之學也韓詩出自燕 <u>\_\_</u> 尤爲有名由是齊詩 則一有韓內傳 有師 河內張禹子文朝夕入說尚 丹公仲伏理族君潁川滿昌 丹伏理之學長安 理以詩授成帝爲高密 人韓嬰嬰推詩人之 四卷韓外傳六卷, **歎曰『吾久** 中 光祿 班伯 而 九卿。 遺 君 麗, 書 少

帝

之武 時 孝宣 至 帝 時嬰當與董仲舒論於上前, 時 山 涿郡韓 太 傅; 亦 生其後 以易授 人推易; 迎; 以易徴待韶殿中日『 其人精悍處事分明仲舒 意 前 爲 之傳燕趙 所 間 好詩故其 不能難也後其孫 易微; 唯 韓 也; 氏 南 日傳

·韓 ·詩, 博 生 諁 易 不 如 丽 韓 好之卽更從 氏易深太傅故專傳之。一司隸 受焉顧韓生之易 卒不傳韓生之詩授之淮南賁 校尉蓋寬饒 本 受易即先太傅 受易於東海 孟喜見 生, 所 河 傳 內趙 涿韓 當

誼 而 符詔 趙 倫 者; 子以授同 久不 竊 以臣 進 聞道於 郡蔡誼誼以明經給 見 誼 上疏 先 師, 日: 自 臣 托 於經術 Щ 事大將 東草萊之人行能亡所比 也願 軍 陽清 衛青幕府昭帝時詔 閒之燕, 得盡 容貌不 精 求能為韓詩者 思 於前 <u>及</u> 衆; 然 上 加 不 見 棄

郡 誼 食 說 辯; f 公 甚悅擢爲光祿大夫給事 與 瑯琊王吉子陽吉爲昌邑王 中進授昭帝數歲 中 尉。 丽  $\Xi$ 好 累拜丞相封陽平侯傳其 遊獵。 驅馳 國 中動作 無節 〈學於同 吉 引

詩 F. 疏 諫 爭 甚 得 輔 弼 之義; 雖 不 治 后民國中*莫不*對 敬 重焉 昌邑王 敗 吉以 罪 廢宣

部 徴 刺 起 史而 爲 博 順授東海髮唱豐授山陽張就皆至大官徒衆尤盛由是韓詩有王食長 諫 大 夫而食子公亦為博士授 泰山 栗豐吉授淄川 長孫順順為 豐

鵨 志 第 Ш

韓三家 害或辭 故訓 與 取春 荷 夏 JE. 文 讀詩 以毛萇 卿 傳三十卷多記古文倍詳前! 惟 而 夏序}詩 秋, 用 道精以授趙國毛萇時 丽 剘 不讀序, 與齊韓魯詩三家並立學官置博士然齊轅固燕韓生之師說莫詳 用今文漢書藝文志 順 溯之子夏於三家爲 **宋雜說** 咸 稱略视 逆 爲之長授同國 顧 而蔡 爲 夏序詩篇義各編遭戰國至秦而南陔六詩亡亨乃引序各冠篇首作 而 毛 大邕 别 詩 無本之敎 不 達, 建 要 非 不得置 丽 其 同魯|魯 唐書藝文志稱詩而所作獨斷 明乎 本義 心讀詩與: 博 貫長卿長卿投齊 與不 有 人謂亨為大毛公萇為小毛公二毛公詩用古文魯齊 載 世 士與三家 典或引 一詩經 次 據 得 得 也。 记而儒 魯國 序而 失之迹而吟咏情性有以合乎詩 中或假借 亦獨河間 同 二十八卷魯齊韓三家毛詩二十九卷』是 毛 不 詩魯 讀 下碩 商三 者 人解延年延年爲阿武令授號徐敖世 本蓋今古文殊也惟序用子 亨亦受學荀 故 힜 序十韓一 爲 訓傳失守之學也 或互訓或通釋或 獻王修學好占於國中 魯 嬰篇 注之 最 卿,以 爲 二二十二二十二句 近何者 毛 一」文簡 別自名家自謂 文生上下 魯申公之學傳 卷與 入 是毛 立 之本旨故 夏, 而 其爲 毛氏詩 則 義膽, 而

哎

日

齊魯 光武 列 授 |文, 於漢廷 其九世祖勝傳尚書所謂 原 遷常 祿 授。 數 世光武卽位, (明齊詩) 光武 中興 高 韓毛今古文 百 大 拜恭爲司 八夫翻以: 詡 山 (成帝時) 一爲置 立 即位, 者 太 季 间自 五 改定 本之徐敖敖授 守敦修學校教授不 父任 · 空儒者以爲榮初父駢章句繁多恭迺省減浮辭定爲二十萬言旣 一再徵爲博士尋拜大司農在 經 博 知 又並立詩齊魯韓毛一 程博士易施孟梁邱書 以父 士焉。 其 章 湛 句作解說 爲 名 曾祖父嘉以魯詩授元帝仕上谷太守。父容少傳嘉 王莽 任爲 儒 郎 舊 中, 篡漢 九江 博士 臣, 濟南伏生者也自父理學詩匡衡 世傳為詩以信行淸操知名王莽篡位父子稱盲 九篇位 才堪 輟由是北 第子王莽敗倉猝1 位, 陳俠; 宰相, 以 陳俠 至 丽 徴 俠 光 州多爲伏氏學明帝 爲 朝以方正 祿 於平帝之世公車 拜 尚 游 勳黯子恭字 學 書 大夫授詩 毛詩 大 再 兵起天下**驚擾** 稱。而 小戴春秋嚴顏皆 遷 大司徒, 初不 叔齊太常試 齊詩世家稱哪那代湛 大顯! 九 別自名學 徵說詩自是毛詩 時天子 江謝曼卿為詩訓。 封 於時 陽都 而 湛 傳業 魯詩 臨 用 經第 學哀 侯。 獨 晏 今文獨 辟 弟黯 於湛, 雍於行 平間 逃不 世家, 一拜 然 字稚 不 始 仕 教 惠 廢 爲 旣

詩 志 第 四 Ш

陽

張

太

Щ

都

尉

夏恭

敬

國雲

陽

令扶

風

朱 勃

土

會

稽

趙

曄

長

君

閬

朗

仲

屯

騎校

尉

山

陽

行 饗禮, 氏 章句二 遂 拜 十二 恭 爲三 一卷見隋 ||老於詩學最爲儒宗也韓詩 書經籍志漢傳父業尤善說災 世 家, 稱 (異纖 淮陽薛漢公子; 緯教授常 世習 數百 入光 韓詩,

宗 有薛 武 叔 度, 刨 一角稽澹 <del></del>位, 爲 .博士受詔校定圖 臺敬伯 鉅爬 韓伯 讖當世言詩者推漢爲 高最 知名而 撫 **汗**尤 高; 長! 傳漢 第子 犍爲 學定韓詩 杜撫 章句 叔和 弟子 京兆 干 廉 餘 范

所 作 題, 云下 林有 撫脫 詩按 通華 議陽 說國 志 文約義 通 學者傳之日 1社君注。 此 魯齊韓三家詩

諫 世 議 也其它治魯詩者日太傳 大 夫沛 陳宣子興 大 鴻 臚 會稽 南陽卓茂子康 包咸 子 良 、騎都尉 時 司 徒扶風魯恭仲康及弟侍 任 城 魏 應君伯 侍御 中丕叔 史豫章 陵 陳

重 景 公 南 頓令豫章雷義 仲 公, 太尉 汝 南李 咸 元章處 酇李 炳子然, 瑯琊 傅 陳

叔 本 调, 廣漢景鸞漢伯, 大鴻 魯峻 仲嚴治 臚 潁 JII 齊詩 陳紀 元 者, 扶風 長沙太守 馬援文淵處士 汝 南 郅 惲 蜀 郡

者;

百

伏

波將

軍

章, 末 叔 方治韓詩 陽處

文 義 梁國 祿 勳 壽春召 馴 伯 春 五 威太守安定 李恂 叔 英 肌 中豫章 唐 檀 中令巴 產,

国 文通遼東屬國都尉北海公沙穆文乂處士汝南廖扶文起 車騎將軍巴郡

兆 草 見隋書經籍志則非篤信 馬 於 傳 毛 南 十卷謂之日箋鄭箋行而毛 心中興 卷 緄 時 義 融 % 郎 卷毛詩問難二卷毛詩奏事一卷以申毛難鄭益闡毛義撰毛詩注二 叉 著休明皆有名字 季長始 愼 鴻 若 有 書經籍志 劉 (之)初學 有 隱略, 叔重 異同 卿, 瑶 侯苞者作 大 撰 炎漢祚 將軍安定梁商伯 (毛詩義 則 亦稍稍治毛詩然在廷諸臣猶崇韓故兼習魯訓而作毛詩傳者自扶 也北海鄭玄康 不知 毛詩於謝曼 更表 -韓詩翼 於義 衰三 明; 如 四卷毛詩箋傳是非二 載在史策而韓詩極盛趙曄受學杜撫撰韓詩譜一卷詩神 一國分 於 三 有 要十 卯 何獨太常東海 學昌三家微矣然鄭箋 戊 毛者也獨宏作毛詩序善得 不 崩 夏, 同即 初從 丽 達作 魏有 卷見隋書經籍志獨 司 東郡 空 下 · 已意 齊魯韓詩 太子文學東平劉楨 河 張恭祖受韓詩既 內 一卷謝 杜 王 而 爲識 肅 喬 叔榮大尉 沈撰 與毛氏異同又有毛詩雜議難 兼用韓魯以補缺拾遺於毛與 别, 雍灼知鄭箋之異毛撰 東海 毛詩注二十卷毛詩釋義 如 風雅之旨河南鄭衆仲師 **今人之簽記積** 公幹撰 衛宏敬仲扶風賈逵景伯 宏農劉寬 事馬融治詩乃一於宗毛 毛詩義問 文饒, 一十卷而司空 而 毛詩 東 成 帙, 海 + 義 相 卷 凡 狄

東萊王基伯奧撰毛詩答問駁譜合八卷見隋書經籍志其中毛詩駁五卷則申鄭玄

而難 有太常卿徐整撰毛詩譜三卷侍中韓昭侍中朱育等撰毛詩各雜問七卷見隋書經 王肅者也由是毛詩有鄭玄王肅二家之學此魏之治 毛詩者也吳之治 毛詩者

籍志皆不傳獨太子中庶子烏程令吳郡陸磯元恪撰毛詩卓木蟲魚疏二 輯佚廑存蓋蟲魚草木今背異名年 代迢遙傳疑彌甚而磯去古未遠疏 解猶 一卷爲後人 爲得眞

故也蜀之治毛詩者無聞而治韓詩者魏有 後來之箋毛者咸以璣書爲據也末附四家詩源流四篇而毛詩爲特詳者則宗毛之 河東崔琰季珪吳有會稽都尉廣

張紘 子綱蜀有大鴻臚蜀郡杜瓊伯瑜安漢令蜀郡何隋季業而杜瓊著韓詩章句

中尉

陵

餘萬 詩雖存亦無傳者儒生洲誦獨有毛詩而鄭王吳說攻難互起長沙太守孫毓撰毛詩 言至崔琰晚事鄭玄常亦兼習毛故者也齊魯之詩學者耗矣亡焉晉禪魏

異同 |評 河東郭璞景純撰毛詩拾遺 十卷恢張王說 而徐州從事 一卷給事耶楊义撰毛詩辨異二卷毛詩異義二卷 陳統 义明鄭義作難孫氏毛詩評四卷其它宏農

具 見隋書經籍志疑义毛公之補缺拾遺者也宋齊梁陳繼晉而作言毛詩者則宋有

中散 濟撰 州 金紫 詩義疏二 業瓊所注立義多異凡二十卷謂之業詩雖世所不行然於毛詩極盛之後卓然別 文帝撰毛詩十五國風義二十卷桂州刺史崔靈恩集注毛詩二十四卷給事郎 魏之安豐王元 卷毛詩集小序一卷信都劉焯士元撰毛詩義疏二十九卷國子助教餘杭魯世達 騎常侍沈重 毛詩章句義疏四十卷毛詩并注音入卷其間聰穎特達日焯日炫並稱二劉箋毛疏 刺 顧軟撰毛詩集解敍義一卷梁有武帝撰毛詩發題序義一卷毛詩大義十一 光祿 史阮珍之撰毛詩序注一卷齊有處士劉獻撰毛詩序義疏四卷毛詩編次義 大夫徐廣撰毛詩背隱義 毛詩檢漏義二卷處士陶弘景毛詩序注 而不欲爲毛公之輿臺亦可謂畸士也北學宗毛無殊南朝其著有成書者則 一十卷具見隋書經籍志皆謹守毛公而爲之箋明疏證其義爾獨宋奉朝請 大夫何偃撰毛詩釋一 撰 毛詩義疏二十八卷隋有太學博士景城劉炫光伯撰毛詩述義四 延明撰毛詩誼府二十八卷太常卿劉芳撰毛詩箋音證十卷蕭歸 卷通直郎雷次宗撰毛詩序義二卷毛詩義 卷奉朝請孫暢之撰毛詩引辨一卷毛詩序義七卷 一卷何胤撰毛詩隱義十卷舒援 卷簡 卷校 撰毛 謝曇 自

墨, 惜 删 箋, 也, 云『案鄭詩譜意大序是子夏作小序是子夏毛公合作上商意有不盡毛公足成之。 也 篇之小序子夏惟裁初句耳『葛覃后妃之本也』「鴻雁美宣王也』如此之類是 毛 亦足以神參證焉然自孔穎達而後說詩者莫敢疑毛鄭雖老師宿儒亦謹守小序至 一差忒 撰定毛詩正義四十卷而鄭學日章王注以熸其書以劉焯義疏劉炫述義爲藁本, 詩指 者負恃才氣輕鄙先 其所繁增其所簡 文 或云『小序是東海 至 大成終唐之世人無 而 下皆大毛 未 又儒擢秀幹於一時騁絕轡於千里固諸儒之所揖讓日下稱爲無雙者 **党勘其** 用之邦國焉, 卷乃据鄭詩 公自以詩中之意而繁其辭云爾雖佐證未備 會同, 而草木蟲魚則取裁陸磯之疏故能融貫羣言包羅古義集 時有 達同其所異異其所同, 異辭惟穎達正義之於詩序引舊說云「起「關 衞敬仲所作。 **』名關睢序謂之小序自「風風** 譜意而定小序首句爲子夏所傳其下爲 **顚躓至唐貞觀** 具列 兩說而不爲論定蓋其愼也獨成伯 十六年詔國子 或 應 略而反詳或宜詳而 也」訖末名爲大序」沈 祭酒 而決別疑似 孔穎達等 毛萇所續。 雕 更 於說 因 略, 后妃之德 鄭玄之 準 謂 也所 **興撰** 、毛學 詩者 其 繩

|宋而 經倀假於去聖人千百年後不見先儒中間之說而欲特立一家之學者果有能哉吾 術亦復湛深撰毛詩本義十六卷其書先爲論以辨毛鄭之失然後斷以己見凡爲說 以論正之。」是修作是書本出於和氣平心以意逆志故其立論雖不曲徇毛鄭而亦 未之信也。」又曰『先儒於經不能無失而所得固己多矣盡其說而理有不通然後 然修之言曰『後之學者因述先世之所傳而較得失或有之矣使徒抱焚餘殘脫之 尤不 不得以濫觴之始歸咎於修矣修之門下士眉山蘇轍子由乃撰詩集傳二十卷其說 以詩之小序反覆繁重類非一人之辭疑爲毛公之學備宏之所集錄而不取子夏之 未當輕議毛鄭後之學者或務立新奇自抒獨得甚者删竄二兩則變本加厲之過固 心也臨川王安石介甫與蘇轍同輩而神寒倚界作相置經義局以安石提舉修定其 百 因惟存其發端一言而餘文悉删然轍於毛公之說曰『獨採其可者見於今傳其 有四篇統解十篇時世本末二論國魯序三問而補亡鄭譜及詩圖總序附於後。 新義日增舊說幾廢推原所始實發端於廬陵歐陽修永叔修文章名一世而經 可者皆明著其失」是轍於毛公之學亦未一筆抹殺而務持其平猶之修之用

新 卷大指依據毛公安石 訓其義而 訓其辭者則其子雩元澤蓋亦

新經三書之一 變然多襲其義 也安石 理,而 傳安 又撰字說二十 石 名 物 訓詁之學 卷以 相 者, 輔 翼; 日 山 與三經幷頒學官於是宋之學風 陰陸佃 **慶師**, 们 遊察十元度佃

卷凡十一 安石客下安石壻也佃 類; [釋天釋百穀釋草釋木釋鳥獸釋蟲釋魚釋馬雜釋雜解論者或詆其 作埤雅 **卞作毛詩名物** 解大指背以字說爲宗而卞之書二

外 議 者安石 論 穿鑿徵引擎 Z 新 )瑣碎無 經 詩 義不 **裨於經義然徵引發明有** 傳; 丽 卞之學出於安石; 此 出 於陸機草木蟲魚疏 可以考見安石 新經詩義之一 孔颖 達 ıE 斑 義

焉。 南 然安石 宋前 田 鄭樵漁伸始乎樵之學雖自成 新經詩義於毛公尚少訶辭而詆毛公廢詩序毅然力持昌言不忌者其自 一家而師 心自是撰夾漈詩傳辨妄二十六

卷, 廢; 大指以 致今學者只憑毛 爲 毛 詩 氏且以序為子 自 鄭 毛既箋之後 夏所作, 而學者為 更不 · 敢擬議蓋 信 康成故此書專行齊 事 無兩 造之辭, 魯韓一 則 獄 有 偏

之惑 **過極言毛序之** 不 可偏信 也然設以聽訟 爲 喻詩者其 事 也齊魯韓毛 則證

之人也毛詩 本書具在 流傳甚久譬如其人親身到官供指詳明具有 本 末者也 齊魯

者以 時淺 中無 用鄭樵之說也然考朱子注詩蓋兩易稿其初藁全宗小序卷首自序作於淳熙四年, 如出一 允也既朱子撰詩集傳二十卷而殿以詩序辨說以大小序自爲一 無 能 改從鄭樵而自變前說而祖謙仍堅主毛鄭故祖謙沒朱子作家塾讀詩記序稱「少 可 三家本書已亡於他書中間見一二而眞僞未可知譬如其人元不到官义已身亡, 」者卽採朱子注詩初稿說也朱子與祖謙交最契其初論詩亦最合顧朱子晚年 親 追 置 平於祖謙之故見自封然迄後攻序宗序兩家角立相爭而不能以偏廢嗜祖 陋之說伯恭父誤有取焉旣久自知其說有未安或不免有所更定伯恭父反不 語斥小序蓋猶初藁之序金華呂祖謙伯恭撰呂氏家塾讀詩記中引了 對徒得之風聞道聽以爲其說如此者也今捨毛詩而求證於齊魯韓猶聽 不絕也祖謙書三十二卷博採諸家存其名氏先列訓詁後陳文義鄭載貫穿, 身到官所供案牘爲不 手有所發明則別出之斷以闡發詩人「躬自厚而薄遺於人」之旨蓋宋儒 疑於其間熹竊惑之方將與反覆其說以求眞是之歸而伯恭父已 可信乃採之於旁人傳說而欲以斷其事論者 編而辨其是非蓋 下世 示以 朱子

詩學之詳正未有逾於祖 謙 者也惟公劉以後編纂二備而條例未竟學者惜焉! 崇德

輔 廣 -f-漢 卷 卿 大指 者, 初從 主 於掊擊詩序羽翼詩集傳與 呂祖 謙 遊後 復從 朱子譜 學, 祖 刨 世所稱 謙 說詩之宗序 慶元 輔氏 者 心顧 不 同。 輔氏撰 而 慶元 王 詩 應 (童

麟 伯 數條蓋韓詩最後亡唐以來注書之家引其說者多也。反之輯三家詩者或訾應 厚 旁採 , 諸書所 引齊 魯韓三家詩逸文撰詩考一卷中採韓詩較夥齊魯二家厪

應鱗 腱粪 為 爲 未 備。 庸 然占書散佚蒐採爲難。 也自序稱: 漢言詩 ||者四家| 後 人 踵 師 事 增修較創作 異指殊 買逵 修自易 撰齊魯韓與毛氏異同梁 爲 力篳路艦 機終當 崔

靈恩採三家本為集注。今惟毛傳鄭箋孤行韓僅存外傳而魯齊詩亡久矣諸儒 説

曾 語 門 壹以 毛 人 鄭爲宗未有參考三家者獨朱文公集傳多從韓詩 『文選注多韓詩章句 欲寫 出。 應麟竊 觀 傳 記 所述 洗 三家緒言 末師專己 J守殘之陋。 一份 多

图 羅 遺 **佚傳以說文爾雅語書萃為** 編以扶微學廣異義亦文公之意云爾讀集 傳

孔子 〈有考於斯。 無邪之旨 而據後漢書之說以小序爲出自衞宏不足深信 亦朱子集傳之羽翼 也慈谿楊簡敬仲撰慈湖詩傳二十 要與朱子無大殊其 卷

詩 志第四

旁徵遠引曲暢其說其考核六書則自說文爾雅以及史傳之音注, 葵之」之葵爲有向日之義問有附會穿鑿然其於一名一 它箋釋文義, 至篇中所論謂左傳不可據謂爾雅亦多誤謂鄭康成不善作文甚至自序之中以大 訓 蓋簡之學出陸九淵九淵固謂 學之釋洪澳爲多牽合而詆子夏爲小人儒斯又大言炎炎而爲朱子之所不敢出者。 學也然簡之放言自恣無所畏避尙不如金華王柏魯齋之甚也柏之學雖淵源於朱 章 爲 **削之其以行露首章為** }王 話則自齊魯毛韓以下以至方言雜說無不博引可謂折衷同異自成一家之言者 風 不類獨著其疑也主於召南删野有死醫邶風删靜女鄘風删桑中衞風 漢儒 而撰詩疑一卷則攻駁毛鄭不已併本經而攻駁之攻駁本經不已义併本經而删 删 所妄補 大車丘中有麻鄉風删將仲子遵大路有女同車山有扶蘇縣分狡童褰裳手 如以『 狮! 聊樂我員」之『員』爲姓以『六駁』爲赤駁之譌以『天子 其詞 亂 入據列女傳為設猶有所 與谷風 \_\_\_\_ 學苟 和同; 知道六經皆我注 似乎 移綴以下泉末章爲錯簡謂與上三 不也以 脚」而朱子尚信 物一字 小弁「 無逝 無不 一句必斟酌 悉蒐其訂正 我 删氓 梁 經傳道問 <u>ا</u> 有狐; 法取, 四句

名物鈔 日(采 傳口/陳 瑾 疑 敢 乃淺識之人所作則更直 爲 {小 海門 雅 者, 公論 各 刻質}風 問不 毛鄭是宗歐陽修蘇敞而後別解漸生鄭樵朱子而後異**城**高 间 也元儒 之墠 唐權輿當日夏屋大東當 粲 者止 未 删旧 《然整潔。 八 脱三 所不 循 FI. 政 東 遽信 門 {風 《卷考訂名物音訓咸有依據信足以補 其十 支演 許, || || || 淵 金華許縣盆之 了矜野 猗筍 乃托訶 池 旈 说, 源 I 者 疑 東門之粉東門之楊 亦 面 义日『小雅山 政厅 所 坦 出朱子撰詩傳 移之篇 於漢儒之蠶入至於謂 有蔓草溱洧; 兼 辨 謙存 |排孔子删定之失當不復托詞於漢儒矣此又楊簡之所不 稱 πĪ **闫**小東。 故實; 已放之鄭聲· 受學於王柏前 山雖未具 中凡雜以怨誹之語, 泰風 雖證 通釋二十卷發明 沙 <u>\_\_\_</u> 則幷篇名改之矣顧柏 删晨 列; 有鵲巢月出 實 其降雅為 世! 蹈 識見 於 相 頭人第二 (風; 虚 朱子之 不 詩 集吳 疑 同, 集傳 然義 {風, 可謂不雅予今歸之王風; 株 删 放闕馬! 東方之日 林澤 章形容莊姜之色太褻黃 已 所 與輔廣 欲 理 明言之矣叉曰: 陂凡二 删 世 同時有安福劉 之國風 鈔傳 亦 蓋宋以 (詩童子) 自 序爲 店 一十二篇。 然謙撰詩 張迄末年乃古 知 )風 三十二篇 誕斥 删 削 問 綢 桑中當 之說 聖經 ※ 所按 相 同 瑾 且 使 或 則

義 黜 林 學士 傳 而 新 逋 釋, 學 立; Wi 等 故 書 有元 泰 其 尤 著 代之說 者 也至仁宗 沉詩者如 一十卷亦· 行 無 科 非朱傳之箋疏。 舉法定6 主於闡揚朱傳遵憲典也然元 爲 功 **令**。 許 謙 之詩集 明制 因之永 傳 名物 樂問, 鈔, 行 劉 瑾

師 翰 文以 傳, 有所 應 || 胡廣 闡 詔。 明皆由 此 盐 名 心得。 敕撰詩經大全二 為 官撰, 明則靖難 IJ 本 劉 瑾 以後耆儒宿學略已喪亡廣等 之詩 傳通 釋而稍損益 之惟 改 無 其 ul 興 中 謀, 人篤守 瑾案 乃 剽竊

例 一字爲 面 已自是宋 劉 氏 學昌而漢義絀朱傳行而 11. \_\_\_ 义 劉書 以 小 序分隸各篇是書 毛詩 廢矣然明儒詩學亦有宏究漢義, 則從 朱子舊 本合爲一篇 小變其 而

宗朱傳者監利 呂 加 謙 讀 詩 記 嚴粲 李先芳伯 詩 絹。 其自 承撰 序曰: 一讀詩 私記 文公謂 一卷釋義 小序 不得 多從 小雅之 毛鄭; 毛鄭 訊 有 舉 所 難 而 歸 通 則 刺 馬

端 主 臨罰文公不得鄭衞之風, 家, 放議 論宏通 絕 無 园 分門 舉而歸 戶之 之淫胥有然否 見 如說鄭風 子衿 不自揣量折衷其 仍從 學校 之義, 間。 則 一蓋 不 取 宋學;

謂 或 風 可否蓋小序皆以為 小 雅 初 無 變止 之名, 則 刺幽王義有難通而集傳所云义於古無考故闕所疑也, 不 從漢 說; 至楚茨 南 <u>}</u>Щ 等 四篇, 則 小序 與集 傳

詩志第四

旨意也。 文志 謀 雖 卷則統: 次爲 似失之穿鑿然謀瑋 所異同其間自立新義者**,** 前 }傳 也。 出應舉窮經久分兩事。謀瑋生長帝室不藉應舉為進取乃得以研究遺文發揮古義 接據不 瑋 十卷前二十四卷依 經術盛衰之故此亦. 專門之學也所辨正者惟朱子集傳爲多歐陽修詩本義呂祖 而 載詩類有魯故齊后氏故 鬱儀撰詩故士 經話五卷分六子目日舉要日考異日正字日 鄭箋佐之其 淪 謀瑋是書蓋用漢儒之舊名故其說詩亦多以漢學爲主與朱子詩集傳多 風 廣時有闕略要其大綱則與鑿空臆撰者殊矣然猶折衷漢宋也明宗室朱 雅頌之旨 名物 卷乃專以 博極羣書學有 訓詁 剘 次 प्रा 解 如以 知其 多以陸璣疏爲主題 經, 一準諸爾雅篇義 毛詩 而不 齊孫氏故韓故毛詩故訓傳顏師古注『日故者道 小星爲暬御 大凡矣迨明之亡也吳江 小序為 根 載經文但表篇目其無所論 柢, 要異乎 入直以斯干為成王營洛周公所賦 主 而考證 |日毛詩明所宗也日稽古| 準諸 剽竊陳言蓋自胡廣等五經 **」辨物** 小序而詮釋經旨則 以 三日數典日 陳啓源長發撰毛詩稽古 舊說其日詩故者蓋 謙讚詩記次之嚴粲 **說則併篇** 」稽疑木為 編 明 目 準諸活 附錄 亦不載; 大全 爲 漢 唐以 之類, 其

0八

故 喜騁虛辨迨淸儒矯爲徵實之學以挽頹波古義彬彬於斯 唐以來之說,亦不主於一人所採諸儒論說自漢唐注疏,朱子集傳以外凡二程子張 者也澄之撰田間詩學十二卷大旨以小序首句為主而 家本無詩注蓋草木鳥獸之名引其埤雅爾雅翼也自稱毛鄭孔三家之書錄者十之 允 子歐陽修蘇轍上安石楊時范祖禹呂祖謙陸佃羅願謝枋得嚴粲輔廣眞德秀邵忠 以審其本末稽之五雅以核其名物博之竹書紀年皇王大紀以辨其時代之異同與 言之尤詳嘗語人日『詩與尙書春秋相爲表裏必考之三禮以詳其制作徵諸三 所 緝 啟源之世亦有兼綜漢宋不主一家者桐城錢澄之飲光吳江朱鶴齡長孺其尤著 集傳錄者十之三諸家各本錄之十之四持論 季本郝敬黃道周何楷二十家其中王楊范謝四家今無傳本蓋採於他書陸羅二 入雖未免或有所編然引據賅博疏證詳明, 父次之所抬擊者惟劉瑾詩集傳為甚輔廣詩童子問次之但廣書皆循文演義, 駁惟訓解之辭而瑾書兼辨訂故實故所駁 頗爲 一一皆有本之談蓋明代說經諸儒 多考證之語其堅持漢學不容一語 精核 非有意於攻朱子集傳於漢 而於名物訓詁 爲盛而啟源實先河 山 川 也! 地 傳 然

矣! 至 情事之疑信即今興記以考古之圖經而參以平生所親歷。」亦可見其考證之切實 鶴 齡 則 與陳啓源同里曾序啟源之毛詩稽古編而撰 言詩經通義十二卷則自序

**今古之**間。 稱 鄭唐用孔穎達宋川歐陽修蘇轍呂訓謙嚴粲並世用陳啓源其釋音明用陳第 此書蓋與 」蓋其 放源商権 專主小序而兼綜漢宋與澄之田問詩學同惟甄採較狹於漢用毛 而成。 义称 啓源毛詩稽占編事崇古義此書則 参停於 、並世

義者不 非清儒也清儒之傳經者百推長州惠氏三世以經學著稱而發祥者惠周惕字元龍 用 顧 炎 同然啓源之毛詩稽古編屢稱焉惟啓源鶴齡 武其凡例 九條及考訂鄭氏詩譜皆具有條理雖參用今古與啓源之專 與錢澄之三人者明之遺老而 崇古

別謂 也著有易傳春秋三禮問及詩說而詩說三卷最佳其大旨謂大小雅以音 別不 以 政

以 下爲 正雅變雅美刺錯陳不必分六月以上爲正六月以下爲變文王以上 變調一 南二十六篇皆房中之樂不 必泥其所指何人謂天子諸侯均得有 爲正 [民

魯政 又與錢燈之朱鶴齡之棄採漢宋折衷同異者殊科無錫顧棟高震滄撰毛詩類釋 非僭大抵引據確實樹義深切而於毛傳鄭箋朱傳無所專主多自以已意考證,

博; 注二 貴 齊魯 漢義 者 撰 撰詩毛氏傳疏三十卷毛詩說 二 十 一 撰鄭氏箋考徵而后知毛古文鄭用三家從今文之不同術也析毛鄭之殊恉明音義 詩 卷而 毛 於 有別亦庶幾抒所自得能出新意者然淸儒說經之所爲別幟於宋元者在能宏究 辨明家法其始也闡揚毛鄭古文以破宋儒臆測之談及其旣 卷金壇段玉裁懋堂之撰毛詩故訓傳三十卷詩經小學一 清 棟 傳箋通釋三十二卷涇 韓諸家逸文而駕之晚出毛鄭古文之上至 在 卷蓋 陳與師事段玉裁治毛詩說文以爲鄭康成習韓詩兼通齊魯最 補疏五卷嘉應李黼平繡子之撰毛詩納義二十四卷桐城 儒 高 注禮之後以禮注 也休寧戴宸 此 書 析毛詩名物為 則採錄舊 東原之撰 /詩, 説, 一十一 縣胡承珙墨莊之撰毛詩後箋三十卷崇明 頗爲謹嚴又往往 非墨守一 一卷毛詩傳義類十九篇釋毛詩音四卷鄭氏箋考正 毛鄭詩考正 類而 氏箋中 爲之釋也惟諸家之釋名物者多泛濫 有用三家申毛者有用 四卷考正鄭氏詩譜一卷杲溪詩經補 因 如 以發明經義與但徵故實, 惠戴二氏抒所 卷江都焦循 得 馬瑞辰元伯 也則又旁採今文 三家改 而 後治毛詩箋 陳奐碩甫之 出 **社體同類** 新 理堂之 毛者 義 乏撰 非所 以炫 書 因

青厓 詩考而 之通借, 考搜採-敍錄 斯 精, 魏源 嘉 豧 鳥獸 興馮登府柳東撰三家詩異文疏證一 則 緝, 入闡揚毛 撰齊詩翼氏學四卷而陳喬樅 說, 之議 成 一篇义撰詩經四家異文考四卷齊詩翼氏學疏證二卷蓋喬樅之考據詳 搴擇 草木 迺放爾雅, 魯詩遺說考六卷齊詩遺說考四卷, 輯三家詩拾遺十卷視應麟書為賅備矣然獨未及侯官陳喬樅樸園 之備, 論 宏辨言。 鄭古 · 蟲魚 魏源 末漢之微言置鄭箋而疏毛傳署日詩 駁辨之快; 之細分別部居各爲探索久乃劃除條例章句糅成作疏摛取 文以破宋儒臆 編作義類於 今文者 財稱 顧 有不 切聲音 測 足於 一難焉 東其家 之談者也它如會稽范家相 魏源 卷邵陽魏源撰詩古微十七卷吳江连 晚清善化皮錫瑞鹿門 訓詁之用天 學以父壽祺撰三家詩遺說者未 韓詩遺說考五卷各述授受源 之好 創 毛氏傳疏蓋諸家之尤矜愼 新 地 說; 山 日: 川之大宮室衣服 \_\_\_ 撰詩 蘅 解經是樸學不 洲 經通 之因 宋王 論 流 政 成; 也! 制 ൬ 浴卷! 光秦 一應麟 博, 鶴 百 冠 次 稱 與 用 以 第 ||陳

採

<del>个</del>文齊

魯韓諸家逸文而欲駕之晚出毛鄭古文之上者也此外又有

H

思解經

須

確憑,

不得任臆

説也。

然其右今三家

而

抑毛傳,

實與魏源同指。

斯

义旁

連江陳第季

---

曲爲 不 聃追跡三代之禮曰「夏禮吾能言之祀不足徵也殷禮吾能言之宋不足徵也足則禮是也及周之衰諸侯將踰法度惡其害己皆滅去其籍於是孔子適周而問禮於老禮 不 皆周朝之官書也獨禮記自孔子門人弟子著所聞見微言授受協諸義而協經天緯 故 益 吾能徵之矣」然觀殷周所損益曰「殷因於夏禮所損益可知也周因於殷禮所損 窮乎物物必不屈於欲兩者相待而長是禮之所起」而帝王質文世有損益至周 周義 爭爭則亂亂則窮先王惡其亂也故制禮義以分之以養人之欲給人之求使欲必; 禮記自孔子著稱太史公書日「禮記自孔子」者世稱三禮周禮記周官制儀禮 可 之防事爲之制故曰『經禮三百曲禮三千』經禮三百周禮是也曲禮三千儀 知 禮 文編著之圖籍王謂之禮經邦國官府謂之禮法設之於官府而布之於百姓, 也其或繼周者雖百世 起於何也曰『人生而有欲欲而不得則不能無求求』 可知也以一文一質周監二代郁郁 而 無 乎文 或吾從周! 度量分界則不能

未之有, 禮之詳 焉。 故所居堂弟子內後世因 其 其 地 徴 死 子之殁葬 尙 |秦焚書散亡益多於漢獨有士禮士禮亦稱儀禮日士禮者以其爲士之禮稱儀禮者, 涉之難 嬴秦坑儒, 魯諸 講誦 (數, 義 本 公是故三代雖亡治; 之則 也。 史之事 儀 生. 習 可以義起也是禮記之所欲著也夫禮者理之不 太一之初 共 禮 循 魯 文此其所得 初 項籍封 起朝 樂絃歌之音 法 而陳涉之王魯諸儒持孔氏之禮器往歸陳王於是孔甲爲陳涉博 城 北 也」儀禮是也故其數 則 度量刑 儀諸學者多言禮, 泗 魯公及其死楚 上,冢 原始要終體之乃人情之欲 法猶存是官, 與民變革者 辟 大一項弟子及魯 不 廟藏孔子衣冠車服禮器 ·絕; 圖 籍, 木 非孔子之遺化 地皆降漢獨魯不下漢高 也觀 人 知其 而魯高堂 百 可陳也其義難知 理之不 義謹 吏之所 人往從 一生最! 守其 好禮樂之國哉故漢 可易者蓋 以 然後知禮者義之實 禮 而 數, 取 冢 固自 諸 而 愼 祿 家者 儒 可易者也周禮之記 也協諸義而協則 秩; 不 以時講 孔 必於禮記之自孔 敢 \_\_\_ 一周禮是也。" 子 帝 損 百有餘室因 舉兵圍 時 益也; 而 禮 (也禮之所命 其 興, 鄊 父子 太常 魯魯 經 飮 失其義陳 大射其 (禮錐: 不 命曰孔里 相 記官制, 具; 子而 中 叔 傳, 孫 先王 諸 以 通, 卒 間

以其記禮之儀文也凡十七篇士冠禮第一童子任職居士位年二十而冠主人玄冠 朝服則是任於諸侯天子之士也。土昏禮第二士娶妻之禮以昏爲期因而名焉士相朝服則是任於諸侯天子之士也。土昏禮第二士娶妻之禮以昏爲期因而名焉。士相

也燕禮第六諸侯無事若卿大夫有勤勞之功與羣臣燕飲以樂之也大射禮第七名。 獻賢者能者於其君以禮賓之也郷射禮第五州長春秋以禮曾民而射於州序之禮 見第三士以職位相親始承摯相見之禮也郷飲酒禮第四諸侯之郷大夫三年大比,

與 於祭也聘禮第八大問曰聘諸侯相於久無事使卿相問之禮也公食大夫禮第九, 大射者諸侯將有祭祀之事與羣臣射以觀其禮數中者得與於祭不數中者不得

主國君以禮食小聘大夫之禮也覲禮第十覲見也諸侯秋見天子之禮也春見曰朝, 夏見曰宗秋見曰覲冬見曰遇喪服第十一天子以下死而相喪衣服年月親疏隆殺

夕第十三喪禮之下篇也:士虞禮第十四虞安也士旣葬其父母迎精而! 之禮而子夏爲之傳焉者也士喪禮第十二士喪其父母自始死至於既殯之禮也旣 反日中 而祭

饋食禮第十六諸侯之卿祭其祖禰於廟之禮也有司徹第十七少牢之下半篇也獨 之於殯室以安之也特性饋食禮第十五特性饋食禮非諸侯之士大祭祖禰也少牢

71六

禮見周官 子|徳 高堂 篇與高堂生同而字多異多三十九篇後世不傳而其篇名頗 而 百三十一篇周官經五卷皆古文舊書不同高堂生士禮之爲今文惟禮古經之十七 釋鄉飲有射義以釋鄉射大射有燕義以釋燕食有聘義以釋聘禮有朝儀以釋覲禮, 云皆升合 百三十一篇者出自孔氏孔子殁後七十二子之徒共撰所聞以爲此記後人各有 |生能| 明堂禮見月令禮器注古大明堂禮見蔡邕論又奔喪疏引逸禮王制疏引逸禮, 古文於壞壁之中逸禮有三十九旣河間上從民求善書得禮古經五十六篇記 爲河間王餘爲魯王顧河間 錄 盐 其中檀弓禮運疑子游門人記中庸坊記表記 之以 撰; 言 於太祖文選注引逸禮云『 或錄舊禮之儀或錄官禮所由 內宰注朝貢禮見聘禮注蒸嘗禮見射人疏中蓄禮見月令注及詩泉水疏, 之而魯徐生善爲容孝文帝時徐生以容爲禮官大夫孝景 爲記蓋士禮之傳也有冠義以釋士冠 王 修學好古而魯王好治宮室壞孔子宅欲以爲宮 三王禪云云五 或兼記體履或雜序得失漢興博士叔孫通 子思所作緇衣公孫尼子制月令 有昏義以釋士昏有鄉飲 帝禪亭亭」皆古經之逸禮 見於他書若天子巡 帝時嘗 酒 封皇 義以 狩

食是。 周之制 作十論 有 者 然奇古與美殆聖於文或以為東周後齊人所作或以為 鄭之刀」 而 以當冬官然百工爲九經之一共工爲九官之一先王原以考工爲大事以之殿周官 四 序官之義有二一則以義類相從如宮正宮伯同主宮中是膳夫庖人外饔同 也獨佚冬官一篇王乃購千金不得取考工記以補之於諸經 地官司徒第二春官宗伯第三夏官司馬第四秋官司寇第五李氏上之河間獻王 制 可以 以釋喪服有問喪以釋士喪有祭義祭統以釋特姓少年有司徹 則次敍一官之屬不以貸卑爲先後而以緩急爲次第故宮正等士官在前內 七難以 度而不及道化嚴於職守而闕略人主之身傳者以爲周公作也其 叉稱 考見古代 排 — 秦無廬 也惟其後闕冬官一篇河 棄之雖入祕府而未傳也獨士禮傳自高堂生而魯徐生乃以善爲 制器尚象之遺焉惟周官雖出孝武以爲 鄭封於宣王時秦封於孝王時其非周公之典己 間工取考工記合成六篇按考工記稱「 先秦書未詳孰是也雖不足 末世價亂不經之書故 中最爲晚 發明 分例 出其 無疑 其義; 主 雖 造

七

客 爲 世 大夫至廣陵內史延及徐氏弟子公戶滿意桓生單次皆為禮官大夫而瑕丘蕭 E其家傳子| 至孫徐延徐襄襄其資性善爲容不能通經延頗能未善也襄亦以容 鲨

宮之曲臺 准 博 陽太守然孝武以前諸言禮爲容者由徐 土 一東海后蒼近君說禮數萬言爲 記號日后氏曲臺記后蒼者嘗 氏焉孝武帝時嘗行禮 射 於未央 學 齊詩

以

禮爲

於魯夏侯始昌 無傳者蒼校書曲臺著曲臺后蒼九篇見漢書藝文志以授沛聞人通漢子方慶普孝 而禮 學則傳之同郡孟卿卿蕭奮弟子也後之言禮者由后蒼而徐氏

公梁戴德延君戴聖次君通漢以太子舍人論石渠至中山中尉普爲東平大傅德爲

卷卽漢書藝文志著錄議奏三十八篇也并羣儒疑義十二卷具見隋書經籍志旣出 信 都 大傅號曰大戴而聖者德之從兄子也號 小戴以 博士論石渠撰集石渠禮論 四

部, 爲 九江 錄囚徒有所舉以屬 **上太守行治** 多不 郡。 法前刺史以其大儒優容之及蜀郡 聖日 後進生 何 知, 酒欲亂 人治! 何武君公爲揚州刺 占皆 無所決武使從 事

其罪聖 雇自免後為; 博 士毁武 於朝廷武聞之終不 揚其恶而聖子賓客爲 **羣盗得** 

武繁治聖自以子必死武平心決之卒得不死自是後聖漸服武每奏事至京師聖

食第 第三其下則郷飲第四鄉射第五燕禮第六大射第七士虞第八喪服第九特牲第十 第八有司徹第九郷飲 次第以冠禮第一昏禮第二相見第三士喪第四旣夕第五士虞第六特牲第七少宰 未 諡 第十七此經篇次第之不同也戴德檢記百三十一篇合明堂陰陽記三十三篇孔子 少宰第十一有司徹第十二士喪第十三旣夕第十四聘禮第十五公食第十六覲禮 四; 逸 一朝記 嘗 蒼, ]法 然各本不 干五 十五篇謂之大戴記而戴聖別删定四十九篇謂之小戴記小戴記傳而大戴記 十五覲禮第十六喪服第十七而戴聖亦以冠禮昏禮相見禮相次爲第一 而 不 王度記三正記別名記親屬記五帝記少年飽食禮注引締於太廟禮號 經十七篇之次第記百三十一篇之去取二戴無一相同蓋戴德傳經十七篇 造門謝恩於是傳者莫不多武長者而韒聖之經生薄行也聖與戴德皆受禮 七篇王史氏記二十一篇樂記二十三篇爲二百十四篇取足以闡明經旨者, 篇其存目自三十九篇 同 或兩七十三或兩七十二其逸文往往見引他書如 酒第十鄉射第十一燕禮第十二大射第十三聘禮第十四公 始無四十三 四十四四十五六十一 班 四篇有 固 白虎通引禮 兩 第二

三體志第五

=

禮注 記皆大戴逸篇也亦有他書引大戴篇名與小戴同而文絕異者如毛詩幽譜正 引王 禮文王世子漢書章元成傳引祭義王式傳稱驪駒之歌在曲禮服 記蔡邕明堂月令論引俗穆篇王充論衡引瑞命篇 應劭風俗通引號諡

禮器; | 映桑篇引祭義曾子問情性篇引閒傳崩魂篇引檀弓王制許愼五經異義引大戴 明堂月令論引檀弓唐皮日休有補大戴禮祭法其文往往爲小戴記所無而大

有恩 **愛**廟篇: 戴記存篇之與小戴同者有投壺哀公問兩篇篇名同曾子大孝篇見小戴祭義諸侯 有義 見小戴雜記朝事篇自『 至 『聖人因殺以制節, 聘禮 」見小戴喪服四制其它篇目尙多同者蓋二戴 至 諸侯附焉 」見小戴聘義本事篇自

四十六篇 三十一篇之記各以意斷取成書故異同參差乃爾後隋書經籍志乃以爲 删大戴之八十五篇者妄也由是禮有大戴小戴慶普之學普授魯夏侯敬

又傳族子咸爲豫章太守而大戴授琅邪徐良斿卿 為博 士州牧郡守家世傳業 小戴

授梁 而榮爲琅邪太守由是大戴有徐氏小戴有橋楊氏之學孝宣帝時河內女子壞老 人橋 仁季卿楊榮子孫仁爲大鴻臚著禮記章句四十九篇家世傳業

屋, 又得逸禮古經一篇合河間王五十六篇爲五十七於是始立大小戴慶氏三家禮。

帝 然考所謂三家禮者蓋三家受諸后蒼所傳經十七篇之禮而大小戴禮記附十七 不 别 時光祿大夫劉向領校中五經祕書向卒王莽以大司馬柄國薦向之子歆宗室有 出; 大小 戴禮 非大小戴禮記亦不以逸禮古經 爲 勝十七篇 而立學官也及孝成

與 材行以光祿大夫貴幸復領五經卒父前業乃以爲「禮 、十七篇文相似多三十九篇及明堂陰陽王史氏記所見多天子諸侯卿大夫之制, 古經者出於魯淹中及孔氏,

雖不能 **治** 也然十七篇古稱士禮其實不皆士禮純乎士禮者惟冠昏喪相見若祭禮則少年 備猶瘉蒼等推士禮而致於天子之說。 」果若所書願是逸禮古經之勝十七

饋食 **}禮** 有司徹爲 諸侯見天子禮; 大夫禮鄉飲射, 並非專爲 士設其通稱士禮者蓋以 ·大夫所通行燕禮大射聘禮公食大夫爲諸侯禮覲 士冠列首途並其下 通 称

而 不復分別耳且士禮何爲不 可推而致於天子也「自天子以至於士庶人壹是

皆以 於天子之說 修 身為 也魯穆公之母卒使人問於曾子曰「如之何」對曰「申也聞諸申之 孔子日二 吾觀於鄉而知王道之易易也」則是孔子推士 禮 而致

父曰『哭泣之哀齊斬之情饘粥之食自天子達』」則是曾子推士禮而致於天子

之說也記不云乎『禮也者義之實也協諸義而協則禮雖先王未之有可以義起也;

何不可推致之有是故知父子之當親也則為禮醮祝字之文以達焉其禮非士冠

可賅也而於聘覲焉始之知夫婦之當別也則爲筓次帨鞶之文以達焉其禮非士昏 可賅也而於士冠焉始之知君臣之當義也則爲堂廉拜稽之文以達焉其禮非聘覲

酒可賅也而於鄉飲酒始之知朋友之當信也則爲雉腒奠授之支以達焉其禮非士 可賅也而於士昏焉始之知長幼之當序也則爲盥洗酬酢之文以達焉其禮非鄕飮

和見可賅也而於士相見焉始之。記曰『禮儀三百處儀三千』其事蓋不僅父子君

臣夫婦長幼朋友也卽其大者而推之而百行舉不外是矣其篇亦不僅士冠聘覲士 昏鄉飲酒士相見也卽其存者而推之而五禮舉不外是矣斯則后蒼推士禮而致於

天子之說也而劉歆非之何也歆既親近欲建立左氏春秋及毛詩古文尚書與逸禮

皆列於學官哀帝令歆與五經博士講論其義諸博士或不肯置對歆因移書太常博 士責讓之其言甚切爲羣儒排棄會哀帝崩王莽持政莽少與敵俱爲黃門耶重之白

起 散 累 遷 旋言之。 |莽, 此書 君臣 氏之徒 爲然自是周官經之名廢而以周禮易之一說「 令正乖繆壹異說而歆尤以爲周官經六篇者周公致太平之迹迹具在斯足以佐王 相 |莽盜漢立法布令必以周禮爲據焉然逸禮卒不得立。 年左 春氏 博不 毛詩周官爾雅等篇文字通知其意者皆詣公車至者前 上下父子兄弟非禮不定宦學事師, 乃班 政化者也奏請立周官經以爲周禮置博士然歌以前周官經之不 祠 秋隱 祭祀 也! 絕然 揖讓周旋是儀也非禮也」五年春秋:《祀供給鬼神非禮不誠不莊』曲禮則 傳一故曰『道德仁義非禮不成敎訓正俗非禮不備分爭辯訟非禮不決。 中壘校尉典儒林史卜之官徵天下通一藝教授十一 朝治軍設官分職之書而非專爲禮設正名之曰周官經允符其實奚以 初魯國曹充持慶氏禮以博士從世祖巡狩岱宗定封禪禮還受詔議立七 未 有 顯 於儒林者慶氏禮雖不 非禮 得立; 不親班朝治軍 則禮者典章之達稱 傳然則周官經之題禮也亦宜。 然撰集漢 **「禮經邦國定社稷敍人民利後嗣。** 世祖中興禮有大小戴博 禮 後千數皆令記說庭 以 蒞官行法非禮 人 制 以 而 代大典者皆 非 上 及有逸禮, 以禮名 僅 就 威嚴 揖 者,蓋 。 中 將 而 讓 雖 改 周 不

三禮志第五

常憾朝 郊三 守奏褒 抱筆 **昔** 韶召玄武司馬班固問改定禮制之宜固曰『京師諸儒多能說禮宜廣招集共議得 時刊立褒復上疏具陳禮樂之本制改之意遂拜侍中從駕南巡以事下三公未及奏。 常太常巢堪以冠一世大典非褒所定不可許帝知羣寮拘攣難與圖始朝廷禮憲宜 議拜侍中然事卒不行子[褒字|叔道少篤志有大度結髮傳元業博雅疏通尤好學禮] 可爲後嗣法。五帝不相沿樂三王不相襲禮大漢當自制禮以示百世。一帝召對善其 孫通漢儀十二篇勑褒曰『此制散略多不合經今宜依禮條正使可施行於南宮東孫通漢儀十二篇勑褒曰:此制散略多不合經今宜依禮條正使可施行於南宮東 觀盡心集作。」褒旣受命乃次序禮事依準舊典雜以五經讖之文撰次天子至於庶 作大章一 帝曰: ·札行則誦習文書當其念至忘所之適·初舉孝廉再遷圉令持德化不立威刑太 雅大射養老禮儀顯宗即位<br />
充上言「漢再受命仍有封禪之事而禮樂崩闕不 廷 耎弱罷官徵拜博士會<u>關宗欲制定禮樂</u>褒上疏請定文制著成漢禮章下太 制度未備慕叔孫通爲漢禮儀而欲纘父之志晝夜研精沈吟專思寢則懷 諺言 夔足矣」章和元年正月乃召褒詣嘉德門令小黄門持班固所上叔 「作舍道邊三年不成」會禮之家名爲聚訟互生疑異筆不得下。

三體志第五

冠, 景伯, 古 |義 難 莽 議多見從用當世稱爲通 世。 也! 讀, 今, 十二篇演經雜論百二十篇义傳禮記四十九篇教授諸生千餘 冠 師 敗, 帝 擢褒監羽 同 初 頗 時治 故 雖 婚吉凶終始 數言政事顯宗 能 董鈞從大鴻臚王臨受慶氏禮而扶風 兵革 之學洪雅博 識 但納 寢 傳 其 慶氏 父業 其 說達與河南鄭衆仲師往受學焉衆父興字少養亦作周禮 並 林左 之; 不 奏; 起, 疾疫喪荒 一漢禮 學以 叉 后 騎後 ・ 復令有司 制 受業 聞又以經書記傳相證明爲解達解行於世而鄭與父子之解不行。 (為博士者) 度, 即位爲 於杜子春 遂不 大尉 儒累遷! 爲 弟 百五· 行然褒博物識古父子禮宗父充作章句辨難而褒作 張 平奏會帝崩, .博士時草創 子死 酺 义有犍爲董鈞字文伯。 顯宗之初, 尚書 十篇寫以二 葬; 五官中郎將常教授門生百餘人亦慶氏禮之名家 有 **張敏等奏**了 和帝卽位。 里 五郊祭 子春年 人 賈徽從劉歆受周官自歆 |尺四寸簡其年十二 河南 和及宗 褒 且九 緱氏 褒 擅 乃爲作章句帝遂以 世祖時舉孝 杜 制 廟禮樂威 十家於南山; ||漢禮破亂聖經 子春 及徽 月奏 《儀章服 八慶氏學遂行於 廉, 深辟司徒府; 解詁。 注 份 之立 上帝 周官 **術**; 宜 在! 周官遭 徽 新 輙 丽 令鈞 衆逵 加 以衆論 能 子達, 禮 博通 刑 通 字 參 通

當 撰 世! 幹 惟 扶 若 於 於典籍觕識皇祖大經周官之義存古字發疑正讀亦信多善徒寡且約用不顯傳於 風 事馬融融以周官傳授玄而玄於諸家解詁獨稱『二鄭者與衆 北 爲 成 |今文則注云" 前 祕府所藏之本也其民間傳寫不同者則爲今書而正讀之例有云『讀如』『讀 馬融季長兼攬衆逵二家謂多遺闕而衆解近得實因自力補之謂之周官傳 海 卷見隋書經籍志自是周禮大行然任城何休邵公猶斥周禮爲六國陰謀之書。 是也或從古文則注云『今文某爲某』 乃因馬融之傳而參取杜子春之注鄭與鄭衆賈逵之解詁網羅諸家裁以己意, 者擬其音以求其似也有云『讀爲 周 鄭玄本習今文小 官禮注 鄭玄康成括囊大典徧覽羣經從東郡張恭祖受周官禮記旣因涿郡 者, 糾其誤以正其字也 十二卷而以周官禮傳寫古文諸本違 古文某爲某」如士冠禮 戴禮之十七篇後以禮古經之五十六篇校之取其義長者或 |例既定而周官禮之大義 「関西國外」 『讀曰』者就其音以易其字也有云 如士冠禮 選其注云『 句注『古文関爲槷閾爲 醴辭孝友時格 乃可言矣然周官禮古 故書 同宗之大儒, 二者謂: 二句注 盧植 明理 初獻 文

文爲斧; 以 文而 從, 讎之通例而鄭玄遵以注校十七篇焉义以小戴十七篇次第尊卑吉凶雜亂舍之不 事 今文格 此 凡 居 者數 請 尤 文者用 先; 尚 而 依 卽指其意之所在者士相見禮 有 mi 尊, 也; 喪祭七篇 也又有今古並存而復及他說者上冠禮『 爲 喪事 劉向別錄以吉凶人神爲次蓋据記云『吉凶異道不得相干, 』鄉飲酒禮 無 功 嘏, 走; 事; 於學者蓋讀禮者非籀繹有明無以通其指也玄又注 濟。 尙親; 如上冠禮注云『凡奠爵將舉者於右不舉者於左』 」是也又有爲今文所 『凡薦出自東 上介 儿 爲 」 遂以冠昏相見鄉飲鄉射燕大射聘公食 執 凶禮居後焉故名鄭氏學凡十七卷蓋一篇爲一卷也其注之發 幣者 奉幣先入門左』注 不 · 趨容 房。 注 注 無而爲古文所 凡牲皆用左胖。 ·---某不敢為 今文「遵爲僎或爲金; \_ 「古文重 今文無容』鄭不用今 儀固 章甫殷道也』 有者士相見禮『 天, 是是 請, 其餘諸篇 注 大夫覲禮 也凡此之類蓋漢人 **今文不爲非古** 小戴所傳禮記四十 <u>\_\_</u> 注指 是也。 \_\_\_ 注 m 凡 用古 某將走見! .體士質: 有發凡 甫或爲父今 十篇爲吉禮, 叉有存古 者以其足 之事; 者 文 古古 校 固 今 ŻΕ

三體志第五

之附 羊穀梁冠義昏義鄉飲酒義射義燕義聊義朝儀喪服四制 禮家之古文學也小戴禮記四十九篇非一 《周 杜 若周官之顯然立異也杜買二 十七篇之傳為 鄭玄三禮之學其宏通在 篇, (國) 篇, 買 受 未經 鄭 經不 學 多引杜子春鄭大夫鄭司 通 於綦 儀禮周官爲三禮 說禮別今古文最嚴何休解公羊傳據逸禮 說皆古文說; 人注 11: 別出者與經歧爲二軌漢以經十七篇立學曲臺 解周官馬融解周禮而十七篇 母 《今文說 君, 解前無所承, 取其 則今古學糅者也而 說 而 此其雜! 玉藻為 爲圖 而撰三禮目錄一卷三禮圖九卷其中三卷則陳留阮 此 江川周禮為 鄭解周官皆不引博士說以博 | 農前有所承尙易爲力而經十七篇與 一者也於是周官之分經別 糅 **占周禮說曲禮檀弓雜記** 亦在 此大經  $\mathbb{E}_{\}}$ 更 制為 手所成或同今文或同古文汪制多同公 上撰喪服經傳注 難; 而鄭玄觀其會通 **今學禮宗比之周禮** 十七篇禮家之今文學 加 不據周官以逸禮雖屬古文不 出 T者與禮· 為古春秋左氏說祭法 問喪祭儀祭統諸篇皆 后脊 士祇立今文也鄭衆注 一卷獨鄭玄編注 獨 九篇以後, 博 合爲 為古 学 小戴禮記 **心周官六篇** 而詳說之然 文所宗云 途 並 無 而 解義;

以爲 事馬 未嘗 若 大司 植學古 當亦今占糅雜與鄭玄同道者也惟玄汪行世而 從通儒故南郡太守馬融受古學頗知今之禮記特多回宂臣前以周禮諸經發起粃 籍志然植之注禮記有與鄭玄不同者如鄭玄以王制 糧, 謬, 也自是鄭玄 乃好 敢 再 融, 周禮夏殷禮之分而於不能合者或且改易文字展轉求通 徒五等封地皆即本經 率愚淺爲之解詁而 小 繼以魏太常東海 撰三 研 王制以駁周官然則玄之議禮殆以 5 文也然植能 緯 **精合尚書章句考禮記失得庶裁定聖 元學行** 禮解計會靈帝以蔡邕言立太學石經正五經文字植乃上書曰『臣 書好改經字宋儒所譏固不足爲漢儒病也惟鄭玄或據周官 MI 通古今學好研精 王肅子雍兼併諸家參合同異成周官禮注十二 大小戴漸廢夫綜會今古文遍注三禮 家乏無力供繕寫上願得 立說不牽涉王制獨鄭玄利同今古 圃 不 守章、 古文說爲主者乎涿郡盧植少與鄭玄俱 植解不行獨禮記注十卷見隋書經 句明著後漢書本傳意 典, 刊正 將能書生二人共詣東觀就官財 爲夏殷雜 碑文』蓋蔡融碑今文而 使家 而植以 專門家法至此變矣! 文兩家說疏 法 不 分明始 者植 卷禮注十七 爲漢法等是 以疑王制 之所 通 於鄭 證 少

三體志第五

卷禮記注三十卷見隋書經籍志雖佚不傳而每有見引他書者惟肅善賈馬之學而

文武 悉升於太祖」而肅引禘於太廟逸禮『昭尸穆尸皆升合於太祖 袷五年禘袷大禘小。」本於春秋公羊經書『有事爲禘各於其廟大事爲秴羣廟主 至子孫五殷五廟至子孫六周尊后稷文武則七』而肅乃數高祖之父高祖之祖與 周合文武二, 融爲七本喪服 羊傳爲正逸禮不可用也鄭玄說五帝爲五天帝本周官司服 不知董劉皆未見周官不知有圜丘但言郊而不言禘不足以難鄭玄也玄說『三年 不好鄭玄議禮必與相反然鄭玄擇善而從立說皆有所據如說廟制以爲天子五廟, 不得服裘又先鄭注掌次云『五帝五色之帝』是鄭玄義本先鄭而肅以爲五人帝 裘而冕祀五 **禘譽配天」圜丘本周官周人禘譽本國語祭法而肅乃謂郊丘引董仲舒** 而九不知古無天子九廟之說而肅說二祕亦與祭法不合也鄭玄說: 帝亦如之』五帝配南郊祭用夏正月故服大裘若五人帝则迎夏迎秋, 小記『王者立 远廟, 禮緯稽命徵「唐處五廟夏四廟 | 祀昊天上帝則服大 一不知鄭玄以公 劉向爲據 「圜丘是

分主五行然則大峰炎黃之先無司五行者乎此與庸駁鄭玄義以爲社稷專祀句龍

去取必自有說而肅乃取鄭玄所不用者轉以難玄玄據今文則以古文駁之如據逸 土穀之神者同一武斷也考王肅所據之書鄭玄豈有不見而不用者當時

后稷不祀· 聚訟今古文說不同鄭玄折衷其義始亂家法儻王肅有意攻玄當返求之家法, 禮以駁公羊是也玄據古文則以今文駁之如據蓮劉以駁周官是也不知漢儒 法廟制古說此萬不能合者而肅僞撰孔子家語孔叢子所言廟制合二書爲一說鄭 今古斯或可以制勝乃肅之不別今古任意牽合殆尤甚於鄭玄如王制廟制今說祭 禮家 分別

言以爲論定不知禮家所以聚訟正以去聖久遠無明文可據是以石渠虎觀至煩天 學者愈以迷亂不復能知古禮之吳而家語孔叢舉禮家聚訟莫決者壹托於孔子之 |玄以爲祭法周禮王制夏殷禮尙有端緒可尋至肅乃盡抉其藩籬蕩然無復門戶使

發 子稱制臨決若孔子之言如此彰灼羣言淆亂衷諸聖尙何庸齗齗爭辨乎古人作注, 明 大義 而已肅注家語如五帝七廟郊丘之類處處牽引攻鄭之語殊乖注書之體,

而 自 發其作僞之覆肅又作聖證論六十八事 以譏短鄭玄今約存者三十事禮之大

者即五 帝七廟郊丘禘裕社稷之屬其餘或文句小異不關大義然肅之所謂聖證者,

三體志第五

刨 収證 於家語 孔叢徒以鄭玄名高非託於聖言不足以奪其 席; 然而 後 之學 者, 卒目

論 亥 以 難 爲 肅之僞 E 肅, 而著有禮記音義隱七卷禮記注三十 作斯可謂 小 勞日拙者矣樂安孫炎叔然受學鄭玄之門; 卷同時有鄭小同者玄之孫也亦 乃駁釋聖證

挑 禮義 四 卷, 具見隋書經籍志而皆不 ·傳意: 必有所以申玄指 而難 王肅 者惟 古 禮

重 卷見唐書藝文志小戴禮記 喪服經十七篇獨喪服子 夏有傳放 四十九篇有營子問喪服小記雜記上下喪大記 喪服 义別爲禮家 不專門之學」 大戴 有 喪服 變

喪

奔喪問喪服問別傳三年問喪服四制 十一 篇皆屬喪服檀弓亦多言喪禮。 經

志志义著 篇馬融 蜀 獨於喪服經傳有注而鄭玄王肅 丞 相 蔣琬 撰喪服 安記 卷,吳 齊王 亦 別 一傅射: 出喪 慈 服經傳注各一 撰 喪服變除圖 卷見隋書 Ŧi. 卷斯足 與

娜 之王肅 丽 鄭氏 孫炎鄭 學幾廢迨元帝渡江, 小同輩駢稱三國之禮家者焉晉武帝王肅外孫郊廟典禮皆從 太常荷崧詩置鄭儀禮博 士即士 七篇之鄭氏 學也 /儀 肅

之名始 此; 漢以前 無之也爱從晉宋逮於陳氏傳禮業 者, 小 戴禮 記尤盛周禮 次

|禮

而

儀禮獨盛喪服其著錄隋書經籍志者晉有給事中袁準撰喪服經傳注 卷廬陵

太守孔倫集注喪服經傳一卷陳銓撰喪服經傳注 一卷; i ji 劉 逵撰喪服要集二卷大保衞瓘撰喪服儀 一卷征南將軍杜預撰喪服要集 卷司 空賀循撰喪服要六卷

喪服 要 記 十卷喪服譜 一卷劉德明撰喪服要問六卷太 、學博士 環濟撰喪服要略

卷徐氏撰喪服制要一 變除一卷宋有大中大夫裴松之集注喪服經傳二卷通直耶雷次宗略注喪服經傳 卷開府儀同三司蔡謨撰喪服譜一 卷散騎常侍葛洪撰喪服

外 }服 要問 卷丞相諮議參軍 郎散騎 二卷崔凱撰喪服難問六卷伊氏撰喪服雜記二十卷孔智撰喪服釋疑二 庾蔚之撰喪服三十一卷賀循喪服要記注十卷喪服世要一卷張耀撰 蔡超宗集注喪服經傳一卷徵士劉道 拔撰喪服經傳注 卷員 喪

卷; 郎 司 馬 軍 蠍撰喪服經傳 司馬貴沈撰喪服集議十卷齊有 義疏五卷給事 中樓幼瑜撰喪服經傳義疏二卷步兵校尉劉 東平太守田僧紹集解喪服經傳二卷散騎

集記三卷喪服圖 卷光祿大夫王逸撰喪服世行要記十卷袁祈撰喪服答要難 古今

蠍撲喪服

經傳義疏一

卷徵·

士沈

麟

士撰喪服經傳義疏

卷太尉王儉撰喪服

卷王氏撰喪服記 卷嚴氏撰喪服五 要一卷卜氏撰駁喪服經傳一 卷樊氏撰喪服

}疑 卷賀遊 」 撰喪服圖 卷崔逸撰喪服圖 卷。 梁有步 兵校 尉五 經博 士賀場撰

卷; 喪服 子 義 疏二 助 敎 皇侃 卷尚書左丞 選 喪服: 文句義 何 修之撰 疏 十卷喪服問答目 喪服經傳義疏 干 卷; 通 卷陳有國子祭酒 直 郎 裴子 野 撰 喪服 謝 傳 嶠 撰

卷凡二二 喪服 義 百 卷大將軍袁憲 九卷皆 明喪服 撰喪服假寧制三卷喪禮五服七卷 者 山 周禮則 有晉之樂安 E 師 伊 說 王隆伯撰論 周官 禮注 喪服 卷 决 散

騎常 官 禮 異同 侍 干 寶汁 評 十二卷散騎常侍處喜撰集孫琦問干 周官禮· 1-一卷,莊王 師 Ė 懋約周官寧朔 **寶駁周官駁難三卷孫略周官** 新 書 八 卷 司 空長 史陳 邵 周

**級難** 書 卷 卷, 凡 百 有 梁之桂州 儀 1 卷视 察謨安北諮議 七篇之喪服殺矣禮記 靈恩集注周官禮 則有 二十卷 晉之燕王 經博士沈重周官禮義疏 師 E 懋 約禮記寧朔新 、那范宣 四

四卷

刺史崔

五

開

府

间

三司

参軍

曹躭

國子

助

敎

尹

一般李

軌

員

外

音 各二 卷, 一競騎將軍 徐鋭 禮記音三卷劉昌宗禮記音 五 卷宋之奉 朝請業進 禮

{}E 顒 禮記 4. 中庸傳 卷 111 散 大 大冷 一卷齊之給事中樓幼瑜禮記 爰 禮 記 音二卷 豫 章 郡 撫遺 **永雷** 別記 肅之禮記義疏 卷梁武帝之撰禮記大義 一卷散 騎常 侍 戴

之禮 卷 記 中庸講疏一 義 疏 九十 九卷, 卷步兵校尉五經博士賀陽之禮記新義疏二十卷 心體 記 講疏 ħΠ 4. 八卷五經博士 沈 重之禮 記義疏 國子助發 四十卷; 全。 祕

褚 評十一卷凡二百九十七卷而姓名失考者尙略不著於三禮之中尤爲夥頤沈 暉之禮記文外大義二卷何 氏之禮記義 十卷庾氏之禮記略解 ---卷創雋之

沈 者 也梁桂州刺史崔靈恩撰三禮義宗三十卷徵士陶宏景撰三禮目錄注 一卷祕

書 宴 **公客輙** 士習 學 士 舢 褚 彈章也北朝自魏末大儒華陰徐遵明子判門下講鄭玄三禮傳業於渤 尙 暉撰三禮疏 元 虚; 而 孰知 一百卷斯又囊括大 殫 心禮學若是之精詳哉斯所以 典而 觀其 會通者論者徒以爲南 期 功去官猶 迎 古禮 邨 除 女清 服

李鉉寶鼎 中山 馮 偉偉節紀顯敬呂黃龍 夏懷敬 加 儁 田元 鳳 而鉉撰有三禮義疏 傳 海

業 鮑 饒安刀柔子强 季詳獨安生最爲顯學安生初從 河間 那 峙 士峻渤海劉畫 房糾受周禮後乃事鉉遂博通五經然專以三禮 扎 丽 長樂熊安 生植之平 原 張買 奴 渤 海

教授 禮義疏二 第子自 一十卷禮記義疏三十卷其後生能通禮經者多是安生門人諸生盡通 遠 方 至者干餘人 乃討論 圖 **緯捃摭吳聞** 先儒所未悟者皆發明之撰周

三體志第五

於周 禮 儀 禮 兼 通者十二三而! 傳 大戴禮記而爲之解詁者, 太 《學博士》 盧辨

見皇侃, 鄭 {禮 书目 棼之手雖繁而 制 務 木 家而 之立異; 記, **本經**, 落不 百 伸 鄭注 家然唐有天下國子祭酒孔穎達奉詔撰定禮記正義六十三卷序稱! 制三公一 題疏皆三千 已儀! 歸其 多引 北 學惟見熊安生, 久而論定六朝 不 外義, 禮 觅 本, 章 命 附 狐 絲 -餘字其餘 統之楚 疏 會; 死不首其邱此 益亂也皇氏雖章句詳 ズム疏 则 然採摭舊 有二家信 而北行, 而皇侃為勝據以為 南 北學三禮意宗鄭氏而 171 千餘字者尤多元元本本貫通羣經譬諸 T. 文詞當理 馬雖 都黄 皆二家之弊未爲得 餘 字; **慶**齊之盛德。 疾 \_\_\_\_ 正微稍繁廣义既遵鄭氏 此 博; 而 年 有 去 愈遠; 本其有不 因 小。 記 李孟悊 **為義疏者儻以小戴禮** 聘 义欲釋經 也! 』云云疏二千餘字月令郊特 派 備 者稱隋 別 以 而作 自以爲後來居 文惟 熊氏補焉惟 疏 聚 乃時乖鄭義 至 碩 難 數千 儒 義, 依 焉。 山鑄銅燒 言者, 自 猶 上; 闸 離立 治 熊 南 論, 此是 奚 如王 學 絲 則 肅 啻 説 與 惟 違 面

買公彥據晉陳邵周官禮異同評,

梁沈重周官禮義疏撰定周禮注疏四十二卷雖頗

海

鹽說禮之家有鑽

研莫盡者

焉!

然穎達之於鄭禮厪疏記注高宗之

世

太

學

博

士

引 者, 倘 緯 有 書, 老 與 門; 鄭 擇善 同 譏; 然疏 而 從, 藉 不 破注. 手 爲 易 義 而 例 儀 則 然; 禮 章 而 疏 發揮鄭學信稱 祇 齊黃 慶 隋 李孟 博 m 悊 能 核 家 者焉! 丽 己! 然 然 周 買公

則 彦 撰 舉 定 小 略 儀 大, 禮 經 注注 注稍周, 疏 + 七 卷, 似 序 入 室近 稱: \_ 慶則 觀 而遠 舉 大 不 ·察二家之茶 略 小經註疏 疏, 漏, 互 有 猶 登 修 山遠望而 短。 今以 先儒 近不 失 路後 

以 宜 鄭玄 易 塗故; 為 崇。 悉鄙 뻾 情, }儀 }禮 聊 裁 尤 以 此 鄭 疏。 玄 L\_\_\_ 為 是創 絕 學。 制 注 起 文 例, 古 闡 揚鄭指 奥得 疏 尤有 乃 明; 抉 倍 發 難 塗 於 徑首 周 禮 在 者 發 焉! 夫三 凡。 有 鄭

|注 愛凡 而 公彦 疏 辨同 者。 異 兴者 有鄭江下 不云凡而? 與發凡 無 《異由硫 申 明 爲 凡 例 者。 有 鄭

往 而 流 不 發 發 凡 儿 者 而 有 疏 發儿 疏 不 玄 歸。 凡 有經是變例 而 無 異發 鄭注 凡 者。 發凡 注 精 而 而 簡, 疏 疏 申 詳 明 之者。 而 密, 有 分 析 經 是 常 變究 變例 其 注 不 天 由

侍 餘 华 中 來, 曲 議 城 魏徴 禮 者 玄成 奉 爲 以 依 小 戴禮記綜彙不倫, 後 來著 述背此 書之支 史作 類 流 禮 而 一十篇, 初 太宗之世 採 諸儒 訓 諫 議 注, 數 大 年 夫 檢 而

太宗 魏 乘 美 其 請 書, 用 詔 魏 徵 日: 類禮列于 **-**以 類 相 經帝 從, 别 爲篇 命左散騎常侍元行沖與諸 第, 並 更 注 解, 文義粲 然。 儒 集義作 錄 置 內 府。 疏將立之學 迄 元宗

三禮 志第

一三八

炎 是唐代之於禮記, 謀 (記, 得 帝 雖 四 恨 條 始始 扶鄭義, 引 擅美千古矣於是: + 然之自是元疏之魏 靡 不 例支分已以類比而魏注類禮特整次孫注 不 因舊書摘 所具鄭志者. ·與吾同 九 國 如 堅持背言擯 畢 篇 子 魏 以 博 條例 淮 聞。 mj 大宗嘉 爲之解, 類禮; 世 支分箴 范行恭四門助教施敬 類相比有如抄掇諸儒共非之至徵更加整次乃爲訓注恐不 者! 獨 著 百有餘科章句之徒, 厭 L\_\_\_ 不伸疑於 줆 右 出 世 今孫炎禮記注三十 賞, 丞相 淮 魏 自 所 錄 石 類禮不 一辨名日釋疑, 注之類禮 賜儲 間 不 起增革百 張說 傳鉤黨獄起康成於蠶伏之中理紛拏之典雖存探空, 贡。 知新果於仍故! 建言: 陛 出, 下 而 元 孔疏之 本採 纂業, 篇。 大指 疏 曾不是省王肅因之或多攻武。 魏氏病 戴 卷不 謂 宜 聖 本, 獲 之鄭注戴記行所 剏前 mj 傳, 然物 所 刊綴爲五十篇, 所 \_\_\_\_ 小戴禮行 錄, 循 刊 而證以張說 **羣言之冘脞采衆說之**精 向已千 古之未 其尤脞爾然孔穎達禮記正 極則 襲乃制 變, 於漢末 載, 此 顧 有! 韶 及百 與 將 元行 元 儒 鄭注 經 行 甄 沖終以 一分舊義豈 馬 並 官使此書得 沖之言則是孫注 年當有明哲君子, 之戴記 而鄭 融 立, 爲 不 可罷。 學有 傳, 爲 簡, 鄭注 盧 미 孔 悟 刊 孫炎, 植 用。 魏 疏, 行, JE. 草 咨 句 麦 戴 孫 則

篇 引 鄭玄 H 錄 式 此 於 別錄 屬 某某。 如 曲 禮 王 制 ₹禮 器 少儀 深 衣屬 制 度檀 弓

通論。 藻 月令明堂位 大傳學記經解 屬 明 堂陰陽。 **夏公問仲尼** 曾子問: 滅居 喪服 孔子閒居坊記中庸表記緇衣 小記雜記喪服 大記奔喪問喪服 儒 }行 問 大 傳

祭祀,樂記員 三年間 喪服 屬樂投壺冠義昏義鄉飲酒義燕義聘義屬吉事別錄者劉向 四 制 屬 喪服。 文王 一世子屬 111 ÷ 法。 内则属子 法。 郊 特牲祭法 祭義 書 也則是禮 祭統 屬

記之分類品 行論 || 者謂載記 個不 不廢張 始於孫炎魏徵矣何張說獨議魏徵哉然魏徵類禮卒以張說之言 說 固 有 存古 乏功 而類禮 不 行, 亦不 無泥 古之失焉 迨 唐 不 中

學者 葉, 昌黎韓愈退之一 n觀焉。 既唐氏失祚, 代 文 降為五 雄; 然讀 代周世宗詔國子 {儀 禮 而 苦其難於是, μJ 業聶崇義參定郊廟祭玉 掇 其 大 、要奇辭 奥旨著: 於篇 因 取 俾

也 禮 舊圖 初 E 凡六 於朝 本 祖 重 遭 加 考訂, mi 嘉 之遂 成 三禮圖集注二十 詔 國 學 温 於先 聖 卷 殿北 題 日集注蓋兼採六 軒之屋 壁焉考禮 圖 圖 不 主 始 於漢 家

鄭 玄阮 唐書藝文志有夏俟伏 港院書經籍志列鄭玄及後漢 國三禮圖十二卷張鎰三禮圖九卷崇文總目有梁正 侍 中阮諶等撰  $\equiv$ 一禮圖 九卷是也其 後 可 考見

禮 志第 Ħ.

[圖] 九卷宋 少載 吏部 尚書 張昭 华 奏 二: 四 部 書目 內 有 禮 圖 卷, 是開 中 敕

題 禮 梁氏鄭氏 溫 修 撰, 公闘第一 」四家與鄭阮 第二題云「 圖 併不傳意 梁 氏; 』第十後題云『 心聶崇義 所据三禮舊圖 鄭氏』今書府有 六本者蓋鄭玄 三禮圖, 亦

謎 夏侯伏朗三張鎰 四梁正五, 開皇敕 撰六也然勘驗崇義 書之宮室車 服等 圖, 阮 與

杜 撰 也。 經非古制是宋代諸儒亦不以所圖爲然然其書蒐採諸家具有來歷當 多相違異歐陽修集古錄譏其盤圖 梁正 題阮諶 圖, 護其不 · 案禮 文而; 與劉 引漢事與鄭君之文違錯, 原父所得真古簋 小同朱子亦譏其 正 不 必以違 不 異鄭 盡出 醜

|淮, **亞宗顧宋儒好創新解故相違** 譏 **酒**崇義 此圖 矣自 唐之孔穎達賈 ] 與而始作之俑 公彦 者當推臨川王安石介甫賈公彦以前, 疏章鄭注以成三禮 正義, 而 禮學久定

湯 禮 者 崩 典制。 王安石 而後說周禮者闡義 理神宗時間 詔置 經義局 .撰書詩周禮

敔

義皆 本王安石 自 爲; 雖 』說惟書詩皆山 訓詁 多病穿鑿然依經 ill 其子 零元 詮義, 澤及諸門 如所 解八則之治 弟 子 手獨 新經 都鄙八統之馭萬民, 周禮義二十二

九 兩之繫邦國者皆具有發明後來儒者或訾安石以周禮壞宋而於是書終不廢采

用 世! 百 新 JL + }經 卷, 既行誦習者夥然而 及王 昭 禹之周禮詳 闡明其說著書傳後者厪 解 四十 卷一家 而已。 祥道 見福州陳詳道用之之禮 之書貫通經傳論 辨精 博,

縷悉 或 來訾 條 分; 間 議。 然群道 以 綸 圖; 唐代 本王安石之徒。 諸儒之論 安石說經既創造 並 世聶崇義之圖 或正其失或, 新義務異先儒然則祥道 補 其 闕; 惟掊 之排 撃郷

舊說故是師法然爾何有於鄭注哉! 石; 黛亦安石之徒? 然其 闡 明經義, 推究得 至王昭 四萬未詳何人] 失則: 有 不 盡问 而撰周禮詳解訓詁 於安石 之學, 而 足訂 皆用 注

後臨川俞石 廷椿壽翁撰周禮復古編一卷大指謂 断殊嫌無據: 五官所屬皆六十不得 之周禮新知 有羨。 派; 其

疏

所未

逮

者。

既長樂楊

時

中

<u>J</u>.

撰

周

禮

辨疑一

卷則,

攻安石

經義

者

也。

南

渡

羨

者

取

以補

冬官鑿空臆

斯 Īij 特 筆 世! 初 神宗 相 王安石 | 鈴周官禮| 然自是說周官禮者遂有 而 強體體歷學者 不 復 誦習迄南渡孝宗之

冬官不亡之一

世, 兩 浙 轉 進 判 官 直 秘閣 曾逮 始 刊儀 禮鄭氏注 十七卷陸德明釋文一 卷冠以山錄

引 卷, 載 有 周廣順三 大小 戴劉向篇 年 及顯德六年刊行之監本有汴京之巾箱本有杭之細字本嚴之 第 異同 丽 永嘉 張湻忠甫實爲之校定撰儀禮識誤三卷其所

俗

重

相 刊 巾箱 沿之字轉改六書正體此實不能無蔽然是書存而古經漢注之譌文脫句藉以 本參以陸德明釋文章公彥疏覈訂異同最爲詳審惟株守釋文往往以習,

陳設· 更漸 考宮室之制而釋宮之作尤爲禮家之所不可缺何者蓋古者宮室皆有定制; 之學漸盛而廬陵李如圭寶之撰儀禮集釋三十卷壹宗鄭注 考識; 出 非其 經傳多發買公彥疏所未備, 之地進退之位俱不能 舊槧諸本之不傳於今亦藉以得見崖略其有功於儀禮誠非淺鮮也自 舊; 如序楹楣阿箱夾牖戶當榮當碑之屬讀儀禮者倘不能備知其處則於 知甚或以後世之規模臆測先王之度數而; 而別出 卷以 明章句之旨义爲釋宮一卷以 而旁徵博 如圭是書仿 5 以爲之釋, 歴代日 1是儀禮 屢

同 證寢廟之制, 爾雅釋宮條 諸侯之 一說义如大夫士東房西室之說雖仍舊注 · 異於明堂 ; 分臚序各引經記注疏參考證明 而不用孔疏引鄭志成王崩在鎬京宮室因 如據 而據聘禮 顧命 東西 序 賓館於· 東 文武不 四 夾東西房之文 大夫 ·改作故制

對 其 '右言東對西者同,其辨析詳明深得經意發先儒之所未發大率類此信可爲治儀 亦 有 右房; 據郷 飲酒及少年饋食證大夫士亦有 左房東房之稱, 與天子諸侯言左

禮者之圭泉也朱子嘗與如圭校定禮書而謂" 卷鄉禮三卷學禮 釋儀禮之書須與儀禮參通修作一 十一卷邦國禮四卷共二十三卷爲 甚。 因撰儀禮經傳通解三十七卷凡家禮 儀禮者禮之根本禮記本秦漢諸儒 四十二篇中闕書數 二 篇大射

爲王朝禮中闕 一諸侯相朝八篇尚未脫稟其卷二十四至卷三十七凡十八篇則仍前草創之本是 卜筮一篇目錄踐阼第三十一以後序說並闕蓋未成之本也其書以

}儀 爲 主而取大小戴禮記及他書傳所載繫於禮者附入之惟所載儀禮諸篇, 咸

糾其 讀。 棄經任傳遺本宗末於是解記附經撰成是書答應仁仲書曰『前賢常患儀禮 以今觀之只是經不分章記不隨經, **廢罷儀禮獨存禮記朱子** 

舊次亦頭,

有所釐析

或者不免割裂古經之譏然自王安

fi

難

此 本, 去詣弊恨不得令韓文公見之也」觀其 分章表目開 卷瞭然儻 亦考禮 者所

而注疏各爲

一書故使讀者不能遽曉

今定

不 廢乎惟喪祭二禮未及倫次則以屬其女夫長樂黃幹直卿幹草創就質喜曰『君 喪祭禮規模甚善。則是朱子之與幹者深也然幹僅成

未及訂定 而 卒! 福 州楊復信齊者亦朱子門人而幹之修祭禮也嘗邀復參訂焉遂據

喪禮

十五卷其祭禮則

三體 志第五 所

四 79

概節 卷十六至卷二十九, 本, 参以 目 亦 大 所 聞 略具是矣初建德趙彥肅 續 成其 皆復 書, 所修 凡 十四卷 也。 雖續 併 解不 幹成 子 欽作 出朱子 喪禮 ·特性: 爲 少牢二 續 而 端 儀 緒 禮 一禮圖質於朱子朱子曰: 相 經 因規模不同 傳 通 解二 ·異, 古 + 九 禮 卷, 今自 梗

說, 得 疏 冠 通 其意 昏 圖 各詳其 及堂室 (儀節 制度井考之乃佳! 陳設 \之方位, 繫之於圖 於是楊復 凡二 原 本 百 有 師 意, 五; 日 錄十七篇 儀 禮 圖。 义 經交節 分宫 取 舊

冕牟門性 矣! "是讀儀禮者" 鼎禮器門爲圖二十有 必明於古人宮室之制然後所陳所位揖讓進退不 五, 名儀禮旁通圖附於後其於是經, ·失其方故字 可謂 用 17, 勤 李 如

復是 主儀 書獨 禮 集 釋朱 廢 此 子儀禮經傳 門但隨 事 立 通 圖, 解背特出 或縱 或 釋宮 横既 無 一篇以 定 向; 總 或 挈 左 大 或 綱 右, 僅 使 衆 列 目 皆 隅; 有 遂 所 似 滿 麗。 屋 而

散 依 錢; 經 紛 繪 象 無 約 條貫其見於宮廟門者, 躯 大端; 而 於議禮考文尚 僅止七圖 不 無裨補此 而遠近 南 廣 宋諸儒 狹, 亦未 之治儀禮 分明然其餘諸 者 也 考 圖, 南宋 尙

諸 削, 幾二十餘載。」故採摭羣言最為賅博去取亦最爲精審其後序云『 儒 之治 加豐 者 莫善於 吳郡 衞 湜正 叔 撰禮 記 集 訊 百 五 + 卷; 自 序 他人著書惟 言 B 編 月

則甚 恐不出於己予之此編惟恐不出於人後有達者毋襲此編所已言沒前 涉於禮記者所採錄不在此數也今自鄭注孔疏而外原書無一存者可謂禮記注 矣其用心之厚可特表而 出之者也自鄭注 加 下所 取凡一 百四十家其他書之 人之善也!

博然唐以前僅杜子春鄭興鄭衆鄭玄崔靈恩賈公彥等六家其自劉敞 之蒐採極博者也時樂清王與之次點撰周禮訂義八十卷采舊說五十一家亦稱極 以下四 五

真德秀四山序稱「鄭賈諸儒析名物辨制度不爲無功而聖人微旨終莫之睹惟洛 家則皆宋人凡文集語錄無不搜采蓋以當代諸儒爲主古義特附存而已冠以浦城, 之程氏關中之張氏獨得聖經精微之蘊永嘉王君其學本於程張。 」蓋以義理爲本,

典制爲末故所取宋人獨多矣其注考工記據古文尚書周官司空之職謂冬官未嘗 則 襲俞廷椿之說惟是四十五家之書十佚八九僅藉與之是編以傳雖貴近賤遠,

也。 不及衞湜禮記集說之多存古義而蒐羅宏富要亦湜之亞矣此宋儒禮注之宏博者 若 乃根 據 注 疏 義 取簡約厥有臨邛魏了翁鶴山之儀禮要義五十卷贛 州 朱 中繼

|顯之||禮 句解十二卷了翁之書爲九經要義之一於每篇各爲條目而節取注疏錄

三體志第五

四六

也南宋 以 疏 古 這體 周 大 條 侯 (廟 二禮曾引之天子巡狩禮烝嘗禮軍禮朝貢禮逸奔喪禮皆未 \經釋經 異者至 逐廟禮 官總義三 略 理 奥不 其 之遺撰儀禮逸經 秩 逐句詮釋裁約注疏 原 日王居明堂禮取之鄭康成三 、 然使品節 易通 與思易尙書要義略同蓋其著書本例如是也夫儀禮於諸經爲 文 入元 一於注 蓋仿 不爲鑿空而 日諸侯釁廟 一十卷則: 賈疏 而禮家胥出南人蓋仍宋學也最著者崇仁吳澄草廬掇拾逸經以補儀 朱子儀禮經傳通解之例其引二戴記著所出 疏之疑不能決者, 文繁句 度數之辨 傳一 直 禮, 於職方氏之地 研索經文斷以己意 複難詳 卷凡經八篇 而申以己見其間有力主注 取之大戴禮 不 復 以辭 膽而 則從多聞闕疑之例誠愼之也然寧郷: 一禮注 旧投壺 傷 ńĽ, 理 義 所引 燕蔓, 山 而 轇轕為病; 與注疏 ЛÌ, 以小戴禮記相 {禮, 端緒不 逸禮編次先後皆依行禮之節 考證尤詳斯又詞 日 [奔喪禮, 斯足為 不嫌 明今了翁 疏 黨同雖 m 曲為 初 麥定日中雷 取之禮記 學之津 鄭注 見採而中醫禮禘於太 必己 持論 川證者: 删 不著所 繁 日公冠禮, 出, 粱 取 互 禮,日 |不蹈前 然亦有 有 易 也! 難 要, 力出惟鄭注 短長要皆 讀; 申 分臚 祓彦章撰 次不盡 -之句解, 禘 臚綱目, 漢注 與注 人 者

(儀, ) (儀) 日朝 (集) 日 (集) 書爲 其 書實考典文非考故事乃多載春秋失禮之事繫以論說雜列古制之中卷頁 典是矣乃一 以及諸經之文有涉於禮者以吉凶軍賓嘉五禮統之吉禮之目六十有八凶禮之 見敞所著公是集而澄遺焉則亦不免多所疏漏然較之祁門汪克寬德輔所撰之經 終焉然克寬究心道學於禮家度數非所深求於著書體例亦不甚講如每條必標出 五 禮補逸則條例精密多矣克寬之經禮補逸九卷蓋取儀禮周官大小戴記春秋三傳 以戴記經文龎 一十有七軍禮之目二十有五賓禮之目十有三嘉禮之目二十有一而以禮經附說 士相見公食大夫二儀則取宋劉敞之所補然敞擬記而作者尚有投壺儀 增而精實 . 朝事儀其郷射儀大射儀, 王居明堂禮之見引鄭注未採澄書者亦不少至傳十篇則皆取之二 日士相見儀, 類之中條條連綴書之合爲 雜疑多錯簡故每一篇中其文皆以類相從俾上下文意義聯屬貫通, 則遠遜澄焉澄之撰禮記纂言也其書二十六卷每一卷爲一篇 日郷飲酒儀 取禮記射義篇所陳天子諸侯卿大夫之射釐之爲二 日郷射儀日燕儀 一篇文相屬 而語不屬途致參差 日大射儀日聘儀日公食大夫 無緒; · 戴記; 雖 一篇, 視 叉此 澄

乎若乃疏解三禮繼住渭來死沂象至此近後傳之內焉儻亦張皇補苴有裨禮經者義等六篇別輯爲儀禮傳胥以隸於儀禮逸經傳之內焉儻亦張皇補苴有裨禮經者義等六篇別輯爲儀禮傳胥以隸於儀禮逸經傳之內焉儻亦張皇補苴有裨禮經者 而醇少! 錄 得之見。」又疑喪服傳違背經義非子夏作皆未免宋儒師 君善之儀禮集說 {通 合於舊說者不 而 而 |家之所同蔽而度長挈短當以敖繼公儀禮集說爲善其自序稱『鄭康成注疵多 字研求務暢厥旨實能有所發揮則亦不病其異同矣毛應龍之周官集傳膠執舊 隨 其 識 聲 魏徵類禮之嗣響也他如大學中庸依宋儒別隸四書而投壺奔喪歸於儀禮 其 所 十一篇各爲標目如通 佐鬭 章 删其不合於經者意義有未足則取疏或先儒之說以補之又未足則附 取, 句於左其三十六篇次第亦以類相從凡通禮 而 者有不同也且鄭注簡約又多古語買公彥疏尚 不 ·攻駁所 過所見不同各自抒其心得初非矯激以爭名故與目未睹注疏 禮繼往開來厥有豫章毛應龍 十七卷都昌陳澔 不 取無吹 禮首曲禮則以少儀玉藻篇 毛素垢百計 可大之禮記集說十卷大抵好爲肊 求勝之心蓋繼公於禮所得頗深 介石之周官集傳十六卷長樂敖繼公 施九篇·喪禮· 附之皆非小戴之舊蓋 心之餘習然於鄭注之中 未能 十一 篇祭禮 申 談不 明; 機公獨 ·本古義 劉 四篇, 以 向

逐

之度廟祕 改; 不 功,尤 文疏於考核不 猶 IE 全其 定科舉雖罷儀禮周禮不以試士獨用禮記然禮記則專用古法疏蓋其時老師宿儒, 經 於鄭孔 年記意! 月之並用條例引證頗爲明晰宋以來諸家散佚之說尙因是以存崖略其蒐輯之 有 華 不 術 不可 垂 存者; 中禮記三十卷壹以淵說爲宗用以取士遂誦習相沿而不 爲 斯不足要視敖繼 知 禮 議 出 而 随着所 用集說 没 知 制當有根據禮意當有發明而箋釋字句循文爲詁用爲蒙訓 昭穆之制司尊彝之六尊六 鄭注簡奧孔疏典贈皆不似游說之淺顯宋儒莫詳於衞湜而卷帙繁富亦 明纂元祚遂定禮記用游說 公也至陳澔: 禮不可 如敖繼公儀 則昔賢之訓詁 重徒以禮文奧賾誦讀爲難, 以空言解也離之集說徒託空言而成書則在仁宗制科舉之後, 之禮記集說其詳明者皆襲自鄭注其簡略者即自以意 公之儀禮毛應龍之周禮尤爲卑之無甚高論者矣初仁宗制 禮 之能 半淪。 疏 彝,司 而成祖 通證明然諸 此固澔始 ·几筵之五几五席方弓義弓之異名正蔵 命行在翰林院學士胡廣 因其疏解得知門徑, 願 所不 家 **訓釋引** 及也夫說禮記: 据頗 知用注疏, 斯以 博; 而 等修五 爲 者為唐莫善 於 則 有 冕 則集說之 便蒙之讀 服 餘, 水以 爲删 #1 旗

一五〇

問獨周禮等 申以 幹 }集 不 於文句之間 能 有 疏 之周禮訓雋二十卷長樂柯尙遷之周禮全經釋原十四卷休寧金瑤德溫之周禮 廣昌何喬 明 -卷翼傳 似淵說 爲 疏 說 德之讀禮疑圖六卷歸安唐樞惟鎭之周禮 出 不 事考據, 朱子之壻 後, **| 好要非宋元諸儒望文鑿空者所得置辭也宋儒周程張朱白度徵實之學必不** }行 漢唐上故雖盛稱周禮而皆 又苟 ൬ 鄭江 差多習者然周禮 新廷秀之周禮集注七卷進賢舒芬國裳之周禮 一卷圖 趨簡易以敍官 而推論義理於是考證之學漸變爲論辨之學其可考見者如 而自俞廷 易义南宋 孔 **遂**藉朱學之旗鼓獨 說 疏 一般三禮之在有明幾爲絕學禮記既古義蕩然而儀禮! 一格以後多騁臆見電亂五官以補冬官之亡經遂破裂不完失 卷德清沈瑤林珍之周禮發明 以來朱子之學大行而澔父大猷師餘干饒魯魯師黃幹 爲 一書得鄭注写 無 用 無箋注之專書其傳於今者王安石 列學官而 而 删之經遂有目 闸 訓詁 因論 成禮家不刊之書焉自是禮記 明得質疏云 卷崑 無綱沿及明代, 卷大 定本 山王應電 而 名物制 抵議 四卷 論 爛 昭 Ŧ 長興陳深 多 度考究大備雖 明之周 而 昭 逐頹波义空 考證 山陰 東閣 禹 之陳澔 始 季本 子淵 少 無 推 而

卷:豐 城徐即登匡岳之周禮說十四卷京山郝敬仲輿之周禮完解十二卷莆 义承 譌襲謬竄亂古經

郭良翰道憲之周禮古本訂註六卷則 亡之說者也鄭注賈疏亦幾幾乎從就矣獨崑 雜 疏删翼三十卷壹以鄭注賈疏爲主謂之删者以其書多刊削鄭注賈疏之繁文也又疏删翼三十卷壹以鄭注賈疏爲主謂之删者以其書多刊削鄭注賈疏之繁文也又 以家藏宋景德中官本儀禮疏, 蕪之日臨深爲高, 爲 本 附 根 引諸家之說以發明其義故謂之翼雖多采宋以後說不免浮文妨要而能以 厥推濟陽張爾歧稷若鄞縣萬斯大充宗皆明之遺獻也初爾歧之父日廷鸞者自 益, 柢尙變而 手自點 校幷取朱子與黃幹楊復所次成儀禮鄭注句讀 不離其宗者也又篇第壹瓊舊次不爲竄亂亦爲力遏橫 可謂研 心古義者矣既讓清代與禮學重光 正經注語皆標起止而疏文列 山 王志長平仲於神宗之世撰周禮注 其下因以明國子 而首開 而宗宋俞廷椿冬官 干七 卷附監· 風 氣驅除 流在經學荒 本正 監刊 先路 注 疏

體 一志第五 家其謬誤

脱落

經

IE

誤二

一卷其

所校除監本外則有唐開成石經本元吳澄本及陸德明音義朱子師弟經傳通解

書全錄儀禮鄭汪摘取賈疏而略以已意斷之於字句同異考證極

行羨頭倒經注混淆之處皆參考得實又以監本十三經儀禮

尤 故 禮卓然經師吾不如張稷若』推挹甚至不徒然也至斯大以三禮名當世不同爾歧 {句 編, 其官冘而賦重歷引諸經之相牴牾者以力攻其偽也曰儀禮商二卷則取儀禮十七 學禮質疑之辨商周改月改時周詩周正兄弟同昭穆及宗法十餘篇推闡皆極精確, 篇篇爲之說者也日學禮質疑二卷蓋讀禮有不安者以志疑也日禮記偶箋三卷則 卻導竅言之了了爲書三百卷』惜其不見而 然斯大學本淹 與學禮質疑相爲表裏者大抵好出新義勇於師 於學者 並爲之句讀蓋儀禮一 多而 **闇然隱淪傳者稱**了 其非而存其是亦未始非一家之學也然好騁獨見不盡可依據轉不如張爾歧恪 書, 根· 四安王堯惠刻石經補字亦有舛錯乃爲一一駁正而因其文之古奧難通也, 可謂有功矣崑山顧炎武亭林於友朋嚴於推許獨為 本先儒立言簡 通用思尤銳其合處往往 斯大排纂說禮之言較衛湜爲尤傳湜無所折衷而斯大則批 經自唐韓愈已 當而惜其不 ]苦難讀故習者愈少傳刻之譌愈甚爾歧茲 求聞達無當時之名作廣師篇日『獨精三 發明前 別出者 心讀者或喜其覃思而亦嫌其自 入 所未發如儀禮商之辨治 四書日周官辨非一卷大旨病 人稱爾歧儀禮鄭注 朝 無堂;

守 鄭 注離經辨志之謹樸矣自張爾歧萬斯大而後風氣大開議禮之作日出略, 可考

+ · 注 · · · · · · · · · 見者周禮則有安溪李光坡耜卿之周禮述注二十四卷李鐘倫 卷桐城方苞望溪之周官集注十三卷周官析疑三十六卷考工記析義四卷周 卷吳縣惠士奇天牧之禮說十四卷婺源江永慎修之周禮疑義舉要七卷金 世得之周禮訓

故 進 壇段玉裁懋堂之周禮漢讀考六卷章協夢之周官彙說三十二卷附解義 書考四卷南城王聘珍貞吾之周禮學二卷南海曾釗冕士之周禮注疏 莊存與方耕之周官記五卷周官說二卷周官說補三卷德清徐養原新田之周官 小箋四卷 十二卷武

湘潭王闓 有李光坡之儀禮述注十七卷方苞之儀禮析疑十七卷仁和 運壬秋之周官箋六卷瑞安孫詒讓仲容之周禮正義八十六卷焉儀禮 吳建華中林之儀禮章 則

{旬 十七卷無錫蔡德晉仁錫之禮經本義 十七卷吳江沈彤果堂之儀禮 小疏一 卷長

褚寅亮搢升之儀禮管見四卷秀水盛世佐之儀禮集編四十卷江永之儀禮釋例

禮集解四十 一卷段玉裁之儀禮漢讀考一卷數縣凌廷堪次仲之禮經釋例十三卷章協夢之儀 卷儀禮章句十七卷武進張惠言皋文之儀禮圖六卷讀儀禮記一 一卷續

溪胡培鞏竹村之儀禮正義四十卷涇胡承珙墨莊之儀禮古今文疏義十七卷徐養 筠仙之禮記質疑四十九卷焉若乃一事一 述注二十八卷方苞之禮記析疑四十六卷江永之禮記訓義擇言八卷仁和杭 卷焉禮記則有滿洲納喇性德容若之陳氏禮記集說補正三十八卷李光坡之禮記 之讀儀禮錄一卷遵義鄭珍子尹之儀禮私箋六卷湘潭王闓運壬秋之禮經箋 溪胡匡衷撲齋之鄭氏儀禮目錄校證一卷王聘珍之儀禮學一卷湘鄉曾國藩滌生 原之儀禮古今文異同疏證十七卷嘉定金曰追璞園之儀禮經注疏正譌十七卷績 陳喬樅樸園之禮記鄭讀考六卷湘潭王闓連壬秋之禮記箋四十六卷湘陰郭嵩 之撫本禮記鄭注考異二卷德淸俞樾蔭甫之禮記異文箋禮記鄭讀考各一卷侯官 大宗之續衞氏禮記集說一百卷江都焦循里堂之禮記補疏三卷陽城張敦仁古餘 徵阮元芸臺之車制圖考一卷歙程搖田易疇之溝洫疆理小記水地小記考工創物 田考三卷嘉定王鳴盛西莊之周禮軍賦說四卷休寧戴震東原之考工記圖二卷儀 小記各一卷鄭珍之考工輪輿私箋一卷附圖 篇專攻名家者周禮則有沈彤之周官祿 一卷定海黄以周元同之軍禮司馬法 世駿

献 卷儀禮 課饋食禮三卷江永之釋宮譜增注 則有秀水諸錦襄七之補鄕禮一卷荆溪任啓運翼聖之宮室考十三卷肆 卷 與化任大椿幼植之弁服釋例八卷臨海

洪頤 深衣釋例三卷胡培暈之無寢考三卷善化皮錫理鹿門之王制箋一卷南海康有爲 九卷南豐吳嘉賓子序之喪服會通說四卷禮記則有錢塘邵泰衢鶴亭之檀弓疑問 長素之禮運注一卷而棄綜博考不名一家者則又有崑山徐乾學健養之讀禮通考 卷江永之深衣考誤 煊筠軒之禮經宮室答問二卷程瑤田之喪服足徵記十卷胡匡衷之儀禮 一卷吳縣惠棟定字之明堂大道錄入卷禘說二卷任大椿之

蕙田樹峯之五禮通考二百六十二卷飲金榜樂齋之禮箋三卷曲阜孔廣森撝約之 百二十卷平湖陸隴其稼書之讀禮志疑六卷江永之禮書綱目八十五卷金匱秦

金鶚誠齋之求古錄禮說 禮學巵言八卷江都凌曙曉樓之禮說四卷侯官陳喬樅樸園之禮堂經說一卷臨海 五卷補遺 卷當塗夏炘心伯之學禮管釋十八卷仁和

凡一千六百三十一卷其不知者蓋闕如也可謂洋洋乎大觀也哉問嘗究其得失

三醴志第五

西之禮經通論

卷黃以周之禮書通故

戶卷皮錫瑞之三禮通論

發經疑, 者。 明. 其 有 指 發 歸有考記 以俟論定 凡 起 例, 觀其會通 訂 者 <u>'</u>字句, 有偶 Ē 疏 者。 有删正 小 ·笺, 自 | 抒所 舊 注, (見者有) 訂其闕 失者有数 折 校其音讀者有離 衷至 當, 駁糾 重造 前 人無乎 新 經辨志 疏 者。 有 亦 明其 依 刊 者。 物 有 取類, 章 句 明

繪 賢者有旁采古記 爲 禮 圖 者。 有疏證名物究明古制 而補禮經之闕佚者有囊 者。 有 心 」括大典而考禮制之沿革者有兼綜三 知 其 意創 通 大義 者。 有 網羅 衆說, 博 来 禮 前

周 而 官故 明 禮 學之源 書考儀禮古今文異同疏 委者略條諸 家以明指歸。 證, 金. 1日追 則有胡 之儀禮經 承珙之儀禮古今文疏義徐 經注 正譌張敦仁之撫 本禮記 養原之 鄭

注考異俞樾 之禮記異文箋斯所謂考訂字句正其譌脫者也段玉裁 之周禮漢讀

儀 禮漢讀考俞樾陳喬樅之禮記鄭讀考斯所謂辨章注語校其音讀者也吳廷華章 志,

協夢 之儀禮章何江 句者 也江 永之儀 永之禮書綱日胡 禮 釋例凌廷 堪 之禮經釋例莊 匡 衷之鄭氏儀禮 存 與 目錄校證所謂 一之周官記, 任大椿之弁服 離 經 辨 明

釋例 深衣釋例斯所謂發凡起例觀其會通者也李光坡之周禮述 李鍾倫之周禮訓纂斯所謂删正舊注訂其闕失者也納喇 性德之陳氏禮 注 儀禮述注 řĽ

補 ĪĒ, 惠士奇之禮說沈彤之周官祿田考江永之禮記訓義擇言深衣考誤褚 寅亮

方苞之周官析疑周官辨儀禮析疑禮記析疑邵泰衢之檀弓疑問, 禮管見鄭珍之儀禮私箋斯所謂駁糾前 Ĺ 庶乎不刊者也陸隴其之讀禮志疑, 江永之周禮疑義

禮箋孔廣森之禮學巵言莊存與之周官說周官說補焦循之禮記補疏張惠言之讀 舉要郭嵩燾之禮記質疑斯所謂明發經疑以俟論定者也沈彤之儀禮小疏金榜之

儀 禮記 王聘珍之周禮學儀禮學曾國藩之讀儀禮錄 曾釗 之周禮注疏 小箋斯所謂

偶 重 造新 疏 小箋自抒所見者也胡培翬 疏者也戴震之考工記圖阮元 之儀禮正義孫詒讓之周禮正 之車制圖考張 惠言之儀禮圖鄭珍之考工 議斯所謂5 折 衷至當

E 奥私箋附圖 鳴盛之周 灣軍賦說程瑤田之溝洫 斯所謂依物取類繪爲禮圖者也任啓運之宮室考江永之釋宮譜增注, 疆理小記水地小記考工創物小記洪頤 煊

禮經宮室答問胡培肇 之燕寢考胡匡 一衷之儀禮釋宮陳喬樅 之禮堂經說, 金鶚之求

錄 程瑤田之喪服足徵記凌曙之禮說吳嘉賓之喪服會通說皮錫瑞之王制箋 禮說夏炘之學禮管釋斯所謂疏證 名物 究明古制者也惠棟之明堂大道 錄,禘

三體志第五

通考黃 杭 | 部懿辰 集編, 爲之禮運注斯所謂心知其意創通大義者也方也之周官集注蔡德晉之禮經本義, 論皮錫瑞之三 司 馬法 大宗之續衞氏禮記集說盛 然識太識小賢否判然而揚權羣言較其短長要以惠士奇之禮說盛世佐之儀禮 網羅衆說博采回賢者也諸錦之補饗禮任啓運之肆献裸饋食禮黃以周之軍 讀考莊存與之周官記凌廷堪之禮經釋例張惠言之儀禮圖胡培肇之儀禮正義 禮說、厪限於周禮而言禮學者固以鄭玄爲宗然必悉其名物而後可求其制 褚寅亮之儀禮管見杭大宗之續禮記集說秦蕙田之五禮通考段玉裁之二禮 斯所謂旁蒐故記而補禮經之闕佚者也徐乾學之讀禮通考秦蕙田之五禮 之禮經通論十二家開設戶牖爲能 以周之禮書通故斯所謂括囊大典而考禮制之沿革者也邵懿辰之禮經通 一禮通論, 斯所謂棄綜三禮 世佐之儀禮集編韋協夢之周官彙說儀禮集解斯所 而 不誣來學斯有可得而論者焉按惠士奇 明禮學之源委者也雖議禮考文厥功無 度;

漢年代杳遠在玄當日之所謂猶今某物某事某官者多不解爲何語

語其義理鄭玄之時去周已遠其注周禮多

比

擬漢制以

》明之後:

世去

而當日

經

師訓

制

度

而後可

舉 詁, 明 其 周 輾 轉 制, 所 哎 考證駁辨者; 流 以 **停亦往往形聲並異不可以今音今字推求士奇之書雖不** 參考鄭氏 然古音古字無不 所引之漢制 以 遞水 爲之分別疏 周 制, 通; 明 丽 援 引諸 作之意尤為 史 百 載全經 家之說或以證 裨禮 而 學不 惟標

而

闡

制

有

義; 惑方來其持論以為 謂 古山 訓 康成 不 可 好改字豈其然乎! 改也 康成 禮經出於屋壁多古字古音經之義存乎訓識字審音乃知其 注經皆從古讀蓋字有音義 康成 三禮, 何休 公羊多列漢 相近 法, 而譌 以 者故讀從 其 去古未遠故 之後 借 世不 以

字亦不能; 不 爲 故 能 況賈公彦於鄭注, 盡 通 疏顿; 心況宋: 聖之書者非善讀書 日從 以後乎周三 俗讀, 如『飛矛』『扶蘇』『 医非不 秦 諸 子其文雖不雅馴; 知蓋闕之義 温儒之談 薄』『 借綦 』 之類皆不能疏所讀之 夫漢遠於周, 然 可 引為 而唐义遠於漢宜其說 禮經之證以其近 古也。

深 之習於 也! 盛 經 不 萷 狮, 世佐本末無考其儀禮集編 非 諸家謬誤 ൬ 夏 輯 占 今說 辨證極詳而以宋楊復之儀禮圖本注疏作, 儀 禮 者 \_\_\_ 一斯誠 百 一書成於乾隆 九 十 通 七 家斷 以已 而非 十二年丁卯雖不 意, 拘文牽義之經 無淺 學 然時有併注疏之意失 空腹 如 生所 高 惠氏禮說之 談 뺎 政 排 與 鄭 知 湛 者

志第五

一六〇

年; 於後而 樂其 公出, 編 西。 實 而 經 朱子黃幹楊復諸大儒 有 不 不得 一乃詆爲 謂: 自 亦 有不 易曉往往舍古訓而從之近儒方苞沈彤咸稱其善然推繼公之意不在解經 南面 知 意 經記 不 淮 與鄭玄立 『即射賓中年少者以是勝黨故『 不權立 敢移易經文亦可謂儀禮家之謹嚴者矣時則有褚寅亮殫精儀禮蓋三十 宋人說經好為新說棄占注 明言 通, 坐奠於豐上 育記, 是正之其持論謂『朱子儀禮經傳通解析諸篇之記分屬經文蓋編纂 甚且改竄經 疵 統於門, 多醇少! 此例 翼特巧: 依鄭玄其士冠士相見喪服等篇經記傳寫 以 |降袒執弓反位||敖以| 於立言含而不露若無意排擊者是以入其玄中而不 又崇信之故鄭氏專門之學未爲異義所汨至元 便尋省惜未 文曲就其義; 門 其所撰集說云采先儒寔騁私臆學者苦注疏 在 東則不 |卒業||而門人繼之因仍不改非朱子意 如郷 如土苴獨儀禮爲樸學空談義理者無從措辞; 得 以 **袒執弓** 』非衍文也燕禮 飲 14 酒 袒 記 爲 執 上 若 弓 也 有 郷 一句爲衍不知 射記 北面者 混淆者則別定次序 東上; 勝者之弟子 知所謂 勝觚於賓 吳興 之繁 敖 改 勝者 放繼 故是 悟! 至 重 洗 東爲 觶 而 而

酸酒 豈得妄解 紕言之日 縓 破 敖 下 福 有 喙 射 向 觚 改 禮, 不 # 也! 爲 東, 位 爲 觚 之博, 知 爲衍 佐 因 安 練。 觶 爲 得 則 所 著儀禮管見一 不 在 鄕 北為 平? 觶 明齊 文。不 縓 知 南, 亦 不 以 飲 練冠 大, 郷射 速者 冠; 不 彼 不 酒 知注 た。 **矢口 處** 强 衆 為 排 相 ン 敖 (後 盛 15! 賓 西豊, 大 重故言其質; 例 靴亦 射 杭 平? 輙 明言 it. 以假者酬以觶燕禮宰夫 世位之於儀禮集編惟其書網羅羣言而 答 以 書, 删經 而 所 # 拜 縁以 同之, 耦 儿 h]。 駿續 \_ 者, 有 但 左 不 如 文 乎特! 縓, 大夫 還 味 酒 禮記集說 所 妻輕故言其紕; 如盛世佐儀禮集編之 郷 云, 無 于 射 上 牲 饋 射丁 护门 爲 醴, 東 位 1: 融 IJij 在 之別 所錄自宋元 良禮: 而 貫 左, 人 福 11 据 全 14, 矣喪服記 主献; 有 從 敖 經 下 練 J|: 文 有一 冠 依 疏 pi]  $\equiv$ 福 徹之 總 拜 向 郷 旣 通 **普薦瞍酒** )博洽 衆賓 緣; 也。 人 證 不 射 鸠, 明; 答 则 以 ----7 改 衆賓答 就 公子 雖善 處禮 僻, 北 爲 而於敖氏書繩 拜者, 寫 略 其 则 于 哵 不折衷以 初 質言之日 右。 爲 右。 辨 亦專言 大射 別 大夫 再拜; 明 亦不 者 其妻縓冠 不 擇 齊 知 不 能 以觶 艘 爲 次 阳 Ŀ <u>\_\_\_</u> 旦意, 爲 極 愆 敖 酒, 練 酒, 在 射 稿 糾 敖 主 改 不 冠; 矣! 福 位 及 醴; 則 敖 審; 違 氏 敖 就 也 冉 東, 在 安 有 從 亦 此 以 其 改 MI 寫 北, μJ

禮皆有天一 印證者繼之以注疏諸儒之牴牾訾議者义益以唐宋以來專門名家之考論發明者; 明 學讀禮通考一書本之經傳而參以歷代典制, 議 僅彙纂經傳而未及考訂漢晉以來之禮然漢晉以 以 而 與 也! 堂宗 iųi 禮 人者 護田 世佐 載 萬田 (周 所謂 豁 廟禘賞饗宴朝會冠昏賓祭宮室衣服器用等先之以經文之互 官大宗伯 有之而其不合之處,正宜 儒之說, 朱子嘗欲取儀禮周官二戴記為 室尸 異者蓋 再攻禮學及冠之年, 損益 下者議 , 其事相? 叫 考訂辨正以爲當代之典。一今觀所著經傳通 仍 所列 知 禮考文制 濇浞之例然論禮書之採摭極博當無有過於秦蕙田 者從何處下手雖然爲叔孫通 與論 ŦĹ. 禮之日· | 度之實而爲當代禮典所由出特其沿革損益不能 與同 三禮自秦漢 古經散亡鮮能, 搜羅正述 . 縣蔡德晉宸錫吳鼐 本編次朝廷公卿大夫士民之禮盡 諸儒抱殘守缺注疏雜入讖緯轇轕紛紜。 一考訂折衷以定其是非此而 規模義例 尋端 火之禮, 之綿蕞而 竟委」 大年吳鼎 具得 卽 **迺於禮經之文如郊祀** 朱子本意惜其僅及喪 解繼以黃楊 孔子所謂百世 不可得矣獨 **尊奉兄弟** 一見錯 不 Ŧi. 崑 錄, 為讀 一禮通 氏 出, 可知之 則 山 取 足 徐乾 修 盡合 世 漢 經會; 相 儒

衆授時 考辨, 所赅 神官 擇; 甚 事嫌 成 半 讀其書而譏為 隱 援 而 發明 慝之 月 引, 書凡為5 算 如是 旁 小 無 本 何 潛滋 會, 斷 訛, 從 訓 經為書數篇而未成則萬田之以類纂附尙不爲無據也顧同縣顧棟高震滄 博; 沙, 制 故朱子儀禮經傳通解於學禮載鍾律詩樂义 非正禮所應該不免有炫博之意然周代六官統 間 亦取其言之是而 劉 世! 題統之以古今州 者二十餘 類七十五; **险流其毒以惑後** 者難者答者辨者迴旋反覆務期愜諸已信諸 亦 制! <u>L</u>\_, 慈田 善援 因 謂 以詳備然後疑處可 引者正即接 拨引 則應之日「 年; 以樂律附於吉禮宗廟制度之後以天文推步句股割圜立 而夏然漸 多而斷制 助吾之斷制者耳 國都邑山川地名 立體國 世而潛害吾之斷制 援 引 有 引 少典故多而發明 而 成 者, 破碍障可除先聖之制作, 帙 斷 矣然後發儿! 制; 制 (II) 非阿 グ所 茅 然亦顯 者 從 事 少, 出; 經野 也。 起 耳。 光子曰: 如禮書 欲取許慎說文解字序說: 如 斷 例, 著 此, 名 制 人 依徐氏而 者, 而 则 其謬明斥其 題統之並載入嘉禮雖 日禮禮之用, 總帳 乃獨伸其是而尊於 援 援引之歸宿 「禮失而求諸 後乃筆之箋釋存 引 **以簿讀者** 愈 老 網羅衆說 典故 非, 精 也苟 漫無 不 粗 愈 野。 條 健 多, 及 別 貫, 觀 以 如

播山夫也。 讀若。 不易字故下文仍舉經之本字變化字已易故下文輙舉所易之字注經必兼茲二者, 就其 錯同 **呼同音同而義可推** 爲 音讀謂之名名之分別部居謂之聲類鄭君注周禮多采杜衞賈馬二鄭之說猶 能徵之矣』中庸日『 易而考禮文之審其惟段玉裁之二 具 百 制 比方之詞。『讀爲讀日』 有經緯而同削草者吳鼎與校訂者桐城方觀承宜田嘉定錢大听莘楣 者亦必憑私忖度罅隙百出動輙罣礙 世之上豈漫無別擇而牽引之哉若使希圖省事源流本末岿然不 《字之聲類而後不以經妨字也漢人作注於字發疑正讀其例有三一曰『讀如 !事相違則就其原文字之聲類考訓詁蓋訓詁必就其原文而后不以字妨經; 二二日『讀爲讀日。 可謂體大物博而集歷代禮制之大成者矣然議禮制固綦難考禮文亦不 也變化主乎異字異而義憭然也比方主 無徴 三三旦 者易其字也易之以音相近之字故爲變化之詞。 不信。』徵者援引也典故也。」以故考證經史原原本本, 『當爲』『讀如讀若』者疑其音也古無反語故 禮漢讀考乎自序稱「 而不 足信孔子曰『文献不足故也足則吾 點畫謂之文文滋謂之字。 乎音變化主乎 六四 知卽有所謂 山陽 義。 比方主 有 吳玉 差 必 斷

聲之誤 故有 當爲』之諸例俱在焉其儀禮則僅成十冠禮一卷而已亦不如周禮之完密也夫周 |漢注 讀者朱子云『祗爲重複倫類若通則其先後彼此展轉參照足以互相發明。 莊 漢讀三例寔自玉裁發之其言固不 而 是言然通 文不先爲考定禮制且無從置議因先成周禮漢讀考六卷而『讀如』『讀爲』 文注 正之謂之『當爲』凡言『讀爲』者不以爲誤言『當爲』者斥其誤三者分而 存與之周官記關通羣經融會參證於體國經野分土任民之法言之尤詳其書不 一書根據鄭注考其讀例者莫如段玉裁之漢讀考而融貫經文明其制度者當推 一讀 可讀而經可讀三者皆以音爲用六書之形聲假借轉注於是焉在」 讀為 箋而提要鉤玄白成一書匪經文之輿優寔古禮之別記也至儀禮之所以難 而改其字也爲救正之詞形近而譌爲字之誤聲近而譌爲聲之誤字誤聲誤 倫類宜起凡例鄭注賈疏咸重發凡而有未逮凌廷堪禮經釋例融貫全經, 如」有『讀爲』字書不言變化故有『讀如』無『讀爲』 某 面面 仍本字者『如』 **厪爲禮經發而周禮寫自古文儀禮稱尤難讀禮** 以別音] 爲 一以別義。 當爲 』者爲字之誤, 一有言 是則周禮 二讀如 誠哉

之功臣! 以補楊復之所未有 將 節 者必明宮室而 偶 於訓詁名物而考訂源流辨章經記卓乎禮學之鈴鍵矣黃以周兼綜三種撰禮書通 其例有四日『補注, 而後賈疏獨行或解經而違經旨或申注而失注意』參稽衆說別造正義自述所 文明張惠言制儀禮 無同譏獨張惠言仿楊復取儀禮十七篇篇爲之圖而首冠以宮室之圖總絜綱領, 通 近儒 于大通斯足以破經生拘墟之見而佉曲學專已之私焉邵懿辰禮經通論不斷斷 有 服之例四十雜例二十有一; 例四十飲食之例五十有六賓客之例十有八射例二十變例二十有一祭例三 遠失詳爲辨正別是: 然而不 所 說雖異玄怡義 別立宮室之例者蓋以爲宋李如圭儀禮釋宮已詳故也 后陳設進退 可謂知所先務也自凌廷堪撰禮經釋例而後詳略隆衰儀禮之 圖, 』補鄭玄注所未備也曰『申注』中鄭玄注義也曰『附注, 叫 而後陳設進退儀禮之器數明至胡培暈覃精儀 非, 明折 旁通附而存之廣異聞佉專已也日『訂注, 知所措宋楊復儀禮圖無宮室論者以爲 宏綱細目經緯具在信足匡鄭賈所未逮而爲禮經 衷 心雖乖 唐賢 疏不 ·破注 之例要之無所依違 未得 惟是讀 」鄭玄注義, 要領淺例 禮問一 鄭

(故, 成 斷 列 田 [通考按] 五 制; 干月, 蕙 **虁括** 田 而 固 不 明言 斷; 大典殫見洽聞與秦蕙田五禮通考比隆其校覈異義, 而 之矣 以周 寧不 則 博徴 能 古說 斷 制 哉! 而 乃或 斷以 者以 已意者也然通考之作, 此損 蕙 田 「而揚以日 或謂過 周, 斯亦 卽 援 引 以

之遺 其 知 制 也孫治讓 闕 度; 蓋鄭注 而博 采漢唐宋以 極簡 專攻周禮別造 奥而 賈疏 來迄於清 证義, 或隱略 儒諸家解詁 大抵以爾雅說文正 叉 、於杜 子春鄭興鄭衆 一一零互證釋 其詁訓; 以發鄭注之淵奧神 三人 以禮經大小戴記證 異義後鄭之所 買疏

釋此 **注** 精貫 經開 與 **(**羣經) 鄭 選; 固 不容破然杜鄭三 加 於古訓 il; 制宣 唐疏 究詳 君之義後鄭所讚辨者本互有是非乾嘉經儒 確, 或勝注 義。 博稽 衆 家, 輙 据 匡 糾, 凡 所發 考

采者,

但

有

糾駁.

略

無

申

品識

謂

例

不

破注,

固

無足怪然六朝義

疏

則不

證。

IE 後 鄭 數 + 百 事。 而 拘牽後鄭 義 者, 往往 E 肅。 治護意 無 適 莫; 社 禘 祄 则 從

廟 疏, 制 明 揭 昏 賈義 期 则 從 不 如 王; 於鄭注不 胡 培建 儀禮之或 為曲 從。 襲買釋而 亦 猶 胡培肇 没不 儀 称名其不 禮 JF. 義訂 攘 注 善之用 之例 也。 至其 心, 尤 有 甄 培量 采

不 逮 者焉 獨 是讓清禮 學冠絕前 古正義儀禮前有胡氏更疏 漏官別· 出 品渡;

醴 志第 所

前

其

子 人, 有功 以 告 禮學獨禮記則無之不惟三禮新疏缺 友 人陽湖孫星衍 淵 如 日: 吾父死無他言疑周官儀禮之委曲繁 一不備吉聞元 和江聲艮庭之殁詔, 六八 重,不 口

行於今也。 上星行 則層之日 禮意之會通在禮記 不曰『君子行禮不求俗』 叉日

飲 禮 酒 食 從 宜, 使從俗』乎居喪衣衰麻不食肉飲酒而公門則脫齊衰 能以此告之矣」旨哉 然則筦禮學之樞 要者禮記也儻籀禮義 大夫父友食之則 必 明

惜 無人 更爲之疏以有 光於前 人 者至皮錫瑞三禮! 通論大抵本邵懿辰之禮學

斯寔讀 通論而博采衆說以爲敷佐別白今古論證沿革俾學者有從入之途而無多歧之患 南治學之入門也的

爲 夏 友時書五 禮 之指 禹貢 惟言地理茲則 言 惟是學者並稱三禮罕及大戴然考大戴所記夏小 天象與堯典合公冠諸侯 遷廟釁廟朝事等篇足

证

字句較小 補 儀 禮 十七篇之遺盛德明堂之制爲考工記所未備投壺儀節較小戴爲詳。 戴爲確然則大戴不可廢也顧 北周盧辨之注既未精備 哀公問

業者章 句 混 淆 古字 更舛迨淸儒休寧戴震東原餘姚盧文弨 抱經 相繼 校 訂, 蹊 逕 漸

而

更數千句

年

無

孔廣森撝約乃博稽羣書參會衆說爲大戴禮記補注十三卷敍錄一

卷然肊

闢。

曲

阜

法多所發明無隱滯之義無虛造之文實有勝於孔廣森之補注者焉斯亦禮經之別, 古本爲家法所以懲孔廣森妄据他書徑改記文之失其爲解詁也義精語潔確守漢 改記文有識或病南城王聘珍貞吾重爲解詁凡十三卷敍錄一卷其校記文也專守

子也謹以殿於篇末篡三禮志第五

## 春秋志第六

所記, 以告者曰『有磨而角者』孔子曰: 王道壹爲魯司寇秉政諸侯害之大夫壅之孔子知言之不用道之不行也於是去魯 死。 斥乎齊逐乎宋衞困於陳蔡之間已而反魯魯哀公十四年春西狩於大野叔孫氏車 成罰假日月以定曆數藉朝聘以正禮樂上記隱下至哀之獲麟十二公據魯親周故 周公之國禮文備物史官有法故托於魯而次春秋據行事仍人道因興以立功敗以 言 子鉏商獲獸以爲不祥孔子曰『麟也』麟者仁獸也有王者則至無王者則不至有 乎弗乎君子疾沒世而名不稱焉吾道不行矣吾何以自見於後世哉我欲載諸空 子曰『噫天喪予』子路死子曰『噫天祝予』及西狩獲麟孔子曰『吾道窮矣 不 必表年以首事年有四時故錯舉以爲所記之名題日春秋也周室既微孔子明 如見 古 之王者世有史官君舉必書左史記言右史記事事爲春秋言爲尚書而史之 諸行事之深切著明也。 故西觀周室論史記舊聞得百二十國寶書以魯 『孰爲來哉孰爲來哉』反袂拭 面涕沾袍顏淵

勢力, 道 文則 宋運之三代約其文辭而指博上明三王之道, 以 **善善恶恶賢賢賤不肖存亡國繼絕世補弊起廢王道之大者也其事則齊桓晉文其** 備, 合異具論其語成春秋左氏傳以授曾申申傳魏 傳明孔子不以空言說經也或先經以始事, (史孔子曰) 人事浹! 不 可 以 書 七十子之徒, 見也魯君子左 『其義則丘竊取之矣後世知丘者以春秋而罪丘 口口 1受其傳指5 丘 明懼弟子人 爲 有所 人異端各安其意失其真故論 或後經以終義或依經以辯理或錯 刺譏褒諱挹損大人當世君 下辨人事之紀別嫌疑; 人吳起起傳其子期期傳 \*\*者亦以春秋! 明是非定猶豫; 臣有 楚 本 事 X 威 經 而

是傳 趙 椒, 人處卿處卿作處氏微傳二篇抄撮九卷授同郡尚卿則左丘明之六傳弟子 為楚威王 春秋者分爲二義有記載之傳主於記 字子夏少孔 公羊穀梁鄒夾之傳是也鄒氏 傳爲王不能盡觀春秋采取成 子四十二 四歲。 孔子日 二 無師夾氏 吾志在春秋, 事; 敗卒四十章爲鐸氏微又作鈔撮入 有錄 春秋之左氏傳是也有訓詁之傳 無 行 書而公羊穀梁之傳皆自 在孝經春秋屬之商孝經 也合 卜商

之參也。」齊人公羊高者嘗受春秋於商以傳其子下而严傳子地地傳子敢敢傳子

壽至漢景 帝時壽乃與齊人胡母子都著於竹帛漢書藝文志著錄公羊傳十一卷者

是也. 康公爲繆公而襄二年傳云『齊姜與繆姜則未知其爲宣夫人歟成夫人歟 大指明於解經疏於徵事文十二年秦伯使遂來聘傳云『賢繆公也』此誤以 」昭一

矣事之荒略何論焉蓋公羊傳之不傳事與左丘明之傳事不傳義者殊指也至傳引 曹伯廬卒於師傳云『未知公子喜時從歟公子頁芻從歟』 』『子司馬子曰』『子女子曰』『子北宮子曰』又有『高子曰』

則當事

人

月不

知

盡出公羊于也穀梁傳者始於魯人穀梁赤亦云自子夏與公羊傳同惟公羊高親受 子沈子曰 魯子日』蓋皆春秋傳經之師而壽及胡 母子都博采其義以爲坿益是傳義

於 指 齊 子夏而穀梁赤秦孝公同時人乃後代傳聞以授荀卿荀卿亦傳左氏而授穀梁傳 人浮邱伯以傳魯申公亦係口說未知誰著竹帛而題穀梁傳者蓋著師傳之始

穀梁漢書藝文志著錄穀梁傳十一卷者是也其傳指在解經與公羊同其傳文每往 復語難以盡其義亦與公羊同然傳義則有與公羊同者亦有與公羊異者而與公羊

異者或並存其義或直斥其非莊二年公子慶父帥師伐於餘丘公羊云「『邾婁之

邑也曷爲不繫乎邾婁」『國之也』『曷爲國之』 蟓』非稅畝之災也」此穀粱非公羊之說也公羊以為宣公稅畝應是而有天災穀 是公羊傳矣此並存其義者也宣十五年初稅畝冬蝝生穀粱云『蝝非災也其日 伯克段于鄒竹云『殺之』如此者不可枚舉矣蓋穀梁晚出因得監省公羊之違畔, 梁以爲不 子 二年子叔姬卒公羊云「『此未適 公羊異者也與公羊同者隱公不書卽位公羊云『成公意』穀梁云『成公志』 而 君在而重。」之說即兼存公洋「『曷爲國之』『君存焉爾』」之義也文十 公子貴矣師! 或取或不取或非之或兼存之與公羊傳義有同有不同也公羊穀梁皆解正春秋, 秋 叔姬, 秋 所 所 無者公穀未嘗言之而左氏敍事見本末則有春秋所無而 然故曰『非災也」 有而左氏不爲傳者焉故漢博士謂『左氏不傳春秋』而推本公穀以 **』貴也公之母姊妹也其一傳门**『 重矣而! 敵人之邑公子病 『非稅畝之災也』此直斥其非者也此穀梁義之 人何以卒」『許嫁矣』」 許 嫁以卒之也。」」此所謂其一傳明 **『君存焉爾』** 而穀梁則云 左氏爲之傳者焉。 」「其 而穀梁則云 一人其 三日 與

春秋志第六

真孔子之意也然秦火之後漢初惟左氏傳最先出孝惠之世北平侯張蒼献春秋左 治公羊春秋爲景帝博士與廣川董仲舒同業仲舒著書稱其德年老歸敎於齊齊之 著竹帛多古字古言謂之古學而公羊漢時乃興傳以今文謂之今學胡母生子都以 氏傅蓋受學於荀卿者也然則漢之獻書張蒼最先而漢之得書首春秋左氏傳以先 所從始 仲舒少治春秋與胡母生俱為博士下帷譯誦弟子傳以久次相授業或莫見其面蓋 言春秋者宗事之菑川公孫弘年四十餘乃學春秋雜說亦頗受胡母生之說焉而蓮 而 士前後百數而仲舒以賢良對策大致案春秋之文求王道之端以觀天人相與之際, Ħ 天之所爲而下以正其所爲正王道之端云爾。」謹案春秋謂一元之意一者萬物之 正 三年不窺園其精如此進退容止非禮不行學士皆師尊之武帝卽位舉賢良文學之 貴 得之於正謂「正次王王次春春者天之所爲也正者王之所爲也其意曰「上承 四方四方正遠近莫敢不壹於正孔子作春秋先正王而繫萬事見素王之文焉上 者始故爲 也元者辭之所謂大也謂一爲元者視大始而欲正本也春秋深探其本而 人君者正心以正朝廷正朝廷以正百官正百官以正萬民正萬民以 反

師 流 恶怪異之所施也書邦家之過兼災異之變以此見人之所爲其美惡之極乃與天地 在六藝之科孔子之術者皆絕其道勿使並進邪辟之說滅息然後統紀可 通 異道人異論百家殊方指意不同是以上亡以持一統法制數變下不知所守諸不 天道下質諸人情參之於古考之於今故春秋之所譏災害之所加也春秋之所 而 往 來相應此亦言天之一端: 也春秋大一統者天地之常經古今之通義也今 一而法度

使者 舒發之公孫弘治春秋不如仲舒而弘 諛而官不過二千石相江都膠西兩國輙事驕王正身以率下數上疏諫爭敎令國中, 可 明」自漢治雜黃老刑名而武帝 居 及廷尉 而治及去位歸居終不問家產業以修學著書爲事仲舒在家朝廷如有 張湯 就其家而 問 之其對皆以公羊家法而 更推明孔氏抑黜百家立學校之官其議胥自仲 希世用事位至丞相封平津侯仲舒以弘爲從 有公羊董仲舒治獄十六篇 大議, 使

舉玉杯蕃露淸明竹林之屬復數十篇十餘萬言後世結集其篇, 洋明陰陽災異所著皆明經術之意及上疏條敎凡百二十三篇而說春秋事得失聞 著漢書藝文志春秋決事十卷見隋書經籍志此仲舒以公羊斷獄也仲舒尤喜以公 日春秋繁露繁

春秋志第六

蕃解之者曰『繁露冕之所垂有聯貫之象春秋比事屬辭立名或取諸此也』其: 周以春秋當新王。」」此著於三代改制質文篇者也何謂張三世曰『春秋分十二 秋應天作新王之事時正黑統王魯尙黑絀夏新周故宋以春秋當新王『春秋當新 外內』三科九旨一切非常異義可怪之論問不導自春秋繁露何謂存三統曰「春 正黑統而殷周爲王者之後絀夏改號禹謂之帝禹錄其後以小國。」故曰『絀夏存 方百里爵號公皆使服其服行其禮樂稱先王客而朝春秋作新王之事變周之制當 帝堯之帝號絀處而號舜日帝舜錄五帝以小國下存禹之後於杞存湯之後於宋以 通三統也是故周人之王尙推神農爲九皇而改號軒轅謂之黃帝因存帝顓頊帝譽 之後以大國使服其服行其禮樂稱客而朝故同時稱帝者五稱王者三所以昭五端, 王者奈何』曰『王者之法必正號絀王謂之帝封其後以小國使奉祀之下存二王 十七卷發揮春秋之旨多主公羊而後世公羊家所稱『存三統』『張三世』『異 見也裏成文宣君子之所聞。僖閔莊桓隱君子之所傳聞也所見六十一年所聞八十 以爲三等有見有聞有傳聞有見三世有聞四世有傳聞五世故哀定昭君子之所 書

鷄走馬長乃變節從嬴公受春秋以明經爲議耶至符節令孝昭元鳳三年正月泰山 嬴公守學不失師法爲昭帝諫大夫授東海孟卿魯眭孟孟名弘以字行少時好俠門 本焉弟子遂者蘭陵褚大東平嬴公廣川段仲溫呂步舒、大至梁相步舒丞相長史惟 內諸夏而外夷狄。」此著於王道篇者也雖無三科九旨之目而後之言三科九旨者 五年所傳聞九十六年。」此著於楚莊王篇者也何謂異外內曰「內其國而外諸夏 社 有大石自起立。昌邑有枯社木趴復生上林有柳樹枯僵自起生有蟲食柳葉成文字, 舒有言『雖有繼體守文之君不害聖人之受命』漢家堯後有傳國之運漢帝宜誰 王者易姓告代之處。今大石自立僵柳復起非人力所爲此當有從匹夫爲天子者枯 日『公孫病已立』孟推春秋之意以爲『石柳皆陰類下民之象泰山者岱宗之嶽 差天下求索賢人膻以帝位而退自封百里如殷周二王後以承順天命」書上廷尉 孟子爲耶孟弟子百餘人惟東海嚴彭祖魯顏安樂爲明質問疑誼各持所見孟曰「 木復生故廢之家公孫氏當復興者也。」 孟意亦不知其所在卽說曰「先師董仲 『祇言惑衆」伏誅後五年皇曾孫病已與於民間卽位爲孝宣帝其言迺驗徵

春秋志第六

春秋. 颜氏記· 字公子爲宣帝博士至太子太傅著有春秋公羊傳十二卷見隋書經籍志然廉直不 事權貴或說曰「君亡左右貴人之助經誼雖高不至宰相願少自抑」彭祖曰「凡 仲舒並仲舒通五經能持論善屬文而江公之先受穀梁春秋及詩於魯申公傳子至 谿惠惠授泰山冥都都爲丞相史都與路又事顏安樂故顏氏復有筦冥之學路授顏 夫蘭陵疏廣仲翁事孟卿至太子太傅而廣授琅邪筦路路爲御史中丞禹授潁川堂 府豐淄川太守由是顏家有冷任之學始琅邪貢禹少翁事嬴公成於眭孟至御史大 尤盛顏安樂字公孫本眭孟姊子與嚴彭௱並推孟高第弟子家貧爲學精力有公羊 中為元帝少府家世傳業中授同郡公孫文東門雲雲為荆州刺史文東平太傅徒衆 通 九 孫 經術固當修行先王之道何] 卿徒衆尤盛推而公羊春秋之盛月董仲舒武帝時瑕丘江公之言穀梁春秋與董 之意在二子矣』 寶子嚴爲大司農豐授東海馬宮游卿取邪左咸宮至太師 十一篇見漢書藝文志官至齊郡太守丞授淮陽冷豐次君淄川任公公爲少 孟死彭祖安樂各顧門教授由是公羊春秋有顏嚴之學彭祖 可委曲從俗荷求富貴乎」竟以太傅官終授琅邪王 大司 徒而咸 爲 郡守

孫爲 於是 中戶 大 事 賢長信少府夏侯勝及侍中樂陵侯史高皆魯人也言『穀梁子本魯學公羊氏 皆從廣受千秋 之其後寢微惟魯榮廣王孫晧星公二人受焉廣盡能傳其詩春秋高才捷敏與 郎 也宜興穀梁。」時千秋爲郎召見與公羊家並說上善穀梁說擢千秋爲諫大夫給 師 保 博 中後有過左遷 中輓伊推宋顯穀梁議耶尹更始待詔劉向周慶丁姓並論公羊家多不見從願請 傅蕭望之等大議殿中平公羊穀梁同異各以經處是非時公羊博士嚴彭祖 宮使卒授十人自元康 士劉向以故諫大夫通達待詔受穀梁欲令助之江博士復 將, 眭孟等論數困之故好學者頗復受穀梁沛蔡千秋少君梁周慶幼君丁姓 博士然吶於口上使與仲舒議不如仲舒而丞相公孫弘本爲公羊學比輯其議, 因尊公羊家詔太子受公羊春秋由是公羊大興太子旣通復私問穀梁 選那十人從 又事晧星公爲學最篤宣帝卽位聞衞太子好穀梁春秋以問 平陵令復求能爲穀梁者莫及千秋上愍其學且絕迺以千秋 受汝南尹更始翁君本自事干秋能說矣會干秋病死徵江公孫 中始講至甘露元年積十餘歲皆明習 死 迺 徵 周 慶 迺召 五經名儒 丞相韋 丁姓待 公羊 而善 太 郎

**农秋志第六** 

內

侍 對, 郎許 多從穀梁由是穀梁之學大盛慶姓皆爲博士姓至中山太傅授楚申章昌曼 廣 使者亦並內穀梁家中郎王亥各五人議三十餘事望之等十一人

見隋書經籍志义受左氏傳取其變理合者以爲章句傳子咸及汝南翟方進 君 誼 爲 士至長沙太傅徒衆尤盛尹更始爲諫 大夫長樂戶將撰春秋穀梁傳 現 邪 房 + 五卷,

都 鳳鳳字子元哀帝時累擢光祿大夫五官中郎將時光祿勳王龔以外屬內卿, 尉 劉歆共校書三人皆侍中畝白左氏春秋 可立哀帝納之以問諸儒皆謂『 與奉 左氏 車

|散逐共移書賣讓太常博士大司空師丹奏||散非毀先帝所立三人皆出外補 爲 不 傳春秋, 不肯對飲於是數見丞相孔光爲言左氏 以求助光卒不肯惟鳳龔許 更而鳳

豧 九江 莽時爲講 太守至青州牧始胡常事江博士。江博士死, 學大 夫由是穀梁春秋有尹胡 申章 迺與鳳俱事尹更始授梁蕭 房氏之學習 方 進 雖 秉

更始然好左氏傳其左氏則劉歆師也左氏之學自北平侯張蒼蒼於秦時爲 一受穀梁 御

長卿為藻陰令授清河 漢文帝時爲丞相傳洛陽賈誼諡爲左氏傳訓故授趙人貫公爲河間献王 張禹長子禹與蕭望之同時爲御史數爲望之言左氏皇之 博士。

更始 傳子咸 書 數以稱說後望之爲太子太傅薦禹於宣 及翟 一万進 胡常常授黎陽 賈護季君哀帝 帝徴待 時, 待韶 詔未及問會疾死: 爲 《郎授蒼梧 授尹 陳欽

善之,上 傳。 始。 帝崩 見 |佚, \*秋 皆 見之其詳 以 以 嚴 略從咸 文春秋 以爲 左 志, 名 博士而已。 顔 Ŧ 神吟左氏 氏 家, |莽持政而散 而已皆公羊家 /授王 一左丘 略 丽 及翟 不 左 亦 | 莽至將軍 王孝宣 同 氏傳大好之時 兼 **声方進受質問** 治 下 明好惡與聖 <u>\_\_</u> N親近用 主 引傳文以 穀梁非公羊 婢僕, 也 世復立穀梁博士哀帝 而穀梁左氏 而劉歆從尹咸翟 皆能 事卒立左氏左氏自荀卿至尹更始父子胡常翟 大義。 解經轉相發明由 人同親見夫子而公羊穀梁在七十子後傳聞之與 丞 齊學絕 相 諷 翟 誦, 初左氏傳多古字古言學者傳訓 方 不 由 是言春 與終 進; 不 方進 而 相 東漢 時散既以欲建立左氏春秋黜外會哀 尹 通 是章 受。 秋 瞂 者 始歆 之世 此 爲 左 也旣, 氏 旬 丞 傳 義 相 嗣 而 史以能治 其 世祖 者, 理備焉歆父子 治穀梁有聞 父向 本 之劉 中 領 興立 左氏 歆初 故而 校 中 者, 五經 三已及歌 春秋 與飲 俱 好 Ė. 僅 經 博 方 河 古, 進 惟 校 祕 親 治 書, 有 博

秋志第六

房扶風

賈逵景伯而已斷於前漢哀帝時事九江太守房鳳治穀梁爲都講逵

農 受業 文, 內 輩 陽樊儵長 也。 爲 家之說令擇從所安諸儒皆伏其多連 立 者 諸 文學遷 恭子 一嚴氏 張 學官然與公羊代與公羊嚴顏 博 生自 :士居數1 中蜀 晚, 霸以條删猶多繁辭迺減定爲二十萬言更名張氏學諸生孫林段著劉固等慕 玄 於恭而儵删定公羊嚴氏章句世號樊侯學教授門徒前後三千餘人其尤 然於五 然, 學 君 遠 陳介 魚左 方 郡 知 夏 月諸 常 名 |豫章唐檀子產 至者著錄 張 上家穀梁為兼活 霸 縣丞清淨無欲, 中郎將汝南 北 者; 則有 生上言: 伯 海周澤稚 驍霸子長陵令楷公超潁川太守會稽顧 長沙 數干 — -人太常 太守汝 玄兼 都太常陳留樓望次子侍中 通, 鍾興次文太子少傅 而已然玄棄 專心經 而實受其父徽左氏春秋爲古學者也左氏雖終 說嚴氏不宜專為 並 立殿氏為 樓 望, 南 書方其 郅 | 舉孝廉除爲 耶君章 侍 通 中 數家特以顏氏為 盛而治 承宮 講 北 琅 問, 額氏 一郎會顏 左 邪 海甄宇長文海西令 乃不食終 顔氏 太 中 守 **琅邪承宮少子長水校尉** 博 郞 氏博 將 士! 有 河 鍾 本 內 Ĥ, 宗。 聞 \_\_\_ 李章第 乃罷。 及有難者 其間 興長 世祖 十缺玄試策第 者終東漢之世 時舉明經濟 水 則 J. 豫章 公少 校 恭 兼說嚴氏 最 尉 輙 府 陳 樊儵 爲 爲 老 曾 補 不 知 山 張 僅 師。 南 陽 者 拜 弘 數 河

何 者; 王者 義 年撰成春秋公羊解詁十一卷題曰『何休學』有不解者或答曰『休謙辭受學於 得 之政以王之政正諸侯之即位以諸侯之即位正竟內之治諸侯不上奉王之政則 即 師, 之各市宅所居之旁以就學焉此治嚴氏春秋者也有治公羊春秋而不名嚴顏 辭二科六旨也內其國外諸侯內諸侯而外夷狄是三科九旨也七等者州國氏人名 一科九旨者新周故宋以春秋當新王此一科三旨也所見異辭所聞異辭所傳 休 則 卽 位 可怪之論, 乃宣此義不出於已也。一大指以爲 邵公而; 也即位 侍 位故先言正月而後言卽位政不由王出則不得爲政故先言王而後言正 元 不 而 承 中扶風李育元春博士羊弼遼東屬國都尉北 後言春五 天以 者一國之始政莫大於正始故春秋以元之氣正天之端以天之端正王, 而貫以五始三科九旨七等六輔二類之義。」五始者元年 何休最著休為 制號令則無法故先言春而 者同日並見相須成體, 人質扑訥 口而 『傳春秋者非一本據亂而作其 雅 乃天人之大本萬物之所繫不可不 後言王天不深正其元, 有心思從羊弼學覃思不闚門十有七 海公沙穆文义諫議 則 不 一个王工 能 中多非常異 成 大夫任城 《其化故 戸也 何家 聞 月公

潞氏 字子,州不若國故言則不如言楚國不若氏故言楚不如言潞氏甲氏氏不若人故言 于 |楚。 旨七等六輔二類而三科九旨之於七等表裏爲用義最閎大故曰『於所傳聞之世, 輔 時之諸侯諸侯用夷禮則夷之進於中國 見治升平內諸夏而外夷狄至所見之世著治太平夷狄進至於爵天下遠近小大若 如言邾盧儀父字不若子故言邾婁儀父不如言楚子吳子春秋設此七等以進 見治起於衰亂之中用心尙麄觕故內其國而外諸夏先詳內而後治外於所聞之世, 矣外內無異則不 未進於太平夷狄亦未進於中國引而內之恐爲諸夏患故夫子稱齊桓管仲之功有 卿士輔大夫京師輔君諸夏輔京師也二類者人事與災異也此之謂五始三科九 』蓋攘夷狄者所聞世之治也若所見世著治太平哀四年「晉侯執戎曼子赤歸 甲氏不如言楚人人不若名故言楚人不如言介葛盧名不若氏故言介葛盧不 人必無因其種族不同而有歧視之意而升平世不能不外夷狄者其時世治尙 」十三年『公會晉侯及吳子於黃池』夷**狄**進至**于**爵與諸夏同 必攘遠近小大岩一且不忍攘春秋心同天地以天下爲 |則中國之也六輔者公輔天子卿輔公大夫 無外內之異 家, 退當 中國

狄以漸進于天下遠近小大若一其義即本諸董仲舒也寧惟三科九旨而已董仲舒 秋之隆治矣故董仲舒明言『自近者始』『王化自近及遠』由其國而諸夏而夷 而外諸夏諸夏非可攘者而亦必異外內斯則隘狹之國家主義而言治之始爾匪春 爲升平之世言之耳匪太平之治也言豈一端而已夫各有所當也撥亂之世內其 披髮左衽之懼以其救中國攘夷狄而特筆褒予之爲夷狄之未進於中國也雖然特 國

先質後文』之語而何休遂謂『春秋變周之文從殷之質』如此之類難以僕數是 以元之深正天之端以天之端正王者之政。」何休之明五始以焉繁露 春秋繁露重政篇云『春秋變一謂之元』何休之說隱元年以焉繁露二端篇云『春秋繁露重政篇云『春秋變一謂之元』何休之說隱元年以焉繁露二端篇云『 則休之解詁胥出董仲舒之指矣休又以春秋駮漢事六百餘條成春秋漢議十三卷, 四十一事至是休與其師博士洋弼追述李育意以難二 篮以; 公羊 為前 本意初李育習公羊春秋頗涉獵古學嘗讀左氏傳雖樂文采然謂不 世陳元范升之徒更相非折而多引圖讖不據理體於是作難左氏義 一傳作春秋公羊墨守十四卷 玉杯篇有『

春秋左氏膏肓十卷春秋穀粱廢疾三卷然休之解詁公羊亦有用左氏穀梁傳者儻

擊始于左氏5 氏 公羊而今古文家相 廢疾穀梁而義之所長亦有不能 攻若 仇, 亦惟左氏 不兼採並存者 公羊為甚施孟梁邱京易之於費 平? 考漢今古文家 相 攻

家 氏 易歐. 抨難左氏也東漢之初, 陽 大小夏侯尚書之於古文尚書齊魯韓詩之於毛詩雖不並立 左氏雖不立博士然爲當世貴 重 執金吾封雍奴侯 然未如公羊

寇恂 風 孔 子 奮 翼 君 征西 魚 少從劉歌 太將軍 、受春秋· 封陽 夏侯 左氏傳歌稱之謂門人曰: 潁川 馮異 公孫皆以名 將學左氏春秋 吾已從君魚 然未名 **受道矣!** 二世 |家!

**旭即位拜為武都太守會以弟奇經明當仕上病去官奇博通經典作春秋左氏删** 興 少 晚 戇 有 少 子 嘉, 官至城門校尉作左氏說然父子兄 學於王莽時將門 |弟以爲家學||而未大顯於世 [氏大義) 武大義) 歌美興 河南 鄭 而

使 撰 條 例 章 學公羊春秋而好古 句訓詁; 而傳業子衆字仲 師作春秋難記條例春秋删世言 劉 歆 {左 左氏 者多祖

人

從

講

IE

左氏 子元字長孫少傳父業爲之訓詁銳精覃思至不 而買達自傳其父徽之業由是左氏有鄭賈之學買徽亦從劉歆受左氏春秋, 條 例 <del>-</del> 篇。 而蒼梧陳飲習左氏 春秋事 黎陽 與郷里通世祖時與鄭與俱爲 買護 與劉 歌 同 時 而 别 自 名

事 鄙, 戾儿 遺 戾五經謬孔子言及左氏春秋不 與遂爲異家之所覆冒臣元竊見博士范升等所議奏左氏春秋不可立及太史公違, 也! 上, 重 脱 不 魏郡 然 違 四十五 與歌爭具奏左氏之失凡 讖 時尚書令韓歆上疏欲爲左氏立博士博士范升謂「左氏學無有本師 -未得其| 稽 傳師言如得以褐衣召見俯伏庭下誦 衆 誦 而 古退就 微, 帝率立左氏學太常選博士 議, 李封於是諸儒以左氏之立論議讙譁自公卿以下數廷爭之會封病卒世 左 折為 氏 而 事案升等所言前後相 要領美日李育所謂 因 傳及五經本文尤明左氏傳國語爲之解詁五十 大尤指 重誅雖死之日生之年也」書奏下其議范升復與元相辨難凡 不 復 補! 瑕**擿雾掩**其弘美所謂 然 世儒言左氏者不絕特爲人 + 四 可錄三十一事元聞之詣闕上疏曰「左氏」 違片斷截 陳元 事。時 四人元為第一帝以元 范升 難者以太史公多引左氏升又上太史公 孔子之正道。 小 更相 文媒黷微辭 小 非 辨 ·破言, 主所 折, 理丘明之宿寃若辭不合經, 而 重扶 小言 多引圖 新忿爭乃用其 以年數小差掇爲巨謬 一篇永平中上疏獻之。 風 破 讖, 道 賈逵悉傳父業 不據理體 \_\_\_ 者也臣 次司 孤學少 而 十餘 多違 隸從 元 違 愚 者 旭

春秋志第六

一八八八

顯宗 其 異 卑 中 纸 養 師 與 餘同 南宮雲臺帝善逵說使出左氏傳大義長於二傳者逵於是具條撰成春秋 臣 中上言左氏與圖讖合者先帝不 劉 義深於君父公羊多任於權變其相殊絕固已甚遠而寃抑積久莫肯 五 家, 排之從是攻擊左氏逐 不 二十卷奏之日 經家皆 各有 |飲欲立左氏 重 曉圖讖故令中道而廢凡所以存先王之道 **堯不得爲** 子彊幹弱枝勸善戒惡至明至 公羊者十 書寫 所採場有施孟, 無以證圖 藏 火德左氏以爲少昊代黃帝卽圖識所謂帝宣也如今堯不得爲火則 有 三臣 不先暴論 祕館肅宗立降意儒術特好 七八, 謹 讖 (為重讎! /或文簡· 復立 摘 明劉氏爲堯後者而左氏獨有明文五經家皆言 大義 出左氏三十 梁丘份書歐陽復 至 而 小異無害大體。 光武 遺芻蕘省納臣言寫其傳詁藏之祕書建 切至直至順。 輕移太常恃其義長眡挫諸儒諸儒 皇帝 事 尤著明者斯皆君臣之正義父子 奮獨 古文尚書左氏傳詔逵入講北 有大 者要在安上理民也今左氏崇君父, 且三代異物損益隨時。 至 見之明興立左氏穀梁會二家先 如 祭仲紀 小夏侯今三傳之異, 紀季 伍子胥叔術 分明臣以永 故 內 顓 亦 先 懐 至中侍 之紀綱 之屬 宮白虎 項代 左氏 猶 帝 不 是也 服, 博 相

漢不 於世! 異同 國 嚴 吾矛 春 據 卷叉以何休 鄭衆 特迂 作書二 顔 郎朝夕受業黃門署學者皆欣欣羨慕焉扶風馬融季長嘗欲訓左氏春秋旣 明左氏乃發公羊墨守鍼左氏 秋 通 得為赤其所發明補益實多」書奏帝嘉之賜布 說 八年乃詔 諸 以伐我乎! 左 深, 所注, 北 生高 氏 曲 一卷駁之隋書經籍志所著駁何氏漢議者是也休見歎日『 是占 海鄭玄康成始 山 傳 笑附托圖讖献媚 . 乃 日: 才者二十人, 解誼三十 重難左氏撰春秋左氏膏肓釋痾十卷春秋成長說 諸儒 一初中 學逐 -買君精而不博鄭君博而不精 各選高才受左氏穀梁春秋皆拜逵所選弟子及門生爲千乘王 明公羊微而左氏興玄作左氏傳注未成, 與之後范升陳元李育賈逵之徒爭論占今學及玄答何休 一卷亦以 、教以左氏與簡 事京兆第五元先通公羊春秋既因 世主 公左傳駁! 膏肓起穀梁廢疾以 以行 紙經傳 其 何休之所駁漢 學耳論! 各 者 旣精旣博吾何加焉! 一通然逵之所爲 五百 致難於何休又以休有春 以 爲 事 记衣一 涿郡 十條成春秋漢議 以 與河南服虔 本 九卷春秋塞難三 襲令逵自選 盧植 也! 康成 然左 稱引左氏 子 入吾室, 幹 但著三傳 氏 由 子順 事 見逵 馬融, 是行 秋

作

漢

春秋 斯 撰春秋左 守糜信 注 請 春秋 百 則 康 卷春秋外傳國語注二十一卷中書侍耶雲陽韋昭宏嗣撰春秋外傳國語注二十 **氏** 亦 撰 東 翔 7師事 鍼 京左學 左 博 撰春秋 人。 左 春 句 氏條例 起 士, 氏傳十二 秋 撰春秋說要十卷春秋穀梁傳注十二 河 一卷注二十二卷大司農弘農董遇 太尉 何 爲 東樂詳條左氏疑滯 左 K 之後 立 疾, 氏傳音三卷大 外傳國語注二十一 傳音三卷斯稱 五萬餘言 楊賜。 寧官; 申明左指者也然左傳猶未置博士會靈帝立太學石 一卷。 勁也已漢祚既! 於獻 調 朗子太常肅字子確能傳父學撰春秋左氏傳三十卷春秋 面 帝 與春秋共相 儒 長 同時南陽謝該文儀亦以明春秋左氏爲世名儒門 初, 七十二 避 林之盛 秋 衰鼎, 亂 韓益 卷尚書僕射 荆 州聚徒于 事 表 分三 事焉蜀亡傳春秋者吳則有 撰春秋三 裏 以 國言春秋者和 季直撰春秋左氏傳章句三十 問該背為通解之名為謝氏釋行 <u>\_\_</u> 也。 卷理何氏漢議二卷中 丹陽唐固 餘人 陳國 傳論 潁容 劉 魏 表以爲武陵 子正撰春秋穀粱 卷。 子嚴者博學 有 而高貴郷 司 徒 東海 騎都尉會稽 經盧植 (太守不肯) 公以 散 ·多通, 大 帝子 夫 句樂平太 朗 傳 識郡 於 景 洛 乃 注 興 徒 起, + 虞 躬 世。 [春 撰 斯 數

卷春秋 , 内以諸國爲外外國所傳之事也其文以方內傳或重出而小異自鄭衆爲之 /越八 外傳國語者傳云自左丘明旣爲春秋傳又稽其逸文纂其別號分周魯齊晉 (國事) 起自周穆王終於魯悼公別為國語二十一篇亦曰外傳者春秋以

解

**數**條; 諸家 而漢 惟賈唐二家援據駁正為多凡所發正六十七事而三國之言公羊者僅見魏河 並 亡獨章昭之注存自序稱兼采鄭衆賈逵虞翻唐固今考所引鄭說虞說寥寥 魏儒者並申以注釋治其章句此亦六經之流三傳之亞也然鄭衆解詁 以 下

祚遂幷 事, |南 乃耽 尹丞高唐劉寔子眞之撰春秋條例十一 思經籍爲春秋左氏經傳集解分經 吳國蓋鎮南大將軍京兆杜預 元凱之謀爲多預博學多通立功之後從容 卷春秋公羊達義三卷焉晉武帝旣禪 之年與傳之年相附比其義類特舉劉 飲 魏 無

買徽父子許淑潁容之違以見同異大指以爲「古今言左氏春秋者多矣獨劉子 大義買景伯父子許淑卿皆先儒之美者也末有顏子嚴者雖淺近亦復 区名家其 駿

它可 見者 十數家 大體 轉相 祖; 於丘明 之傳有所 不通皆沒 而不 說, 而 更膚 引公羊

穀梁適足自亂預今所以爲異專修匠明之傳以釋經經之條貫必出於傳傳之義例,

行事 舊章仲尼從而修之以成一經之通體其微顯闡幽裁成義類者皆據舊例而發義指 總 尊君 新意故傳不言凡曲而暢之也其經無義例因行 許 會 也故發傳之體有三而爲例之情有五一日『 日 也。 捷之類是也五日『 歸 不 推 相 田之類是也四日『 備成一家之學比老乃成自云『有左傳癖』然當時論者謂預文義質直未之重 之類皆所以起新舊發大義謂之變例然亦有 以正褒貶諸稱 諸 與 Ä. 地, 命舍族尊夫人梁亡城緣陵之類是也二曰『志而晦, 冗; 體以尋經旨簡二 與謀曰及之類是也三曰 爲 其 部, 發凡以言 凡四十部十五卷皆顯其異同從而釋之名曰釋例又作盟會圖春秋長 **懲惡而勸善** — 盡而不汙。直書其事具文見意丹楹刻桷天王求車齊侯獻 書』『不書 例者五十其別四十有九皆經國之常制周公之垂法史書之 一傳而去異端蓋丘明之志也。」 』 求名而亡欲蓋 **—**] 婉而成章』曲從義訓以示大順諸所諱辟**璧**假 一一先書 微而顯」文見於此而起義在彼稱族 事而言則傳直言其歸趣而已非例 故書 史所不書卽以爲義者此蓋春秋 而章書齊豹盜三叛人名之類是 又別集諸例及 し
「
不
言 **」約言示制推以** <u>\_</u> 不 地 名譜 稱 三『書 知 例。 第 曆

獨 盖 獝 爲 魚 靗 而 傳此其所 {佛 {傳 盡亡。 集 秘 鳥 鄭 書監 }典 設; 解 湛 獸草木之名又言 買服 周禮, 而所 初 中不著其 與學者 長 發明, 以 安 先引 一家尚存厓 摰 來 多以老莊 名; 虞 何 杜鄭韋注國語明徵買 -仲治賞 但 左 溷昔賢于已 <u>|</u>左傳! 氏忠 地 **压略預舉四家** 理好為 臣 皮傅。 之日『左丘 」蓋左氏 」 之 稱 肊 說迹近乾沒其失一 而 預 說, 生諸 也! 未能 而 初 然 行, 唐; 明 不 後賢短預 學者 揆度遠 儒後始 本爲 及服。 言 必稱 春秋作 不得 其 海以左氏: 失二 先, 近, 也預解不可 (或頗未同) 其 不 輒 · 敢掠美。 以影 例故傅會公羊以就 傳; 也長於星曆 而 儿 **左** 附 、舉所出劉智 究厥 例 傳 預乃空舉 今 爲 逐自 地。 所以條, 揭 地 葉不 說三 孤行! 理, 與許顏之 劉 也 吝 買 爲 復 其 釋 於 許 雜 說: }例 且 蟲 潁, 义

義 三家之異, 乖, 時 有不 合者舉其長義以通之又為春秋左氏解名日 合 而 通 之周禮 有 調 人 八之官作春7 秋 調 二墨守以春秋 七萬 ·全綜公羊穀梁解 餘言皆論 其 首 尾,

棄

經

信傳,

· 曲爲之說,

或直謂是經誤預自云

「有左傳

癖。

若

此之類,

得不謂之

癖

歟!

預

之集解,

與服虔並

立

國學然預書盛

行,

而

服

義寢微!

黨續咸孝宗師

事

預,

再

春秋

氏义有

東平

劉

兆

延世

者與

(預同

時,

而

治

春秋

不

主

經

而

家

殊

使

春

春秋左氏傳杜氏服氏博士各一人其公羊穀梁省不置太常荷崧以爲不可乃上 書皆不傳偷預之所謂『庸引公穀適足自亂』者乎既晉道 是左氏公羊所不載亦足有所訂正三傳雖同日春秋而發端異趣此則義則戰爭之 辭義清雋斷決明審董仲舒之所善也穀梁赤師徒相傳其書文清義約諸所發明或 翼 它如奏。一曾有兵事而公羊亦不卒立然終東晉之世言公羊者僅車騎將車鄢陵 場辭亦劍戟之鋒於理不可得共博士宜各置一人。』詔曰『穀梁膚淺不足置博士 穀梁傳義十卷答春秋穀梁義三卷具著隋書經籍志罕有見者獨范寧之集解獲傳 傳集解十二卷春秋穀梁傳例一卷饒騎將軍姑幕徐邈之春秋穀梁傳十二卷, 有廣陵太守魯國孔衍舒元之春秋穀梁傳十四卷豫章太守范寧武子之春秋穀梁 於後焉考寧之穀梁本出家學其父散騎常侍汪字玄平者當率門生故更兄弟子姪, 經傳 『丘明書菩禮多膏腴美辭張本繼末以發明經意信多奇偉然公羊高親受子夏**,** 稚 恭問王愆期答之春秋公羊論二卷著隋書經籍志而已始絕學矣言穀梁者則 中朱書以別而同時濟北氾毓稚春之撰春秋釋疑亦合三傳爲之解注二人 中替元帝践阼江左詔 春秋

研 杷 編; 指 稱 獬 講六籍, 也已於是商略名例敷陳疑滯博示諸儒同異之說·至寧撰次諸子各記姓名故· 不 傳 伯 而 解。 th 诙 惟 膚 其義精 寧集解 通直云 來逆 惟漢書藝文志載 學者以 日, 多引 淺 叔姬之喪 末 次及三傳左氏則有服杜之注公羊則有何嚴之 葬桓王一一 如鄭玄王弼之易 有 學不經 便 |邈 審, 乃分傳附經併注之疑即寧之所合。 拘閡必曲爲解說蓋家法然也獨范寧兼釆三傳不主穀梁開唐啖趙 『不達』不望文而 ※注, 為 未詳其故語 世所 討, 师匠辭理, 而 事與左傳合餘皆不 重旣而徐邈復爲之注世亦稱之』是邈注在集解之後今集 割 公羊穀梁二家經十一 曹伯廬卒於師 裂其 有 所著春秋穀梁傳例 典 文散附集 象日 曲 據, 旣 說, 無 不 墨守以護傳 可觀; 解歟然何休 象日 知所引何傳疑寧分傳附經之時皆冠以 天王殺其弟佞夫』五事皆冠以 又引左氏 卷穀梁傳十一 中「公觀魚於棠 <u>\_\_</u> 卷 之例傳義未安多 今佚然集解中時有 解 多聞 公羊以解 詁, ·訓, 闕疑蓋愼之也! 專 而釋穀梁傳者雖近十 主公羊杜預 卷。 此 <u>\_\_</u> 則經 稱 傳文義違反 葬桓 晉書 集解壹宗 未 傳 傳 詳; 初 本 亦 例 傳 經 别

春秋志第六

末河 指 歸梁而服解 海 寬之屬然沈氏長于義理例疏于經傳蘇氏則全不體 公羊穀梁文句義凡一百三十卷而左傳先習服解仕魏爲太常博士以天監十三年 通 之時會稽虞僧 博固爲罕儔然意在矜伐性好非毀規杜氏之失凡一百七十餘事習杜義而攻杜氏 解又有姚文安秦道靜初亦學服氏後更 劉 在 抵 而 足漢儒 擇善多引杜預此 北 | 畫鮑季詳鮑長暄並得服氏之精又有衞凱陳達潘 日坦坦弟驥於宋朝並爲靑州刺史傳其家業故齊地多習左傳杜解北 南 爲義疏者則有梁國子博士武康沈文阿國衡隋太學博士景城劉炫光伯 北 大儒徐遵 所 不爲 爲 專家之學蓋經學至此一變雖譏十家穀梁之引左氏公羊違反文義 章 誕 句好 江東所行乃改說杜義每文句常申服以難杜遂著左氏條義以即 明子判門下講服解平原張買奴河間馬敬德那峙樂城張思伯渤 爲國子助教最精杜學因作 沿街 互 則述左家之義說穀梁之傳已以譏人而未 有不同河東崔靈恩 兼講杜預所注其江左 申 杜 **福習三傳撰有左氏經傳義及條例** 難服以答靈恩世並傳焉。 本文惟旁攻賈服劉炫聰 叔虔雖不 儒 出徐氏之門亦 自反者焉! 生俱服膺 社解既 杜預 朝自 暨蘇 杜氏 魏

或 據 者, 者比之蠹生于木 亦 有 愜 1 **燮理者旣唐太宗御** 而還食其木非其 世。 理也! 國子 祭酒 然視二家差有 孔穎 達 奉詔 可觀所爲規杜有 撰春秋 左傳 IE 騁臆 義, 失

四 杜 {杜 抑 解, 劉於劉之致 博士楊士勛 而 疏 則 損 益 焉。 、規於**杜者**壹切以 劉炫 士勛兼明穀梁又為范寧春秋穀梁傳集解作 而 以 沈 文 阿 爲非是斯又篤信專門之過而與共參定者則 補 其 阙漏。 惟 杜解 旣 嫌 强 經 就傳。 疏; 其書不 而 孔疏 及穎 亦 過 有 達 申

皆在 出 中 \*杜 所引, **流** 集 之賅洽然諸儒 人復世 解所 有 稱 附之 鮮 范氏略例」 佐 外其云別 助 言左傳者: 之力詳 者, 例 略 有 者, 多言公穀者少既乏憑藉之資而 殊觀過其宜 是蓋范氏注· 稱 \_\_\_ 范例 中已 也! 一者有稱 惟范寧傳例全書已佚散 有 例, ك 而此 范氏別例 別 出故 孔疏 也。 0\_\_\_ 者, 成于 中 (附集解) 凡二十餘條; 如 衆 桓 元 手 年 ൬ 此 疏 疏 則

引 范氏 災 例 Ž: +-有二 春秋 一内則書 Ŀ 下 日外 無王 者凡 則 書 時。 百 有 八…… 年 莊二 夏五月乙 一十二年 夏 雨 大 災疏 引范

范 }例 例 立: 祭 祀 例 有 九 护 書 月以示 譏 閔一 如 此之類皆臚次 西吉 其事以 諦於莊公疏 見義類

春 秋 無 達 例 但屬辭比 事臚列書法之同異有可以心知其義者則爲之說其不

一九八

爲 彌 路。 疏 {傳 |休 耶? 不 氏 可 丘 備! 明 傳 亦 若 得 解 惟 肅 縫 知 授魯曾申申傳吳起自起六傳至賈誼等說亦皆附會。 公羊 記; 闕 代 無經 品, 勛 此 (左 自 然春秋之學至唐 穀梁傳疏, 之世 漏; 數國之史以 但 傳 何 叉 則 放其論 穀梁 雑 文足; 釋傳 附經, 休 闕 有 解詁 采 始於 各國 潤 以互證今本 而 而 以後罕有5 老 州 知 不 不 釋經與杜范 (授門人) 異先 丹 經 諸 社 在 爲 爲 預{穀 陽 卿 啊 士 曲 励之後; 密 家傳及 儒。 疏 縣 證; 以傳附經, 公羊穀梁 義 如謂: 主簿 梁附 通證明集漢詁 爲 斯 之疏者; 則 可 異例, 經疑自 口 趙郡 1 而 \_\_\_ 以 書 傳, 左傳非 疏 推 (知漢末) 初亦 或 夢 未 啖助 文 世 見 徐彦作 書 范寧而 形 傅 自設問 范 口授公羊 占書縱 之大成; 竹帛。 fc. 叔 徐 例 明 佐 猶 之矜慎 彦 所作; 後代 百別 者, 公羊 不 疏 答文繁語複 横 明春秋撰統例務在考三傳得失, 之時 亦 知 學者 獨詳 名高穀梁 傳附經, 至 行後世所傳 小 何 焉! 說, 唐 所合併歟自是春秋三傳之 代? + 乃演 故序 周 』又云『春秋之文簡易。 其 勛 而 晉齊宋楚鄭之 或者 則 風 疏 硫 名赤 事雖 不 述之功, 而 氣 葬 通 知始 漢 獨開導宋學之先 故襲公羊之文 桓王 之編 石 未 名, 釋經殊 經殘 必是寔漢書 自何 條 不 次 可 事 字公羊 年 沒也。 全 月以 觀 何

先 最 '集 深 者! 損 作。 以 後 那 儒 朱墨 其 傳 以 見傳 之門人 高, 啖 益, 非。 前, 辨 成 陸淳 助 至 或 谷 至 博 淳 疑 記 |春 未 學 以 及 淳 来 伯 其 秋 者皆專門名家荷 [國 明, 則 但公穀守 諸家敍事 爲 + 剘 集傳纂例· 傳, 卷蓋 一勝否又摭 则 直 神。 直 左. 不 俱題 調 謂 憑 淳 肯 啖 因 私 . \_\_\_ 光備能令 左氏 柏 臆 經, 敍 助 助 左 + 左 氏 事 之學 決; 三傳之不 統 通, 非 雖 卷; 例, 其 遂引 氏 淺 互. 多解經意 於公穀 僅成 有不 至 义本褒貶之意更為春秋微旨二卷條別三傳 相 F. 失 通 淳 明。 史其 百代之下頗見本末因以求 也 以為丘 弹 入 六 **分製**。 射, 而 通, 學言經誤 (纂例 發揮 體 卷 其 期, 誣 た子 異爾! 殊 明然自古豈 謬 遂 助之學傳于 少公穀傳經常 者駁 旁通 滋 與 實 ·以前賢· 惟三 繁。 助 甚。 其失 IE. 也。 之子日異者夏錄 ي 傳 然淳 以 自 啖 人如 (啖趙之說) 之義, 啖助 助 洋 世 止 之闡 密於 固 以 州 丘 Ž 史 本 爲 刺 陋! 明 佚 計 <u>\_\_</u>j 左 啖 說 ·意經文可知。 簽 史 氏然左 () 運任之流。 姓 助 左 以 師 出 口 河 左乎且? 傳 遺 以 氏公羊 說, 明 東 而 〈後學者 文增纂 ;左 亦 去 趙 風 氣漸 氏 取之意 }(傳 有 匡 左傳 焚書 佰 此餘 榖 亦 變 折衷 非 梁 本 喜 變, 則亦 **統** 循 之後, 國 皆 傳 成 例 援 F: mi 大 春 經 抵 未 其 啖 明 孔 加 前 耳 功 }秋

**春秋志第六** 

乖定非 也。 m 厲者也。

加州 不 倫, 為一 敍 事多 書者實自: | 萨之襲例 一人所爲 的始淳本沙 \_\_\_ 此则 **啖助之說** 闡發師 雜采三傳以意 說 變本 加 去取合為: 然今 此書變 # 所 傳

專家爲通學是春秋經學一大變宋儒治春秋者皆此 一派如平陽孫復明復之撰春

秋鈴王發微十二卷新喻劉敞原父之撰春秋 一卷; 權衡十七卷春秋傳十五 卷春秋 意林

秋經解十二卷春秋本例二十 卷春秋傳說例 郵孫覺幸老之春秋經解十 卷春秋例要一卷吳縣葉夢得石林之撰春秋傳二十 三卷涪陵崔子 方彦直之撰春

安 卷春秋考十六卷春秋識二十二卷壽州呂本中居仁之撰春秋集解三十卷崇安胡 國 康侯之撰春秋傳三十卷鄞 縣高閥抑崇之撰春秋集注 四十卷瑞安陳傅良君

舉之 撰春秋後傳十二卷南安呂大圭 主叔之撰春秋 或問二十卷附春秋 **五論** 

家並翁則堂之撰春秋詳說三十卷皆焯然名家著有成書者其中以孫復爲最

|眉

山

從 先; 獲, 劉 敞 亦 不 爲 盡 最 傻; 前 進 胡安國為 退諸 說, 最顯 往 往 依經 孫復 立 沿啖陸之餘波幾於盡廢三傳而 義不 似復 之意爲斷制此亦說貴 劉敞 徴 實 則 不盡

也胡安國之撰春秋傳自草創至於成書初稟不留一字其用意亦勤矣顧其書作

徴

於 名最高 南渡之後故感激時事往往借春秋以寓意不必一一悉合於經旨在宋儒 而品斯下焉余考宋儒之說春秋者蓋往往推衍啖陸之說葉夢得 白『左 春秋之

事多誤。 是史學公穀是經學史學者記得事郤詳於道理上便差經學者於義理上 氏 明者 啖助 呂 必 請學公穀考事甚 魏智伯之事 知 無 傳 大圭日: 伯亡 丘 事 明 7 <u>\_\_</u> 胡安 不傳義是以詳於史而事 時左氏猶在, 字故不可考。 公穀守經左氏通史」之說也臨川王安石介甫有左氏解一卷證 』又曰『左氏曾見國史考事頗精只是不知大義專去小處理 事今佚其書 左氏熟於事公穀深於理蓋左氏 國 义舉趙襄子之謚若以爲丘明自獲麟至襄子卒已八十年矣使丘 日 疏然義理郤精二人乃是經生傳得 <del>--</del>1 事莫備: 一斷以爲 」葉夢得 不 知 7 於左氏例莫明於公羊義莫精於穀梁。」 戦國時人 撰春秋讞 據左傳 事者 未必實公羊穀梁傳義不傳事 何據? 莆田鄭樵漁仲六經輿論云『左氏終紀韓 或問程子曰 曾見國 末載 許多說話往 史而公穀乃經 韓 <del>--</del>0 魏反而 左氏是丘明否? 是以詳於經 喪之」 往不 一朱子曰: 生也 會往往 曾見國 一之語謂 **|**有功然記 左 一二左氏 曰: 氏 此 丽 朔與 義未 非丘 不 史。 推 曾 衍

也。 左 间 氏 時, 不 戰 應 於麻墜秦師 孔子既沒七十有八年之後丘明猶能著書此左氏爲六國人明驗 敗績, 獲不更女父。 』又云『秦庶長鮑庶長武 帥 師 及晉 師

戦於 矣! 秦至 櫟。 <u>\_\_\_</u> 惠王 秦至孝公時立資級之爵 一十二年初臘明驗三也左氏師承鄒衍之說而稱『 乃有 不 更庶長之號。 明驗二也左氏云『 帝王子孫。」齊威 虞不

王時鄒衍 輿 千二 次 推五德終始之連明驗四也左氏言分尾皆準堪輿按韓魏分晉之後, 「始於趙 分日大梁 之話。 明驗五也左氏云『左師展將 以 公乘馬 而歸。 而

之書序晉楚事如『 也。 按三 氏序呂相絕秦聲子說齊其為雄辨狙詐真遊說之士捭闔之辭明驗七也左氏三代時有車戰無騎兵惟蘇秦合從六國始有『車千乘騎萬匹』之語明驗六 代時有 **戰無騎兵惟** 楚師熔猶拾瀋 」等語則左氏為楚 人。 ·乘騎萬 明驗八也據此八驗, 之語明驗六

六國 時人非丘明 矣 一朱子亦謂 虞 不臘 矣」 爲秦 八之語, 與鄭樵 同此 左

知

爲

推 行陸淳 然宋自孫復之礼 左氏 非丘 **陸淳人人** 明 し之説 以臆見說春秋思舊說之害已也則舉三傳義例 也惟 重 證驗, 主事 實殆有勝於陸淳之懸想鑿空者 而廢

之义恶左氏所載證據分明不能縱橫顚倒惟所欲言也則併舉左傳事蹟而廢之譬

許 治 是非曲 直, フケ न 惟 所 斷 而莫之爭也獨 眉 Щ

最 轍 子侧 卷。 爲 末粲 於 训 {氏 爲 在 本成春秋分紀九十卷條別件繁附以序論清儒顧棟高之春秋大事表大略仿焉斯 子由 然 深; 於此; 疏 本; 節 年 顺 其發揮左傳者 盖一 黜公穀惟林栗指左傳之『君子日』爲劉歆所加而資州李石方丹著左氏君 然蓋左氏之書詳於典制三代之文章禮樂猶可以考見其大凡其遠勝公穀, 據 **獄務燬柔牘之文滅證佐之口則** 中 錄 撰春秋集傳十二卷大意以 了翁所 事抒論 日 社 卷則以爲左傳有所謂君子曰者蓋皆示後學以褒貶大法云蒲江 名譜曆法天 傳之意測者難信 月名氏之曲 注 孔疏, 輯蓋 意不 毎條前 文五 在 則有春秋左氏傳說二十卷續說 庶乎 説煩 通經 行 得其要領者丹稜程公說 爲 標 福清林栗黃 而 疆 重 理禮 **瑣屑者多刊除不錄而名物度數之間則删繁舉要** 左氏之徵 起, 而 世人多師 系 樂征伐職官諸書周魯齊宋晉楚以下大 以先後次第成春秋左傳要義三十一卷, 史者 中撰春秋經傳集解三十三卷則尤專主左 孫復 有據也金華呂祖 克齊則 不復信史故簡別公穀壹以左 十二卷東萊左氏博議二十 取 春秋經 謙伯恭之學於左 傳做 魏 [in 馬 小 ſ 其 翁 逃 國 本 鶬 寔 世

與 程端 學以爲 纂疏爲藍 爲主而明成祖命行 士條格春秋用三傳及胡安國傳然祁門汪克寬德輔作春秋纂疏三十卷一以安國 儒之間殆所謂抗心獨往而不囿於時論者耶元仁宗延祐二年定科舉經義經疑取 儒所謂經義者實安國之傳義而已故有明一代春秋之學爲最陋而其端寔於元發 之此元明兩代之春秋學所爲卑之無甚高論者也獨有可特筆者元之二家曰慶元 求 主張不同方法亦不同程端學作春秋三傳辨疑二十卷其書以攻駁三傳爲主凡端 厥以劉敞之春秋權衡爲最著有駁三傳之典故者厥以葉夢得之春秋獸爲最著至 爲三派有棄傳而 魏了翁 學積齋日休寧趙汸子常明之二家日長洲陸粲子餘日太倉傅遜士凱四 類求之不得則以不 可疑者皆摘錄經文傳文而疏辨於下大抵先存一必欲廢傳之心而 |本焉自是胡傳行而三傳悉廢儒者馴乃棄經不讀惟以安國之傳爲主明 春秋左傳要義俱爲左學之津梁也是皆刻意於左氏之書者儻以廁於宋 不駁傳者厥以孫復之春秋尊王發微爲最著有駁三傳之義例者 在翰林院學士胡廣等撰定春秋大全七十卷即用克寬之胡傳 可信 一語概之蓋不信三傳之說創於啖助陸淳逮宋析 百計 以

復以 歷舉 爲 端學也至趙汸淹貫三傳所撰春秋集傳十五 牽合之論罔不併舉而摧陷焉是蒐采宋學之總匯者端學而廓清宋儒之矯誣者, 於 旨 卷則 端 傳良章旨附於杜注之下成春秋左氏傳補注於杜注 救左傳之 卷片據傳求經多 通之其大旨謂 後之 諸 學乃兼 功於左 之蓋徵質之學與虛腦高論者終有別也惟趙汸譏陳傅良春秋後傳之貫通三 家 各 傾能 則宗杜預左有不及者以公羊穀梁二傳通 誑, 三派 糾正 非則 加 其書佚者十之九 (傳; 卽 抨擊雖過疑三傳未免 聖人 兩者 胡安國傳之失而所釆自三傳而下凡一 而 \_\_\_ 用之且; 杜偏於左傳良偏於穀梁若用陳之長以補杜之短用公穀之是 一由考證得之不似程端 不言 兼 得; 之旨 筆削義 併以左傳 則 亦 可謂集宋學之大成者矣至其作春秋或問 灼然 例觸類貫通 乖方至於宋代諸儒, 爲 偽 撰 推 波 助 瀾 111 學 見。 一卷春秋日 之好 傳注 因 反復 之,杜所不及者以 騁臆說蓋防之說春秋以左 得失辨 屬辭 辨討, 罔顧 有未備者頗采孔穎達之疏 干五 百七十六家中多宋儒 7釋悉當 其安! 出入 切深刻瑣碎之談附 卷春秋左 百家究其得 而作春秋 陳傅良左 不 獨有補 氏傳補 + 於杜 傳章 ·卷, 則 氏 亦 會

傳, 之誤 /倬 貫 '秋 矯 以 以 於 卌 卷; 则 殿正 然 明 削 一族譜 通 吳江 図 遜 则 壓 有 三傳之先路奚 武 罕睹! 著 特 分 有 有 崐 公穀 宗 傅者! 出 未 更 方. {杜 朱 傳 狂 而汸所采錄, 苍 經 加 時, 倡 顧 與左 卷吳縣惠一奇天牧之撰半農春秋說十五卷惠棟定字之左傳補 獨 乎! 屬 孔疏 著 考 炎 辨 龄 事二十 · 左 ( 左 ( 族 左氏 武 泔 議 لز 暨陸 以訂 猛 氏終是異師; 亭林之撰左傳 儒 者, 不 必 亦 绾 卷, 頗 卷則 淵 撰 絕於講誦其 創 杜預 德 獨 推漢學與明 以 讀 明 胍 繩 發杜注之違 左日 已意 之誤; 之左傳釋文旁乐諸家, 補 做建安支樞紀事 陳 杜注之 11 姒 爲 IF 鈔 杜 义著左傳注解辨誤二 之釐 1 解 無 儒 以 H 造闕, 背 其 異 補 **慙左氏之忠臣杜注** 四 獨性 卷 論 革 趣然公羊垂絕復續至 失! 正三卷衡陽 抑足存 || 矣陳傳 然漢 斯 泰 本末之體 其 則 州 陳厚耀 寥 左氏之忠臣, 尹 寥 陳書之梗概 斷 良之書獨存春 更始之章 無多! 以 王夫之而 一卷川 已意, 變編 泗 陸粲 源 之諍友而有 於 **社** 曾 年. }句, 之撰春秋 - 爲屬事事: 一晚清 農 }注 衆說 焉! 晉 訓詁家頗 リケ 著左傳附於 之諍 劉 之 至 秋 《後傳左傳音》 撰 無錫 迺 以折衷之; 兆 心盛而穀梁 長曆十 之 春 友 光 · 全線, 以題 爲 邵 秋 於 而 實 削 明 注: 稗 有 卷春 疏 分題 國賢 已開 儒 杜注 哲 裨 ĨE. 卷 胍 面

卷陽湖洪亮吉稚存之撰春秋左傳詁二十卷錢唐梁履繩處素之撰左通補釋三十 卷吳江沈彤冠雲之撰春秋左氏傳小疏一卷甘泉焦循理堂之撰春秋左傳補疏 二卷吳縣沈欽韓文起之撰春秋左氏傳補注十二卷桐城馬宗璉魯陳之撰春秋左 五

傳補 成 同 幽 顧 棟高震滄之撰春秋大事表五十卷錯比全書創意爲表天文有時令表朔閨 一般通買服之說發性氏之違於左氏書有所闡明而焦循沈形特斥 注 馬氏之篡弑語有證佐最推深識然就左氏 一卷嘉興李貽德次白之撰春秋左傳賈服注輯述二十卷皆能 7而論猶爲掇抬細 故未究大體獨 一杜預註· 滿苴罅漏 左, 表 無 以 張

楚爭盟表吳晉爭盟表齊晉爭盟表秦晉交兵表晉楚交兵表吳楚交兵表吳越交兵 }Ш 表列國險要表城築表國際有列國爵姓及存滅表齊楚爭盟表宋楚爭盟表晉

長曆拾遺表天文表五行表地理有

列國疆域表列國犬牙相錯表列國都邑表列

齊魯交兵表魯邾莒交兵表宋鄭交兵表兵謀表四裔表齊紀鄭許宋曹吞滅表內

宋執政表鄭執政表亂賊表典禮有吉禮表凶禮表寶禮表軍禮表嘉禮表人物有列 政 有 列 國官制 表刑賞表田賦軍旅表王迹拾遺表魯政下逮表晉中軍表楚令尹表

春秋志弟六

ì

春秋分紀同然條理詳明考證典核較公說書寔爲過之其辨論諸篇引據博洽議論 |循等 舊說。」發凡創例撰左傳舊注疏證先取買服鄭二君之注疏通證明凡杜氏所排擊 家 易三經表杜註正譌表凡百三十一篇類聚區分以列春秋大事略與宋程公說之作 國 說實左氏一家之學又如經疏史注及御覽等書所引左傳注不載姓名而與杜注 所載左氏 者 經於左氏傳致力尤勤嘗謂『左氏之義爲杜注剝蝕已久其稍可觀覽者皆係 世相 糾 姓 亦是賈服舊說凡若此者皆稱爲舊注而加以疏證其顧惠注補及洪亮吉沈彤焦 確多發前人所未發亦非公說所可及信千古之絕作也亦有體大思精父子祖孫, 正之所剿襲者表明之其沿用韋氏國語注者亦一一疏記 專釋左氏之書以及錢戴段王諸家計訓 嬗, 表 說皆本左氏先師說文所引左傳亦是古文家說漢書五行志所載劉子駿 卿大夫世系表人物表列女表考文有三傳異同 而莫殫其業者則有 如儀徵劉义淇孟瞻生於道光之世研精古籍貫串 說有 山 釆咸與登 表闕文表左傳引據詩書 他如許慎五經異義 列末始下以已意 襲取 茎

定其從違上稽先秦諸子下考唐以前史書旁及雜家筆記文集皆取爲證佐期於實

主詮 斯 發疑 有繫 苑新序列女傳中所舉左氏事義六七十條其間 說, 杭章炳麟太炎與師培驩好亦治左學以爲左氏古義最微非極引周秦西漢先師之 貶互見錯文見異變文爲例文實殊指內外異詞時日月例成春秋左傳例略一書餘 昭類存微恉漢儒說左氏據本傳以明經義凡經字相 之亦以夭死厪卒襄公三世 則 稱 求是俾左氏之大義炳然復明草創四十年長編已具然後依次排比成書顧未及 月不 其 章劉劉師培申叔者劉文淇之曾孫而壽曾之猶子也少承先業以春秋三 經左傳爲書說尤賅備審其義例或經無傳著或經略傳詳以傳勘經知筆削 而卒其子毓崧伯山繼之會天下大亂年五十卒迄未成書其子壽曾恭甫又繼 ĪE 讀成春秋左傳讀一 術 不 繫月之分創獲實多亦較二傳爲密爰 **崇非極爲論難辨析則其義不** 書又據桓譚新論謂劉向以穀梁名家而亦呻吟左氏說 一經濟志踵歿滋可哀也清祚 明故以淺露分別之詞, 之闡厥科條即 字偶易正 同,即 爲同恉叉引月冠 舉同詞同指同詞異實 垂衰樸學亦絕經 |可見古文左傳 申深迂優雅之旨 事明 生矯厲 不同 傳同 褒 所

春秋志第六

本而子政之改易古文代以訓詁者亦皆可覩蓋字與今異者則可見河間古文訓與

氏向 今異者則本之賈生訓故抽繹古義次第其文成劉子政左氏說以糾漢書稱飲治左 魯學然穀梁自昔孤微清中葉以後稍振其著書立說差自名家者則有海州許桂 不能非間猶自持穀梁義之違謬斯可謂輓近左學之後勁者矣穀梁與左氏同

同 叔之穀梁釋例四卷番禺侯康君謨之穀梁禮證二卷丹徒柳興恩賓叔之穀梁

經入手而善經則以述辭比事爲據事與辭則以春秋日月等名例定之扶翼孤經於 大義述七卷嘉善鍾文孫朝美之穀梁補注二十四卷而柳興恩之治穀梁專從善於

穀梁家爲 春秋公羊通義十一卷兼援左穀未明家法又其三科九旨不遵何氏而別立時日月 有條貫云公羊與左氏義相反對與穀梁亦非同趣而曲阜孔廣森撝約撰

爲天道科譏貶絕爲王法科尊親賢爲人情科如是則以日月名字爲褒貶公羊與穀

耕著春秋正辭九卷宏發公羊刊落訓詁名物之末而專求所謂微言大義者其同縣 梁何異言公羊學者不重之然淸儒之言公羊者蓋自廣森開其端而武進莊存與方

則無春秋春秋因魯史以明王法改周制而俟後聖猶六書之段借說詩之斷章取義, 外孫劉逢祿申受繼之昌衍其緒以正孔廣森以爲「無三科九旨則無公羊無公羊,

惟其 故雖以齊襄楚靈之無道祭仲石曼姑叔術之嫌疑皆假之以明討賊復仇讓國之義, 春 爲一人一事設哉故曰『於所見微其辭於所聞痛其禍於所傳聞殺其恩』此一義 恶 事 諱挹損之文辭洞然推極 也穀梁氏所不及知也『於所傳聞世見撥亂致治於所聞世見治升乎於所見世見 來之言公羊者莫之逮也江都凌曙曉樓者精熟鄭氏禮能通其要旣聞劉逢祿論何 太平』此义一 氏春秋大好之深念春秋之義存於公羊而公羊之學傳自董子董子春秋繁露原天 實 |秋何氏釋例三十篇凡何氏所謂『非常異義可怪之論』如『張三世』『通三 不 不予而文予左氏詳於事而春秋 不 組周王魯」「受命改制」 同 重事故存十一於千百所不書多於所書惟其無達例故有貴賤不嫌 援比以貫類旨奧詞蹟莫得其會通乃博稽旁討承意儀志梳其章櫛其句爲 ·辭以爲待貶絕不待貶絕之分以寓一見不再見之義·春秋立百王之法豈 義也, 即治公羊者亦或未之信也」於是尋其條貫正其統紀爲公羊 屬辭比事之道又成箋說答難決獄等凡十一書蓋自漢以 諸義次第歸: 重義不重事左氏不言例而春秋有例無達例。 納而爲之敷暢以微言大義刺譏褒 洞號美

注十七卷又不慊于徐彦之公羊疏欲改爲之而未暇成公羊禮疏十一卷公羊禮說 卷公羊問答一卷向容陳立卓人從曙學兼習公羊春秋鄭氏禮而於公羊用力尤

深鈎稽貫串自漢儒治公羊家言者董仲舒司馬遷以下逮淸儒孔撝約莊存與劉逢 疏七十六卷而於何氏有引申無違異證嚴守疏不破注之例也斯亦何氏之悌弟而 **祿諸家悉加董討而裁以己意其禮制則折衷師說而竺宗鄭氏撰成春秋公羊傳義** 

其書法凡例及論斷之繆于大義孤章斷句之依附經文者庶以存左氏之本眞俾攻 據史記本名左氏春秋若晏子春秋呂氏春秋比自王莽時國師劉歆增設條例推衍 公羊之忠臣矣然世儒之學左氏者必絀公羊學公羊者亦絀左氏劉逢祿論左氏書, 迹强以爲傳春秋冀奪公羊博士師法所當以春秋歸之春秋左氏歸之左氏而删

氏此書者也論者以此尚書之太原閻若璩尚書古文疏證一書焉顧近儒章炳麟則 左者不得爲口實成左氏春秋考證二卷自唐以來難左諸家蓋未有詳考博辨如劉

南海康有為長素著新學偽經考則又謂『春秋左氏傳聲周禮逸禮及詩之毛傳凡 訶爲摘發同異比盜憎主人蓋嘗駁難其說累三萬言以弁于春秋左傳讀之編首而

謂 漢 新莽之學。蓋幷擯春秋左氏傳諸書于漢學之外殆視劉逢祿 **尤敢為非常異義** 末劉歆所力爭立博士者皆劉歆僞作以成新莽篡漢之計者也」「新學」 可怪之論托改制以言變法張三世以說進化著有春秋董 之說爲尤甚! 者, 氏

背孔子 之密碼, 于古堯舜者孔子所托也其人有無不可知即有亦至尋常經典中堯舜之盛德大業, 孔子删述者誤也孔子蓋自立 學孔子改制考等書而定春秋爲孔子改制創作之書謂『文字不過其符號如電報學孔子改制考等書而定春秋爲孔子改制創作之書謂『文字不過其符號如電報 黃帝墨子之托大禹許行之托神農是也。」雖然近儒 政 禄 一同當 治 陳立之倫皆言改制而 革命 隨 理想上所構成也又不惟孔子而已周秦諸子罔不改制罔不托古老子之托 如樂譜之音符非口授不能明又不惟春秋而已凡六經皆孔子所作。昔人 時因革 社會進化」之意也故喜言『通三統』『三統』者謂夏商周三代 也喜言『張三世』『三世』謂據亂世升平世太平世愈改而愈 有爲之說實有不同尋常者蓋有爲所謂 一宗旨而 **憑之以進退古人去取古籍孔子改制** 舢 述 何休以言公羊者如劉逢 改制 者, 恆托 卽

進

既以授

弟子

新會梁啓超任公師弟于喁斬實見諸行

事而有戊戌之政變功雖

二四四

明其 害于言革命謂「賈逵言『左氏義深君父』此與公羊反對之詞耳若夫稱國弑君,不成衆論歸高一時士夫之鶩變法維新者益惠言公羊矣然章炳麟專攻左氏而無 謂預借此以助 |狄而亂臣賊子懼』之說謂「春秋大義在誅討亂賊而左氏『弑君稱君君無道 之例揆之春秋大義有乖杜預奸言誣聖曲暢其說 不同而判從違寧必所學之殊耶篡春秋志第六 也」善化皮錫瑞鹿門作春秋通論楊搉三傳而歸重于公羊據孟子『孔子作春 無道則不得以『義深君父』爲解社預于此最爲関通而近世焦循沈形輩多 司馬昭之弑高貴郷公則所謂 「焦明已翔乎寥廓弋者猶 **」持論义殊章氏則是以志行之** 洞乎藪澤

## 小學志第七

爲名取譬相成江河是也四日會意會意者比類合誼以見指撝武信是也五日轉注。 意二二是也二日象形象形者書成其物隨體詰屈日月是也三日形聲形聲者以事 爲字著於竹帛謂之書書者如也書之體用有六一曰指事指事者視而可識察而見 之文其後形聲相益卽謂之字文者物象之本字者孳乳而寖多也故獨體爲文合體( 意兩體皆主義而形聲則一體主義一體主聲兼義四者字之體也至轉注之建類一 也謂之六書其中指事象形二者皆獨體之文也形聲會意二者則合體之字也惟會 轉注者建類一首同意相受考老是也六日假借假借者本無其字依聲托事令長是 至盡而廣字之用者也然則六書之作權奧於文學乳於字而字之學乳蓋形聲相配 首殆形制之歸納法而假借之依聲托事則聲義之演繹法二者字之所由孳乳充類 盡之矣以形爲經以聲爲緯而天下之物盡以聲爲經以形爲緯而天下之義備物不 上古結繩而治書契者蓋作於黃帝之史倉頡覽鳥獸蹏远之迹依類象形故謂

小學志第七

能 先授以部首使知天下之共名則明孳乳之字以類分。 法曰『太史試學童能諷書九干字以上乃得爲史』自是稱書學爲小學也夫六經。... 保氏掌養國子教之六書謂指事象形形聲會意轉注假借也漢與蕭何造律亦著其 六書之孳乳不外形聲相配而一 聲相配而字之名義罔不瞭然心目間故識一 之委也故以殿於篇惟漢以後儒者之言小學有言形制者有言聲韻者有盡形聲之 孔孟之書以載道所以明道者辭也所以成辭者字也學者當由字以通其辭, 通其道宋儒譏訓詁之學而輕語言文字是猶渡江河而棄舟楫也然則小學者經學 逃乎形義弗能離於聲形歸類而建部首聲各義而从某聲父之詔子師之詔弟若 授以某聲使知天下之音義則从某聲之字以音比爽从中聲為中衣授以部首使知天下之共名則明孳乳之字以類分類知太字則桃杏 言訓詁者而形制爲之基。 切文字之體用要歸六書古者八歲入小學故周官 物而衆物明通一 聲而衆聲會也然則 之女 梅湖 養祭 其形 為 本水 由辭以 木水

王之世改易殊體封於泰山者七十有二代靡有同焉及周宣王太史籍著大篆十五 我 聞 在昔倉頡帝史肇興文字鳥迹獸远厥名古文繼以蟲魚古古相積 江帝三

用而

至 傳皆以古文其後諸侯力政不統於王惡禮樂之害已而皆去其籍言語異聲文字異 載漢書藝文志獨史游急就篇傳凡四卷三十四章其字略以類從而不立門目解散 惟 有用者以作訓纂篇順續倉頡又易倉頡中重復之字凡八十九章五千三百四十字。 通 作大匠李長作元尚篇皆倉頡中正字也凡將則頗有出矣至平帝元始五年徵天下 倉頡篇武帝時司馬相如作凡將篇無復字元帝時黃門令史游作急就篇成帝時將 小篆者也是時始建隷書矣起於官獄多事删古立隸茍趨省易施之於徒隸作之自 令趙·局作爱歷篇六章太史令胡母敬作博學篇七章皆取史籀大篆或頗省改所謂 形奏始皇帝初兼天下丞相李斯乃奏同之罷不與秦文合者作倉頡篇七章中車 外孫涼 倉 所稱史籀篇者周時史官教學童書也與古文或異至孔子書六經左丘明述春秋 小學者沛人爱禮等以百數各令記字於未央庭中黃門侍郎蜀郡揚雄子雲取其 也漢與。閭里書師合倉頡爰曆博學三篇斷六十字以爲一章凡五十五章幷爲 州 刺 史魏郡杜業子夏之子日林伯山者爲作倉頡訓纂倉頡故各一篇具 齊人能通倉頡讀者河東張敞子高從受之傳 府

隸體以所變章草法書之至東漢扶風班固孟堅續揚雄訓纂作十三章無復字揚雄

然自史游以下咸以李斯倉頡篇爲本安帝之世大尉南閤祭酒汝南許愼叔重以爲 訓纂終于滂熹二字和帝時郎中賈魴又用此二字爲篇目續成滂熹篇而終于彥均 漢代暴秦承用隸體卽大篆亦將廢棄何論古文故因當時之體采通人之言溯古知 荀卿子法後王之義取其適于時用也凡十四篇合目錄一篇爲十五篇分五百四十 首也立一爲耑聚類羣分共理相貫雜而不越據形系聯引而申之以究萬原畢終于 之迹作說文解字其意蓋尚書載堯以來史記托始五帝之義而以秦漢小篆爲主則 草隸無所不 則穎川邯鄲淳于叔京兆韋誕仲將河東衞覬伯儒皆以篆法授受而覬好古文鳥篆 亥後世之言小學者宗焉北海鄭元康成注三禮各引說文一事獻帝時扶風曹喜仲 部爲文九千三百五十三重文一千一百六十三注十三萬三千四百四十一字其建 一字合倉頡訓纂稱曰三倉凡百二十三章七千三百八十字六藝羣書所載略備矣 揖稚讓作埤倉三卷古今字詁三卷難字錯誤字各一卷掖庭右丞周氏作雜字解詁 善淳善倉雅蟲篆許氏字指魏初傳古文者出于邯鄲淳魏又有淸河張

四 卷; 周成作解文字七卷曹侯彦作古今字苑十卷蜀有太子中庶子郭顯卿作古今 十卷具見隋書經籀志方之許書古今體用或得或失而吳之好說文者稱彭城

嚴唆曼才焉既晉代魏禪衞凱之孫曰恆巨山者善草隸書能世其學撰四體書 說文本無 卷最爲人傳誦而東萊惤令呂忱則表 而 增補者有說文本有而字各異體者然于許氏部敍初無移徙蕭梁之世, 上字林六卷以補許慎說文書所闕遺其中有 勢一

黃門侍耶兼太學博士吳郡顧野王希馮者于篆隸奇字無所不通乃因說文造玉 文字林教士字林之學閱晉宋齊梁陳至唐極盛論者以爲說文之亞今字書傳世者, 二十卷其部敍既有所 增降損益其文又增多於字林唐六典載書學博士以石經說

莫古於說文玉篇而字林實承說文之緒開玉篇之先者也北朝魏符節令陳留江式

法安亦依許氏說文爲本撰古今文字四十卷大體以許氏書爲主及梅傳孔氏

倘

五. 經 音注簡篇爾雅三倉凡將方言通俗文祖文宗埤倉廣雅古今字詁三字石經字

體咸使班. 林韻集諸賦文字有六書之誼者以類欄聯文無複重統爲一 於篆下各有區別訓詁假借之誼隨文而解可謂有造於許氏者也至唐鷹 一部其古籀奇惑俗隷諸

小學志第七

宗時處士富春孫强復修顧野王玉篇愈多增其文世行之玉篇本蓋非野王之舊而 强所修也然許慎專爲篆學而野王雜於隸書用世旣久故篆學愈微野王雖曰推本

學與秦丞相李斯齊名時稱中興蓋唐以說文立博士習之者多而陽冰尤精也更刊 許慎而追逐世好頗改慎舊自强以下固無譏焉代宗之世趙郡李陽冰少溫獨擅篆

定說文仍祖許慎然頗出私意詆訶於慎學者恨之其後譚小學者宋則有洛陽 恕恕先之汗簡佩觽湖州張有謙中之復古篇元則有永嘉戴侗仲達之六書故兗州 郭忠

則之六書本義衛州葉秉敬敬君之字學其大旨皆不違於許氏其間傳述之功則以 楊桓武子之六書統饒州周伯琦伯溫之說文字原六書正譌明則有餘姚趙撝謙古

卷首通釋三十卷以許慎說文解字十五篇篇析爲二凡鍇所發明及徵引經傳者悉 南唐二徐爲最二徐者蓋廣陵徐越鼎臣徐鍇楚金兄弟鍇撰說文繁傳凡八篇四十

加『臣鍇日』『臣鍇案』字以別之繼以部敍二卷通論三卷祛妄類聚錯綜疑義 系述各一卷祛妄斥李陽冰臆說疑義舉說文偏旁所有而闕其字者又篆體筆 承小異者部敍擬易序卦傳以明說文五百四十部先後之次類聚則舉字之相比爲 畫相

皆有音 令鍇以 義者, 載而 簡 記之自敍名之日繫傳者蓋尊許氏書若經也並又苦許氏書偏旁奧密, 繁重, 之日 以太宗雍熙三年奉詔與句 鼎 諸字用古文之偏旁而從說文之舊徵引古文七十 許氏學者所宗謂之大徐小徐是也郭忠恕撰汗簡四卷與大小徐同時其分部分隸 註 略蓋六書之義已具繫傳耳繫傳書成未 義 闕 如一二三四之類錯綜則旁推六書之旨通諸 **:諸部不見者悉爲補錄又有經典相承時俗要用而說文不載者亦皆增加別題** 未備 焉。 每卷各分上下後世所行 新附字其本有正體 訓; 切韵譜其四聲取便檢閱而並爲鍇篆之名曰說文解字篆韵譜凡五 然後之談古文者輾轉援據大抵從此書相販醫則忠恕所編實爲諸書之根 更爲 無音訓者則慎書所附之重文注史字者籀書注古字者古文也所注 補釋亦題 面 臣越等案」以別之音切則一以孫愐唐韵 俗書訛變者則辨於註中其違戾六書者則別 中立葛湍王惟恭等刊定說文其字爲說文註義序例所 毛晉刊本是也自是越之校理鍇之緊傳胥為 布而南唐亡 人事以盡其意終以系述 一家時薛尙功等之書未出 **踏亦卒。並入宋爲太子率更** 爲定以 不可意知因 列 卷末或 卷; 訓猶 後 頗爲 放鐘 世治 篇 帙

抵未可忘所自來矣至据三代鐘鼎 弊器以考古文者蓋自錢唐薛尙功用敏撰歷代

說文引經考鳥程嚴可均景文之著說文天算考說文聲類皆有專門獨到之功陽湖 意者惟周伯奇戴侗葉秉敬諸家耳餘等自鄶無譏焉獨淸儒武進臧禮堂和貴之蓍 鐘鼎蜂器款識始也元明以來說文之學漸微則語錄性理間之也不墜前型差強人

許氏之舊顧其中尙有爲後人竄改者漏落者失其次者——考而復之作長編名曰 堂積數十年之力治說文解字尤爲有功許氏以徐並校本頗有更易不若歸爲不失 說文解字讀悉有佐證不同肊說詳稽博辨旣而簡練成注仍鉉校分三十卷大致謂 孫星衍淵如考魏二體石經殘字校倉頡篇皆以說文解字爲根據而金壇段玉裁懋

者合而一篆乃完也其引經傳有引以說古義者以轉注假借分觀之如虞書曰『 古形古音訓釋者古義也象某形從某某聲者古形也云某聲云讀若某者古音也三 說文五百四十部次第以形相聯每部之中次第以義相屬每字之下兼說其古義 至

於岱宗紫』詩曰『祝祭於樂』說字之本義也如商書曰『無有作致』周書曰「 重夷席」競假借此字之義也有引以說古形者如易曰『百穀草木麗於地』說

段氏 氏不 麗從草麗之意易日「 子之意是也有引以說古音者如奯讀若詩『 許氏書而釋其條例其目曰六書統說日指事曰象形曰形聲曰亦聲曰一全一省曰 謂 經義例以許書以字考經以經考字昭然若發蒙也時元和江艮庭聲者生平 也學者以其說求之斯說文無不可通之處斯經傳無不可通之處矣」 卷然徵引羣書不加斷制或有類書之譏安邱王筠貫 說文者所不廢也樹玉著有說文解字校記三十卷說文新附考七卷曲阜桂未谷馥 符合歎服輟稿焉故其書精實通博非前之傳說文者可及惟吳縣鈕樹玉 訓詁 說文注訂訂其義例鄒伯奇有讀段注說文札記糾其牴牾而段氏之書終為 爲行楷者數十年凡尺牘率皆依說文書之爲說文解字考證旣見玉裁之注多 以雙聲字爲聲日一字數音日形聲之失日會意日轉注日假借日彰飾日 不明不足以通經』日収說文與諸經之義相疏證爲說文辨字義證五 「或體日俗體日同部重文日禺部重文日分別文累增字日疊文同異日 豐其屋 一 說實從一豐之意易日 施呂滅滅 山著有說文釋例二十卷蓋 **介讀若『予違汝弼** 突如其來如, 自以爲揆 説
な
從
倒 非石 服 膺許 是 作 刨

體同 事至列文變例皆論篆籀自說解正例至雙聲叠韵皆論說解自挩文至末則皆臆說事至列文變例皆論篆籀自說解正例至雙聲叠韵皆論說解自挩文至末則皆臆說事主列文變例皆論篆籀自說解正说簿上说簿上阅读上糾徐上鈔存日存疑其自指 許氏書所稱引而部分之便於學者惟許氏書雖明形體而於形聲訓詁間亦述及 丽 以 文變例日說解正 存疑則訂許氏之誤無訂段玉裁注之誤雖例目失之繁多論說或有穿鑿然條舉 字流 僅 推 儒 即謂之字文者物象之本字者言孳乳寖多」以爲「獨體者倉頡之文合體 儀徴 明本義 求 日讀若本義日讀闕日讀若引經日讀若引診, 求之於同 義 本 變之迹甄 劉 字猶未宣究至元和朱駿聲專芭撰說文通訓定聲十八卷更暢發之但駿 師 爲宗羣書中文字義訓之不合於說文者多屬通假段玉裂注乃由 互從, 韵; 培申叔撰古本字考餘杭章炳 明益衆炳麟又讀許氏書敘稱「 例 而 日說解變例日 **晻於雙**聲相藉又不 [展轉相從] 删篆日迻篆日改篆日觀文日糾徐日鈔存日存疑其 日母從 日日非字者不出於說解日 子日說文與經典互易字日 明旁轉對轉之條觕有補直, 麟太炎撰小學答問 倉頡作書依類象形其後形 日聲讀同字日雙聲叠韻, 同意 乃於許氏書 1列文次第1 猶 不 一免於嫥斷。 1讀若 者後 聲 本 通 字 假 相 然

之流 以爲。 議若夫囱吳同語囼擴一文天卽爲顚語本於囟臣卽爲牽義通於玄屮出耑壬同種 乳比而次之得五六千名撰成文始九卷所以明形體聲類之更相扶胥異於偏觭之 王之字古文大篆雖殘缺倉頡之文固悉在許氏書也一於是刺取許氏書獨體命以 讀劉師培古本字考及炳麟小學答問而本字籍字之流變明次讀炳麟文始 初文其諸省變及合體象形指事與聲具而形殘若同體複重者謂之準初文都五百 篆已多承誤 四說文徒以秦篆苴合古籀非不欲備勢不可也然介頡爰歷博學三篇財三千三百 儒薛尙功諸人而後治小學者惡据三代鐘鼎彝器款識以考證占文乃云。李斯 字凡將訓纂繼之縱不增倍已軼出秦篆外蓋古籀及六國時書駸駸復出而班固尤 字集爲四百三十七條討其類物比其聲均音義相讎謂之變易義自音衍謂之孳 變亦明小學之條例至炳麟益精切而小學之境宇亦至炳麟斯恢宏焉惟自宋 『古文自漢時所見獨孔子壁中書更王莽赤眉喪亂至於建武史篇亦十亡三 叔重沿而不治 一至欲改易經記獨炳麟證爲未然而著意於文始敍例, 而 文字 作

小學志第七

之倫 此則 緒時河南安陽縣西北五里之小屯洹水厓岸爲水齧有龜甲牛骨出土上鐫古文字 得徑塗珍如球壁焉蓋殷商文字背人惟於三代鐘鼎彝器間見之然其數頗少至光 之瘖聾蓋何足選。」斯誠矯枉救敝之論然殷虛甲骨文字出土清季而考古文者別 以其地三周環洹水蓋史記項羽本紀所稱『洹水南殷虚上』者或者遂定爲殷商 得四千五百餘片焉然論殷虛甲骨收藏之富莫如上虞羅振玉叔言蓋三萬片云其 藏悉歸丹徒劉鶚鐵雲而洹水之虛土人於農隨掘地歲皆有得亦歸於鶚都鶚 書者有劉鶚之鐵雲藏龜一册羅振玉之殷虛書契前編入卷後編一 文字云有估容攜千餘片至京師爲福山王懿榮連孫所得會拳禍作懿榮被殺其 一二器者宜在蓋闕雖擴撫不具則無傷於故訓也若乃熒眩奇字不審書言之符譬 古文作十三章网羅成周之文及諸山川鼎彝蓋衆說文最字九千視秦篆三之矣 亦足 Ėi 在諸家者亦當以萬計。而駐彰德之某國牧師所藏亦且近萬片,其拓墨影印成 籀憖遺其梗槪具在說文猶有不備禮經古文周官故書三體石經隨倉石鼓 |神補一二||自宋以降地藏所發眞僞交糅數器相應足以保任不疑卽暫見 一卷殷虛書契菩 先後 所

華一卷鐵雲藏龜之餘一卷後英人哈同氏復購得劉翳所藏之一部八百片影印戩

器尤多且古故裨益於古文之考證者尤大惟事類多同故文字亦有重複劉鶚所印, 壽堂所藏殷虛文字一卷則多出鐵雲藏龜之外所刻文字皆殷王室所卜祭祀征伐 行幸田獵之事故殷先公先王及土地之名所見甚衆又其文字之數比三代鐘鼎彝

最先考釋者瑞安孫治讓仲容卽鐵雲藏龜考其文字於光緒甲辰成契文舉例二卷。 未及編類而羅振玉則分別部居去其重複選印稱最精純此殷虛文字之影印也其

契考釋殷虛書契待問編海寧王國維靜菴之戩壽堂所藏殷虛文字考釋先後成書。 雖創獲無多而殷虛文字之考釋實自此始其後羅振玉之殷商貞卜文字考殷虛書

而殷人文字之獲考釋者且什之五六焉。此實近二十年來治文字學者之一大成功

也故特表而出之。形制明而后言聲韻。

之作應在書契以前但求其聲之叶不求其文之工也尚書非有韻之文也變之典樂, 韻書始於魏晉然生民之初必先有聲音而後有言語有語言而後有文字詩歌

依永和聲其聲韻之始乎。阜陶廣歌明良康喜起熙之詞皆韻文也商周風雅頌存於

也文言 辭如「需於血出自穴」皆在屑韻「長子帥師弟子輿尸」皆在支韻則古今所同 个者蓋三百篇作詩者雖未必如今人之檢韵以求叶然今人之考占音者惟**據**詩三 散見於禮經之中者則不可枚舉矣儀禮士冠禮士婚禮之醮辭周官考工記之梓人 百及經子有韵之文足以互證易彖辭如「初筮告再三瀆」之類蓋屋沃占通 篇合而三百篇所無者則又往往與周秦漢魏之歌謠詩賦合其爲上古之音何疑而 祭侯辭栗氏量銘皆有韵之文也春秋左氏傳之筮辭童謠輿誦諺語亦有韵之文也。 今逈異也禮記曲禮首章「毋不敬儼若思安定辭安民哉」思辭哉同韵其餘韵 荀子第二十六篇日賦有禮賦知賦雲賦蠶賦箴賦鼎立於風騷之間儻亦譚先秦古 顯於世旣風雅寢聲下降戰國奇文鬱起其離騷哉考之屈宋之作其音往往與三百 故近世考古韵者大抵取羣經有韵之文折衷於詩三百而後諦煌以上之元音乃復 武帝横槊賦詩所用之韵皆與今韵爲近非若先秦以上之音詰屈聱牙也文選錄漢 音者之所取資而爲 「同聲相應同氣相求水流濕火就燥」求燥同韵與箕子麥秀歌相同則古 有韵文之大宗焉至漢高皇大風之歌漢武帝秋風之辭以及魏 心爻

也, 用 魏 謂之切德紅之切東徒紅之切同是也亦謂之紐。有正紐有倒紐有旁紐, 六經許慎撰說文但云音某或讀若某而已自後漢佛法行於中國得西域胡書能以 魏 之字出切以同韻之字定聲也至魏此事大行。 之義亦謂之翻如同泰之反爲大通桑落之反爲索郎是也兩字切一字磨 而等韻明反語以二字定一字之音而切韻出切即反也兩字互相切謂之反取反覆 乃創反語而聲音之道備蓋反語生於雙聲雙聲生於字母字母以一字貫衆字之音 人詩 韵故考證漢韻比考證經韵尤易惜唐人自撰唐韻漢人未嘗自撰漢韻也鄭玄注 左校令李登撰聲類十卷凡萬一千五百二十字東晉安復令呂靜之弟 切也紐也名異而實同等韻之法以若干母貫穿天下無窮之字而切韵則以同 四字貫一切音謂之婆羅門書。自是字母傳入中國。而樂安孫炎 王弼 賦 注湯亦有1 及箴銘頌讚之屬其有韻之文多於羣經諸子而史游急就焦氏易林, 反 切 W 事而高貴郷公不解, 王肅周易音用反語者十 反以爲怪異自茲厥 人叔然作 後音韵鋒出。 餘 不越一反反 撰約集六 -爾雅音義, 切而 條。 明見 經陸 出 母

中宮商

角徵羽各一卷時音有五而聲未四也南齊汝南周腳彦倫始作四聲切韵

聲為 周捨 類 音之學然漢儒 說 神 虔 神 二家然以之翻 人然」 之作; 吳興 自 相 禪 \_\_\_ 韻 之周 此 推; 反 西域後漢婆羅門書雖不傳而釋藏譯經字母自晉僧伽婆羅以下可考者尙 子顒 曰: 爲 沈約 譜, 率 紐 興也夫漢人課 而韵譜成 圖 而 文皆用 秦 新 序 不 休文繼之撰四聲譜以爲 前 」「稱煇」「丁顛 胡經, 知衡 何謂 鮮 者 識文字而不識聲音旣昧造字之本儻 宮 回 寧年 證 四聲? 商, 矣初沈約與! 而未以制 有 餳 宮 籀隸始爲字書以通文字之學江左競風騷始爲韵 將 也。 商 平上去 初吳郡 涎 』 捨應聲日『天子聖哲。 <u>---</u>j 角 國音。 寅 徴 迎妍 入四 凍郡 延 顧野 羽 紐 半商 字之圖, 王希 | 聲以 \_\_\_ 與掀」「汀天」「 謝朓玄暉郎邪王 「在昔詞人累千 <u>\_\_</u> 眞氈」「娉偏」「 华 零連 馮 徵 此 亦創沈約 造玉篇, 七 制 音 \_\_\_ 韻, 爲字母, 世 』然帝竟不甚遵用約而四聲之 江左之儒 清千 一中載古 呼 見引 永明體獨 載不悟而獨 肅 精箋 亦寧為 融元長 於唐 澄陳 切字要 賓邊 知 」『民眠」「聲羶」 梁武 僧 縱 在 曉立韻之源字母 得胸 法 神 齊 有 <u>\_\_\_</u> 珙四 平 之 平 永明 帝 便一 書以通 經 不好焉; 襟, 聲 自謂入 時以氣 因 去 堅 五音 入四 煙 聲 問

增益。 哑 傳 隋 益 然 後 刨 甚! 牙音 世言 r<sup>l</sup>i 泽 H 文 平? 刑 **六部**, 獨 元宗之 帝 曹劉以下諸 丽 和音 切 4 沈約 字母 韵九 時, 颠 沈 <del>--</del>7 擎虔 萬二 譜弄 陸法 要法之『 兒 約 者之祖 ) || 有 \_\_\_\_ 苏 作譜乃不能 紐字之圖 此反 <u>\_\_\_</u> 于 番 汀 [\_\_ 知組 偕須 孫 溪 天 神圖 人之詩所用之音誤爲 」、文楠 眞 迎 百 焉。 珙序 ححا 愐 [\_\_\_ 之推 研 \_ الــــــ 氈 元引 者 乃宋儒鄭樵 iE 不 十八字唐郭四 傳於後 · 乃以 犎 上 和南 حصا 和輝 也 蕭 |据羅南旁采騷子以成不刊之典而僅按 ·---田 以陽 後釋{切 舌 莎 <u>\_\_\_</u> 疑, 劉臻等 亭田 韻 頭音 人處 \_\_\_\_ 爲 寧年年 忠 爲 譏 」「澄陳」「迎好 n 知元 惜 始定三十 \_\_\_\_\_<u>\_\_\_</u> 定本 凡三十 江左之儒 端 耳! 顧 八 八人本 為刊 然自 網亮 野王 也舌上音 於是今晉行而古音 透上一 字母後 類蓋即沈約紐字圖之所由 ιĒ, 薛 沈約旨共相 秦漢之文其音已漸戾於古至東京 玉 篇 別 恂 識 為唐韻。 <del>---</del>-載 E 四 定 有 摩 知 ıŁj 也重 僧 mī 切字要法之『 撰集; 不識 守溫者益 唐僧神珙 唇音「 泥, 徹 心七音, 是謂 亡為音 即古 班張 割 切韻凡五: 澄 以六字。 例或 。經堅 學之一 以下諸 切字 价稱{陸 然神{書 其然 本, 今 滂 要法 娘, 岦 遞 而 据珙 變! 所 其 爲

小學志第七

宋重修廣韻; 音 法之一真 三十 一萬六千一 者 精 非 從唐韵是唐韵亡而不亡也迨淸獻縣紀容舒遲叟作唐韻考五卷以爲『翻記日是廣韻行而唐韵亡然宋初徐鉉奉詔校許慎說文在重修廣韻以前所用 卽 並 六母 新 古 匣, 角齒音者商舌音者徵喉音者宮唇音 <u>\_\_</u> 鮓 切字要法之『零連』而半齒音『 <u>\_\_</u> --7 清 全 明, 氈 敷 刨 <del>ت =</del> 以切韻亦名廣韻 百 il; 而國音定也迨宋眞宗以景德 0\_\_\_ l\_\_\_ <u>\_\_</u> ---<u>\_\_\_</u> 餳 刨 九十四字註十九萬 切 從 福 奉 字 涎 占 要法之一 燀 2\_\_\_ 切字要法之『賓邊 <u>\_\_</u> **哈亡然宋** 也。 د \_ ـ ---\_\_\_\_ 小 ===1 微, 澄陳 <u></u> 邪, 崗音 1\_\_ 即占 也。 因 烟 د. . 切字 廣書 照 n \_\_\_\_\_, --: **』即古切字要法之** 精箋 弯頭 千六百九十二 \_\_\_<u>\_</u> 韵藝 之文 [\_\_\_ 了。 颠掀 要法之『 舌, 者羽, 四年詔陳彭 名志 娉偏 故皆 (maga <u>[\_\_</u> 华舌音者半徵, 闸 ---陳載 川里 **芬**港 寅 彩年等校定本 一言大中群符四 狀 彭陸 人然 延二 . . [---密 年. 平 )喉音 邵 败非 便 也設以七音相配, 刑賢 雍等校定切 <u>\_</u> j 2\_\_\_ 半齒音者 こっ清 文 橘 **c**-- ≈:-四年書成賜 禪, 影 民 』也半舌音 來, 增卷 眠 題則 <u>\_\_\_\_</u> وستنا . . . . 干 大法 ,--- j 微率 平商 韻 也。 也。齒 曉 îİî 朱言 Ħ. 切 切之 修韵名四亦{大 卷儿 於是 秦前 翻 則 <u>'}'</u> 頭音 唇音 崳 要

假 法, 唐 借 其 |龍 其 上字 翻 下 切 字; 排 必同母下字必同部謂之音和間有用類隔之法者亦僅假借其上 因 此, 其 析 歸 翻 · 各類; 切 下 《乃知唐韻》 字參互: 一鈎稽, 部分與大宋重修 輾轉相證, 猶 廣韵 可得 其部 同蓋唐韵之作, 分。 <u>\_\_</u> 乃 取 亦 說文 以 字, 所 刊 而 iE.

建言 朝 陸法言切的声 苔 中平 韵 洙 百三十二字是字 陳彭 變遷之迹 [ii]·聲四卷, 加 修 年. 症; 而法言 邱 刑部郎 雍 上去入各二卷共五萬三千五百二 可考也至宋仁宗時太常 所定廣韵多用舊 切韵近始出土敦煌干佛洞 如孳乳濅多音韻 th 知制 計 丁度禮部員 文繁略失當, 博 士直 外郎 矣蓋卽世 更館 石室益以紀氏之唐韵考而 因認 十五字视重修廣韵增二 知制誥李淑爲之典領凡成書 宋祁太常 與 丞直 國 子 監直 更館 鄭哉等 講 萬 隋 買昌 唐

數 縣 ----业。 司 家總爲 叉考之切韵 馬 光 君 · 砂總三 集 實 說余得旨繼纂其職書成上之有詔頒焉。 切 指 韵指 掌圖序: 百八十四聲別爲二十圖取同音同 掌 圖 司 者序稱『仁宗詔 馬 光蓋 因 亦寝多 纂集韵科別淸濁成 丁度李淑 一母同 』則是集韻成於司馬 增崇韵學自許 所傳切韻云。 切的指 韵同等四者皆同 掌圖 世义 叔 重 傳 卷 而 大指 光之 降, 有

作; |等 宗 字 音 馬 分 爲 字。 解 據 隋書催 公之 等 以 母, 進 時 廣 而 Wi 和。 爲 剖 刑 韻 為 必 頮 神 UI 取 者宗焉。 最 唇 集韻 切 出 珙 者, 隔 定 毛晃父子 部 韵考之 育之 Ĥ, 譄 統 光 有 重 郞 手 **{[2]** 圖, 唇 唇 ---1 1 而 屋等子: 張 附載 四音 哎 憑 為 筆 輕 齒 知 也然圖 者以 舌 所增修也 那豐 切。 舌等二 制 本 <u>\_\_\_</u> 頭舌 玉篇; 2 同 計 部 矣。 再 哎 説, 韵 廣約 <u>III</u> 寫 Ĥ **J** - --縣孫 度 + 略。 僅 训 上 |-| im ൬ 特禮 宋 韻 齒 表 {集 六 -- j 遂 粗 不 分 初程試 f1 变景 僧 一韵 敕 叫] 指 艰 M 母 頭 攒 部 淵 扩 其 雖 大 华 韻 JE. 也 的略 公之 者謂之 1-1, 데 同 崗 也 寫 111 例。 綱, 三音 用韻漫無章程故閩士至有 其 作 líj 華 非: 其 歸 敕 有二 修之書 高 嚴 }苏 此 體 [ii 通韻。 兒編 出 馬 母, 四 t | 1 mi 疑南 本: 丽 1 增 微。 則 光 清 然仁 修互 其 音 其有 作。 辨 辨 爲 瀏 宋 字 獨 不 開 始 雙 同 上禮 等韻之說, 宗 定。 日 -5: 聲。 者, 成 母, 闔 人 以還, 附 依 訓之 作 書 亦 以 同 L\_\_\_, 釋义互 部 自 知 逋 托 傅 分 出 集韻變四 韵 頒 輕 類 宋 骨 爲 #: 學宮 將 人 自 韻, 梵 隔。 者, 切 重, 後漢 計 以 者, 信 是音 音, 審 僅 則 eran Gran 禮 圳 南 圖 光 輕 丽 不 爲 型等子之 天 宋 部 迎 隸 與 爲 H 此 重 疊. 和 道 韻 行 佛 以 時 光 以 韻。 統 圖 \_\_\_\_ 芝 今以 如 衢 略 者, पी1 經 訂 與 同 者 孟 作, 國 + 何, 州 三四 俱 虚 韻 仰 所 '聲 不 面 ii] 而

故 較 溯 他 韻 叶韻 書 特 产 杏。 殿; 主仁宗 然 收 敕 撰 頗 狹, 此 甚, 止 九千 事 À. 爲 科 百 舉設; 九 - | -字; 而字之去 著爲令式迄南宋 収, 旣 經 廷評义: 不 一改毛晃蒐 付

肵 依 造, 典 據! 韻 之殊; 徒以 復 州 依誤 便於程 往 T 往 增 以 四 附, 并釐訂 試, ıΪi Fi <u>;</u> 二二二世 濟人 治義 律詩 頗 刨 廣; 所謂 倍聲為 ?字畫之誤: 亦利祿之途則然然 者是 本讀; 凡 蚁 州 世 以 父 訂 引漢 -J. 四千 相 韻書規模未 律, 機, 八百 斷 用 三十一字其子 唐 力 頗 獄 少之不古不今, 動; 大變也自金 但 不 知 居 ili 令 IF. 文字 續 殊 難

阳 據 文郁 {|)蛋 韵 集韵 州 併 撰五 加克 部 音集韻; 韻 略 成 始 45 以 水 韵 七音 略; 南 四 等三十六 宋 劉 淵 因 之, 泔 刻 顚 淳 倒 祐 唐宋之字紐 壬子 新 刊 mi 禮 部 韻 韵 書 )略; 始

而

韓道

以上 字 缒 5 紐 萊也 4 迎 韓 終淵 乃定 道 以刊 知錢 -----劉王 华大 昭 Ji, 淵文 水昕 法, 所郁 韵日 部 各三 撰平 王後 分迎 也水 文人 茲剖 郁往 十 王 文 从略 所往 产 郁 其而 撰以 說去 後平 -1-例, 七, 兼二 其 題水 主 合 正爲 一家所 元 大劉 六淵 门 昭 -[: 年考 武 缝 部合併 熊 丽 己元 用之, 忠 則平 子中撰古今韵會 文都 書成 4 而 剖 書舊第 於首 百 至是盡 金有 部 舉要三十 疫河 宗間 而

mi 其 力 排 歴 來 韻書之江左吳音 則尤為後來洪武正韵之所本然而歷來韵

小 志第七

陸法 公 爲 序; 造 坌 似 犽 下 大旨 濂 卷, 所 取 握 则 ----去。 新舊唐 捨 部; 等 不 筆, 決 ŽI. 明 į 纂修其: 於是古 斥 經, 定 略 東 切 亦 则 魏著 育為 罔 載 沈 復 収 韵, 約 有 井門 不 絧  $\neg$ 一同吳楚日 注 爲 作 與 開 藍 來 過 紀。 吳音, 於洪 本源 皇 釋 譄 河 不 相 - 著錄是: 傳之二 今()) 法言 北 初, 以 武 復 训 儀 疗 以 乃以 毛 問 <u>|</u>: 殊; 時 同 E 傷 韵 與書至唐已 百 晃父子增韵 中原之韵 因 劉 <del>--</del> J 極淺脈。 (陸法言) **六部**, 臻等 論 首 间 者 也! **7**j 列 南 北是 洪武 间 論 八 併 人同 趙則 定 以 爲 難 更 一件而唐: 為

東 非, 來之韻指 七 JE. 正韵 疑 八 詣法言 古今 多傷 其 人, 處, ----悉 有六 失, 其 者, 本; 書成 蓋 111; 通 重 以 恭 論 影。 塞, 濁。 爲 我 來 平 劉 明 然考隋 及音韵; 秦隴 輩 沈 之唐韻廣韻 太 臻, 欲 上 於洪武八 約 祖 數 更捃選精 去三聲各爲二十二 沛 入定則 敕翰 國 則 殊爲失據而 以今 去 相 書經籍志 聲 年, 人; 林侍講學士 集韻 顏之 定 爲 聲 切, 丽 **八梁 公** 宋濂 矣。 調 除 諸韻 推, 陸法 載 旣 削 法 琅 疏 自 沈 奉 則 樂韶 言 邪 言 部, 緩。 有 書, 約 敕 臨 蕭 4 岩 别 切 }四 卽 入 爲 燭 以 聲 韵 鳳 沂 顏

則

臨漳

其

人有南有北且北

人多而南

人少則非惟韵不定於吳

人而

序

中

江.

思

道

范陽

涿

人蕭

該

蘭

陵

(辛德源)

隴

14

狄

道

薛道

衡,

河

東

汾陰

而

陸

經 卷,{音, 平 以 阿 取 棫 韵 時 自 相 來, 世, 若 韵 乃牴 類能 水 協 武 附 韵 行 胩 夷 朝 强 錄 韵 此! THE THE 舛 者, 補之例而蒐采賅備者則有 加 廷頒行 吳棫 爲 略日 漏 四 牾 依 唐 知 **、舞文耳然終明之世竟不能行於天下則是是非之心終有** 語且亦明斥吳音之失安得復指爲吳音濂在明 本 ij, 據 韵 眀 牴 百 才老始 太 牾 端! 本 寫 亦 雏 亡為 各為 然後 文, 互 祖 與 學宮之韵 Li o 旣 **越同譏然慎撰古音略例** 隋唐以 一相比較, 也考域之 卷帙, 來言 欲 顧慎之讀 《今古音淆》 重造 書蓋 古音 丽 韵 核 推 來音學之义 著占有詩補音楚辭釋音韵 其體 書, 春, 書 求 皆從 古前。 以南宋劉淵 雖 川川 以 無所用之也南宋以降專著 多 新都楊慎升庵之古音叢目古音 更古 例 於棫 全仿 朱子注詩釋騷 此 入; 而 變! 如不 推 吳棫韵補以今 加 卷取易詩禮記楚詞老莊尚管諸子 韵 闡 重 音韵名 誣古 學 加 刊王文郁平水韵略為藍 亦 密; 有 疏, 人 龜 以罪則; 故援據 路之 取焉; 家則 韵 初號 補三種其詩補音楚辭 分部而 善佚 功, 典 秦漢 爲宿 書以 以討 改之 不 可 不 學, 梅獨傳韵 不可奪者! r'i 分隷 獵要古音餘 辨明古音者, 論 無名! 涭 古 書頻繁富 也。 寧 厥 本 音 知 濂 以古音之 於是 後 誣 亦 爲 用 |補 功; 曲 妄 元 有 明 宋 吳 釋 而 Ji.

谷切, 心。 勞 狮 爲 韵 與 清 末 济 可 必 人 約。詩 等[ 搖昂] 乏 詞, 然挺 安論。 詩合可以五證於是排比經文參以羣籍定為本證旁證二條本證者詩自相證以 ρij 之音原與今異凡今所稱叶韵皆卽古 帕 叶; 篇, 必 與木谷 何 買 叶 --- <u>J</u> ï 標為 米, 也顧炎武作音學五 拾成 必勞唇齒貨簡册」其論 · = ] nhi 靍 一然不 **嘒**彼 禂 開 僚。 **感例若易例** 除 書有離有合終不 獅為 寫 紊。 腻 先路, 小星惟參與昂一 韵。 我 父左國易 韵成; 思肥 <del>. </del> [\_\_\_ 必讀 並受其 於古音 泉茲心永歎, c = 3 連 <del>ر = ع</del>ا 沙丁 象離騷楚詞 姥, 日 書江永作古韻標準, 福, 有據而恆 陳第 <del></del>
尺之離 如清儒崑山顧炎武寧人婺源江永慎修諸 حدد ا 昂音旄; 亦頗足糾正吳棫之說而視占音叢 福 京 音 季立撰毛詩占 歎 岛, 秦碑漢 必讀 離音羅, 下文一 必叶 义謂 興食汲 人之本音非隨意改讀輾讀 他涓 賦 疆, 以經證經推究古音始獨探本真, 抱衾與禂! 吳樾於詩 爲 與歌嗟爲韵。 音考四 以 切。 韵。 <u>\_\_</u> 主 <del>--</del>1 <del>--</del>1 吾與 上 福 卷實 ıl; 不 \_\_] 棘心夭夭 稠 治調; 歌謠箴 必讀 爾靡之, 思古韵寬 三歲不 為首 <del>-</del> 牽就。 偪 ſ<u>....</u>, 銘 功; 目 \_\_\_\_ 質命 靡台 大 緩, 付 觐, 頌 四 一書實 % 情以 人之能 2 如 讚, 如 氏 類; 字 劬 不 覿 齊, 往 母 歷考 爲 豞, 音徒 爲 讀 與 廓 本 勝 和

韵部 探古音之源。旁證者他經所載以及秦漢以下去風雅未遠者以竟古音之委而采易 韵某部; 韵正 也。 正炎武者頗多然合者十九不合者十一南宋吳棫以來古韵叶讀之謬論至此 未及研求邃密至顧炎武乃探討本原推尋經傳作音學五 但卽 廓 者以時! 古音表大指持楊愼 明 八篇韻與今殊者二百三十四字推其本音與毛詩古音考互相發明成屈宋 分妄以通古音者相去蓋萬萬矣此 故 一卷惟每字列本證旁證則間附字下不 與今韵 本經 厥功 心自陳 世近 所用之音互相參考每詩皆 選者 鉅自序謂『潛心廣韵發悟於中而旁通其說於是據唐韵以正宋韵 第 而音聲同也鉤稽參驗所列四百 郎註 作毛詩古音考屈宋古音義而古音之門徑始明然創闢榛 『古人韵緩不煩改字』陳第『古詩無叶韻 日古音某大抵密於陳第 全列經 書卷帙無多然欲 另爲條與毛書古音考體例小異, 文而註 四十四字言必有徵視宋儒 而 疎 於 音 求古韵之津梁舍是無 江 句下; 書日音論詩本音易音唐 永故永作古韵標準, 與 (今韵 合者註 一之説詩本 騷賦 執今 以前 無, 猶 曲

小學志第七

**香表**二 五層 第部 豪焉 所 屬昔 七半 五齊 猶 言之 之 其 失, 部酶 十蒸 第第 用 第二 半屬 歌佳 從 所 一卷辨沈 也! 五韵 屬第 戈皆 部 以 擴 麥韵三登七四有 然炎 昔字 部第 部部 未 部字 第二 麻灰 卷自是而六經之文乃可讀 不 次。 兼屋八半第哈 故 同, 經 錫屬 單十 歌眞 合 為音 武 氏部分之誤, 以 第焉 談一 戈諄 者, 屋獨 又屬 六第 | 炎 之治古 六第鹽部 麻臻 作 鐸鐸 入第 陽二 武 正 論一 部三添尤分文}古 錫陌 聲六 唐魚 據 沈 職部咸侯支殷韻 三昔四尤第虞{廣 約 音蓋一 德月嚴幽 韵观 標 韵屬 部韵 七模 餐韵 卷考正三代 唐韵之失而三代以上之音部 分易 衡分 字痕 淮, 字第 質半 耕侯 而 麥末凡虞屬分分 緝二榔屬清第 百 以 韵點 叉艏 焉先 十一合部 術第 香三 六 一以古音定之爲唐韵 字鎋 入肴 第韵 三 盍乘 物二 第真 部, }廣 屬層 聲宵 八字 部;葉沃 迄半八諄 作 簡 其 以上之音注三 焉薛八豪 部屬 哈第 帖覺 月屬 燕臻{唐 爲 他諸子之書離 第第 部韵 陽焉 分一 洽藥 沒第 登女} 依 韵 七四 第字 唐第 尤部 狎麥 曷五 第殷 { 據; 部部一屬分五 韵東 業四 末麻 九元{ 古 而 **楫藥 部焉 庚部 字**冬 之韵 黠韻 侵魂{音 {廣 分鐸 屋第 韵元 屬鍾 屬字 鎋半 覃痕{表, 韵 百 合分 沃十 字寒 焉江 第沃 屑屬 談桓 始 合有之而] 五篇, 者, 分 正二十卷綜古音爲十部, 葉沃 燭二 層桓 第第 十覺 薛第 鹽刪 分 雖 秩 **冷韵之宗** 洽覺 覺部 焉刪 三二 部藥 麥六 添山 古 爲 如; 韵陌 第侵 第山 部部 然 錫半咸仙 韵 乃 字麥 二分 九先 魚支 江 職屬 衛第 為 不 列 本 谌 屬昔 部覃 部仙 虞脂 永 音 德第 嚴四 十 古今音之 焉錫 質談 庚第 模之 訂 屬三凡蘭 部。 其 遠。 + 第韵 術鹽 清六 分微 其 第庚 第宵 一東 以 卷, <u>\_\_</u> 八字 概韵 耕部 麻齊 於 誠 注 二韵 寸肴 支冬 推 部屬 物字 青廟 韵佳{ 變而 部半而豪脂鍾 哉 易 迹 合焉 迄屬 第宵 字皆{ 百 兼屬 支幽 之江 古 爲 有 爲 **盍節 分焉 十肴 屬灰**{篇 屋第 韵第 微第 音, 味

治薬 狎帖 乏業 惟 以 詩 百篇 爲 主謂之詩韵言 而 以 周 秦 以 音之近 占 者 附 之, 謂 補 視

五二 八御 聲聲 部第 桓部 韻 脂 別 删 孫 家 類三 平物 庚職 之入 爲 支 近 界 四聲迄耕德 炎, 佳 柳部 山唐 ---脂, 侵沒 清三 限 不 陌麥 層屋 仙第 七 舌 爲 尤 類六 鹽屑 青平 較 Ξ, 屬沃第十部; 始 网 明。 第燭 十一 六第 脂 七 添七 支聲 楠 近 旨錫者支之 十覺 五部 部一 珙; 其 入平 佳東 之古音今音 唇 微 弟 二屬 部庚 蒸部 類八 聲聲 入冬 撰 齊 子休 皆 部第 脂耕 登之 九 緝元 聲鍾{聲 九寒陌江}韵 術三 微清 第咍 灰 四 寧戴震 物部 齊青 七第 ъź Н 平桓 麥尤{考, 入 爲 迄藥 皆第 部二 自 皆 聲删 昔侯 分 Z 月鐸 灰十 侵部 草山 錫幽 唐 爲 收 मि 末屬 第二 鹽蕭 東原 也曲 得 談仙 六入 虞 咍 九 易第 十部 帖宵 其 爲 咸去 平聲 至 類 沒五 六具 第肴 衝擊 聲屋 後 受韵 條 陳 點部 部臻 八豪 嚴祭 真沃 作 貫; 隋 職 至 德者之 凡泰 臻燭{聲 學 组緝 支先 部第 金 自 有 萨萊 佳第 覃三 於 壇 入夬 諄覺}類 韵 以 之文 聲廢 文四{表, 屬帖 第十 談部 段 江 爲 合入 欣平 之 第屬 十三 咸尤 氏, 泛 九 盍聲 魂擊 濫 入; 十第 七部 衡幽 無 裁 ,而 類; 五七 部諄 嚴第 葉月 痕陽 涯 不 術 懋 復 **{詩**, 部部 歌女 凡四 堂 帖曷 先唐 聲一 FII 物 業末 脂蕭 鐸平 合; 陌合 戈欣 第部 迄 理 作 麥盍 麻魂 九侯〉六 **治**點 微宵 二聲 月 順 ൬ 書音 益 歌 没曷 狎鎋 齊肴 平歌 昔洽 入痕 部第分 箾 錫狎 聲第 東五 乏辟 皆豪 聲戈 銳, 麻 解, **屬業 八十 冬部**{ 近 末 均 灰入 蒸麻 力 因 而 入聲 登魚 黠 辨 其 支 第乏 部四 鍾魚 表, 以 後, 十屬 職部 江虞 聲藥 之處 自 鎋 文 乃 喉 反 辨 然足 薛 六第 徳元 第模 質五 贻模 分 類一 切 亢 術平 入入 部八 屬寒 十第 古 鼻 始

小學 志第 七

豧

顧

炎

武

ŽĽ

永二家部分之未備

阜孔廣森撝

約

自

以

生

陳

第

顧

炎武

之

以 牽强 旁以諧衆聲雖偏引六經諸子之韵語而字終不能盡也乃卽偏旁之見于詩者而 陽九部之大綱轉陽轉陰五方之殊音旁引博證於嚮之不可得韵者皆一以貫之無, 之屬合之屬是爲陰聲者九陰陽相配可以對惡自謂『獨抱遺經研求豁悟分陰分之屬合之屬是爲陰聲者九陰陽相配可以對惡自謂『獨抱遺經研求豁悟分陰分 伏犧之為 武之好學不倦而稽古有餘審音或滯江永復過信字母奉若科律段孔以降含隱不 選詩聲類分十八部日元之園耕之園眞之園陽之園東之園冬之屬侵之屬蒸之 也若 一些之爲篤陳之如田姪之讀徒結切……古音舌上歸舌頭之證也然後宮商有準 獨嘉定錢 正; 而 疑滯 之屬是爲陽聲者九日歌之屬支之屬脂之屬魚之屬侯之屬幽之屬腎之屬之 識 所指歸; 其整次五音必本字母舊云 知聲者從其偏旁而類之者也文字雖多類其偏旁不過數百苟不知推偏 庖犧佛之如 D\_\_\_ 也大抵清儒治音竺志于 大听幸楣 而据段玉裁六書音均 弼繁之如鞶敷之如 差次古今乃知舌上古歸舌頭輕唇古讀重唇扶服之爲匍 雙聲而清之學者多精言韻雙聲罕究雖以顧 表折衷諸家疏通證明即廣韵以爲抵指毛詩 古而前修未密後出轉精發明對 布, 古讀 輕唇 如 軍 唇之證也中 |轉孔氏尤指 Z 如 炎 殊 類

頭輕唇歸 陽聲相配之可以對轉而不 推究孔氏未發之指作古音娘日二紐歸泥說古雙聲說以究明錢氏未盡之蘊具見 舍顧炎武莫屬雖有損益百世可知也近儒餘杭章炳麟太炎又以爲孔廣森知陰 風從律斯則淸儒之治古音者定韵莫察乎孔廣森審母莫辨乎錢大盺而有開必 重唇而不知古音舌上娘母牛齒日冊之並歸舌頭泥母於是作成均圖 知陰陽聲同列之亦可旁轉錢大脈知古音之舌上歸舌 以

國政論衡亦可謂潛心古音獨闡新義者也聲的明而后言訓詁。 字有意義也訓詁之書莫古爾雅大戴禮孔子三朝記稱孔子教魯哀公學爾雅, 有翻譯則能使胡越如比鄰有訓詁則能使古今爲旦暮詰者古今之異言訓者謂 時有古今猶地有東西南北相隔遠則言語不通矣地遠則有翻譯時遠則有訓

訓爾

雅之來遠矣然不云爾雅為誰作據魏清河張揖稚讓進廣雅表稱周公著爾雅 **今俗所傳三卷或言仲尼所增或言子夏所益** 皆解家所說疑莫能明也謂之爾雅者爾近雅正也正者處夏商周建都之地之正言 或言叔孫通所補或言沛郡梁文所考

也近正者各國近於王都之正言也語言因地域而殊文字又隨語言而 異學者舉今

小學志第七

辨同實 也大戴禮小辨篇 īfī 訓詁 釋五 揚雄子雲方言以爲孔子門徒解釋六藝會稽王充仲任論衡亦以爲 水釋草釋木釋蟲釋魚釋鳥釋獸釋畜十九篇漢 以尸子者有取莊子列子者有 成國之釋名八卷厥爲後來言訓詁者所宗焉然余考漢書藝文志及揚雄傳備載雄 傳杜林有蒼頡故具載漢書藝文志今其書皆不傳惟揚雄之方言十三卷, 今 以 權奧漢人解經書有大小夏侯解故詩有魯故齊后氏故齊孫氏故韓故毛詩故 《釋占語》 語 呵 經者不及十之三四今觀其文有取 以辨異同 執 而 而 殊號 禮 叫 者, 知, 引方言 而廣見聞 詔 」者也儿釋詁釋言釋訓釋親釋宮釋器釋樂釋天釋地釋丘 相 爾雅以觀於古足以辨言。 子所雅言詩書執 以證雅言猶之殊語之互相翻譯班固謂 禮儀, 寧祇 亦 依 (雅言稱) 爲 取國語者有取楚辭者; 解經作哉以隸經部實爲不 證, 禮。 二雅言 Ш 而 山海經者之 不 爲 <u>\_\_</u> 故曰: 俚俗也小雅大雅者皆周詩之正言 初經始萌芽爾雅嘗立博士故蜀郡, 有取穆天子傳者, 1 爾雅 詩讀 大抵採周秦諸子傳記之名義 (書從周· 倫 者所以總絕代之離詞, 古 他是蓋· 之正言不 文讀 五 有取管子者有 H 經之訓故然 kin ; 代訓詁 北 爾 釋山 ·為魯之 雅故解 海 劉 學

爾雅釋詁了 悉著於篇其自易書詩三禮三傳經師之訓論語孟子鴻烈法言之注楚辭漢賦之解, 之鈴鍵學覽者之潭奧摛翰者之華苑也魏明帝時博士張揖繼兩漢經師之後參考 諧推論稱名辨物之意而去古未遠可以推見古音古器物之遺誠九流之津涉六藝 不言揚雄至漢末應劭撰風俗通義序始稱雄作疑依托也然據方語以釋雅言, 之著書不及方言 讖諱之記倉頡訓纂滂喜方言說文之說靡所不採然後周秦兩漢古義之傳於後者, **井爾雅方言說名三書驂駕而駟矣後之言訓詁者胥崇爲不祧之祖焉漢魏之世注** 往籍偏記所聞凡萬七千三百二十六字撰廣雅七卷分別部居依乎爾雅凡所不載, 可據以證得失而其散逸不傳者亦藉以闚端緒曰廣雅者云廣爾雅所未及也斯蓋 異聞薈萃舊說考方國之語采謠俗之志錯綜獎孫博關摹言事有隱豫授据徵之如 者十餘家可考見者犍爲文學注二卷劉歆注三卷樊光注六卷李巡注三卷孫 一卷五 釋古今異言通方俗殊語』之例相合至劉熙釋名從音求義 家而已顧晉著作郎河東郭樸景純者獨以諸家紛謬多未詳備乃綴集 字而許慎說文解字引雄說皆不見於方言其義訓用方言者义 以同聲相 **正典** 

小學志第七

今未 縣 惟 林侍講學士 後 傳今傳者所撰塊雅二十卷中釋魚三卷釋獸三卷釋鳥四卷釋蟲三卷釋馬一卷釋 此 聲務求其得名之所以然又推而通貫諸經曲證旁稽假物理以明其義其所援引多 獨 篇, 人 逡 不 陸 其 有 初 樵以博洽傲脱一時及其既也乃肆作聰明監誤毛鄭其詩辨妄一書開數百年杜 崃 卷釋草四卷釋天二 得以咎昺也宋儒之治爾雅者不尠神宗時有山陰陸佃農師者亦注爾雅書不 元朗德明經典釋文者雖多所遺漏然疏家之體惟明本注注所未及例不旁搜; 引證尸子廣澤篇仁意篇則非今人所及睹至犍爲文學樊光李巡之注見唐吳 雖迭為補 莆田鄭樵漁仲者撰爾雅注三卷爲世所重蓋南宋諸儒大抵崇義理而疏考證 名物性門類 見之書其推闡名理亦往往精鑿佃先以神宗召對言及物性因進說魚說木二 大東 濟陰邢昺叔明于眞宗時奉敕爲 稱詩「到我周王」稱逸詩所見尚多古本蓋去漢未遠也注多可據, 正然宏綱大指終不出其範疇也自是璞注行而諸家悉廢其後宋翰 《後註爾雅》 一卷其釋諸物大抵略于形狀者詳于名義尋究偏旁比附 更撰此書易名埤雅言爲爾雅之輔也迨宋之南渡高宗 璞注作疏多掇拾毛詩正義掩爲己說 形

哉其說以爲聯二爲一駢異爲同故名曰駢雅云迨淸輿樸學旣章古訓是式言精 埠欝儀者號博極羣書刺取古書交句典與者撰駢雅七卷依爾雅體例分章訓釋自 文舉則檢古字代入之一舉筆 膏 解別自名家者也元明之儒 其音釋則元洪焱祖作也焱祖字潛夫亦歙縣人斯並于爾雅郭注那疏之外級獲新 中分草木鳥獸蟲魚六類大致與陸佃埤雅相類而引据精博體例謹嚴則遠在其上。 諸 撰 爾雅厥有餘姚邵晉涵二雲之爾雅正義二十卷休寧戴震東原之爾雅文字考十卷, 釋計釋訓以至蟲魚鳥獸凡二十篇務求博洽少泛濫矣然奇文辟字搜輯良多擷其 嘉定錢玷獻之之爾雅古義二卷爾雅釋地四篇注一卷棲霞郝懿行恂九之爾雅義 腴 說經之捷徑爲通儒之所深非惟作是書乃通其所可通闕其所不可通駁正舊 九卷歸安嚴元昭九能之爾雅匡名十九卷仁和翟灏晴江之爾雅補郭二卷臨 皆極 于詞章要不爲無補也嘗見貌爲漢魏文者取駢雅置案頭署其簽曰代字術作 精確, 于說爾雅家爲善本孝宗時有歙縣羅願存齋者撰爾雅翼二十二卷 于訓詁學實疏故罕以訓詁成一 丽 文不懈入古矣此實文家之詞書寧日爾雅之支裔 家言者獨明宗室朱謀

小學志第七

前 桂 起 是篇用補其闕疑於義者以聲求之疑於聲者以義正之。」斯則曉音韻轉變之友紀, 爲之疏通證明者也震义作轉語二十章其自述曰『人之語言萬變而聲氣之徼有 宗乃採十三經注疏說文釋名諸書以補揚雄方言之遺成續方言二 語未清者展轉譌溷必各如其位昔人旣作爾雅方言釋名余以爲猶闕一卷書剏爲 自然之節限是故六書依聲托事假借相禪其用至博操之至約五方之言及小兒學自然之節限是故六書依聲托事假借相禪其用至博操之至約五方之言及小兒學 而通方言之指歸者矣善哉非耳順者孰能與於此乎轉語書佚不傳仁和杭世駿大 復合斯爲貴也嘉定錢大肵莘楣知古今方音不相遠及其作恆言錄沾沾獨取史傳 語筆札常文所不能悉因以察其聲音條貫上稽爾雅方言說文諸書敫然如析符之 依爾雅蒐羅古義亦碑訓詁然撮錄字書不麗今語而不知考方言者在求其難通之 爲徵亡由闚見聲音文字之本柢而霍瀬之爲通俗篇雖略及訓詁亦多本唐宋以後 **於啓瑞翰臣之爾雅經注集證三卷鹽城陳玉樹惕庵之爾雅釋例五卷斯並補苴** 哲朋發滯義闡郭注之未備糾邢疏之違悟而循文順理張其幽眇郝疏最優發凡 例觀其會通陳釋尤勝若其究宣方言有戴震之方言疏證十三卷乃依揚雄書而 一卷前後類次一

形體就古 漢魏之訓詁而通以戴君之轉語略籀今語得其處理撰新方言十一卷凡釋詞 釋名之學者則有吳縣江聲艮庭之譔釋名疏證續釋名焉治廣雅之學者則有高郵 者雖日不暇給慮有遺剩剏始之業規模已閔所謂知化窮冥無得而稱者也其他治; 唐韵者有數字同從一聲唐韵已來一字轉變餘字則猶在本部而俗語或從之俱變 釋親屬釋形體釋宮釋器釋天釋地釋植物釋動物而殿以音表得十一篇方俗異語 所補父子相嬗以成一家之言尤爲殫精竭慮念孫謂『訓詁之旨本於聲音故有聲 有誦讀占畢之聲旣用唐韵俗語猶不違古音者有通語旣用今音一鄉一 **撫拾略備以今音證古音參伍考驗經之對轉迤轉緯之正紐旁紐以窮聲轉之原蓋** 之嚴則一絲不亂其或張揖誤採博考以證其失先儒誤說參酌而寤其非蓋念孫藉 同字異聲近義同雖或類聚羣分實亦同調共貫。 王念孫懷祖之譔廣雅疏證焉惟廣雅疏證二十三卷其第十卷爲念孫子引之伯申 雜書於古訓貌然亡麗間撮一二亦溷不由析也獨近儒餘杭章炳麟太炎能食 音以求古義引伸觸類擴充於爾雅說文之外無所不達然聲音文字部分 <u>\_\_</u> 因暢斯旨撰廣雅疏證一 州猶不違 書不限

小學 志第七

引之曰 「 **張揖之書以抒獨得實多揖所不及知者念孫旣持「詁訓本於聲音」之論以詔其子** 字之聲同聲近者經傳往往假借學者以聲求義破其假借之字而論本字,

則渙然冰釋如因假借之字而强爲之解則結觸爲病矣故毛公詩傳多易假借之字 而訓以本字已開改讀之先至康成箋詩注禮屢云『某讀爲某』而假借之例大明。

訓雖別爲之說亦無不可必專守一家則爲何劭公之墨守而已。」故其治經也諸說 後人 傳注不皆合於經則擇其合者從之其皆不合則以己意逆經意而參之他經證以成 或病 康成破字者不知古字之多假借也」又曰『說經者期得經意而已前

並列則求其是字有段借則改其讀蓋熟於漢學門戶而不囿於漢學之藩籬也引之 推廣庭訓途成經義述聞十五卷經傳釋詞十卷精博無比而經傳釋詞之作則尤往

有 發明獨爾雅說文二書解說古聖賢經傳之詞氣最爲近古然說文惟解『方』『 經師之所未曾有蓋經傳中實字易訓虛詞難釋顏氏家訓雖有音辭篇於古訓罕

不免何況其餘念孫貫通經訓尤明詞氣而引之克世其學於前人之誤解者獨能旁 諸特造之字而不解『而』「雖」等假借之字爾雅所釋未全讀者多誤毛鄭

引 生見之亦必曰『吾言固 曲 喩 以得本恉所在使人頤解心折歎爲確不可易而又百思不能到使占聖賢復 如是沿誤數千年而今乃得明矣』此誠不 可不開之與変!

錢大脈序其書曰『有文字而後有訓詁有訓詁而後有義理詁訓者義理所由出非 與邵晉涵王念孫友逮聞前訓徵引羣 儀徵阮元芸臺讀其書謂『恨不能起毛鄭孔諸儒而 書選經籍纂計百六十卷集占今計訓之大成。 共證此快論 一者也阮元早歲

别 有義理出於計訓之外者也。」 旨故言乎籍小學志第七。 .-6/4

.

三五三